

**VITA ET
DOCTRINA JESU
CHRISTI, EX
QUATUOR
EVANGELISTIS...**





VITA ET DOCTRINA

J E S U

CHRISTI,

EX QUATHOR EVANGELISTIS

COLLECTA,

ET

IN MEDITATIONUM
MATERIAM

AD SINGULOS TOTIUS ANNIDIES

DISTRIBUTA,

Per

R. P. NICOLAUM AVANCINUM

SOCIETATIS JESU.

Denuò edita.

12.4.9.12



3

TYRNAVIA,

TYPIS ACADEM. SOCIET. JESU, 1751.

APPROBATIO.

EGO FRANCISCUS PIZZONI, Societatis JESU per Provinciam Austriæ Præpositus Provincialis, facta mihi potestate ab Admodum R. P. N. JOANNE PAULO OLIVA Præposito Generali, facultatem concedo, ut *Vita, & Doctrina Christi*, à P. NICOLAO AVANGINO Societatis nostræ Sacerdote, *in singulos totius anni dies ad meditandum disposita*, & ab aliquot ejusdem Societatis Patribus, ad id deputatis, revisa & approbata, typis mandetur. In cujus rei fidem has litteras manu mea subscriptas, & officii sigillo munitas dedi. Viennæ Austriæ 7. Januarii, Anno 1665.



FRANCISCUS PIZZONI,
m. p.

AD
RR. P A T R E S
ET
FRATRES SOC. JESU
PROVINCIAE AUSTRIÆ.



Vitam JESU CHRISTI, quam in singulas totius anni hebdomadas, & dies ad meditandum digessi, vobis dedico RR. Patres, Fratresque charissimi. Quidquid de me præsumptionis, aut arrogantiae concipi posset, uno verbo diluo: ita jubeor. Existimabant illi, quibus unà curæ sumus, laborem hunc vestris usibus servitutum; volebantque vel labores vestros sublevatos, quibus quandoque non sine tædio, meditandi materiam per varios effusi Auctores, veluti panem quotidianum mendicabatis: vel vitam JESU formatam in vobis, quorum professio est contentiosa ejusdem imitatio. Placent diversis diversa: iis tamen, qui se JESU Socios non inani nomine profitentur, placere ea debent, quæ sunt JESU CHRISTI; ut assidua meditatione in ejus vitam, doctrinamque intuentes, in eandem imaginem transformentur. Non damno eos, qui aliunde mentalis orationis quasdam sibi materias congerunt, & quandoque psalmum, aut alium Scripturæ locum expendunt; sed eos non probō, qui vitam, doctrinamque JESU sterilem arbitrati, omnino rejiciunt. Eligunt enim sibi cisternas, quæ aquam sitienti animæ suffecturam continere non possunt, & fontem aquæ vivæ derelinquunt. Nam, quamvis multi extra vitam CHRISTI, & doctrinam, quæ

splendent, & intellectum pascant, reperire possis; quod tamen voluntatem afficiat magis; & calidos excitez animorum motus, aptum magis, idoneumque reperiens nihil, quàm vitam, doctrinam, passionem, & mortem **CHRISTI JESU**; dummodo fidei defectu non labores. Hæc est vastissimus juxta, ac dulcissimus omnium sanctarum affectionum Oceanus, in quo anima felicissima navigatione ad omnem perfectionem progreditur; dum vel documenta legit, vel exempla inspicit; & simul avida quadam voluntate ad eorum amplexum, ad horum imitationem contendit. Atque hinc Sanctissimus Patriarcha noster **IGNATIUS** peroptabat ardentem, ut omnis suorum sequacium vita in meditatione Vitæ, & Doctrinæ **JESU CHRISTI** absumeretur. Cum igitur, & tanti Parentis exemplò, & institutò vestrò contendatis assimilari, & imitari Creatorem, ac Dominum nostrum **JESUM CHRISTUM**, ejusque vestibus, & insignibus indui: confido non ingratum vobis futurum, quod in hunc finem, Majorum adactus imperio, attentavi. Operæ verò id pretium ego postulo, ut, cum ad intellectus lumina, & ad voluntatis affectus desint quàm plurima, ea vos suavissimo Spiritus Sancti ductu suppleatis.

Vester omnium in Christo servus infimus

NICOLAUS AVANCINUS.

AD LECTOREM RELIGIOSUM.



Economiam totius opusculi paucis accipe. Adventûs temporis ea attribuo, quæ Incarnationem, & Conceptionem DEI Filii contingunt. A Nativitate Domini ad Dominicam Septuagesimæ ea complector, quæ sunt Infantia, & Pueritiæ Christi. Hinc usque ad Pascha, ut temporis serviam, Passionem expendo. Tum ad Pentecosten, & Octavam Corporis Christi, quæ sunt ejusdem temporis. Denique per octiduum expensis DEI attributis, reliquam Christi vitam, miracula, parabolas, & doctrinam, ordine ferè quatuor Evangeliorum persequor.

Ne verò materia unquam deficeret, summum, quod est cujusque temporis, accepi: adeoque Adventui

quatuor, tempori post Epiphaniam
sex, post Pentecosten viginti octo
integras hebdomadas assignavi.

Non adjicio meditandi metho-
dum, quam vel passim habes, vel ex
ipsis S. Patris nostri Exercitiis facilè
addidiceris. Placuit tamen iis, qui
hoc opus demandârunt, ut affectuum
quorundam formulas suggererem. Ho-
rum ut obtemperem voluntati, pri-
mùm tibi tria affectuum alphabeta,
juxta tres perfectionis Religiosæ vias
digesta, exhibeo, quorum familiarem
usum, sanè fructuosum, sum expertus:
deinde verò eorum, qui in quaque
via sunt præcipui, exempla aliqua
subjiciam.



FORMULÆ ALIQUÆ AFFECTUUM.



Uin voluntas naturâ cæca sit, nec in ullum affectum erumpat, nisi præviis eam intellectus manuducat, necessarium omnino erit ad fructuosam meditationem persuasissimam tibi reddas veritatem aliquam practicam, quam sive ex verbis, & doctrina, sive ex facto, & exemplo Christi cruxisti. Idque rationibus quidem etiam naturalibus, potissimum tamen, ac principaliter actu fidei supernaturalis; qui est principium non tantum practicarum conclusionum in intellectu, sed etiam motuum omnium, & affectuum supernaturalium in voluntate.

AFFECTUS VIRTUTUM THEOLOGICARUM.

Fides. Credo, Domine; credo. Tu adjuva incredulitatem meam. Suggestit alia mundus, caro, dæmon: non credo. Verbum tuum manet in æternum. Pro hoc exige à me Domine sanguinem, exige spiritum: ecce paratum cor meum Deus, paratum cor meum. Mille gladiis, ignibus, rotis exhibebo hoc corpus, ut tua stet illæsa veritas.

2. Quis me separabit ab hac veritate? Certus sum, quod nec gladii, nec cruces, nec tela, nec ignes, nec inferorum tormenta me poterunt ab ea separare. Tua veritas Deus fallere non potest, tua sapientia falli non valet. Tu dixisti: Satis hoc mihi est præ omni ratione humana, ut etiam sanguine subscribam.

Spes. Quare tristis es anima mea, & quare conturbas me? Habes bonitatem Dei, & misericordiam paratam, quæ vult; habes omnipotentiam assistentem, quæ potest opitulari: habes sanguinem, & merita Christi,

quæ pro te apud æternum Patrem perorant. Projice te ergo anima mea in brachia misericordiæ, & omnipotentia Dei. Quàm nihil potes ex te, tam omnia potes in eo, qui te confortat.

2. In te Domine speravi, & quis mundi impetus, quæ carnis illecebra, quæ dæmonum astutia prævaleret? non, non confundar in æternum. In te Domine speravi: quod vitium non extirpabo? quam virtutem gratiâ tuâ non assequar? &c. Dicant omnia ossa mea: tu es spes mea, Deus meus in æternum.

3. Si Deus pro me, quis contra me? Si exsurgant adversum me castra, non timebit cor meum. Si confurgat adversum me prælium, in hoc ego sperabo, quia scit infinita sapientia, potest infinita omnipotentia, vult infinita bonitas mihi auxiliari.

Charitas. Domine tunc scis, quia amo te: quoniam tu solus bonus, tu solus sanctus, tu solus dignus omnium creaturarum amore. Supplete vos, ardentia Cherubin, tu ardentior Cherubinis Virgo, quidquid deest amori meo. O vivam! ô moriar amori tuo. Moriar potius, quàm te non amem.

2. Domine, quid mihi est in cælo, & à te quid volui super terram? Tu solus Deus cordis mei, & pars mea Deus in æternum. Diligam te Domine, non quia mihi beneficus, aut remunerator liberalissimus; sed quia in te ipso es summa, & infinita bonitas, sola, & una super omnia amabilis. Moriar Domine hoc momento, quo te amo, priusquam succedat aliud, quo te non amem.

3. Exigis à me cor meum Domine: O si mille: ô si infinita haberem, omnia tui unius amore occuparem. Vis amorem operibus experiri? confunde me, contunde me, contere me, in infernum demerge me; non dimittam te, &c.

4. Serò te amavi pulchritudo mea tam nova, & tam antiqua: serò te amavi. Sed neque nunc te amo, ut debeo, neque amo, ut amare desidero. Infinites, infinites te amare vellem, eoque amore, si fieri posset, quò te ipsum amas; quia hic solus amor tuam amabilitatem æquat, &c.

ALPHA.

ALPHABETUM AFFECTUUM PRO VIA PURGATIVA.

Abjectio sui ad pedes
Jesu.

Abjuratio imperfectionis.

Communicatio cum Deo.

Accusatio tui.

Admiratio patientiæ Di-
vinæ.

Angor de culpa.

Contemptus mundano-

Contritio. (rum.

Deprecatio.

Desiderium satisfaciendi.

Defflatio.

Diffidentia sui.

Exhortatio sui ipsius.

Exprobratio.

Fiducia.

Gratiæ imploratio.

Gratitudo.

Humiliatio, & annihilatio
tui.

Indignatio.

Comparatio tui cum San-
ctis, damnatis, dæmo-
nibus, &c.

Confessio humilis.

Confusio tui.

Invocatio Sanctorum.

Lamentatio ad Deum, &
Sanctos.

Mendicatio spiritualis à
Deo, & Sanctis.

Odium tui, & culpæ.

Pavor.

Propositum.

Querelæ cum Deo, San-
ctis, & creaturis.

Reprehensio.

Sollicitudo.

Timor iræ Divinæ.

Vindicta in teipsum.

EXEMPLA AFFECTUUM PRO VIA PURGATIVA.

Abjectio. Deprime sub pedes Dei tui superbum ca-
put, vilis creatura. Ah! etiamnum superbis? In-
digna es, quam suis pedibus dignetur Jesus tuus.
Conculcent te damnati omnes, ac ipsi dæmones, quo-
rum tu iniquitates es supergressa, &c.

Accusatio. Fateor enim, & ut reus memetipsum
accuso: ego te summum & inestimabile bonum, ac
infinitam dignitatem vilipendi. Quis ego? quis tu?
ego Filium tuum crucifixi, & occidi! ego sanguinem
ejus, & infinita merita proculcavi, &c.

Admiratio. O cæcitas mea! ô imprudentia! ô au-
dacia! servus nequam tam bonum Dominum, tam in-

dignè tractare potui ! ô bonitas tua Deus ! ô patientia incredibilis ! ô misericordia infinita ! tu non ferre tantum delinquentem , sed novis etiam beneficiis cumulare potuisti ?

Communicatio cum Deo. Quot tu , justissime Deus , minorum scelerum reos in momento ad infernum precipitasti ? Angelos , tam excellentes creaturas ad unius duntaxat cogitationis consensum in ignem æternum detrusisti : mihi ut parceres , ut dissimulares , quid te movit ? An quidquam totius vitæ decursu præstiti , quod oculis Divinæ tuæ Majestatis placere potuerit ?

Confusio. Averte oculos tuos à me Domine ; quia indignus sum , in quem respicias , postquam me ad tantam vilitatem abjeci , quem tu ad tantam dignitatem creasti . Confusio cooperuit faciem meam , quia repleta est malis anima mea , quæ purissimum Dei oculum meritò avertunt à me .

Contemptus mundanorum. Si habuero omnem substantiam hujus mundi , nihil sum . Nihil est honor , nihil æstimatio , & gloria , nihil opes & divitiæ , nihil omnis voluptas . E nihilo ducta in nihilum eunt : apparent , & evanescent . Solus Deus est omnia ; reliqua amore meo indigna .

Contritio. Deus meus , summa bonitas , omnium creaturarum , tuoque ipsius amore sola , & infinitè digna ; doleo , quòd tam impudenter te offenderim , doleo , non quia timeo , sed quia amo . Si sanguine meo fieri possit , ut non sis offensus ; ecce me , discerpe me , paratum cor meum . Si tormentis inferorum deleri possit ; ecce me : nullum est , quod non merui ; nullum , quod amorè tui non præligo peccato , quod tantopere odisti . Si vides , qui omnia vides , quod aliquando , post quotquot annos , te offensurus sim , hoc potiùs momentò acerbissima morte me tolle , quàm permittas ad infelicissimum illud tempus supervivere .

Deprecatio. Obsecro te æternæ Patris . per misericordiam tuam infinitam ! te Fili unigenite , per tuum in peccatores amorem ; te Spiritus Sancte , per tuam benignitatem ! te Ss. Trinitas , per sanguinem , & merita Christi ,

Christi, parce, parce misero peccatori. Amplius crucifixe Jesu, amplius lava me, vel unicâ guttulâ tui sanguinis, à peccatis meis. Adgeniculor Cruci tuæ, & indignus licet, expecto misericordiam tuam.

Diffidentia sui. Vide Domine infirmitatem meam; quia nihil possum finè te, nec invocare te. Ne desere me, quia labor finè te.

Exhortatio sui ipsius. Erige te anima mea de cœno peccatorum, in quo jaces. Aude aliquando aggredi, quod vanè metuis. Deus porrigit manum; tu tuam exere, apprehende auxilium. Quid hæres? quid dubitas? fortior est, qui te juvat, quàm qui te tentat.

Exprobratio. Quæ tua est impudentia, tam tenerè te amantem Deum, tui amore in Cruce morientem, tam indignè tractare? & odia illi indicere, à quo amores, favorésque recipis? Hoccine meruit, qui te ad se creavit, ut ei cum tanto contemptu tergum verteres. Hoc, qui te toties recepit, & etiamnum expansa habet in Cruce brachia ad te amplectendum, ut tu stercora, & mundi quisquilias, suúmque hostem amplectaris; &c.

Fiducia. Deus meus, auxiliator meus, in te confido, non erubescam. Si consistant adversum me castra tentationum, non timebit cor meum, quia tu es Protector meus: si exurgat adversum me prælium, in te ego sperabo, quia tu es Deus meus.

Gratitudo. Gratias tibi ago Deus meus, quòd peccantem me, & non pœnitentem, hucusque conservaveris, neque statim meritis pœnis addixeris, otiumque dederis animæ meæ calamitatem agnoscendi, ac detestandi, quod mille aliis non concessisti, quos priùs mors, & æterna damnatio occupavit, quàm præstare id possent.

Humiliatio. Agnosco vilitatem meam, Deus infinitæ Majestatis. Infra nihilum descendi, quia te offendi. Et mereor, & volo ab omnibus contemni, & vilipendi. Volo non expectare tantùm, sed quærere, & ambire contemptûs mei occasiones. Confirma hanc voluntatem meam, pro me toties despecte Jesu.

Invocatio Sanctorum. Indignus sum, qui accedam ad thronum misericordiæ Dei, quam impudentissimè despe-

despexi. Tu unica & potens peccatorum advocata ; Dei Mater Maria , quæ nullum in te confidentem despicias , ostende pro me Filio tuo ubera , quibus cum lactasti ; & per merita tua impetra mihi à justissimè irato Deo misericordiam. Tu Angele mi Tutelaris , cui curæ sum ab infantia , per gaudium illud , quod habes super uno peccatore pœnitentiam agente ; vos SS. N. N. Patroni mei , &c.

Mendicatio spiritualis à Sanctis Dei. Sancta, & Immaculata Dei Mater, quæ quantum amasti Filium tuum, tantum odisti peccatum ; vide generis humani (vel hujus hominis N.) calamitatem ; infunde aliquid amoris tui cordi illius , ut sciat , ac velit reprobare malum , & eligere bonum. Sancti Angeli Dei , qui primi tentanti Angelo constanter resististis , aliquid constantiæ vestræ hujus tentationibus suggerite. S. Petre , qui unum peccatum toto vitæ tempore incessanter deplorasti ; aliquid pœnitudinis , & lachrymarum huic indulge , &c.

Odium sui. Quis me liberabit de corpore mortis hujus ? quid queror æterna ? ego mihi ruinæ , & calamitatis meæ sum causa. Fictum hostem culpo , & vero blandior ? Ego sum ipse , qui occidi me , dum amavi me. Sed teneo hostem meum ; non dimittam , nisi occidam eum. Moriatur sensus , vivat ratio ; moriatur author mortis animæ meæ , vivat author vitæ animæ meæ Jesus. Ut semper me oderim , semper amabo Deum meum.

Propositum. Nondum usque ad sanguinem decertavi cum hostibus animæ meæ ; sed abnunc , si necessarium sit , totum sanguinem ad ultimam usque guttam lubens , gaudensque impendam potius , quam delinquam. Sic statuam coram Jesu meo pro me crucifixo. Moriar millies , ne semel peccem.

Reprehensio sui. Et ausus tu es tantâ in Deum impudentiâ ? quis tu ? quis Deus ? & quid ausus es ? ô creaturarum ingrattissima ! tam parvi tibi est Deus ! tam magni tibi ipsa , aut modica tui sensûs delectatio ?

Timor. Timor , & tremor venerunt super me , quia irritavi iram tuam Domine. Quò fugiam à facie iræ tuæ ? quando undique tu me circumstas , & quem Patrem habere

bere nolui, strictissimum Judicem meorum scelerum formido. O Domine ne intres in iudicium cum servo tuo.

Hæc pauca exemplum affectuum pro via purgativa sufficiant, quæ licet proportionem quadam facili ad viam illuminativam trahere possis, libet tamen & hujus viæ alphabetum suggerere, & pauca exempla adnectere.

ALPHABETUM AFFECTUUM PRO VIA ILLUMINATIVA.

A Mor proximi.
Animatio sui ad studium virtutis.

Benignitas.

Bonitas.

Contemptus mundi.

Conversatio.

Curiositas spiritualis, quærens per Sanctos in cælo varia virtutis alicujus exercitia.

Eleemosyna spiritualis, petita à Sanctis pro se, & aliis.

Expostulatio pia cum Deo, & Sanctis.

Fortitudo in adversis.

Gratiæ petitio.

Gratiarum actio.

Humilitas.

Imitandi desiderium.

Intentio gloriæ Dei.

Laus Sanctorum.

Longanimitas.

Mortificatio corporis.

Nitor conscientiæ.

Obedientia.

Patientia.

Paupertas.

Præsentia Dei.

Suavitas.

Tranquillitas.

Veritas.

Zelus animarum.

EXEMPLA AFFECTUUM PRO VIA ILLUMINATIVA.

A Mor proximi. Te Deus in meo proximo, & proximum propter te diligo, sicut me. Tu me exemplo magis, quàm verbis hoc docuisti: qui cum inimici essemus. dilexisti nos: qui perditos nos quæsiisti, & attraxisti miserans. Quem oderim, dum tu omnes amas? quem despiciam, dum tu bonis, & malis pretium tui sanguinis impendis?

Benignitas. Obstupesco tuam Jesu mi benignitatem! quàm benevolè ad te revertentes peccatores excipis! quàm amanter alloqueris! quàm tenerè amplecteris!

ris ! & sine exprobratione omnia restituis bona , quibus per peccatum fuerant spoliati. Hic te sequar mi Jesu, tuorum mihi incumbet cura , amabo etiam delinquentes , ut reducam ; compatiar calamitati animæ , tractabo vulnera leniter , in modo , in gestu , in vultu , in verbis , ut merus animi amor appareat.

Bonitas. Tua ad benefaciendum propensio , bone Jesu, mea est in omnes proximos agendi regula. Innumera nobis dona , sanguinem tuum , merita , gratias , te ipsum elargiris ; neque majoribus tantum , aut iis , qui te reverentur , & amant , dignosque se præstant , sed vilibus etiam , te ignorantibus , demerentibus , contemnentibus. Trahit me tam suave exemplum , ut me impendam omnibus , & super impendam , nemo mihi vilis , nemo mea indignus ope ; quia nemo tua.

Contemptus mundi. Tu non es de hoc mundo amabilissime Jesu : tua desideria , affectus , vota , spes , prosecutiones non tendunt in honores , gloriam , existimationem , laudes , applausus. Delirium meum est , si eò tendam , unde tu sapientia Patris abhorres. Quia nihil sunt , indigna sunt eo corde , quod non satiatur , nisi Deo.

Conversatio. In terris visus , & cum hominibus conversatus es , Domine Jesu , prudenter , & circumspectè , ut non offenderes ; suaviter , & urbanè , ut animos traheres ; utiliter , & salubriter , ut prodesse iis , quibuscum versaberis. O si & ego prodesse intenderem ! quàm cohiberem affectus meos ? quàm cavere errores ? quàm abstinere asperis , & acerbis , frivolis & vanis , & quandoque noxiis sermonibus ? Semel juravi ; aut obmutescam , aut sana loquar.

Fortitudo in adversis. Omnia possum in eo , qui me confortat ; non ego , sed gratia Dei mecum. Non mihi innitor , sed potentia Patris , quæ cannas erigit in columnas ; sapientia Filii , quæ modos , viasque eluctandi habet infinitas ; gratia Spiritûs Sancti , quæ facit aspera in vias planas. In Deo meo transgrediar muros.

Humilitas. O humilitas nascentis , viventis , morientisque Jesu mei ! Cùm in forma Dei esses , exin-

nivisti

nivisti temetipsum , abscondisti Divinitatis Majestatem , ne in te conflueret omnis honor , gloria , admiratio , applausus populorum. Ah serò licèt , tandem tamen eligo abjectus esse in domo Dei , in loco , & officio ; & hæc sit gloria mea.

Intentio gloriæ Dei. Non quæris gloriam tuam Domine Jesu , sed honorificas Patrem tuum , neque altiorē reperisti operum tuorum , tuæque passionis finem , Huc tua incarnatio , vita , mors , cogitationes , verba , opera , somnus , ac omnis respiratio tendebat. Trahe me post te. Quæram te , finè me , finè meo emolumento ; quæram te quotidie , quâvis horâ , quôvis momentò , quâvis respiratione : quæram purè , finè admixtione creaturæ , majorem tuam gloriam.

Longanimitas. Potes Deus momento plectere , quo peccat homo : sique id facias , justum est , & in æternum laudabile judicium tuum. Sed sustines tamen , longanimis , patiens , & multæ misericordiæ : sustines menses , & annos , & non expectas tantum , ut revertamur , sed revocas ad te , & attrahis miserans. Respicis Petrum , tangis cor Magdalenæ , adblandiris Judæ , &c. Egone vel me à te desertum querar ? vel spem alienæ conversionis deponam ! Aderis in tempore mihi : Expectabo te Domine , & non movebor. Aderis gratiâ tuâ peccatoribus : sustinebo , & quod meum est , operabor. Non erit inanis opera , quæ te imitatur.

Mortificatio corporis. Tota vita tua Jesu , continua fuit corporis afflictio. Poteras , cùm Deus esses , citra periculum , omnia corpori commoda indulgere. Non egebas hõc studiò ad corrigendam naturam , quæ nec vitata erat , nec vitari poterat : non ad subjiciendum corpus rationi , quod Divinitas moderabatur , ut non posset rebellare : & tamen in laboribus , & doloribus à Juventute tua vixisti , & expirasti. Est ergo amabile quiddam , quod tu elegisti. Quid agimus anime ? vitata tibi est natura , & in malum proclivis , rebellat rationi , inducit in peccata ; & adhuc ei blandieris , & , ut quàm minimum patiatur , studebis ? Imò conteratur caro mea , ut vivat spiritus. Ut tuus sim ,
carnem

carnem meam crucifigam cum vitiis , & concupiscentiis.

Nitor conscientia. Splendor sinè macula es Jesu mi ; munditia ab omni immunditia libera , perfecta & omnino immaculata. O quando potero & ego insultare , mundo , carni , & dæmoni ! Quis vestrum arguet me de peccato ? O quàm suavis dies , laborque omnis , quàm dulcis quies hominis , dum culpa non mordet animum ! quàm hilaris , felixque mors ejus , quem conscientia non aceusat ! At hoc solatium nemo alius , quàm tu ipse , impendere tibi potes. Malo ergo millies mori , quàm fœdari.

Obedientia. Omnia de te dixit , qui te amavit : Factus obediens usque ad mortem , mortem autem Crucis. Et tu obediens , Filius Dei , sapientia Patris , Dominus dominantium es ? & non Patri tantum , sed hominibus etiam sceleratis , & iniquis Judicibus , ac Carnificibus ? & usque ad mortem. O ferrum ego ? & indomitum saxum , si hœc exemplò non movear , ut iis obediam , & in omnibus , & semper , qui Patres sunt , qui vice Dei funguntur , quibus tuam in me potestatem tribuisti.

Patientia. Domine dirige cor meum in patientia Christi. Statutum est , aut pati , aut mori. Tu Jesu mi , quàm dura in corpore , quàm acerba in anima , quàm infamia in honore sustinuisti ? Tu idem Deus , & Homo : & ego unius puncturæ imaginatione percellar , minimâ infamiâ turbabor ? O Domine da , quòd pro te patiar , qui pro me passus es nefanda.

Paupertas. Domine Jesu , cùm esses dives , factus es pro me egenus ; ut non haberes , ubi caput tuum reclinares. O res à sæculis inaudita , pauper Deus. Et ego illis affigam animum , quæ Deus odit ? Ego pro Deo non relinquam latus , & hilaris mundi nugæ , qui pro me reliquit omnia regna mundi sibi jure debita , adeoque & cælum ipsum ?

Suavitas. Quàm suavis est Domine Spiritus tuus ! Præscribis leges , sed addis vires : cùm minimum facimus , tu plurimum præstas : aptas te singulis , nulli vim inferis :

infernus : paucissima exigis , cum plurima , & gravissima possis . Si erramus , nos revocas , & amanter trahis . Confundis asperitatem meam . Evincis omnino , ut in proximo meo excusem delicta , attendam fragilitatem , non plus exigam , quam ipse præstem : si quandoque sit severitas adhibenda , ea semper suavitate misceatur .

Tranquillitas. Quanta locuti sunt adversum te malignantes Domine Jesu ! tu factus es tanquam surdus , & mutus . Quantis impetitus es blasphemiiis ? at tu immotus stetisti , tanquam non haberes in ore tuo redargutiones : tenuitque semper animum imperturbata quies , tametsi fulmina excire potuisset . Cur ergo , si leviter tangor , erumpo in immoderatos , præcipitesque motus ? Respiciam in te Jesu mi ; & si famam , si vitam perdam , tranquillitatem servabo

Zelus animarum. Amabilissime Jesu , tu propter nos homines , & propter nostram salutem descendisti de cælo , quot hoc fine sustinuisti elementorum injurias ? quot suscepisti itinera ; quot labores , & dolores , quot mortes exantlasti : Effudisti te ad omnes , divites & pauperes , honoratos & abjectos , senes & pueros , in urbibus & pagis , in campis & desertis . die & nocte . Tanti tibi fuerunt animæ nostræ , quantus tuus sanguis , hunc enim pro illis dedisti . Nimis viles ego facio animas , si non ex æquo ad pauperes , abjectos , & pueros me effundo , pro quibus idem pretium datum est . Si pluvia , si nox , si longinquitas spaci , si quævis incommoditas me deterret . O animæ Christi sanguine redemptæ ! ô si omnes ! ô si vel unam meo sanguine , & acerbissima morte salvare possim !

Advertendum est , quod quemadmodum Via Illuminativa spectas doctrinam , proximique virtutis , ita respicias & Christum , velut normam , & absolutissimum exemplar virtutis . Quæ mihi ratio fuit , ut in singulis hujus vitæ affectibus motivum desumerem ab exemplo Christi .

ALPHABETUM AFFECTUUM PRO VIA UNITIVA.

Amicitia cum Deo.
Amplexus Dei.

Appreciatio Dei.
Aspiratio ad Deum.

B

Bea-

Beatitudo in Deo.
 Complacentia.
 Conformitas cum Deo.
 Desiderium Dei.
 Donatio sui Deo.
 Exaltatio Dei.
 Exultatio in Deo.
 Filiatio ad Deum.
 Fraternitas cum Christo.
 Gaudium in Deo.
 Gloriatio in Deo, & Christo.
 sto.

Imitatio Christi.
 Invitatio creaturarum.
 Languor animæ in Deo.
 Laudatio Dei.
 Mors in Deo.
 Narratio magnalium Dei.
 Oblatio sui.
 Pactum cum Deo.
 Quies in Deo.
 Respiratio in Deo.
 Vita in Deo.
 Unio cum Deo.

EXEMPLA AFFECTUUM PRO HAC VIA.

Amicitia cum Deo. Amas me, amo te, amor meus, Deus meus! Tu quod es, meus es: ego quod sum, tuus sum. Mergor in infinito tuo, tu in meo nihilo. Quia amas me, communicas te mihi: quia amo te, reddo me tibi, & te tibi, ô amor meus, unus & solus, electus ex millibus!

Amplexus Dei. Parce mei amoris audaciæ, Deus meus. Qui posuisti lævam sub capite meo, & dexterâ tuâ amplexaris me, intra tua brachia cogis me. In illa reverentissimè coniectus, & vivere volo, & mori desidero. Tu stringe me, nec permitte me separari à te.

Appreciatio Dei. O bonum inæstimabile Deus, & omnium desiderabilium finis! quia super omnia æstimo te, super omnia amo te. Deficit in tui pretii æstimatione intellectus meus, & sub imperio voluntatis, te infinita æstimatione appreciare desiderantis, fatiscit. Sit tibi satis Deus meus: amo te millies, & millies plùs quàm me, plùs quàm salutem animæ meæ, plùs quàm ipsam beatitudinem meam, & jucundissimum, æternúmque tui aspectum, amo te; & in hoc morior, amo te.

Aspiratio ad Deum. Ubi sum? ah jube me Domine venire ad te. Exeam à mundo, & ejus concupiscen-

piscentiis ; exeam à me ipso , ut nusquam sim , nisi in te. O quando erit felicissima illa hora , quâ mihi vel annuas , vel dicas : veni de Libano , veni ! Ecce me , respondebo , adsum : nec ullum me aliud votum , vel momento , retardabit.

Beatitudo in Deo. Deus meus , nondum video te revelata facie ; & tamen beatus sum , quia amo te. Nullum tormentum sentio , dum amo te ; quia solum tormentum mihi est , non amare te. Tu solus totum intellectum trahis , ut te unum possideat : tu solus omnem amoris mei vim exhauris.

Complacencia Dei. Tu es , qui es : & hoc unum mihi placet , quod es , qui es , infinite perfectus in sapientia , potentia , & bonitate. Non possum hoc exprimere , nisi verbis illius amantis : Si tu Deus esses Augustinus , & ego Augustinus essem Deus ; ego Deus vellem ; ut tu Augustinus esses Deus : ita mihi placet , ut tu sis tu.

Conformitas cum Deo. Amo te Deus meus. Satis dixi : voluntas mea jam tua est , & tua est mea. Vis me premi , abjici , contemni , torqueri , dilaniari ? volo & ego , quia tu vis. Vis me inter beatos ad tui fruitionem attollere ? volo : non quia limpidam , & innocentem hoc adfert voluptatem ? sed unicè , quia tu vis.

Desiderium Dei. Desiderium habeo dissolvi , & esse tecum. Quis me liberabit de corpore mortis huius ? Quando veniam , & apparebo ante faciem Dei mei ! Defecit cor meum , & caro mea , Deus cordis mei , & pars mea Deus in æternum. Sed nemo venit ad te , nisi tu traxeris eum. Trahe me post te amor meus , Deus meus : trahe me , & curram ad te.

Donario sui Deo. Quid petis à me Deus meus ? Audio suavissimam tuam vocem : Præbe , fili mi , cor tuum mihi. Ecce habes , tibi que sponte , & hilariter dono , quidquid mihi dedisti ; cor , animam , vitam , sanguinem , intellectum , & voluntatem. Nolo cor meum , nisi sit tuum : nolo amare , nisi te : nolo vivere , nisi in te : nolo sapere , nisi te : nolo velle , nisi

te. Jam tuus sum, non sum meus: Vivo quidem, sed non ego; vivit verò in me Deus.

Exultatio in Deo. Cor meum, & caro mea exultaverunt in Deum vivum. Salvo extra me Deus meus: ut veniam ad te. Angustiæ cordis mei non capiunt torrentem voluptatis, quò tui recordatio me perfundit.

Filiatio ad Deum. Filius tuus ego sum, filius tuus. Non est præsumptio; quia dedisti mihi potestatem filium Dei fieri. Dicam tibi semper, & totâ animi fiduciâ dicam: Pater meus es tu. Diligam te, quia Pater meus es tu: amplectar te, nec dimittam te, quia Pater meus es tu. Pater, da mihi portionem substantiæ, quæ me contingit: sed portio mea tu es, Deus meus; aliam nec quero, nec desidero.

Fraternitas cum Christo. Primogenite in multis fratribus Jesu Christe: Pater tuus idem meus & esse, & vocari vult Pater: te hæredem, me cohæredem facit. Amo te, amabilissime frater; etsi me in hæreditatem regni non admittas, amabo te; etsi me à te projicias, amabo te. Omnia tu unice hæres accipe, quia omnia debentur tibi: unicuique mihi relinque amorem, ut amem te. Hic unicus sit pars mea, & hæreditas mea.

Gloriatio in Deo, & Christo. Absit mihi gloriari, nisi in Deo meo, & in Cruce Domini mei Jesu Christi. In hoc glorior, quòd tu Deus, sis Deus meus, Dominus meus, omne bonum meum: in quo summa est mea felicitas, quòd sim creatura tua, servus tuus, & quem tu amore infinito dignaris. In hoc gloriabor, si in cruce configar Jesu meo, si vulnera tua fiant mea, & tecum paupero, & despecto, fiam pauper, & despectus.

Imitatio Christi. Cum in forma Dei esses, amor meus Jesu, exinanivisti te metipsum divitiis, honoribus, & sapientia, factus pro me egenus, ac despectus, & ludibriò habitus. Fac possim esse dives: nolo; quia tu fuisti pauper. Fac possim esse ab omnibus honoratus: nolo; quia tu contemni elegisti. Fac possim sapientiæ famam lucrari: nolo; quia tu pro fatuo haberi maluisti. Electio tua, regula est electionis meæ. Et sic eligo solùm ad majorem tui imitationem.

Lan-

Languor anima in Deo. Amore tui languéo, Deus meus. Nauseat anima mea, quidquid humani est solatii, & mundum, omnesque creaturas fastidio; quia te unum, & solum amo; & cum nondum te frui liceat, in omni alia operatione deficio, & in solo amore respiro, amor meus, Deus meus.

Laudatio Dei. Lauda anima mea Dominum, quoniam bonus. Omnis actio mea, omnis cogitatio mentis, omnis affectus voluntatis, omnis respiratio, omnis arteriæ motus dicat tibi: Magnus Dominus, & laudabilis nimis. Necdum assequor, quod volo, quidquid dicam, quidquid cogitem; adhuc es infinites laudabilior. Magnificet te, mei locò, anima Sanctissimæ Virginis Mariæ. Laudent te ardentissimo affectu Seraphini: Sanctus, Sanctus, Sanctus. Benedicant omnia opera Domini Domino, laudent, & superexaltent eum in sæcula. Nondum assequor, quod intendit affectus. Laudet te humanitas Sanctissima Redemptoris mei: & quod ultra non possum, tua te Divinitas laudet in sæcula.

Mors in Deo. Mortuus sum, & vita mea abscondita est in Christo in te Deus meus. Liquefacta est anima mea, cum tu tetigisti cor meum, & à me transiit in te. Omnis cogitatio mea, omnis affectus meus, cum Christo consepultus est in te. Vivo tamen in te, quia hoc unum sentio, quod amo te.

Narratio magnalium Dei. Magnificat anima mea Dominum, quia mihi fecit magna, qui potens est, &c. (*Potes totum recitare*) Quidquid sensu, quidquid intellectu capio extra te Deus meus, opus manuum tuarum est, & tui in me amoris effectus: Ideo magnificat te anima mea Dominum. Sic dilexisti mundum, ut Filium tuum unigenitum dares: ideo magnificat te anima mea. Charitatem tuam diffudisti in cordibus nostris per Spiritum Sanctum, qui datus est nobis: ideo magnificat te anima mea.

Oblatio sui. Omnia mea, tua sunt Domine; quia omnia tua voluisti esse mea. Quid habeo, quod à liberalitate, & misericordia tua non accepi? & quia

accepi, rursus tibi cum sincerissimo gaudio offero, corpus meum, & animam meam, omnes sensus, & potentias meas, intellectum, memoriam, & voluntatem meam. Non aspice, quòd mea sint; sed quòd tua, & pretiosissimo Sanguine Filii tui tibi vindicata.

Pactum cum Deo. Amo te Deus meus; & tu scis, quia nihil amo, nisi te. Non sufficit cor hoc sentire, non lingua loqui. Sic ergo paciscor tecum Deus, de minimo quocunque motu interno, & externo animæ, cordis, & corporis mei; de omni mea æquè dormientis, ac vigilantis aspiratione, ac respiratione; de omnibus, & singulis, qui sunt, & erunt, creaturarum motibus; de singulis Beatorum tuorum, sanctissimæ Mariæ, ac Jesu mei Redemptoris actibus, sint signa mea, quibus meum in te amorem loquar. Quidquid horum aspicias Deus, in eo tibi ego loquor: amo te amabilissime Deus.

Quies in Deo. In omnibus requiem quæsi, sed extra te non inveni Deus meus, amor meus. In omnibus nihil reperi, nisi dolorem, & afflictionem spiritûs. Recordatus sum tui, ecce pax, & consolatio, quam mundus, & creatura nulla dare potest. Infundo me totum in finem beneplaciti tui. Hæc requies mea: hic habitabo, quoniam elegi eam. In pace, in idipsum moriar.

Vita in Deo. In te, per te, propter te vivo, Deus cordis mei. Tu anima animæ meæ. Nullam volo mentis, nullam corporis operationem, quæ non sit beneplaciti tui. Hoc solum me moves, ut excedam rebus omnibus creatis. Quò moveor, illò vivo. Vivo te, vita mea, Deus meus.

Unio cum Deo. O quàm mihi bonum est adhærere Deo. Jam experior quòd, qui adhæret Deo, unus spiritus est cum eo. Tu mihi hoc obtinuisti amabilissime Jesu, quando etiam pro me orâsti Patrem, ut sim, in te, & in Patre unum, sicut tu, & Pater unum estis. Et quis me separabit, &c.



I N D E X

In Evangelia Dominicarum totius Anni.

Dominica I. Adventus. *Congruit
hujus Dominicae Evan-
gelium cum Dominica
ultima post Pentecosten,
quod expenditur fol.*
414. & 415.

Dom. II. Advent. *Cum
audisset Joannes in vin-
culis.* 298. & 299.

Dom. III. Advent. *Mi-
serunt Judaei ab Hie-
rosolymis.* 234.

Dom. IV. Advent. *Lege
Evangelium illius diei.*

In Natali Domini. *My-
sterium ejus diei.* 26.
27. 28. 29. 30.

Dom. infra Nativ. Si-
meon & Anna prophe-
tizant de Christo. 57.
58. 59.

In Circumcis. Domini
Mysterium ejus diei.
31. & sequent.

In Epiphania Domini.
Mysterium ejus diei.
35. usque ad 42.

Dom. I. post Epiphan.
*Cum factus esset Jesus
annorum duodecim.* 71.
usque ad 80.

Dom. II. post Epiphan.
*Nuptiae factae sunt in
Cana Galilaeae.* 239.

Dom. III. post Epiph.
*Simile est regnum cae-
lorum.* 393. 394.

Dom. IV. post Epiph.
*Ascendente Jesu in na-
viculam.* 254.

Dom. V. post Epiph.
*Simile est regnum cae-
lorum homini, qui se-
minavit.* 308.

Dom. VI. post Epiph.
*Simile est regnum caelo-
rum grano synapis.* 309.

Dom. Septuagesimae.
*Parabola operariorum
in vinea.* 393.

b 4

Dom.

INDEX EVANGEL. DOMIN.

- Dom. Sexages. *Exiit, qui seminat, seminare semen suum.* [306. 307.](#)
- Dom. Quinquag. *Ecce, ascendimus Hierosolymam.* [89.](#) *De cæco Hierichuntino.* [398.](#)
- Dom. I. Quadrag. *Ductus est Jesus in desertum.* [231. 232.](#)
- Dom. II. Quadrag. *De Transfiguratione Christi.* [332.](#)
- Dom. III. Quadr. *Erat Jesus ejiciens demonium.* [303.](#)
- Dom. IV. Quadrag. *Christus pascit in deserto quinque millia hominum.* [319.](#)
- Dom. V. Quadrag. *Quis ex vobis arguet me de peccato.* [354.](#)
- Dom. VI. Quadrag. *Mysterium ejus diei.* [90. 91.](#)
- Dominica Resurrectionis. *Mysterium ejus diei.* [156.](#) *Evang.* [159. 161.](#)
- Feria II. *Apparet Discipulis euntibus in Emmaus.* [168.](#) usque ad [173.](#)
- Feria III. *Apparet Christi Discipulis congregatis.* [173. 174.](#)
- Dom. I. post Pascha. *Apparet Discipulis, dat eis Spiritum S.* [177.](#) *Thomæ incredulit.* [178.](#) *Apparet præsentæ Thomæ.* [179.](#)
- Dom. II. post Pascha. *Sum Pastor bonus.* [359.](#)
- Dom. III. post Pascha. *Modicum, & jam non videbitis me.*
- Dom. IV. post Pascha. *Vado ad eum, qui misit me.* [190.](#) *Cum autem venerit ille Spiritus venerationis.* [204.](#)
- Dom. V. post Pascha. *Lege Evangelium illius diei.*
- In Ascensione Domini. *Mysterium ejus diei.* [192.](#) usque ad [195.](#)
- Dom. VI. post Pascha. *Cum venerit Paraclitus, quem ego mittam vobis à Patre.* [212.](#)
- Dom. Pentecostes. *Mysterium ejus diei.* [202.](#) usque ad [208.](#)
- Dom. SS. Trinitatis. *Mysterium ejus diei.* [208.](#) *Evang.* [187. 189.](#)
- Dom.

INDEX EVANGEL. DOMIN.

Dom. **I.** post Pentec.
Nolite judicare. **290.**
 In festo Corporis Christi. *Mysterium ejus diei.* **212.** & sequent.
 Dom. **II.** post Pentec.
Homo quidam fecit cænam magnam. **215.**
 Dom. **III.** post. Pent.
Parabola de Ove perditâ. **378.**
 Dom. **IV.** post Pent.
Piscator Petrus ad stagnum Genesar. **248.**
 Dom. **V.** post Pentec.
Nisi abundaverit justitia vestra. **278.**
 Dom. **VI.** post Pentec.
Reficiuntur quatuor millia hominum septem panibus. **326.**
 Dom. **VII.** post Pent.
Attendite à falsis Prophetis. **293.**
 Dom. **VIII.** post Pent.
De villico iniquitatis. **383.**
 Dom. **IX.** post Pentec.
Videns civitatem, flevit super illam. **94.**
 Dom. **X.** post Pentec.
Parabola Pharisei, & Publicani. **387.**
 Dom. **XI.** post Pentec.

Sanatur surdus, & mutus. **325.**
 Dom. **XII.** post Pent.
Parabola descendentiis in Hiericho. **364.**
 Dom. **XIII.** post Pent.
Mundantur decem leprosi. **346.**
 Dom. **XIV.** post Pent.
Nemo potest duobus dominis servire. **287.**
288.
 Dom. **XV.** post Pent.
Filius viduæ suscitatur. **297.**
 Dom. **XVI.** post. Pent.
Sanatur hydropicus. **372.** *Recumbendum in novissimo.* **376.**
 Dom. **XVII.** post Pent.
Magister, quod est mandatum magnum. **412.**
 Dom. **XVIII.** post Pent.
Sanatur paralyticus. **257.**
 Dom. **XIX.** post Pent.
Nuptiæ Filii Regis. **408. 409.**
 Dom. **XX.** post Pent.
Sanatur Filius Regis. **247.**
 Dom. **XXI.** post Pent.
Rex ponens rationes cum servis. **342. 344.**
 Dom.

INDEX EVANGEL. DOMIN.

Dom. XXII. post Pent.

Licet censum dare Cæsari, an non? [411.](#)

Dom. XXIII. post Pent.

Mulier curatur à sanguinis fluxu. [260.](#) *Suscitatur filia* [Tairi.](#) [261.](#)

Dom. ultima post Pent.

Predictio desolationis.

[414.](#)

Si plures Dominicæ sint post Pentecosten, uti accipiuntur ex Dominicis post Epiphaniam Evangelia, sic erunt & meditationes ex iisdem Dominicis sumendæ.

INDEX

In Evangelia præcipuorum Festorum.

I. IN Circumcisione Domini. *Vocatum est nomen ejus Iesus.*

[33.](#)

VI. In Epiphania Domini. *Cum natus esset Iesus.* [35.](#) & seq.

XVIII. In Cathedra S. Petri. *Quem dicunt homines esse Filium hominis?* [329.](#)

XXV. In Conversione S. Pauli. *Ecce nos reliquimus omnia.* [391.](#)

XXVII. In Festo S. Joannis Chrysostomi. *Vos estis sal* [terra.](#) [275.](#)

IN FEBRUARIO.

II. In Purificatione B.

V.M. *Postquam impleti sunt dies purgationis.* [49.](#) usque ad [58.](#)

XXIV. S. Matthiæ. *Venite ad me omnes, qui laboratis.* [317.](#) [199.](#)

IN MARTIO.

XIX. S. Josephi. *Ioseph autem vir ejus cum esset justus.* [21.](#)

XXV. Annunciationis B. V. *Missus est Angelus Gabriel.* [17.](#) [18.](#)

IN APRILI.

XXV. S. Marci Evangelistæ. *Designavit Dominus alios septuaginta duos.* [361.](#)

IN

INDEX EVANGEL. FESTORUM.

IN MAJO.

I. SS. Philippi & Jacobi. *Invenit Philip-pum.* Joan. **1.** 238.
239. punct. **3.** & se-quent. med. punct. **1.**

VI. S. Joannis ante portam Latinam. *Ac-cessit ad Jesum mater filiorum Zebedæi.* 397.

VIII. In Apparitione S. Michaëlis. *Quis putas major est in re-gno cælorum?* 340.

IN JULIO.

XXIV. Nativitas S. Joannis Baptistæ. *Elisabeth impletum est tempus* pariendi. 2.2.23.

XXIX. SS. Petri & Pauli. *Quem dicunt homines esse Filium ho-minis?* 329.

IN JULIO.

II. Visitatio B.V. *Exur-gens Maria abiit in montana.* 20.

XXII. S. Mariæ Ma-gdalenæ. *Mulier, quæ erat in civitate pecca-trix.* 300. 301.

XXV. S. Jacobi Apost.

Accessit ad eum mater filiorum Zebedæi. 397.

XXVI. S. Annæ Ma-tris. *Simile est regnum cælorum thesauro ab-scondito.* 310.

XXXI. S. Ignatii Fun-datoris Societ. JESU. *Sint lumbi vestri præ-cincti.* 371.

IN AUGUSTO.

VI. Transfiguratio Do-mini. *Assumpsit Jesus Petrum, & Jacobum, & Joannem.* 332.

usque ad 334.

X. S. Laurentii. *Nisi granum frumenti ca-dens in terram.* 402.

XV. Assumptio B. V. *Intravit Jesus in quodam castellum.* 365.
366.

XXIV. S. Bartholomæi. *Exiit Jesus in montem orare.* 268.

XXVIII. S. Augustini. *Vos estis sal* terra. 275.

XXIX. Decollatio S. Joannis Baptistæ. *He-rodas natalis sui cœnam fecit.* 318.

IN

INDEX EVANGEL. FESTORUM.

IN SEPTEMBRI.

VIII. Nativitas B. V.

XIV. Exaltatio S. Crucis. *Ego si exaltatus fuero à terra.* 403.

XXI. S. Matthæi Apostoli. *Videns Jesus hominem sedentem in zelonio.* 259,

XXIX. S. Michaëlis. *Accesserunt Discipuli ad Jesum dicentes : Quis putas, &c.* 340.

IN OCTOBRI.

IV. S. Francisci. *Venite ad me omnes, qui laboratis.* 317.

X. S. Francisci Borgiæ. *Sint lumbi vestri præcincti.* 371.

XXVIII. SS. Simonis & Judæ. *Hæc mando vobis, ut diligatis invicem.* 104,

IN NOVEMBRI.

I. In Festo omnium SS. *Beati pauperes spiritu.* 270. usque ad 275.

XI. S. Martini. *Confessoris. Lucerna corpo-*

ris tui est oculus tuus. 286.

XXI. Præsentatio B. M. Virg. 15.

XXV. S. Catharinæ. *Simile est regnum celorum decem virginibus.* 416.

XXX. S. Andreæ Apostoli. *Ambulans Jesus juxta mare Galilææ, vidit duos fratres.* 250.

IN DECEMBRI.

III. S. Francisci Xaverii. *Sint lumbi vestri præcincti.* 371.

IV. S. Nicolai. *Homo quidam peregrè proficiscens, vocavit servos suos.* 418.

VIII. Conceptio Immaculata B. M. V. 14.

XXI. S. Thomæ Apostoli. *Thomas unus ex duodecim non erat cum eis.* 178. 180.

XXV. Nativitas D. N. J. Christi. 26. & seq. In Dedicatione Ecclesiæ. *Ecce vir nomine Zachæus.* 399. 402.

DOMI.



DOMINICA I. ADVENTUS.

De æterna Verbi generatione. *Joan. I.*

IN principio erat Verbum, & Verbum erat apud DEUM, & DEUS erat Verbum. *Joan. 1.* Considera Filium DEI in se, esse Verbum Patris, consubstantialem ejus imaginem, in qua omnes absolutæ perfectiones relucant; æternitas, immensitas, &c. quæ Filio à Patre communicantur: ideoque procedere per intellectiōem, quâ Pater seipsum, & secum connexa intelligit. Crede hoc firma fide, adora, lauda, magnifica, gratulare, ama, sed & tu ad imaginem DEI creatus es. quàm nobilis! at nunc, quàm dissimilis prototypo. Fatere, confundere, dole, de restauranda imagine cogita. Ut producta est prima; sic restauratur secunda Dei imago per Dei cognitionem, & sæpius exercitos fidei actus, quorum defectu potissimum labimur.

2. *Omnia per ipsum facta sunt, & sine ipso factum est nihil.* Ibid. Considera Verbi Dei potentiâ omnia ex nihilo condita esse, & conservari, sine hac in nihilum deficere. Agnosce viva fide te, & omnia ita à Deo pendere. Magnifica, & lauda potentiam ejus: invita creaturas; vicissim te ab iisdem invitari crede. Mirare tot possibiles creaturas, in suo nihilo relictas, te tam miserum

Avance. Medita.

A

pecca-

peccatorem extractum. Agnosce quanta potueris cum eo, quam pauca præstiteris. Humilia te, quod nihil possis sine eo. Apprehende manu tua omnipotentem ejus manum, eum qua sola omnia potes, & erige te ad magnanimitatem in arduis, ac difficilibus.

3. *Quod factum est in ipso vita erat.* Ibid, Regredere à creaturis ad Deum. Cogita creata omnia eminentiore modo in Deo esse, habere in Deo quoddam esse Divinum & vivum. Eras ergo & tu in verbo, & eras *vita*. At vivisne etiamnum in te ipso vitam Divinam? quid respondent operationes tuæ, ex quibus vita colligitur? invenies, pro quo gratias agas, de quo Deum laudes, quod ames, de quo doleas, te confundas, & deprimas, quò ad fiduciam erigaris.

F E R I A II.

De creatione, & fine hominis.

1. *CREAVIT DEUS hominem ad imaginem, & similitudinem suam.* Gen. 1. Agnosce Creatorem tuum, ejus æternitatem in essentia, omnipotentiam in creatione, bonitatem in sui communicatione, sapientiam in gubernatione, &c. Lauda & glorifica factorem tuum; hic est, qui te extraxit ex nihilo, totus ergo es ejus, at quoties te Domino tuo subtraxisti! Assurge, redi in possessionem ejus, dolendo, amando, resignando, ait S. Leo. Imaginem sui tibi indidit per creationem. Gratias age, sed *tibi reliquit*, ut secundum ejus imaginem fias, ait S. Basilus. Confer te cum prototypo, adverte, quantum tibi desit, ut ei similis evadas; propone id urgere, quo maxime deficis: pete gratiam, &c.

2. For.

2. *Formavit DEUS hominem de limo terræ, & inspiravit in faciem ejus spiraculum vitæ.* Gen. 2. Animæ nobili addidit Deus corpus de limo terræ, ne ex nobilitate nimium superbias, ex vilitate, nimium dejiciaris. Si tam nobilis, cur ad indigna declinas? si tam vilis, cur mancipium es corporis tui? Resipisce: corpus tuum cura, non fove: necessitate metire obsequia, quæ illi impendis, non voluptate. Abjice te per humilitatem sponte, antequam per necessitatem abjiciaris in pulverem, &c.

3. *Dominum DEUM tuum adorabis, etque soli servies.* Matth. 4. Hic est finis tuus, ad quem creatus es. Agnosce *Dominum*, agnosce *DEUM*, agnosce *tuum*, & hinc titulos, quibus ei & adorationem, & servitutem debes per omnes tibi concessas corporis, & animi facultates. Quamcunque enim a Deo accepisti, ea DEO obstricta est. Reflechte te, quam parum hanc veritatem agnoveris; unde & tuis facultatibus abusus es. Dole, detestare, propone, &c. Respice altior finem, ad quem Deo serviendo tendis. Lauda Deum, qui se ipsum tibi in præmium proponit, gratias age, desidera, pete gratiam, &c.

F E R I A III.

De mediis ad eum finem consequendum.

1. *IN principio creavit DEUS cælum, & terram.* Gen. 1. Quanta rerum series, quæ tibi servit! Aliæ sunt naturales, ut cælum, elementa omnia, & omnes eorum perfectiones, homines, artes, scientiæ, virtutes. Aliæ supernaturales, ut Christus Mediator, ejus merita, Sacramenta, gratia, Angeli, Sancti, sacra Scriptura, instructiones,

stiones, status Religiosus, &c. Admirare, quòd tanta fecerit tibi ingrato, & rebeli. Lauda DEUM in omnibus operibus suis, agnosce ejus in te amorem. Cogita, quanta tibi in cœlo præparet, qui tantis te exulem donat.

2. *Omnia subjecisti sub pedibus ejus.* Psalm. 8. Considera modum, & affectum, quo tibi Deus hæc media dedit: amorem, quo gaudet tibi benefacere: liberalitatem, quâ hæc ultra necessitatem, ad jucunditatem suppeditat: providentiam, quâ suis omnia temporibus disponit: sapientiam, quâ mala, quæ tu obesse crederes, ipse in utilitatem convertit: patientiam, qua manum suam non retrahit ab ingrato. Admirare hæc, prædica, extolle, gratias age, indignum te reputa. Disce à Creatore tuo esse in eundem liberalis, & in ejus servitio constans; sed hoc non egisti hætenus; ingratus fuisti; dole propone, pete gratiam.

3. *Invisibilia ejus à creatura mundi, per ea, quæ facta sunt, intellecta conspiciuntur.* Rom. 1. Considera finem horum mediorum esse, ut te ad finem tuæ creationis prosequendum juvent. Juvant ergo corpus nutriendo, vestiendo, medicando, recreando, &c. animam, homines instruendo, scientiæ illuminando, & perficiendo intellectum, virtutes adornando naturaliter voluntatem. Juvant denique supernaturaliter ad cognoscendam Divinam omnipotentiam, sapientiam, providentiam, bonitatem, & magnificum de Deo sensum excitandum. Confundere, quòd his mediis tam segniter hætenus sis usus. Time hos in ultimo judicio tui accusatores & testes. Gratias age. Opta ea ob segnitiam tuam non subtrahi. Spera ea à Dei bonitate. Sponde iis uti ad eam intentionem, quâ tibi dantur.

FE.

F E R I A I V.

De bono usu creaturarum, & de indifferen-
tia circa eas.

1. *V*idit DEUS cuncta, quæ fecerat, & erant valde bona. Gen. 1. Omnia à prima sui creatione erant tam bona media, ut spectato hujus universi ordine meliora esse non potuerint ad tuum finem. Bona est ergo sanitas, infirmitas honor, contemptus, divitiæ, paupertas, afflictio, solatium, &c. Sed horum usus arbitrio tuo relictus est. Quomodo usus es hætenus? ad vanitatem, ad sensum, ad ruinam tuam. Injuriam fecisti Deo, qui creaturas ad malum detorsisti: Creaturis, quòd eis abusus ad errores, & peccata; Tibi, quòd per eas iveris in perditionem. Errasti? ergo confundere, dole, deprecare, revertere, concipe fiduciam in Deum, implora auxilium, &c.

2. *Beatus vir, cujus est nomen Domini spes ejus, & non respexit in vanitates, & insanias falsas.* Psal.

39. Considera modum practicum, quo bene utaris creaturis. Hic verò est 1. ut eas non universim tantum, sed in particulari ad Deum referas, non ad vanitates. 2. Ut attendas in quo, aut quo modo hoc opus tibi ad finem ultimum prodesse, aut obesse possit. 3. Ut attendas ad affectum, & desiderium tuum circa hoc opus, an Deum illo quæras? an te ipsum? an vanitatem? an insanias mundi falsas? reflecte te ad præterita: statue de futuris: quia omnino necessarium est, ut creaturis solum ad ultimum finem tuum utaris: neque secus licet. Et hanc veritatem seriò cordi imprime.

3. *Non declines ad dexteram, neque ad sinistram.* Prov. 2. Affectu non magis in sanitatem, divitias, & honores feraris, quàm in morbos, pau-

pertatem & contemptum, quia æquè hæc, atque illa ad finem conducunt, ut Deum cognoscas, laudes, ames, &c. statue te in æquilibrio: quidquid eveniat, æque ad Deum dirige. Hic ergo expugnandus est inordinatus tui ipsius, & rerum creatarum amor. Hic enim est laqueus, quo te sæpius captum fuisse doleas, confundaris, horreas super te iudicium Dei. Hinc contemnes blanda, si obsint; amabis etiam ardua, si profint: propones, petes gratiam.

F E R I A V.

De Hominis lapsu.

1. **H**omo cùm in honore esset, non intellexit, comparatus est jumentis, &c. Psal. 48. Primos parentes nostros, propter unicum inobedientiæ peccatum paradyso ejectos, esse veritas fidei est. Expende 1. in quo honore fuerit homo, in gratia conditus, expers internarum rebellionum, morborum, ac ærumnarum, in loco deliciarum collocatus. Agnosce lauda Dei liberalitatem.
2. Expende hominis ingratitude, qui vetiti pomi esum præcepto tam rigorofo antehabuit. Confer cum tua ingratitude, hanc detestare.
3. Quæ pæna secuta? omnes ærumnæ corporis, morbi, passionum rebelho, cæcitas intellectûs, voluntatis depravatio, &c. Agnosce gravitatem peccati, abhorre, detestare.

2. Omnes declinaverunt, simul inutiles facti sunt. Psalm. 13. Considera unum peccatum in omnes transiisse, omnes gratiâ spoliatos, originali maculâ (exceptâ B. V.) infectos, factos filios iræ, & inimicos Dei. Et quid hoc? quam grave est spoliari gratiâ? esse odibilem Deo, &c. Quæ latebræ

tebræ tegant peccatorem à facie iræ Dei? Abhorre à peccato, quod in omnes tuas actiones transit, & vitam eis moralem, animæ spiritualem adimit.

3. *Stipendium peccati mors.* (Rom. 6.) & temporalis, & æterna. Per peccatum enim mors ingressa est in mundum: per peccatum infernus est fabricatus. Vixisses felix semper, & æternum beatus, si non peccasses, quia peccasti, morieris utraque morte. Expende mala primæ, sed transitura, mala secundæ, sed æterna. Agnosce hinc gravitatem peccati. Exhorresce, dole, detestare, pete veniam, &c.

F E R I A VI.

De decreto, & motivo reparandi hominem.

1. *Nolo mortem impij, sed ut convertatur à via sua.* Ezech. 33. Per peccatum facti filii mortis æternæ! O miserabilis casus à tanta sublimitate ad tam profundam abyssum! Vide unde, & quò delapsus es. Confer priorem statum cum statu peccati, ex eo, quod perdidisti, & in quod incurristi. Sed non vult tuam mortem DEUS. *Nolo mortem peccatoris.* Si hoc jam jam ad rogam educendus audires à principe tibi dici, quantum exultares? quas gratias ageres? quid tam arduum, quod tam bono Principi non sponderes? Hoc in Deum age.

2. *In charitate perpetuo dilexi te.* Jerem. 13. Considera causam hujus tam piæ in nos Dei voluntatis esse infinitum ejus amorem. Quid amor non potest in ipsum Deum! at quibus nostris meritis? nullis, sed *cùm peccatores essemus, dilexit nos.* Quid tu faceres in inimicum? infinities gravius merebaris. Dilexit te tamen, quem offenderas, Deus.

O ferreum cor! si non diligas diligentem, cum ipse dilexerit offendentem!

3. *Et extraxi te miserans.* Ibid. Altera causa decreti de reparando homine est Dei misericordia. Peccaverat Adam, nocuerat omnibus: omnes extirpandi eramus. Noluit Deus totum humanum genus sine suo frustrari. Peccaverat Adam; sed inductus à Dæmone, in ipsum Deum rabie actus. Hominis causam ut propriam assumpsit. Deus. Spem concipe, quod causam tuam DEUS ut suam assumet, contra tentationes dæmonis.

S A B B A T H O.

Decretum Incarnationis Filii DEI.

1. **C**onsidera potuisse Deum infinitis modis aliis hominem reparare, elegisse tamen per viam condignæ Deo dandæ satisfactionis. Hanc præstare creatura non poterat, quæ non simul esset Deus, quia injuria erat infinita, omnis verò satisfactio finita. Hinc æstima gravitatem offensæ Divinæ, & abhorre. A te verò si satisfactionem requirat, unde reddes?

2. Considera potuisse Deum Angelicæ naturæ uniri, & pro homine satisfacere, voluisse humanæ, ut vinceret dæmonem in natura infirmiore: & daret nobis visibilem, & imitabilem Redemptorem. Agnosce facile superari dæmonem ab homine, qui Deo unitur: & adhære Deo, ut confundas fortem. Agnosce Redemptorem tuum, Magistrum, & exemplar. Poterásne hoc sperare? vide, ne devies.

3. Considera, ex qua vilitate, & miseria, ad quam dignitatem evehctus sit homo. Æstima, gratulare, ama, gratias age, &c. Decebat ergo,
ut

ut Divinæ factus confors naturæ vitam duceres
tuæ dignitati parem. Sed heu? quid egisti? Pu-
deat, pæniteat tantum descivisse, &c.

DOMINICA II. ADVENTUS.

Pater Filium, Filius seipsum mundo donat.

1. **S**ic DEUS dilexit mundum, ut Filium suum uni-
genitum daret. Joan. 3. Quis? Deus: quem?
te dilexit. Quomodo amorem probavit? dando
Filium, & hunc DEUM infinitè dilectum, pro te
rebelli peccatore. Quàm nihil tu reddis Deo?
pudeat, quin te quoque affectu creaturarum tuique
ipsius exuis, & te ei donas, qui Filium tibi de-
dit? Attende quam habes obligationem hoc agendi.

2. *Dilexit me, & tradidit semetipsum pro me.* Ga-
lat. 2. Dilexit me, quem vidit specialiter ingra-
tum futurum, & suæ intentioni repugnaturum;
& in signum amoris dedit seipsum, qui se tibi tot
argumentis negare poterat. Quid tu agis pro
ejus amore? an salvabit te, si adhuc resistas? Red-
de te totum ei, qui se totum tibi prior dedit.

3. *Cum in forma DEI esset; exinavit semetipsum
formam servi accipiens.* Phil. 2. Et quo se dedit,
qui se tibi dedit? In paupertatem, in contem-
ptum, in cruciatus, in mortem. Hæc tolerabilia
fecit amor. Non amas vicissim, si ista fugis.
Ad hæc te resolve, ut amorem testeris.

F E R I A II.

In Incarnatione elucet Sapientia, Bonitas,
& Omnipotentia DEI.

1. **O**cculta Sapientiæ tuæ manifestasti mihi. Psal. 50.
Invenit medium, quo solo Divinæ Justitiæ
A 5 satis-

satisficeret, debitum nostrum in Divinam personam transferendo. Invenit modum, quo idem qui Creator erat, esset & Redemptor, ut pluribus titulis, totum in se colligeret amorem nostrum. Et tamen fraudas Deum expectatione sua, qui amorem dividis in creata. Redde Deo, quod Deo debes.

2. *Bonitatem fecisti cum servo tuo.* Psal. 118. Quæ bonitas? Justus pro injustis, innocens pro peccatoribus, Dominus pro servo, Deus pro homine se dedit: huic se univit non affectu tantum, sed substantia. Et poteris tu, si hoc credis, extra Deum amare aliquid. Convertere anima mea tota ad Deum, qui solus bonus, solus amore dignus est.

3. *Fecit potentiam in brachio suo.* Luc. 2. Filius Dei est brachium Dei, quod è cælo protendit ad sublevandum hominem. In hoc Filio Incarnata apparuit omnipotentia; quæ tantum operata est, quantum amor desiderare potuit. Nec majus ille imperare, nec majus hæc exequi valuit. Persuadeat hæc veritas, ut amorem reddas, quem negasti hactenus, & eum testeris opere, quantum potes.

F E R I A III.

Per Incarnationem Filii DEI placatur DEUS, erigitur homo, confunditur dæmon.

1. *Omnia ex DEO, qui nos reconciliavit sibi per Christum.* 2. Cor. 5. Non potest placari Deus offensus nisi vel condonatione, vel satisfactione. Noluit condonare peccatum nostrum, voluit satisfieri pro eo, à nostra natura adjuncta per unionem Verbi, quâ merita ejus ad infinitatem eveherentur. Time anima mea, quia etiam à
te

te satisfactio exigetur! & tam rarò hoc cogitas! At quia satisfacere non potes, uni tuum nihilum cum thesauro infinito meritorum Christi,

2. *Suscitans à terra inopem, & de stercore erigens pauperem.* Psalm. 112. Declinaverat in terram homo, & cognitione, & affectu; Deum nec videbat, nec amabat; quia sub sensum non cadebat: visibilem ergo se dedit, ut nos exemplò, & doctrinà ad Deum erigeret. Prævalebuntne ergo terrena, ut te rapiant ad se? illucne ibis, quò illa trahunt, an quò Filius Dei? &c.

3. *Nunc princeps bujus mundi ejicietur foras.* Joan. 12. Triumphabat dæmon, quod in uno homine omnes homines perdidisset. Unum hominem invenit Deus, quò ejus superbia confunderetur, nempe Christum Deum, & hominem. Ita nos perdidit unus homo, unus salvavit. Sed hoc non egit humanitas, nisi Divinitati unita. Non vinces hostem, nisi Deo unitus. Te solo nihil, cum illo omnia poteris.

F E R I A IV.

Eligitur Mater tanto Filio digna.

1. *M*isit DEUS Filium suum, factum ex muliere. Galat. 4. Decreta Incarnatione decrevit Deus non creare sibi corpus; sed ex fœmina nasci, ut sicut mulier juvit ad perditionem nostri, ita una coadjuvaret ad redemptionem. Et hac ratione voluit fieri filius hominis, & frater noster. Quæ ergo nostra dignitas, qui habemus eundem cum Christo Patrem? quæ Christi humilitas, qui cum esset Filius Dei, fieri voluit filius hominis, illam agnosce, & factis proba! hanc imitare, & te deprime.

2. *Re*

2. *Respexit humilitatem ancillæ suæ.* Luc. 2. Vidit DEUS ab æterno omnes mulieres, & quidquid in quocunque statu fuissent operaturæ. Vidit B. Virginem in omnibus circumstantiis bene operaturam, nunquam malè, idque ex meritis Christi. Ideò eam præ cæteris adamavit. Vis à Deo amari? cooperare ejus gratiæ, nulla te prætereat occasio. Fecistinc id hætenus? Confundere, dole, time, propone, &c.

3. *Fecit mihi magna qui potens est.* Luc. 2. Quid majus, quàm esse Deum? Unde hoc illi? quia semper correspondit gratiæ invitanti, aut intimanti voluntatem Dei. Potes & tu Mater DEI esse. Nam qui fecerit voluntatem Dei Patris, qui in cœlis est, hic Mater mea est. Amas hanc dignitatem? fac ejus voluntatem, corresponde internis invitationibus.

F E R I A V.

Promittitur Incarnatio Filii DEI.

1. *Nimicitias ponam inter te, & mulierem, inter semen tuum, & semen illius, & ipsa conteret caput tuum.* Gen. 3. Hoc erat promittere Redemptorem, qui Adamum, & posteros liberaret à potestate dæmonis. Quàm bonus Deus! xix peccat homo, illico ille spem gratiæ facit? & offert. Nónne & tibi eandem spem fecit? & quoties? quam ergo debes gratitudinem? quem amorem? quam fiduciam?

2. *Inter semen tuum, & semen illius.* Hoc erat promittere Redemptorem, ex descendantibus ab Adamo posteris. Hanc deinde promissionem per tot prophetias, & figuras renovavit, ut spem eandem nepotibus Adæ faceret. At tibi non spem

spem Adventûs fecit, sed præsentem exhibuit: & tamen magis ei serviebant, qui sperabant. —, quàm tu, qui frueris. Confundere, & posthac responde tanto beneficio.

3. *DEUS ipse veniet, & salvabit nos.* Isai. 35. Hoc credebant, & dicebant priora sæcula. Ideo ad eos Christus sua merita, quia erant infinita, extendit. Non ergo deserit quemquam, qui in eum sperat. Putásne minùs misericordem in te, postquam venit, si ei fideliter servias? Uberius participas merita Christi per Sacramenta, &c. Hæc merita semper offer æterno Patri. Hæc unica sint tuæ spei fundamentum.

F E R I A V I.

Desideratur Redemptor à Patriarchis, & Prophetis.

1. *R* *Orate cæli desuper, & nubes pluant iustum.* Isai. 45. Quem promiserat Deus Salvatorem voluit desiderari, ut ex parte nostra aliqua esset dispositio. Quid minùs pro tanta gratia exigere potuit, quàm desiderium. En, & ad te venire vult Deus: & hunc quam tepide desideras, qui alia nôsti tam ardentèr desiderare. Vult à te Deus desiderari, qui vult uniri. Pone ergo alia desideraria, ut hoc excites.

2. *Mitte, quem missurus es.* Exod. 4. Considera, quàm ardens eorum fuerit desiderium: cælos, nubes, terram, nocte, & die inclamabant, ut veniret, qui mittendus erat. Impetrârunt hi affectus accelerationem Incarnationis. Si advertas ad tuorum desideriorum languorem, non queris te non exaudiri. Pudeat te, quòd tam arden-

denter sensui grata, tam tepidè Divina desideras. Quid te impedit? quòd creatis associaris.

3. *Expectavimus eum. & salvabit nos.* Isai. 25. Transibant sæcula, augebantur miseriæ; promissus non veniebat, attamen spe certi expectabant tam vivi, quàm animæ in limbo, quia nempe & necessitatem suam, & magnitudinem promissi beneficii cognoscebant. Desiderares & tu constantius, si Deo fideres, si necessitates tuas adverteres, si cognosceres, quantum bonum sit, Deum habere. His nutri desideria.

S A B B A T H O.

De Conceptione Immaculata B. V.

1. *Nondum erant abyssi, & ego jam concepta eram.* Prov. 8. Peccatum originale abyssus est, quâ omnes sorbebamur. MARIA est exempta, quia ut ait S. Ansel. Decens erat, ut eâ puritate, qua major sub Deo nequit intelligi, Virgo illa niteret. Adverte, quantum Deus attendit ad id, quod se decet. O si & tu attenderes, quid te, quid statum, & vocationem tuam deceat!

2. *Tota pulchra es amica mea, & macula non est in te.* Cant. 4. Non tantum peccatum non fuit in B. V. sed neque fomes, neque concupiscentia, neque prava inclinatio; sed cum summa tranquillitate caro & sensus suberant rationi & spiritui. Sed sentis aliam legem in membris tuis? Tranquillitatem habebis, si concupiscentias, & inclinationes opprimas, si ratio & spiritus regant, non caro & sensus.

3. *In me gratia omnis viæ & veritatis.* Eccl. 44. In primo instanti contulit Deus gratiam B. V. habitualement supra omnes homines, & Angelos: Intel-

tellektûs plenum usum, & cognitionem Dei; voluntatem amantem supra omnes Seraphinos; gratias efficaces cum quibus statim secundum omnem intensiorem operata est. Quando tu intellectum, quando voluntatem Deo applicuisti? quomodo? an cooperatus es gratis? an cooperaberis? &c.

DOMINICA III. ADVENTUS.

De Nativitate, & Præsentatione B. V.

1. *Nativitas tua DEI genitrix Virgo, gaudium annuntiavit in universo mundo. Ecclesia. SS.*

Trinitati; quia filia Patris, mater Filii, sponsa Spiritûs sancti. 2. Angelis, quia eorum Regina.

3. Hominibus, quia eorum protectrix; quibus proprie est MARIA: *Stella maris* naufragantibus: *Illuminatrix* cæcis, & in umbra mortis positis: *Domina* omnibus, ut ei serviamus, eam post Deum amemus, revereamur. Congaude & tu. Agnosce in hoc nomine ejus excellentias, & spes tuas.

2. *Concupiscit, & deficit anima mea in atria tua.* Psal. 83. Joachim, & Anna toto affectu offerunt Deo filiam, & hoc se solatio libenter privant. Quam sanctum est propter Deum se omni solatio privare. An & tu hoc agis: Virgo trimula properat se offerre Deo, non ætate, non amore parentum detenta. Quam facile tu impedimentum arripis? denique se Deo cum summa hilaritate offert, per votum perpetuæ castitatis. Quæ hic devotio? quæ reverentia? sed quæ tua tot es repetita oblatio? quam frigida?

3. *Multæ filiæ congregaverunt sibi divitias, tu supergressa es universas.* Prov. 31. Considera virtutes ab ea in templo exercitas. Cum Deo uniebat se per contemplationem, charitatem, voluntatis

tis suæ subjectionem : Proximum , seu simul de-
gentes puellas æstimabat , amabat , juvabat , sus-
ferebat , omnibus se subiciebat : seipsam depri-
mebat humilitate , ab amore terrenorum avelle-
bat , mortificabat , &c. Oblatus es in domo Dei :
has à te ipso virtutes exige.

F E R I A II.

Beata Virgo desponsatur S. Iosepho.

1. **V**oluit Deus futuram suam Matrem spon-
sari viro. Non detrectavit Virgo , nec vo-
to timuit , quia se totam Dei gubernationi dede-
rat. Non dubitabat se intactam conservandam
ab eo , cujus hinc voluntatem exequebatur. Sine
te à Deo gubernari , & nullum incurres pericu-
lum. Examina præterita , dispone futura.

2. Considera causas desponsationis. 1. Ne gra-
vida incurreret notam apud homines. Consule
famæ alienæ , præsertim Matris tuæ Religionis.
2. Ne ipse etiam de innupta natus , illegitimus
haberetur. Consule tuo etiam nomini , dum ad
gloriam Dei magis expedit. 3. Ut celaretur ad
tempus mysterium Incarnationis. Discce partus
virtutum tuarum celare.

3. Considera qualitates sponsi. Erat quidem
regiâ stirpe editus , sed pauper , faber lignarius ,
justus tamen , & Virgo , ut Virgo Virginem cu-
stodiret. Quàm alia æstimat Deus , alia mun-
dus ! Deus justitiam , sanctitatem , virginitatem ,
humilitatem : mundus excelsam stirpem opu-
lentiam , &c. Si ut Deus præctice judicasses ,
non tantopere adhæsisisses terrenis. Nunc saltem
corrigere iudicium tuum.

F E R I A III.

Legatio Angeli ad Beatam Virginem.

1. *M*issus est Angelus Gabriel, à DEO in Civitatem Galilææ, ad Virginem. Luc. 1. Expende, quis? quem? ad quem mittit? Deus Angelum ad Virginem pauperem, desponsatam fabro, consecratam Deo. Tales dignatur Deus legatione Angelorum. Sed nec te dedignatur, invisibili legatione internarum inspirationum. Attende his, quia à Deo sunt: æstima, & sequere, quia ad tuum bonum sunt. Melior esses, si hactenus hoc præstitisses.

2. *Et ingressus Angelus ad eam, dixit: Ave gratiâ plena.* Luc. 1. Ingressus, quâ reverentiâ? quâ modestiâ? quâ compositione? Quam longe minore tu ad Deum ipsum accedis? laudat Virginem, reticet se Angelum esse. Disce tui laudes non promere, promere alienas. Vocat gratiâ plenam. Hæc sola laus coram Deo. Sed quô tu es plenus! vanitate, inordinatis affectibus, &c.

3. *Dominus tecum*, in cogitatione, in desiderio, in amore. Felix societas sic esse cum Deo. Felix MARIA, quæ semper cum Deo. Quam raro tu cum Deo! Consule cogitationes, desideria, & affectus tuos. Ubi vagantur? Collige eos ergo omnes ad Deum.

F E R I A IV.

Angelus intimat Mysterium Incarnationis.

1. *Quæ cum audisset, turbata est in sermone ejus.* Luc. 1. Turbatur, id est, confunditur ad tantas sui laudes, ad tantam Angeli reverentiam. Hoc proprium est humilium. O quantum distas.

Avant. Medis.

B

à Vir-

à Virgine ! turbaris ad tui vituperia , exultas ad laudes. Illa abhorret veras , & meritas ; tu quæris immeritas , & falsas.

2. *Ne timeas MARIA , invenisti enim gratiam apud DEUM.* Luc. 1. Unicam rationem ad pellendum timorem adducit ; quòd sit in gratia Dei. Inexpugnabilis hæc clypeus est. Quid enim timeat , quem DEUS amat ? Quære ergo huic placere , non hominibus. Placeres magis , si his minùs placere voluisses.

3. *Ecce concipies in utero , & paries filium , & vocabis nomen ejus JESUM.* Hic erit magnus , & filius Altissimi vocabitur. Et regnabit in domo Jacob in æternum. Ibid. Gratulare Virgini de tanto Filio : adora Filium : agnosce Deum : crede , ama , & regnanti te subde.

F E R I A V.

Explicat Angelus Mysterium Incarnationis.

1. *Dixit autem MARIA : Quomodo fiet istud ? quoniam virum non cognosco.* Luc. 1. Non dicit *non fiet istud* , quæ semper Deo consentiebat : sed quomodo ? insinuat votum , & amorem majorem puritatis , quàm maternitatis tanti Filii : de cætero quid Deus disponat auditura. Ama puritatem & animæ , & corporis majorem , quàm antehac.

2. *Et respondens Angelus dixit ei : Spiritus sanctus superveniet in te , & virtus &c.* Ibid. Explicat , quomodo consistent Virginitas , & fœcunditas operâ Spiritûs sancti , corpus Dei Verbo formaturi. Gratulare Virgini , in qua Spiritus sanctus operabatur hoc mysterium. Vide , ut idem solus in anima tua operetur inspirationibus , non sensus , non amor proprius , non humani respectus.

3. *Ecce*

3. *Ecce ancilla Domini ; fiat mihi secundum verbum tuum.* Ibid. Consentit Virgo. Hoc expectabat SS. Trinitas, Angeli, Patres in limbo, homines. Cum quanta humilitate ; Mater Dei se ancillam vocat. Virginitate concepit, humilitate meruit. Hic modus est, quo Deum ad te trahas, si te deprimas ; sicut eum pellis, si te elevas.

F E R I A VI.

Dotes Christi animæ à Verbo assumptæ.

1. *In quo sunt omnes thesauri sapientia, & scientia Dei.* Coloss. 2. Primo instanti perfectissime cognovit omnia naturalia, etiam te, & tua facta. Sed viditne, quod gaudio esse poterat, an quod mœrori ? 2. Omnia supernaturalia ad Deum. Quam felix illa anima ! quam tu infelix ! Hæc non vides, saltem actuali fide sæpius crede. Ex hujus defectu aliis plerumque deficiis.

2. *Talis decebat ut nobis esset Pontifex, sanctus innocens, impollutus.* Hebr. 7. Ex unione ad Verbum fuit sancta infinite, neque crescere potuit. Tu potes : at non cresces, nisi Deo magis uniaris ; non unieris, nisi à creaturis magis recedas. 2. Fuit sancta per summam gratiam, supra omnes creaturas. Respice egestatem tuam. Ditiore esset, si te Deo magis unires. 3. Fuit impeccabilis, quia regebatur à Verbo. Quam tu fragilis ! forte quia non pateris te à Deo regi.

3. *In ipso complacuit omnem plenitudinem inhabitare.* Coloss. 1. Ob unionem habuit omnes virtutes supernaturales, quarum capax fuit. Quantum complacuit sibi in illa Deus ! quam parum in tua ! quia egenus, & pauper es. Nec fuerunt otiosæ illæ vir-

tutes ; jam tunc in nos influebant. Sed quoties hunc in te fluxum non admisisti ?

S A B B A T H O.

Christus primo instanti conceptionis offert se Patri æterno.

1. *Ingrediens in mundum dicit : Hostiam , & oblationem aliam noluisti , corpus autem præsti mihi. Tunc dixi : Ecce venio. Heb. 5. Offert Patri se , sua , corpus , animam , & quam promptissime : quia cognoscit hæc esse ab illo ; quid tu habes , quod non sit à Deo ? cur non illi omnia ? cur tibi ? cur sensui multa immolas ?*

2. *Ecce venio , ut faciam Deus voluntatem tuam. Ibid. Vidit statim decretam sibi à Deo paupertatem , contemptum , passionem , mortem : promptissime excipit ipso primo momento crucem , voluntate sua tota in Dei voluntatem transfusa. Confer te cum Christo , quam conformis sis voluntati Divinæ , præsertim in arduis , quam ames , aut fugias Crucem.*

3. *Quæ placita sunt ei , facio semper. Joan. 8. Quia summe ei placet gloria sua , & salus nostra ; huc statim intentione sua respexit , eaque purissima. Perdis omnia , quæ non huc dirigis. O quantam hætenus jacturam fecisti ! quod posthac facturus es , purum sit , ut nihil sensus interveniat.*

DOMINICA IV. ADVENTUS.

B. V. ad Elisabetham invisit.

1. *Exurgens MARIA in diebus illis abiit in montanæ festinatione. Luc. 1. Concepto Deo abit in ardua. Inhabitantis Dei signum est ad diffi-*

difficilia se resolvere. Concepto Deo exit in publicum. Necessarium est latere, donec Dei spiritus sit in te; antea non tutò agis cum proximo. Ut Joannem peccatò solvat, relinquit amatam solitudinem. Relinquendus Deus propter Deum.

2. *Exultavit infans in utero ejus, & repleta est Elisabeth Spiritu sancto.* Ibid. Effectus hi sunt visitationis MARIE. Infans mundatur, sanctificatur nondum natus, prophetat gestu: Elisabeth illuminatur, agnoscit Matrem Dei, extollit eam, humiliat se se. Deus omnia nos habere voluit per MARIAM. Huic tuam necessitatem expone: ab hac mendica.

3. *Magnificat anima mea Dominum.* Ibid. Laudata laudem refundit in Deum, se verò humiliat. Quidquid à Deo tibi adfluat, tu ad tuum nihil redi; magnifica illum, & sublimem de eo sensum concipe.

F E R I A II.

S. Joseph de Mysterio Incarnationis instruitur.

1. *Joseph autem vir ejus cum esset justus, & noluit eam traducere, voluit occultè dimittere eam.*

Matth. 1. Videt gravidam, non novit Mysterium; angitur, sed non exprobrat, in melius interpretatur: cogitat de dimittenda; sed occultè, ut famæ consuleret. Disce 1. prudenter adversa tolerare, non murmurare. 2. Alienos defectus apud te excusare; apud alios tegere.

2. Angebatur & Virgo; quæ sciebat angere Josephum; se de adulterio suspectam; se periclitari de dimissione. Silet tamen, neque excusationem adfert: committit se Deo innocentiae defensori. Etiam de sanctis sinistra formantur judicia; sile,

si tibi hoc contingat. Deo te committe, qui providentiâ suâ omnia ordinabit in bonum.

3. *Angelus Domini apparuit ei in somnis, dicens: Joseph fili David noli timere accipere MARIAM.* Ibid. Tribulari vult Deus justos, non opprimi, præstat Divina auxilia, cum defunt humana. Docet mysterium Incarnationis Josephum. Quod tam hujus, quàm Mariæ gaudium? Ita sunt curæ Deo, qui se illi committunt.

F E R I A III.

Nascitur S. Joannes Baptista.

1. *Peperit filium, & audierunt vicini, quia magnificavit Dominus misericordiam suam cum illa.* Luc. 1. Primò eximendo illam à dedecore sterilitatis. Si tam turpis erat sterilitas corporalis, quàm turpis coram Deo erit sterilitas animæ! Et hæc tua est. 2. Dando filium, qui *erit magnus coram Domino.* Sola magnitudo vera est, quæ coram Deo est. Quid aliam quæris?

2. *Peperit filium, & audierunt vicini. &c.* Considera, quæ secuta sint nativitatem Joannis. Gaudent vicini: alii timent: alii mirantur: recipit loquelam pater; repletur Spiritu Sancto; loquitur benedicens Deum, prophetat, &c. Quantas mutationes facit vir unus zelosus, si quando compareret in populo!

3. *Quis putas puer iste erit? etenim manus Domini erat cum illo.* Luc. 1. Præfagiunt magnitudinem Joannis ab Angelo prædictam, ex eo quia manus, & favor Dei erat cum illo, hic tamen favor non fecit eum magnum coram mundo, sed contemptum, deduxit in desertum, aluit locustis, vestivit melote, &c. Per hanc viam ducit Deus
cos,

eos, quos vult magnos coram se. Hac & tibi eundum.

F E R I A I V.

Munus, ad quod destinatur Joannes.

1. **H**ic venit in testimonium, ut testimonium perhiberet de lumine. Joan. 1. Testimonium ore, ut Christum prædicaret; testimonium opere, ut doctrinam suam sanguine signaret. Ad hoc vocatus es, ut testimonium perhibeas, non ore tantum, laudando, prædicando; sed multò magis opere, ardua pro eo agendo, patiendo. Quid egisti? quid passus es? quid in futurum?

2. *Ipse præcedet ante illum in Spiritu, & virtute Eliæ.* Luc. 1. Spiritus Eliæ fuit zelosus, igneus, fortis, & imperterritus. Talis fuit Joannes, in eremo ad Jordanem, in urbibus, in carcere, in morte. An & tuus talis? quàm tepidus, quàm debilis? quàm facile deficit?

3. *Parare Domino plebem perfectam.* Non destinatur tantum ad Herodem, aut magnates, sed etiam ad plebem excolendam. Demitte te ad vilissimos, quoniam nullius est vilis anima. Idem omnium est pretium, Sanguis Christi. Hoc exemplum Christi, hoc vocatio tua exigit.

F E R I A V.

Expectatio Partûs.

1. **Q**uem conceperat B. Virgo, summè desiderabat parturire: quia sciebat eum omnium salutem datum, ut hoc opus aperte inchoaret. Desiderabat eum quidem utero sibi unitum habere: sed prævaluit affectus salutis aliorum. Quo-
 ties,

ties tu Deum concipis per bona proposita? quàm rarò parturis? Insistendum his: alias otiosa sunt. Sepone quandoque etiam spiritualem tuam consolationem, ut salutem aliorum servias: multò magis solatia sensuum. Non perditur sic Deus, sed paritur.

2. Agnita Dei voluntate, ut Christus nasceretur, desiderabat hujus partum B. Virgo, ut eum etiam corporalibus obsequiis prosequeretur, videret, oscularetur, stringeret, gestaret, serviret. Non solum affectum, sed etiam externa opera Deo impende.

3. Ad hunc partum qui se disponebat? Per intensissimos virtutum omnium actus. Non unâ virtute te, nec lenta ad Deum in te pariendum dispones. Necessè est omnibus, & in gradu heroico. Quas habes? quot defunt? Heroicis assuesce, quæ fervidam, & constantem resolutionem postulant.

F E R I A VI.

Beneficia à Christo in utero existente SS. Matri collata.

1. **G**estavit Filium sinè gravedine, sinè dolore, & tædio. Facile gestatur, quod summè amatur. Privilegium hoc fuit Virginis, non tuum. tibi dictum est, *in dolore paries filios*, id est proposita tua etiam per difficultates in opus sunt reducenda: faciliora fient, si ames. Gravis est tibi doctrina Christi, ama; amor omnia dulcorat.

2. Considera quàm adornatum reliquerit Christus thalamum uteri. Qui tantas B. Virgini gratias primo instanti, quo conceptus est, contulit; in quantum putas eas cumulaverit per decem menses? quam intellectui lucem, quem affectum voluntati indidit? Gratulare Virgini. At unde
tua

tua cœcitas, & tepiditas, cum sæpius Deum recipias? Fortè quia non pateris eum diu tecum morari, dum te statim ad alia effundis.

3. Considera filios alios nobilitatem à matre accipere, quoniam *partus sequitur ventrem*. At hic mater à filio accipit. Regina enim omnium est, quia Mater est Regis universorum. Ab eo nobilis eris, quod pepereris, id est à tuis actionibus Christo conformibus, non à doctrina, non ab æstimatione.

S A B B A T H O.

Iter Virginis in Bethlehem.

1. *Exiit edictum à Cæsare*. Luc. 2. Licet ex superbia, & avaritia; B. Virgo tamen reveretur in Imperatore terreno auctoritatem Dei: non excusat se graviditate, temporis iniquitate. Nonne hinc discis Superiores tuos locò Dei habere, etiam in durioribus imperiis.

2. *Ascendit & Joseph, ut proficeretur cum MARIA*. Ibid. Decrevit Deus, ut filius pauper, & contemptus nasceretur. Ordinatur, ut edictum Cæsaris prodeat. Hinc constringi videtur, ut in Bethlehem eat. Sed hac necessitate tegit suam voluntatem patiendi, humilitatem, patientiam, paupertatem. Quid ego? prodeo sub virtutis colore, sed delicta celo, amo commoditates, &c. O pudor!

3. *In propria venit, & sui eum non receperunt*. Joan. 1. Comitare undique mendicantem hospitium B. Virginem. Vide, quam indigne excludatur. Expende, quis ejus sensus, maxime quod *sui eum non recipiant*: qui recipiunt alienigenas. Nonne & tu Deum quandoque cor pulsantem

excludis? & cui das locum? aperi ergo posthac illi, claude vanitati.

IN NATIVITATE DOMINI.

1. *Factum est autem, cum essent ibi, impletum est tempus, ut pareret:* Luc. 2. Ubi? Considera vilitatem loci, tempestatem perfrigidam, tempus noctis, circum undique miseriam, & paupertatem. Vis ut in te nascatur Christus? esto tibi vilis, frigescent tuæ passionēs, ama latere, esto pauper & humilis. Amat & in te ea Filius Dei, quæ pro se elegit.

2. *Peperit filium suum primogenitum in præsepio.* Ibid. Considera, quibus actibus reverentiæ, humilitatis, adorationis, amoris B. Virgo filium suum exceperit, & statim pro mundi salute Patri obtulerit. Audi vagitum, vide lachrymas: quære, cur flet? Audi respondentem, quod non habeat imitatore, & statue tu eum sequi.

3. *Et pannis eum involvit:* Ecce paupertatem Matris, & Filii. *Et reclinavit eum in præsepio:* Ecce quomodo à teneris Dei Filius incommoditates amat. Et cur tu fugis? *Quia non erat ei locus in diversorio:* Qui creavit te in habitaculum sibi, non invenit locum apud te: & invenit, qui te it perditum.

DIE 26. DECEMBRIS.

Sensus Dei, B. Virginis, & Angelorum in nativitate Christi.

1. *Cogita ab æterno Patre tibi ipso Nativitatis instanti dici: Hic est Filius meus dilectus, in quo mihi bene complacui.* 2. Tibi donari ab eo filium,

um , & ejus merita. Quàm dives his eris , si bene utaris , & tibi applies. 3. Filius verò Patri offert se ipsum in victimam pro peccatis tuis. Quis amor iste in te ? Quomodo es meritus ? Offer quoque te ipsum in victimam Deo.

2. Considera quas gratias B. Virgo retulerit ob conservatam Virginitatem. Æstima , & custodi tantum thesaurum , quem illa tanti fecit. 2. Quomodo obtulerit eum æterno Patri , quomodo mundo , quomodo tibi ? suscipe in manus , ama , fove , utere in bonum tuum.

3. Considera revelatum Angelis , dictumque ; *Et adorent eum omnes Angeli ejus.* Crede ergo adstitisse Angelos , admiratos illam exinanitionem , paupertatem , &c. Et tamen non eorum causâ hæc agebat Christus , sed tui. Quæ tua ergo obligatio , non tantum admirandi , sed etiam imitandi hanc exinanitionem.

DIE 27. DECEMBRIS.

Christus natus annunciatum Pastoribus.

1. *Pastores erant in regione eadem vigilantes , & custodientes vigilias noctis , super gregem suum , & ecce Angelus Domini stetit juxta illos.* Luc. 2. Quibus revelat se Christus ? Pastoribus , simplicibus , & humilibus : *vigilantibus* : & attentis ad occasionem boni : *custodientibus* greges passionum , & affectuum suorum. Suntne in te hæ qualitates , ut merearis tibi Deum revelari ?

2. *Et claritas Dei circumfulsit illos , & timuerunt timore magno.* Lumen , & cognitio Dei Majestatis excitat in anima sacrum quendam horrorem , ac reverentiam. O quàm parva tua est in Deum reverentia in tuis spiritualibus exercitiis. Unde ?
quia

quia modicum est in te lumen, & non formas sublimem de Deo, rebusque Divinis æstimationem. Si æstimabis, revereberis

3. *Evangelizo vobis gaudium magnum, quod erit omni populo, quia natus est vobis hodie Salvator.* Gaudent Angeli de nostro bono. Disce gaudere de bonis aliorum. Gaudium nobis annunciant. argumenta gaudii sunt, quod natus Salvator, quod nobis, quod hodie. Est Salvator tuus, sed non salvabit te sine te. Cooperari ergo oportet.

DIE 28. DECEMBRIS.

Datur signum Pastoribus, & canunt Angeli.

1. *ET hoc vobis signum: invenietis infantem pannis involutum, & positum in præsepio.* Luc. 2. Salvatorem populorum annunciat Angelus, & dat ejus signa tam vilia! Deus nempe non invenitur nisi in humilitate, & contemptu terrenorum. Elige hæc ad majorem Christi imitationem, etiamsi par omnino esset in deliciis, & honoribus Dei gloria.

2. *Et subito facta est multitudo militiæ cœlestis exercitus laudantium Deum.* Ibid. Quia Dei Filius se tantopere exinanivit, Pater eum per Angelos honorat. Quanto minorem ipse tui curam gesseris; tanto majorem geret Deus. Ubi terrena solatia abjeceris, aderunt cœlestia. 2. Quid laudant Angeli? Infantis sapientiam, tenelli potentiam, despecti gloriam. Deus eruit, & manifestat, quæ latent, huic te committe.

3. *Gloria in excelsis Deo, & in terra pax hominibus bonæ voluntatis.* Ibid. Deo soli debetur per omnia gloria, non tibi. Si eam tibi arroges, Deus te confundet ob furtum rei alienæ. Quo-
ties

ties eam Deo furripuisti. Redde, quod non est tuum. 2. Pax datur hominibus bonæ voluntatis. Bona voluntas directa per solidas veritates, prompta, resoluta, fervida, est principium omnis boni, & pacis internæ. Reflechte te ad te ipsum, & ex te ipso disces esse verum. Ideo hanc voluntatem excita, & conserva.

DIE 29. DECEMBRIS.

Pastores se hortantur mutuò ad invisendum Salvatorem.

1. **U**T discesserunt ab his Angeli, *Pastores loquebantur ad invicem.* Luc. 2. de iis, quæ Angeli decantârunt. Non sunt ergo statim eorum obliti, ubi Angelus disparuit; quemadmodum tu facis, qui elapsâ horâ meditationis, vix postea cogitas, quod lumen habueris, quod propositum; de hoc interdum sæpius tibi loquere, dum practicandi est occasio.

2. *Transcamus usque Bethlehem,* Ibid. Non fuit pura rememoratio eorum, quæ audierant, sed practica; ex qua concluderunt *transire.* Cura, ut tales sint tuæ meditationes, quibus tibi loqueris, ut semper concludas transitum, vel ab imperfectione ad virtutem, vel ad altiore[m] virtutis gradum.

3. *Et videamus hoc verbum, quod factum est, quod Dominus ostendit nobis.* Ibid. Volunt experiri, quod audierant. Quanta ostendit tibi Deus, cum tibi interiorius loquitur! Debes ea opere experiri: aliàs frustratur Deus suo fine, tu fructu. Si hactenus id fecisses, quantus evasisses! ipse tibi impedimento fuisti, sis ipse tibi stimulo.

DIE 30. DECEMBRIS.

Pastores veniunt ad præsepe Domini.

1. **ET** *venerunt festinantes.* Luc. Etsi Angelus non mandaverit, quia tamen Deo gratum fore illum transitum intellexerunt, festinârunt eo magis, quò majus erat desiderium. Ubi lumen hausisti, & propositum statuisti, festinandum est, & prima exequendi occasio arripienda. Facies id, si verum sit in te desiderium. Hoc in meditationibus tuis semper excita.

2. *Et invenerunt MARIAM, & JOSEPH, & Infantem positum in præsepio.* Ibid. Cogita, qui eorum fuerint affectus, submissionis, admirationis, laudis, gaudii, &c. Correspondit eventus lumini, quod Angelus dedit, quia properârunt experiri. Propera modo ad opus propositum, sic invenies Jesum, aut ejus virtutem. Cur id hæctenus non fecisti?

3. *Videntes autem cognoverunt de Verbo, quod dictum erat illis de puero hoc.* Ibid. Dictum erat illis: nondum erat plena cognitio. Viderunt, & tunc demum cognoverunt. Experienciâ virtus discitur. Audivisti tibi loquentem Deum in meditatione? est initium hujus scientiæ. Accede ad opus, tunc plene cognosces. Quia id non præstitisti hæctenus, inde es tam rudis.

DIE 31. DECEMBRIS.

Reditus pastorum à præsepio Domini.

1. **M***ARIA autem conservabat omnia verba hæc, conferens in corde suo.* Luc. 2. Habes exemplar meditantis, MARIAM. 1. *Conservabat verba à Pastoribus in laudem Christi dicta: quid tu*

tu conservas eorum, quæ tibi Deus dicit? 2. *Omnia.* Quare non omnia lumina in praxim trahis? 3. *Conferebat in corde.* Debes ea sæpius in memoriam revocare, captare occasionem exequendi.

2. *Reversi sunt Pastores glorificantes, & laudantes Deum.* Ibid. Ex conversatione cum Christo, remanserunt in illis affectus gloriæ Dei, quos retulerunt ad officium suum. O felix! si ex meditatione tua referas tales affectus, eosque in officio tuo exerceas! Miser, si hoc non facias! Quanta enim perdis!

3. *In omnibus, quæ audierant, & viderant.* Ibid. In omnibus glorificant Deum. Nihil præteri occasionis, quò id exerceas, cujus lumen habuisti. Multas invenies occasiones, si attendas, & tuò lucrò: multas perdes, & tuò damnò, si non attendas. Et sic Deum glorificabis, quòd facias; quæ ipse ingessit.

DIE I. JANUARI.

De Circumcisione Domini.

1. *Postquam consummati sunt dies octo, ut circumcideretur puer.* Luc. 2. Christus à lege exemptus erat, quia peccatum non habebat per eam abolendam. Vult tamen subesse legi, quamvis duræ. At tu leges quamvis faciles, facile transgredieris! difficiles declinas. Est hoc Christum imitari? resolve te etiam ad ardua, ubi vides Dei voluntatem.

2. *Ut circumcideretur Puer.* Considera B. Virginem à Deo edoctam, resolvissè se ad Filium circumcisioni subjiciendum. Amabat Filium terrimè, sciebat quis illi dolor inferendus esset.

Non

Non dat locum affectui, quia sciebat voluntatem Dei. Ubi de Dei voluntate constat, sepone affectum. Offendetur proximus? sed Deus jubet. Utri attendes? utri attendisti hactenus?

3. *Ut circumcideretur Puer.* Considera dolorem quem senserit Christus, quia erat tenellus Infans, complexionis delicatissimæ. Hunc prævidit, quia habebat perfectum usum rationis: & tamen voluit legi parere. Quantum disto à Jesu meo? ubi modicum confusionis, aut doloris prævideo, quantum fugio? sed ab hoc die non fugiam: imò ambiam ad majorem imitationem Jesu.

DIE 2. JANUARI.

Quos fines habuerit Christus suæ circum-
cisionis.

1. **C**onsidera primum ejus finem fuisse, ut ostenderet se verum, non phantasticum corpus assumpsisse, & se esse hominem nobis similem, doloribus subiectum. Gratias age, adora hoc corpus. Sed discce, non esse contentus specie, seu apparentiâ virtutis, sed veram quære. Hanc autem probare debes circumcissione mortificationis.

2. Secundus finis fuit, ut se declararet filium Abrahæ, cui lex illa data fuit. Nec absterruit eum dolor, aut confusio. Esne Religiosus? non es, si id non probas circumcissione mortificationis: si te confusionis, aut doloris timor a professionis opere avertit. Non sic ages imposterum.

3. Tertius finis fuit, ut jam tum adhuc infans suum in nos amorem testaretur. Insigne enim amoris argumentum est, pro eo pati, quem amas. Quis vicissim tuus in Deum est amor? paterisne pro eo? habesne promptam ad ardua voluntatem,

tem, ac desiderium? Excipisne promptè, & amanter, seu oblata, seu imperata? Hæc impostum tui amoris exhibe documenta.

DIE 3. JANUARI.

Præcipuæ virtutes à Christo in Circumcisione exhibitæ.

1. **P**rima sit *Obedientia*. Non tenebatur lege, & se subjecit. Et quoniam circumcisio erat protestatio subjectionis ad universam legem. significavit se illam totam servandam suscipere, quamvis gravis esset. Si is tam grave jugum tui causâ suscepit: cur tu cum tam levi jugo Religiosæ Regulæ luctaris? cur sæpe excutis, cujus fructus est tuus. At non te obligant sub peccato? Ideo suavius est jugum. Amplectere.

2. *Humilitas*. Circumcisio erat remedium peccati originalis: arguebatur id contraxisse, qui circumcidebatur. Christus nec peccavit, nec peccare potuit: accipit tamen peccati stigma. O humilitas Dei mei! sed ô superbia mea! Re ipsa peccator sum, & videri nolo. Discam libenter confundi, nec quæram alius videri, quam sim.

3. *Charitas*. Quâ properavit pro me in vulnera. Amor mei non imperavit illi gloriam, aut delicias; sed vulnera, & sanguinem, & quidem in infantia. O quam ferò ego te amavi! sed quam etiamnum tepide te amo, dum duris, & asperis amorem testari fugio.

DIE 4. JANUARI.

De impositione Nominis JESU.

1. **V**ocatum est nomen ejus *Jesus*. Luc. 2. Quando? In ipsa circumcisione; quando signum
 etiam. Medis. C pec-

peccati accepit, & se se infinitè humiliavit: tunc Deus dedit illi gloriosum nomen, quod est super omne nomen. Ita Deus elevat eum, qui se humiliat. Habes nomen socii Jesu, ut illud dignè feras; esto socius humilitatis

2. *Vocatum est nomen ejus Jesus.* Quando? in ipsa circumcissione. Adeo nomen Jesu, ipsi Jesu sanguine constitit. Habes nomen socii Jesu: ut illud dignè sustineas, circumcidi, imò mortificari est opus. Hoc instituti nostri ratio à nobis postulat. Fecisti id hætenus? facies imposterum? Quomodo?

3. *Vocatum est nomen ejus Jesus.* Quando? In circumcissione, quâ se obligabat ad implendam totam legem antiquam. Habes nomen socii Jesu: Vide quam te hoc obliget ad observantiam regularem. Singulæ enim continent quandam imitationem Jesu. Examina, reflecte te, statue.

DIE 5. JANUARI.

Causa Nominis JESU, & quam nobis inferat obligatiouem.

1. *Ipsæ enim salvum faciet populum suum.* Luc 2. Ideo vocatur Jesus Salvator. Nomen hoc quàm apte convenit rei significatæ. Nomen habes socii Jesu? habesne etiam zelum salvandi animas? Nomen sine actu, ignominia tibi erit. Excita ergo in te zelum exemplò Christi.

2. *Discedat ab iniquitate, qui nominat nomen Jesu.* 2. Timoth. 2. Si reputat indignum Paulus, nomen Jesu pronunciari à peccatore: quanto indignius erit, nomen Jesu gerere, & peccare? Hæc ergo prima est obligatio, ut non pecces, qui hoc nomen geris, ne levissime quidem. Examina, doce, propone.

3. *Omnia*

3. *Omne, quodcunque facitis in verbo, aut in opere, omnia in nomine Domini Jesu.* Col. 3. Hæc secunda est obligatio, quam etiam ipsum nomen a te postulat. Jesus, & ejus gloria sit initium, sit medium, sit finis operum tuorum, & verborum; nec alium quære. Examina, time, dole, ama, &c.

DIE 6. JANUARI.

De vocatione Magorum.

1. *C*um natus esset Jesus, ecce Magi ab oriente, &c. Matth. 2. Eodem tempore manifestavit se Judæis per Angelum, Gentibus per stellam. Agnosce bonitatem Dei, qui neminem vult exclusum à gratia, quamvis immerentem, & reluctantem. Expertus id es ipse. Recogita annos priores, & intelliges; miraberis, quod te Deus ita sit persecutus; dolebis, gratias ages, propones, petes gratiam.

2. *Vidimus stellam.* Quàm infelix status cœcæ gentilitatis ante natum Christum! sed hodie vidit lucem magnam. Cogita, quis olim status animæ tuæ ante ortam stellam vocationis? quis hodie? Detestare priorem, gratias age pro præsentī.

3. *Vidimus stellam.* Vocat eos per stellam, quia dediti erant stellarum speculationi. Ita Deus in vocandi modo accommodat se hominum inclinationi: & simul erudit interne, quid stella significet, & movet illorum voluntatem. Agnosce 1. gratiæ necessitatem, sine qua ad Deum non venies. Hanc ora. 2. Disce experiri illorum inclinationes, quibuscum agis, & per eas illos lucrari. 3. Disce ex creatis ascendere ad increata, ut illi ex stella stellarum Dominum agnoverunt.

DIE 7. JANUARI.

De Magorum ad vocationem cooperatione.

1. *Vidimus*. Matth. 1. Non soli tres, sed fortè alii omnes in eadem regione viderunt stellam: soli tamen tres eam secuti sunt. Vere *multi sunt vocari, pauci verò electi*. Quot stellas Divinarum inspirationum tibi misit Deus, quàm paucas es secutus! Dole, time, ora plures, & stude vocationem tuam certam facere per bona opera.

2. *Vidimus: venimus*. Ut viderent, Deus dedit; quòd venerint, de suo addiderunt. Frustrà est gratia, ubi non est cooperatio. Vide, ne gratia Dei in te vacua sit. Nullam negliges, quid, fortè quævis est ultima?

3. *Vidimus: venimus*. Inter videre stellam, & venire nihil interponitur: statim enim vocanti Deo obediverunt, non retracti tam multorum exemplò, quos cura domùs, affectus propinquorum, propria commoda retinebant. Disce non differre, dum lumen habes. Rumpe vincula terrenorum affectuum.

DIE 8. JANUARI.

De egressu ex Patria, & itinere Magorum.

1. *Vidimus: venimus*. Matth. 2. Non ignorant itinerum molestias, terræ, & aëris injurias: fortè & plura sibi præfigunt animo, & tamen iter aggrediuntur. Magna generositas! Hæc volentibus ad Deum ire, semper est necessaria: hoc enim iter molestiis non caret. Confortare ergo, & esto robustus, ac generosas cape resolutiones Deo confisus.

2. *Vidimus: venimus*. Iter ineunt, quia vocati; quò?

quò? ignorant: generosè, & intrepidè se Divinæ committunt vocationi. Fiducia illa stellam ducem merita est. Quàm sæpe times aliquid aggre-
di, quia eventum nescis. Ubi credis Deum velle, resolve te, fide: qui dedit velle, dabit & perficere.

3. *Vidimus.* Considera, quis per iter fuerit eorum sensus, habitò semper præ oculis stellæ miraculò? quæ Deo gratiæ? quæ in adversis patientia? quod Christi desiderium? quæ eum invenien-
di cura? Confundere, quòd cum tot luminibus tam parvum habeas desiderium Christi, & inven-
iendi curam. Gratias age pro luminibus, ora
plura & efficacia, sequi statue.

DIE 9. JANUARI.

Tres Magi Hierosolymam ingrediuntur.

1. *Ubi est, qui natus est, &c.* Matth. 2. Quia stellam amiserunt, necesse habent ex hominibus quærere. Sed quæ causa amissæ stellæ? Forte voluit Deus eorum constantiam probare. Solet enim etiam sanctis eripere solatia spiritua-
lia, & ariditatem immittere. Quid ages tali casu? Ecce Magi pergunt, intrant civitatem, spe
pleni, quòd Deus medium suggeret. Tu pariter nè cade animo.

2. *Ubi est, qui natus est Rex Judæorum:* Quàm intrepida animi magnitudo! In ipsa Urbe Hero-
di subdita, vivo, & regnante Herode Rege, ho-
mine ambitioso; quærunt de novo Rege, non sine
vitæ periculo. Fides viva, & ardens desiderium,
expunxerunt metum periculi: quoties tu ob leves
metus, vel non suscipis pro Deo, quæ parum sunt
ardua; vel suscepta deseris! Confundere, emenda.

3. *Audiens autem Herodes turbatus est, & omnis Hierosolyma cum eo.* Matth. 2. Turbatur Rex ambitione Regni, quod timet perdere: turbatur populus Regis studiô, quem timet offendere. En quomodo vel unus ad terrena affectus, una inordinata passio pacem animi turbat. Amas hanc pacem? ejice animo inordinatos affectus.

DIE 10. JANUARI.

Herodes quærit, ubi Christus nascatur.

1. *ET congregans Principes Sacerdotum, & scribas populi.* Matth. 2. Quàm admiranda Dei providentia! Herodes malevolus; Sacerdotes iniqui serviunt ad dirigendos Magos: Lauda, & magnifica hanc. Si verò cognoscere vis Dei voluntatem, ejus ministros, Superiores tuos consule. Etsi iniqui sint, Deus non patitur illos in eo errare, quod per te vult fieri.

2. *Sciscitabatur ab eis, ubi Christus nasceretur.* Ibid. Quàm pia in speciem quæstio! quam sinister in corde affectus! quam sancti videri volunt affectus pessimi! Non sinas passionem ullam dominari: etiam te dementabit, ut quod facis passione, excuses virtute; quod ex ira, vestias zelô, &c.

3. *At illi dixerunt: in Bethlehem Judæ.* Ibid. Sciverunt hoc ex scriptura, quam allegant; docent hoc Magos, & tamen stolidi ipsi Jesum non quærunt tam sibi vicinum. O ingrati! Quanta tu audis, quanta scis, per quæ venire possis ad Jesum! & cur non facis? oberit ipsum scire, si nolis facere.

DIE II. JANUARI.

Herodes cum Magis agit.

1. **C**lam vocatis Magis diligenter didicit ab eis tempus stellæ. Matt. 2. Quo fine? ut inde colligeret ætatem pueri, & deinde in eam ætatem sæviret, ut Regem exstingeret. Et adverte illud: diligenter didicit: si filii iniquitatis diligenter arripiunt media ad suos fines pessimos, quid te facere oportebit ad sanctos fines?

2. *Ite, & interrogate diligenter de puero, & cum inveneritis, renunciate mihi.* Ibid. Vide progressum malitiæ. Herodes jam ipsos Magos vult inducere, ut cooperentur suæ passioni. Hæc est natura passionum indomitæ, semper ad pejora proserpunt. Hæc tibi sit ratio, ut ad eas opprimendas animeris. Vide ergo, quæ sit in corde, & tempestivè cultrum admove.

3. *Ut & ego veniens adorem eum.* Ibid. Mendacium est: dic clarè: ut occidam eum. Hucusque enim progressa est passio, ut ad stabiliendum regnum, velit Christum peremptum. Indignare, detestare. Velis & tu ad stabiliendum tibi cœleste regnum, peremptum amorem proprium, & pravos affectus. Nam minus hi cum illo regno stare possunt, quam vivus Christus cum terrestri, aut Herode vivo.

DIE 12. JANUARI.

Magi discedunt Hierosolymis, & veniunt in Bethlehem.

1. **Q**ui cum audissent Regem, abierunt. Matth. 2. Considera, qua sollicitudine Christum quærent. Id solum agunt in urbe, quod ad hoc

servit: quærunt, ubi nascatur; intelligent. Hoc habito statim prosequuntur iter, nec patiuntur se curiositatibus rerum detineri. At tu in suscepto virtutis itinere, quot diverticula ad creaturas quæris? quàm lentè progredieris? Non seriò vult, qui lente vult.

2. *Et ecce stella, quam viderant in Oriente, antecedebar eos.* Ibid. Amissam stellam tolerârunt cum patientia, & spe, non desistunt tamen ab itinere. Ideo consolatur eos Deus remissâ stellâ. Vide, quam bonus est Deus in eos, qui tempore desolationis nihil remittunt de virtutis progressu. Ne ergo animo concide, si absit consolatio: fer patienter, & spera. Aderit rursus Deus: huic te cõmitte.

3. *Usquedum veniens staret suprâ, ubi erat puer.* Ibid. Quò deduxit tandem hæc stella? Ad Deum quidem, quem quærebant; sed tamen etiam ad vile stabulum. Vide, quò stellæ, seu cognitiones tuæ te ducant. Si ad vanitatem, existimationem, &c. ignes fatui sunt: si ad vilitatem, & contemptum tui, stellæ Dei sunt. Has sequere, & Deum tibi monstrabunt.

DOMINICA I. POSTEPIPHANIAM.

De adoratione Magorum.

1. *ET intrantes domum invenerunt puerum cum MARIA matre ejus.* Matth. 2. Considera 1. Hos Principes non horruisse sordes stabuli, non despexisse paupertatem, aut infirmitatem infantis; sed interne illustratos agnovisse hunc puerum esse Deum. Lauda Deum, gratulare Magis. Neque tu horre paupertatem, aut contemptum. Postquam enim Deus pro te vilis factus, non invenies eum per gloriam, & existimationem. Refleste, dole, desidera, pete.

2. *Et*

2. *Et procidentes adoraverunt eum.* Ibid. Proci-
derunt primum, non tantum corpore in terram
in reverentiæ signum; sed etiam animo in suum
nihilum, agnoscendo se undequaque ab hoc Deo
pendere. Deinde adorârunt perfecto cultu latriæ;
quia Deum cognoverunt. Ecce quam sui æsti-
mationem excitat Deus cognitus? quam reveren-
tiam? quam amicorum subjectionem? quem sui
contemptum? Excelleres his, si Deum bene-
nôsses.

3. *Et procidentes adoraverunt.* Considera qui fue-
rint eorum affectus. 1. Eos gratias egisse, quòd
venerit in Mundum ad redimendos homines. 2.
Quòd per stellam eos ad se deduxerit. 3. Ob-
tulisse se ad perpetua ejus obsequia servos infi-
mos. Excita in te eosdem affectus, & offer te
ad quævis ardua.

F E R I A II.

De oblatione munerum.

1. *A* *Pertis thesauris obtulerunt ei munera, aurum,*
ibius, & myrrham. Matth. 2. Eidem testan-
tur opere; nec comparent vacui ante Regem:
donant illi quidquid habent pretiosum. Nec du-
bium est obtulisse etiam, quod iisdem muneri-
bus designatur; cum auro charitatem; cum thure
devotionem; cum myrrha mortificationem. Cre-
dis Deum; operibus proba. Offer eidem tria;
hæc mystica dona; sed oblata semel, non am-
plius recipe.

2. *Obtulerunt ei munera.* Considera, quàm gra-
ta fuerint hæc munera Christo Domino: non quia
pretiosa ex materia, sed quia conjuncta erant 1.
cum viva fide. 2. pietate. 3. humilitate, & sub-

jectione. 4. amore. Deus enim solum æstimat ex quanto affectu, non quantum dones. Cum igitur offers munus tuum Deo, affectum procura.

3. *Obtulerunt ei munera.* Considera, quid Deus, qui se liberalitate nostra vinci non patitur, his donis responderit. Etsi nihil constet, considerare tamen licet, retulisse auro augmentum sapientiæ, & charitatis: thuri, orationis, ac devotionis: myrrhæ, incorruptionem, seu gratiam, quâ præservati fuerint à peccatis. Nihil frustra Deo dabis; quô plus dederis, plus accipies: dabis vilia, accipies pretiosa.

F E R I A III.

De reditu Magorum in regionem suam.

1. *ET responsô acceptô in somnis, ne redirent ad Herodem.* Matth. 2. Perplexi hærebant, an eadem, an aliâ viâ redirent. Recurrisse ad Deum crediderim, & orasse lumen. Deus mittit Angelum, qui doceat. Agnosce, & lauda Dei providentiam, quæ suos regit. Committe te illi, maxime in dubiis, & adversis, certus quod aderit.

2. *Responsô acceptô, ne redirent ad Herodem.* Prompti sunt, etsi via suggeratur forte longior, molestior, ignota: nec pensi habent, promississe reditum Herodi, dum Deus aliud jubet. Disce posthabendum respectum, & motiva humana, cum quid Deus, vel superior jubet: eundem viâ, quâ te superiores, & Regulæ ducunt. Reflecte te in priora, ordina futura.

3. *Per aliam viam reversi sunt in regionem suam.* Ibid. Priore via amiserunt stellam, inciderunt in Herodem, inciderunt in periculum promissione

ne

ne reditûs data. Quid fieret, si redirent? Faciant te propria pericula cautum. Noli eò redire, ubi expertus es, te deliquisse; vitata occasione vitabis periculum. Quàm sæpe id es expertus.

F E R I A I V.

Ex infantia Christi disce Mundi contemptum.

1. *Nolite diligere Mundum.* 1. Joan. 2. Ita te Jesus exemplò suò alloquitur. Nascitur secreto, in nocte, sinè pompa, sine hominum accursu, ignotus omnibus; & natus, non se Regibus Mundi, sed despectis solum Pastoribus promulgat. Non est hoc velle latere? Quid ergo tu quæris lucem? Disce sanctè latere? & solitudinem amare; te plebi potius cōmunicare, quàm inclytis.

2. *Nolite diligere mundum.* Considera Christum à nemine ex vicina Bethlehem, à nemine ex Jerusalem visitatum. Non ignorabant hi natum, qui Magos ipsos docuerant, ubi nasceretur. Mansit ergo totis 40. diebus in stabulo despectus à suis, qui poterat sui honorem omnibus imperare. Non est hoc mundum contemnere? Et tu voles tibi applaudi? te æstimari? uter errat, tu? an Dei Filius?

3. *Nolite diligere mundum.* Considera accepisse quidem Christum à Magis aurum; poterat meliorem sibi commoditatem curare, unde magis ab hominibus æstimeretur, qui transeuntes eum videbant, & contemnebant. Non est hoc Mundum despiciere? cū ejus plausum habere possis, nolle? At quàm tu sollicitus es, ut vel lucreris æstimationem: vel non perdas. Elige contemptum ad majorem Christi imitationem.

F E R I A V.

Disce ex infantia Christi, Humilitatem.

1. *Discite à me, quia mitis sum, & humilis corde.*

Matth. 11. Ita ad te clamat Jesus ex stabulo, ex præsepi, ex pannis. Humilitas est descensus ad vilitatem. Ad quantam descendit Deus, qui est infinitæ dignitatis! factus homo, servus, similis peccatoribus. Admirare, gratias age, ama. Et tu audebis superbire? Ex necessitate tibi convenit humiliari, quia re ipsa vilis es. Expende vilitatem tuam, & deprime cor tuum.

2. Considera, quomodo Christus in stabulo occultat majestatem Dei, & perfectiones: Sapientiam, potentiam, gloriam, divitias, &c. adora tu illas. Mirare, lauda, gratias age humiliato Deo. Disce tua non jactare, & gratias occultare.

3. Considera Christum omnia viliora elegisse: pro Matre pauperem, & despectam puellam; Pro nutritio fabrum, pro habitatione stabulum, pro cunis præsepe, pro lecto fœnum &c. An tu meliora affectabis? an deberi tibi judicabis? Confundere vilis homo, dum pro te Deus factus est vilis.

F E R I A VI.

Disce ex Infantia Christi, paupertatem.

1. *Propter nos egenus factus est.* 2. Cor. 8. Quis?

Dominus universorum, in cujus domo sunt gloria, & divitiæ; qui omnibus dat abundanter, pro se nihil habet superfluum. Inspice pauperem casam: obstupesce: æstima paupertatem, quam tanti fecit Deus; ut cum eam non reperiret in cœlo, in terris quæstiverit. Sed rescinde etiam superflua à te, ut Jesum propius imiteris.

2. Pro-

2. *Propter nos egenus factus est.* Non tantum caret superfluis, sed vix necessaria habet, panni vilissimi, & paucissimi; cunæ, præsepe; lectus, fœnum; & ut se calefaciat, halitus animalium. Obstupesce pauperem Deum. Confundere, qui vis pauper esse, sed defectum non pati, qui si fortè occurrat, inquietaris, murmuras. Disce cum paupere Jesu, etiam necessariorum defectum tolerare.

3. *Propter nos egenus factus est.* Non tantum necessariis caruit, sed ea, quæ etiam habuit, vilissima fuerunt, & incommoda; stabulum frigori pervium, panni viles, præsepe durum, fœnum asperum. Æstima, & dic cum Bernardo: *Quanto pro me vilior, tanto mihi charior.* Nonne hæc te confundunt, qui licet Mundum deserueris, adhuc amas, & quæris tuas commoditates? siccine imitaberis Jesum.

S A B B A T H O.

Disce ex Infantia Christi, Obedientiam.

1. **H**umiliavit semetipsum factus obediens. Philipp. 2. Primus ejus nascentis actus fuit obedientia. Natus enim est, dum in ejus exercitio esset, ut ex Nazareth in Bethlehem ascenderet. Et quis? cui obedivit? Imperatori terreno Rex regum, homini Deus; peccatori, qui tollit peccata Mundi. Vides, quanti Christus fecerit obedientiam. Nec in contrarium motus est iniquitate mandantis, nec difficultate itineris: quia sic sciebat Patrem glorificari. Disce æstimare, amare obedientiam: non spectare personam jubentis, sed Deum per illam jubentem; omnis enim potestas a Deo est.

2. Hu-

2. *Humiliavit semetipsum factus obediens.* Considera quàm ab arduis cœperit obedientiam exercere: ab humilitate, paupertate extrema, adversis, & incommoditatibus, &c. Sciebat optimam esse voluntatem, quæ Divinæ consentit per omnia. Disce in Superiore Deum agnoscere, & plenum tuæ voluntatis holocaustum ad quæcunque ardua offerre.

3. *Humiliavit semetipsum factus obediens.* Per omnia Matri, seu in sinum accipiat, seu in fœnum reponat, & patitur se verti, reverti ad libitum Matris. Admirare Christi obedientiam, gratulare Matris felicitati. Redde etiam tam felices tuos Superiores, & sine te ab iis ad libitum moveri. Magnum hoc est Superiorum solatium: magna pars imitationis Jesu.

DOMIN. II. POST EPIPHANIAM.

Disce ex Infante Jesu, patientiam.

1. **C**onsidera 1. Potuisse Christum nasci impassibilem, amoliri à se omnem asperitatem, & dolorem: noluisse tamen; quia voluit pati in ipsa etiam tenerrima ætate; licet potuisset id differre ad robustiorem ætatem. Quid ergo tu te tantopere amas, ut omnem pœnam fugias? Vita præterita non te obligat, ut mortificationes assumes? Scis esse gratum Christo, quid differs.

2. Considera 2. ipsa incommoda, quæ patitur: frigus, fœtorem, egestatem, vulnus circumcisionis: tristitiam in anima ex consideratione tot peccatorum, & frustratæ suæ passionis. Et hæc quo affectu? Quid ego ago infirmus, si medicus pro me patitur? fugiamne pati pro Deo, qui querit pati pro me?

3. Con-

3. Considera 3. Quàm innocens, & immeritus patitur. Innocenter pati, patientia est Sanctorum: reorum, pro culpa. Tu neutram habes. Confundere. Si, quod patiaris, occurrat, milles te meritum cogita. Si pateris innocens, habes occasionem exhibendi amoris, qui per dura probatur; habes occasionem, ut similis fias Jesu Christo: non est discipulus supra Magistrum.

F E R I A II.

Disce ex Infante Jesu amorem Dei, & proximi.

1. **A**mor probatur operibus, quibus bonum amati quæritur citra proprium commodum. Considera ergo, quæ Christus opera edat, quibus bonum Dei quærit, etiam cum suo gravi incommodo. 1. Quia scivit placere Patri, toleravit omnes incommoditates. 2. Flet ex zelo honoris Dei, ob peccata hominum: quibus abolendis dat lachrymas, deinde sanguinem. 3. Invitat ad specum illam pastores, & gentiles, ut notam illis faciat gloriam Dei. Si amas Deum, operibus proba: primum in te, deinde in aliis gloriam ejus promove. Dignus est enim cui soli debetur gloria.

2. Considera Christum etiam, in nos probasse amorem, omnes illas incommoditates pro nobis offerendo. Gratias age, & ama Jesum. Disce amare proximum, eique benefacere, non ob commodum tuum, sed ob ejus salutem. Purifica omnem amorem erga homines, ut hoc solum illis velis: quia hoc est esse adiutorem Christi in redemptione hominum.

3. Considera Christum, suum in nos amorem pro-

probâsse, quòd omnia mala nostra corporis, & animæ in se suscepit, dolores, tristitias, tædia, pœnas, quas merebamur, satisfactiones pro peccatis; quas reddere non valebamus. Languores nostros ipse tulit, & dolores nostros ipse portavit. Quid debes medico, qui pro te factus est infirmus? Quid vadi, qui pro te satisfecit? Non poteris tu compati proximo tuo? non ejus defectus sufferre?

F E R I A III.

Disce ab Infante Jesu; quomodo te sanctè
ames.

1. **A** Mare seipsum sanctè, est velle sibi ipsi bonum, non falsum, & apparens, sed verum & solidum, seu æternum. Quod bonum sibi voluit Jesus? non suum, sed gloriæ Dei. Jam tum in infantia impressum illud habebat: *Non quaero gloriam meam, sed ejus qui misit me.* Oppone amorem, quo te hætenus amasti, quam inordinatus! quam sensualis est! Imò odisti te, quia indulxisti tibi ea, quæ à Deo avertunt. Corrige ergo amorem tui: ut nihil tibi velis, quod non sit pro gloria Dei; alias te odisti, tibi obes.

2. Considera amorem Jesu in seipsum, fuisse desiderium voluntatis Divinæ in se adimplendæ: Qui semper facit ea, quæ Deo sunt placita, etiam in præsepi hoc egit. Nullum majus bonum tibi velle potest, quàm ut voluntas illa sit regula tua. Nunquam errabis, semper Deo placebis. Quàm pauci eam respiciunt, ut sequantur! quam multi sensum ducem potius sequuntur! si tu es inter illos, dole, & emenda.

3. Considera Christum ex hoc amore sancto in
seipsum,

seipsum, acceptâsse dolores, humiliationes, paupertatem, contemptum; quia relucebat in his beneplacitum Dei, & salus mundi. Unde sancto sui amore impugnabat sensum, & ei vim inferebat. Sic amare te debes: generosè tuos sensus, & passiones expugnare; apprehendere humilia, dura, & aspera; quia omnino hæc est voluntas Dei. Quàm felix esses, si à puero hoc fecisses! quàm infelix futurus, nisi modò constanter id facias?

F E R I A I V.

Iter B. Virginis ex Bethlehem in Hierusalem ad purificandum.

1. *ET postquam impleti sunt dies purgationis.* Luc.

2. Considera, quàm sollicita fuerit de implenda purgationis lege, quâ non tenebatur. Non excusat se sua servata Virginitate, prolis dignitatè. Accepit exemplum Filii, qui implevit legem circumcisionis, cum nec egeret, nec teneretur. Gloriam suam reputat, si inter immundas falso judicio accenseatur; cum sic ejus filius sit numeratus inter peccatores. O admiranda obedientia, & humilitas! O quàm ego sum alius! sum coram Deo peccator; & coram hominibus de puncto honoris luctor. O pudor! Disce à Jesu & Maria.

2. Considera 2. Quo sensu B. Virgo, & S. Joseph reliquerint stabulum, in quo soli cum solo Jesu inter tot asperitates, in summa paupertate deliciabantur. In defectu rerum omnium, una & abundans erat illis consolatio, esse cum Jesu. Cum Jesu nullus locus est solitudo, nulla paupertas dura, nullum incommodum molestum. At molesta sunt illa tibi? Mi bone, non es totus

Avano. Medis.

D

cum

cum Jesu : mendicas à creaturis solatia , sed apparentia ; & vera despicias . Relinquis fontem aquæ vivæ , & fodis tibi cisternas .

3. Considera itinerantium paupertatem , modestiam , patientiam , dum à transeuntibus contemnuntur , dum à diversoriis excluduntur . Audi pios discursus , plenos variis affectibus in Jesum . Vide alternantes obsequia puero Jesu , nunc Mariam , nunc Josephum gestantes puerum , &c. & cum qua reverentia , &c. Utinam hi sint affectus tui , cum Jesum in Eucharistia sumptum corde geris .

F E R I A V.

De causis Purificationis B. Virginis.

1. *Postquam impleti sunt dies Purificationis ejus secundum legem Moysis.* Luc. 2. Cum certum sit Beatissimam Virginem pluribus titulis exemptam fuisse ab obligatione legis purificationis , examina causas , cur tamen voluerit purificari ? Prima causa est Dionys. Carthus. *ut legi obediret* , in qua Legislatorem reverebatur . Perfecta obedientia plus peragit , quam tenetur . Quid refert , quod non obligeris sub peccato , si regula est de re licita ? Noli eo descendere , ut id tantum velis , quod non potes sine peccato non velle . Cadentium hoc est principium . Tu id cave . Adde , quod in hoc sit humilitatis exemplum .

2. Considera secundam ab eodem causam assignatam esse , ut *imitaretur filium suum , quem vidit legi circumcisionis subiectum* , qui eadem non tenebatur . En motivum , quò tibi persuadeas regularum observantiam , tametsi illæ sub peccato non obligent ; quia sic magis Christum , & B. Virgi-

Virginem imitaris. Errare non potes eâ viâ , quâ filius Dei præcedit. Dole , quod eâ non iveris : time , si non eas ; ama , & ibis.

3. Considera tertiam causam fuisse , ut purissima Mater , magis purificaretur , non quidem per recessum ab impuro , sed per accessum ad summè purum. Assimilavit enim se magis primæ puritatis regulæ Christo Jesu. Unde credunt Patres ejus puritatem in hoc mysterio auctam fuisse ; sicut virginitatem in partu. Si te non movet ad regularum observantiam , ut magis per eas ad summè purum accedas ; moveat te , ut ab impuro recedas. Inspice te , & vide infirmitatem tuam. Accede etiam ad summè purum desiderium proficiendi in via virtutis.

F E R I A VI.

De aliis causis Purificationis.

1. *Postquam impleri sunt dies Purificationis.* Expende aliam causam à Carthusiano traditam , ut vitaret scandalum Judæorum. Peperisse sciverant : esse Matrem Dei ignorabant. Ne scandalo sit Mater Dei , abstinet privilegiô. Disce hinc , esse quandoque aliqua præstanda , ad quæ non obligaris , ne aliis sis scandalo : aliqua pariter omittenda , quæ licite ageres. Hoc charitas poscit.

2. Considera aliam causam ab eodem traditam , ut conformaret se aliis mulieribus in licitis , & honestis. Non singulari ergo via incedit Virgo , sed communi. Non utere , multo minus pete exemptiones , & singularitates. Via communis secura est magis , quia magis probata , & regulis a Deo dictatis firmata. Hac Sancti præivere. Hanc constanter tehe.

D 2

3. Con-

3. Considera aliam causam à Petro Blesensi traditam: *ut debitis supererogaret indebita*. Non tenebatur. Ergone non agendum, ad quod non teneris? plura amat Deus, quam imperet. Graviora sunt obsequia, quæ citra debitum exhibentur, quam quæ cum debito præstantur. Avarus nimium es, si Deo nihil ultra præcepti debitum impendas. Vellésne, ut Deus nihil tibi impenderet, quod non tenetur? Quam miser, quam egenus esses!

S A B B A T H O.

Quas præcipuè virtutes B. Virgo in sua Purificatione exhibuerit.

1. **I**nsinuavi supra obedientiam, & amorem puritatis. Nunc accipe *Humilitatem*. Videbat se æstimandam cæteris mulieribus parem. Non curat, ut videatur pura, sed ut sit. Non prodit se Matrem Dei, cum sit. O quantum abes! nōne videri magis curas, quam esse bonus Religiosus, &c. Vidcri alienum, & extraneum est; esse, intrinsecum est, & solum prodest. Cura ergo magis esse, quod vis videri. Nec videri velis, sed esse.

2. Considera exhibitum tibi paupertatis exemplum à B. Virgine. Poterat ea ditiorum more agnum offerre, si aurum à Magis oblatum huc impendisset: elegit pauperum sacrificium: quia vidit Jesum pro nobis pauperem factum. Non eligis tu tibi honoratiora? non procuras? non gaudes melioribus? At hocne est pauperem Jesum imitari? Non dubita tantò gratius Deo fuisse sacrificium columbarum, quanto erat vilius. Quid tu reddes Deo tuo?

3. Con-

3. Considera devotionem , quâ filium suum , & munus Sacerdoti præsentavit : quâ hanc oblationem comitata sit intentionis puritate ? quâ charitate ? &c. Confer tuam cum illius devotione. Vide , quantum tibi desit : penetra ejus necessitatem in tua vocatione. Digere tibi tempora , & actiones , quibus te magis cum Deo conjungas.

DOMIN. III. POST EPIPHANIAM.

Quare Christus offerri voluerit.

1. *Tulerunt illum in Hierusalem , ut sisterent eum Domino.* Luc. 2. Considera authorem legis voluisse implere opere , quod verbô jussit. Legislator , aut Doctor nullô magis legem suam , aut doctrinam firmat , quàm opere. Multa de virtute , de Deo aliis dicis : sed facisne etiam ? Non laudatur à Christo , qui solum docuerit , aut præceperit , sed *qui fecerit , & docuerit.* Vide ergo , ut verba tua firmes operibus. Virtus enim consistit non in dictis , sed in factis.

2. Considera cum , qui venerat Magister humilitatis , nullam ejus exhibendæ occasionem præterisse. Æstimabatur purus homo , ut cæteri , eadem lege peccati obstrictus : quid tum ? Dei Filius magis attendit , quæ grata sunt Patri , quàm quæ sibi honorifica. At tu fortè contrarium attendis ? Forte etiam , quæ Deo debes , ad tuum honorem torques ? Quô plus tu ipse honori tuo studes , minus eum Deus procurabit , minus concedet : quia *gloriam suam alteri non dabit.*

3. Considera , Christum voluisse duplici titulo nostrum esse : ideo , qui datus à Patre fuerat , voluit præsentatione emi , ut ait S. Thom. de

Villanova. Vide, quomodo titulos quærit, & cumulat, quibus tuus sit. Idem tu præsta in illum. Quot tibi suppetunt? quot tu perdis, ac negligis. Esto posthac sollicitus magis, ut sis Dei, quam fueris hætenus. Titulos suggerit omnis hora, omnis creatura. Quò tu magis Dei fueris, Deus erit magis tuus.

F E R I A II.

Mater Filium, Filius semetipsum offert.

1. **C**onsidera, qui fuerint affectus Virginis in Deum, cui hanc hostiam offerebat, fidei, adorationis, gratiarum actionis pro omnibus donis sibi impensis, charitatis, sui ipsius resignationis: quæ deinde in nos charitas, quia eum offerebat Divinæ justitiæ pro nostra salute. Gratias age Virgini. Disce hanc quoque hostiam iisdem affectibus pro peccatis tuis offerre. Cum hac offer teipsum, quidquid es, quidquid potes: alias acceptus non eris. Non enim gratum est Deo, nisi quod cum Christo, aut ejus meritis offertur.

2. Considera, quomodo se Christus ipse æterno Patri obtulerit ad promovendam ejus gloriam, & salutem generis humani. Id verò cum quanto, quam puro affectu, sinè omni suo commodo? Accende in te zelum gloriæ Dei, & salutis proximorum. Offer te & Deo, & ejus vicariis Superioribus ad quævis ardua. Detestare priorem teporem. Pete gratiam, &c. Cogita Christum tunc etiam ad te respexisse. Quid ei debes? Reddere potes imitationem, alias nihil.

3. Considera, quam grata fuerit hæc oblatio Deo, quia offerebat Mater, offerebat seipsum Filius; offerebatur Filius pretium totius mundi, dile-

dilectissimus Patri. Offerebatur in finem gloriæ Dei, & pretium redemptionis nostræ. Gratulare Patri, Matri, mundo, quòd una tandem inventa sit oblatio, quæ Deo placeat. Agnosce & in tui pretium oblatum. Expende, quanti te fecerit Deus, quantum te amaverit. Et quid reddes, nisi amorem? Hunc etiam brutum amanti reddit.

F E R I A III.

De occurſu Simeonis ſenis, & ejus elogio.

1. **E**T homo iſte juſtus, & timoratus. Luc. 2. Pulchrum Sancti ſenis elogium. Optima ad recipiendum in ulnas, vel in animam Chriſtum, diſpoſitio eſt, Juſtitia, ſeu vitæ ſanctitas, & timor. Juſtitia Chriſtum nobis unit, timor unitum conſervat; dum non ſolum *expellit peccatum*, ſed minimos etiam nævos arcet. Nam, *qui timet Dominum, nihil negligit*. Diſce ad conſervandam animæ puritatem minimos defectus curare, ne per hos viam majoribus aperiās, & paulatim decidas. Perfectio virtutis in minimis elucet. Tunc hoc agis?

2. *Expectans conſolationem Iſraël*. Sciebat promiſſum Salvatorem; ſed videbat tot elabi ſæcula, tot Patriarchas, ac Prophetas, qui eum ſperabant, interim emortuos: ipſe tamen conſtanter expectabat. Quàm magna hæc in Deum fiducia? Quàm conſtans expectatio! Quam tu expectas conſolationem? abſit, ut vanam, vel caducam à creaturis. Ergo ſanctam in ſolo Deo? ſed nondum experiris? nondum tibi aſſecutus videris? Expecta Dominum grandi fiducia, & conſtanter. Advertit certò re ipſa, ſi eum ſpe præocupaveris.

3. *Et responsum acceperat à Spiritu sancto ; non visurum se mortem , nisi priùs videret Christum Domini.* En quid promeritus sit iustitiâ suâ , timore & expectatione ? nempe certitudinem videndi Christum. Fortè nec ausus fuit de hoc interrogare , sive ex humilitate , sive ex certa fiducia , & tamen *responsum* accepit. Habes aliquid similis felicitatis. Quot mandata , quot regulas , tot habes à Spiritu Sancto responsa , non visurum te mortem , si ea observes , cum iustitia , timore , & fiducia. Si enim dictum est : *Hoc fac , & vives ;* tuum est , ut hanc tibi promissionem certam reddas.

F E R I A IV.

Simeon accipit Christum in ulnas suas.

1. *ET venit in Spiritu in templum.* Luc. 2. Considera S. Simeonem motum ab eodem Spiritu , à quo promissionem acceperat ; festinasse spiritu fervido , ac sitibundo in templum ipsa horâ , quâ Christus inferebatur. Hanc oportunitatem si distulisset , non vidisset Christum Domini. Quantum est oportunitatem , & gratiam oblatam arripere ! Noli differre , cum gratiam habes : fortè hæc ultima est , æternum non reditura. Hoc ipsum te moveat , quod hætenus plures neglexeris , cuius merito cum dolore recordaris.

2. *Et ipse accepit eum in ulnas suas.* Promissum solum erat , quod videbit Christum : at insuper eum in ulnas accepit. Plus dat Deus , quam promittat. Tu contra plura spondes , & proponis , quam præstes. Noli esse tam parcus in eum , qui in te est tam liberalis. Accepit eum inter brachia : per quæ (ut ait Hugo) nostræ operationes significantur. Ad Deum quidem pervenitur deside-

desideriis, sed non tenetur nisi operibus. Erras ergo, si proposita statuisse contentus, ad opera non progrediaris.

3. *Et benedixit Deum, & dixit: Nunc dimittis servum tuum Domine, &c.* Considera, qui fuerint gerentis affectus, Fidei, Spei, Charitatis; gratulationis tam sibi, quam toti mundo, resignationis, ac potissimum moriendi desiderii: quod significat, nullius creaturæ amore in vita hactenus se detentum, sed sola spe videndi Jesum. Felix anima, quæ in nullas creaturas amorem spargit, sed totum in Deum colligit! Hoc postulat finis tuus, ad quem creatus es. Abstrahere ergo à creaturis affectum. Tantum accedis ad Deum, quantum ab illis recedis.

F E R I A V.

S. Simeon prophetat de Christo.

1. *E*cce positus est hic in ruinam. Luc. 2. Salvator in ruinam? sed eorum, qui cognoscent quidem Deum, sed non secundum cognitionem honorabunt; qui abutentur gratiis, & per suam malitiam vocationi non obsequuntur. Time, ne & tibi sit in ruinam, si gratiis ejus non utaris. Dole tam frequentem earum abusum. Ora tibi efficaces dari. Statue cooperari. Sit potius in ruinam tuarum passionum exemplò suò, & auxiliò.

2. *Et in resurrectionem multorum.* Imò omnium, si velint. Nemo à gratia resurgendi per Deum excluditur. Quæ bonitas ista Dei? offensus gratiam offert; læsus lædenti amicitiam quærit. Non vult mortem peccatoris, sed ut convertatur, & vivat. Nec hoc bonò, aut comodò suò, sed tuò. Impensius ergo Deus tua vult bona, quam

tu ipse tua. Quod si resurgas ejus ope, quoties iterum tuâ malitiâ cadis? O pudor! ita demum resurge, ut cadas nunquam. Sed pondus passionum opprime, ne te in lapsum trahant.

3. *Et in signum, cui contradicetur.* Eventus vitæ Christi dedit Prophetiæ veritatem. Perpetuam enim *sustinuit à peccatoribus adversus semetipsum contradictionem*: quæsitus ab Herode ad necem, à Judæis parati in eum lapides, damnata, aut spreta ejus doctrina, ipse tanquam scopus omnium opprobriorum, calumniarum, & cruciatuum positus. Sed & quoties tu vitæ ejus, & doctrinæ contradixisti! Sit tibi posthac signum Jesus, non cui contradicas, sed cui te conformes, ad quod tua desideria, tuas actiones conjicias.

F E R I A VI.

De iis, quæ Simeon B. Virgini prophetavit.

1. *Tuam ipsius animam pertransibit gladius.* Luc. 2. Vide quomodo jucundis acerba permiscet Deus. Audiverat ex Simeone B. Virgo laudes, & benedictiones sui Filii. Quæ hinc gaudia? jam de gladio audit, qui sibi non corpus, sed ipsam animam sit penetraturus. Ut Mater enim, & Filii amantissima, non poterit non gravissime sentire injurias filii. Nam amati injuria, est amantis tormentum. Vis signum, an Jesum ames? explora, quomodo ejus injurias feras, tam à te, quam ab aliis illatas. Doles, detestaris, impedis, & hoc quidem ardente zelo? Confide, quod ames; & exardesce in omnem Dei injuriam.

2. *Tuam ipsius animam pertransibit gladius.* Considera causam, ob quam voluerit Deus B. Virgini hunc doloris gladium jam in infantia Christi

sti per prophetiam imprimere. Fortè voluit eam Christo magis conformem : ut sicut ille ab infantia semper habuit sibi præsentem passionem suam , ità & illa semper ejusdem memoria torqueretur. Vide , quò evadas per assiduam crucem , & mortificationem : ad similitudinem Christi. Crescit enim virtus , cùm adversis probatur : per majorem virtutem Christo es similior. Amas hanc similitudinem? ama crucem. Ad hanc te magnò animò resolve; hanc amplectere.

3. *Tuam ipsius animam pertransibit gladius.* Considera prophetiam hanc , eò ipsò quidem momentò , maximè autem tempore passionis Christi impletam. Percurre tormenta Christi: vide præsentem cruci Virginem. Cogita quis dolor Matris ob tam graves in tantum Filium injurias fuerit. Sed & tu hunc gladium Matri infixisti , qui Filio tot injurias , tam graves irrogasti. Dole , & time gladium iræ Dei.

S A B B A T H O.

De Annæ Prophetissæ occurſu.

1. *Non discedebat de templo , jejuniis , & obsecrationibus serviens die , ac nocte.* Luc. 2. Considera perseverantiam hujus sanctæ Matronæ in dictis exercitiis , à quibus non remittebat. Non meretur virtutis nomen , quàm non comitatur perseverantia. Apud Deum hæc sola coronatur. Quomodo tu ad coronam pertinges? Quàm multa proponis? quàm pauca exequeris? Minima difficultate frangeris , &c. Perrumpe tandem , reddetur suave , quod credebas laboriosum.

2. *Non discedebat de templo , jejuniis , & obsecrationibus , &c.* Ibid. Considera deinde ipsas hujus viduæ

duæ virtutes, virginalē, & vidualem ejus castitatem, exactam Legis Divinæ observantiam, frequentem cum Deo communicationem, rigidam abstinentiam. Atque his merita est Jesum verum Deum agnoscere, hæ enim sunt, quibus se Deus communicat penitus agnoscendum. Vis, ut Deus se tibi exhibeat? habe cor mundum, observa mandata, & regulas: sæpe cum Deo colloquere: retrahe te à sensuum delictamentis.

3. *Et hæc ipsa horâ superveniens.* Ibid. Considera hanc Annæ felicitatem ad hanc horam esse à Deo dispositam, ita tamen, ut & ipsa hæc eadem horâ occurrat, cæteroquin eò solatiô non potitura. Ità Deus gratias suas certo tempori, & occasioni alligat, quas nisi eà hora arripias, fortè nunquam obtinebis. Vide ergo, ne hac horâ oblatam gratiam prætereas, perduntur sæpe mæ, dum una negligitur. Nam Deus eas veluti per catenam ducit, uti si uni coopereris, plures promerearis. Si scires ab una hac pendere tuam salutem, quid ageres? Et forte pendet. Ne ergo sis segnīs, & incurius.

DOMIN. IV. POST EPIPHANIAM.

De affectibus, & sermone Annæ Prophetissæ.

1. *ET hæc ipsa horâ superveniens.* Luc. 2. Considera, qui fuerint interni affectus Annæ agnoscantis sub velo carnis verum Deum: quæ fides, spes, amor, gaudium, gratulatio, sui resignatio, &c. Suntne iidem tui in Deum velò accidentium panis tectum? Si credis, cur non major est in eum reverentia? Si speras, cur affligeris adversis? Si amas, cur amorem dividis in creaturas?

Si

Si gaudes, cur solatia ex cæno mendicas? Si gratularis tibi tantô bonô, cur alia extra Denm æstimas? Si te resignas, cur toties te iterum recipis? &c.

2. *Confitebatur Domino.* Ibid. Hoc est benedicebat, & glorificabat Dominum. Vehementes enim affectus erumpebant in verba. Sed quæ fuerint, non exprimitur. Credi tamen potest, laudasse Dei bonitatem, ac misericordiam, quam fecit cum servis suis: admiratam fuisse ejus humilitatem, & exinanitionem. Unde fit, quod sis tam sterilis in laudes Dei? quia nimirum tepidè, aut parum afficeris. Amanti enim de amato non defunt verba. Quod loqueris, prodit, quid ames. Examina te ipsum, & verba, sermonesque tuos, & deprehendes, ubi sit animus, unde evocandus.

3. *Et loquebatur de illo omnibus.* Ibid. Et quid loquebatur? sine dubio, hunc esse tam diu expectatum Messiam! huic soli impendendos amores, &c. Nonne hoc professio, & vocatio tua exigit? ut ad cognitionem, amorémque Jesu erudias, & inflammes *omnes*, qui ejus sanguine redempti sunt, nulli, quamvis misero & egeno te subtrahas? Cur ergo vel omnino subterfugis? vel rejecis viliores? Nunquid ideo vilis est anima, quia vilis lacerna tegitur? an pro comptis solum mortuus est Dei Filius? vero zelo nulla anima est vilis. Accende igitur hunc in te zelum animarum.

F E R I A II.

Christus secundum legem redimitur quinque siclis.

1. **U**T facerent secundum consuetudinem legis pro eo. Luc. 2. Etsi nulla fiat ab Evangelista men-

mentio, quòd Mater Christum consuetò pretiò à Sacerdote emerit: certum est tamen, eam omnem apicem legis implevisse; ac proinde etiam quinque siclos pro eo deposuisse. Considera ergo 1. Quis eum emat? Nempe B. Virgo, non ut sibi servet, sed ut eum nobis nutriet, sesèque postea nobis totum impendat. Debes ergo grates Virgini tantum de tuo bono sollicitæ. Et quibus affectibus tibi redditum excipies?

2. Considera, à quo eum emat? Ab æterno Patre, cui oblatus erat. Donaverat eum nobis per Incarnationem: redonat, aut vendit illum iterum nobis, novos quærens titulos, quibus suum Filium totum faciat nostrum. Adeo nostræ salutis satagit, ut, quamvis oblatum sibi Redemptorem, iterum nobis reponat. Utinam sic ego cum Deo agerem! offero toties cor meum, voluntatem, & facultates cæteras: sed quod donavi, momentò recipio. Nunc accipe Deus cor meum, voluntatem, corpus, & animam, irrevocabili dono, & tu de iis ad libitum dispone.

3. Considera, quò pretiò ematur, nempe secundum legem quinque siclis. Vide, quam parvò emitur Deus. Quamvis sit infinitum bonum, noluit à te exigere infinitum pretium, tuæ consulens egestati; noluit ingens aliquod, ne ejus emendi excusationem prætenderes; noluit nullum, ut rigidior titulo tuum faceret. Inexcusabilis ergo, es ô homò! si tantum bonum tam parvò, tam obviò pretiò non emas. Et tamen quoties in vanitates, & sensuum oblectamenta plus pretii, plus inquam laboris effundis.

F E R I A III.

Herodes iratus.

1. *T*unc Herodes videns, quoniam illus^{us} esset à Magis. Matth. 2. Considera illud: *Videns*. Promiserant quidem Magi, se redituros. Sed intervenit dispositio Dei jubentis per Angelum, eos aliâ viâ redire. Hoc ignorabat Herdes; & tamen tam certum habet, ac si videret Magis fuisse animum illudendi. Vide, quàm turpiter erret suspicio! audet scrutari intentionem, & tanquam certissima habet somnia, quæ sibi fingit. Non videt, sed cæcè graditur: ideo errat, & animum turbat. Detestare hoc malum, & potius cæcus sis in aliorum factis, quàm ut suspiciosô oculô videas.

2. *Videns quoniam illus^{us} esset*. Illusor ipse Herodes erat: Magis per simulationem imposuerat. Qualis ipse fuit, tales illos judicavit. Poterat non reditum illorum in melius interpretari, & minùs turbatus fuisset. Disce tu hoc agere, ne fortassis optima in venenum vertas. Nonne tibi id fieri velles? fac ergo aliis. Magna tibi inde quies erit, quia sinistra judicia plurimorum turbant animum. Reflecte, dole, propone,

3. *Iratus est valde*. Considera Herodem in ira cepisse consilium occidendi Christum, quam crudele! quam enorme! ira nihil sanum suadet. Non potest bonum esse consilium, quod dicat passio. Quoties, quæ in passione decrevisti, tibi redditus damnasti! Disce ergo tuas passiones opprimere, ne te ad pœnitenda consilia deducant. Vide an, & quæ tibi dominetur, statue, quibus modis domes.

F E R I A I V.

Decretum Dei de subtrahendo Christo
Herodis iræ.

1. **C**onsidera , quàm sint longè alia consilia Dei , alia hominum. Periclitatur de vita Christus. Poterat Deus vel Herodem perimere , vel iram extinguere , vel Filium invisibilem reddere. Decernit , ut fugiat. Quale hoc medium? quàm dignitati Filii Dei contrarium? quot incommodis objectum? ita Deus cum iis agit , quos amat : aspera illis , & difficilia decernit. Esne tu dignior Filio Dei? si dura à te Deus experimenta exigit , quid lamentaris? Agnosce hæc esse ejus in te amoris argumenta , & mitius feres , & gaudebis , & gratias ages.

2. Considera , voluisse Deum , ut hæc fuga fieret , non ad Magos , apud quos Christus fuisset in honore , & veneratione , sed in Ægyptum , ad gentem barbaram , & Judæis infensam , procul ab amicis , & notis. Ita Filio suo toto infantiae tempore , nec ab amicis solatium , nec à notis honorem , aut commoditatem admisit. Et quid tu quæris agnosci , æstimari , honorari , commoditatibus instrui? Si te servum Christi agnosceres , rejicerès ista , & gauderes potius latere , contemni , affligi. Aude hoc à te exigere , ut Christo propior accedas.

3. Considera , quod ait auct. oper. imperf. 1. *Recordarum esse Dominum , qui non irascitur in finem , quanta mala fecerit super Ægyptum , ideo mittit Filium suum in eam , & dat illi magnæ reconciliationis signum.* Quàm bonus Deus! quibus ex justitia sustulit primogenitos , ex misericordia suum primogenitum committit. Discat peccator , dum
à Deo

a Deo plectitur, non desperare in finem. Imò ipsum plectere; est quoddam bonitatis documentum. Castigat enim omnem filium, quem diligit? Tu pœnam omnem humilis excipe, & bonitati ejus consigna.

F E R I A V.

Joseph monetur ab Angelo, ut fugiat in Ægyptum.

1. *Angelus Domini apparuit in somnis Josepho, dicens: surge, & accipe puerum, & matrem ejus, & fuge in Ægyptum.* Matth. 2. Considera præcepti circumstantias. 1. Monet Angelus Dei nomine, tanquam per superiorem. 2. Non Virginem etsi excellentiorem, sed Josephum tanquam caput familiæ. Per superiores enim regit, quibus, ne errent subditi, assistit. 3. In somno monet. Rumpenda est quies, ubi Deus vocat. 4. Accipere jubet Puerum, Matrem. De cætera suppellectile nulla cura. Omnis supellex tua sit, Jesus & Maria. 5. In Ægyptum abeundum, in terram hostilem, ut tutus sit Jesus. Designari tibi locum patere, non elige. Si periculosus tibi videatur, Deus proteget, qui designavit.

2. *Et esto ibi, usque dum dicam tibi.* Moræ tempus non determinat. Occupationis, loci, officii, afflictionis tempus Deo remitte. Ipsi cura est de te, mutabit, cum expediet. Quantum tu ipse de te disponis, aut ad votum disponi procuras, tantum te subtrahis Divinæ gubernationi. Quantum inde turbationis, si non obtineas; si obtineas, quam parùm meriti, quam parùm solatii, quam multum periculi!

3. *Qui confurgens accepit Puerum, & Matrem ejus*
Avanc. Medit. E nocte.

nocte. En obedientiæ perfectionem. 1. Cum judicii subjectione, etsi multa occurrere potuissent, quæ obtenderet. 2. Cum voluntatis promptitudine, in re ardua, & difficili. 3. Cum executionis celeritate, ipsa nocte, abrupto somnô, relictis omnibus, quæ habebat. 4. Cum hilaritate, quod sciret hanc esse Dei voluntatem. Expende tuam ad hos numeros obedientiam.

F E R I A VI.

De ipso itinere fugientium in Ægyptum.

1. **E**T secessit in Ægyptum. Matth. 2. Considera, qui fuerint animorum sensus Josepho, & Mariæ. Experiebantur molestias itineris, injurias aëris, duritiem hominum, penuriam cibi, &c. Sed in his omnibus una hac cogitatione recreabantur: omnia hæc agimus, & patimur pro Jesu salvando. Hinc quæ solatia? quæ dulcedo? Omne enim amarum hac cogitatione dulcorabatur: Hoc tu principio nitere in adversis: Pro Deo patior.

2. Considera, quis animi sensus infanti fuerit, qui sciebat se ad necem quæri, qui venerat, & ipsi etiam Herodi vitam dare. Putas non vulneraverit animum tanta ingratitude? Vide, ne parem doloris occasionem sæpius Christo præbeas, dum tot beneficiis, & gratiis non respondes. Sed poterat Omnipotens infans vindictam sumere de Herode, suumque honorem tueri: at noluit. Falsum ergo est principium amoris proprii: non tolerandum id, quo honor periclitatur, &c.

3. Considera, quæ Christus in corpore eo itinere passus sit: Ætas erat tenera, hyems perfrigida, pluvix, nives, diversoria vilia, quandoque
nulla,

nulla, paupertas parentum summa, barbaries hominum, &c. At non ex necessitate hæc tolerabat; sed voluntate. Et ego pari refugio, & ea quoque, quæ necessitas adfert? ego commoditatibus meis studebo?

S A B B A T H O.

De iis, quæ Jesus passus est in Ægypto.

1. **C**onsidera, quæ in animo passus est. Vidit se in medio nationis pravæ, cultum Deo negantis, idolis tribuentis: ardebat interim zelus gloriæ Dei. Hinc quod vulnus ejus animo, qui clare perspiciebat, qui sit Deus: quæ indignitas ejus offensæ? quanto affectu vitam suam ad tollenda peccata offerebat? quam parum in me zeli est, quem non tantum aliena peccata non vulnérant, sed vix propria! Accende in te zelum hunc. & attendes magis, ut opera tua non displiceant Deo.

2. Considera, quæ Christus in se sit passus. Defectum non superfluum tantum, sed etiam necessariorum: contemptum ab hominibus, cum non alius haberetur, quam fabri filius. Et hæc non ex necessitate patiebatur Rex gloriæ, sed ex voluntate, & cum gaudio, quod sciret sic placitum esse Deo. Condole cæcitati Ægyptiorum non agnoscentium Jesum. Vide, ne tua sit horum similis. Admirare, & lauda Christi patientiam: sed non pigeat imitari, quod laudare delectat.

3. Considera dolorem, quem habuit Jesus aliis compatiendo. Primo quidem SS. Matri suæ, & Josepho, quos sui causâ videbat durum illud exilium tolerare, qui dolor sine dubio fuerit ad men-

suram amoris , quô in eos ferebatur. 2. Infantibus innocentibus , qui etiam sui causâ crudeli carnificina laniabantur. Disce compati aliorum malis , eorum præsertim , qui in innocentia sua Herodis , seu mali socii gladiô occiduntur. Quantum his depravandis studet iniquitas , tantum tu reducendis stude.

DOM. V. POST EPIPHANIAM.

Cædes Innocentium.

1. **M**ittens occidit omnes pueros , qui erant in Bethlehem. Matth. 2. Considera 1. sanguinariam Herodis crudelitatem. Unum vult morti datum , & omnes occidit. Quô deducit unica ambitionis passio ! imô quævis , nisi edometur. Lapsus tuos rememora , quos una quandoque passio causavit ; tuô damnô disce eam opprimere , nè te opprimat. Nec differendum est , quia tempore adolescit.

2. *A limatu , & infrâ.* Ibid. Considera , quam cautelam patrando sceleri Herodes adhibeat. Nam 1. Non sua manu eos occidit , sed mittit ministros ; ut , si arguatur , excessum in hos retorqueat. 2. Occidit omnes , ut tantò certius is perimatur , quem volebat. 3. Non tantum in Bethlehem occidit , ubi acceperat natum Christum , sed etiam in omnibus finibus ejus. 4. Non solum eos , qui à tempore stellæ ortæ nati erant , sed etiam qui antea. Non patere , ut filii tenebrarum sint cautiores ad malum patrandum , quam tu ad declinandum. Omnem cautelam adhibe , ne qua te pars boni prætereat , ne qua parte subrepat malum.

3. Considera admiranda Dei consilia , qui ipsis homi-

hominum sceleribus utitur in bonum. Nam, ut observat S. Chrysoſt. hom. 9. forte hi pueri non erant futuri boni. Ergo beneficium fuit illis mors accelerata. Deinde crudelitas ipſa divulgata Romæ, ſervivit ad divulgandum Meſſiæ adventum, cultum eidem à Magis delatum. Diſce malis ad bonos, tibiſque ſalutares, & Deo glorioſos fines uti. Magna hîc Dei imitatio: magnum tibi lucrum.

F E R I A II.

Monetur Joſeph de reditu ex Ægypto.

1. *Deſuncto autem Herode.* Matth. 2. Conſidera Herodem, qui per mortem Chriſti ſuum regnum ſtabilire volebat, per ſuam mortem eo excidiſſe. Juſtus eſt Deus. Diſſimulat peccata ad tempus, ſed tandem plectit, cum minimè opinamur. Time, dum peccâſti, aut, ne pecces, juſtitiam; qui, dum peccas, non amas bonitatem.

2. *Angelus Domini apparuit in ſomnis Joſeph in Ægypto.* Ibid. Conſidera Dei providentiam, qui ſtatim Herodis mortem Joſeph nunciat. Quàm putas gaviſus ſit Joſeph, quòd ſui tantam curam à Deo geri animadvertit? Quàm fuerit in fiducia erga Deum firmatus. Lauda & tu Divinam providentiam. Projice cogitatum tuum in Dominum; ei te gubernandum committe. Erit illi cura de te, & videbis triſtium etiam rerum lætos eventus.

3, *Surge, & accipe puerum, & Matrem ejus, & vade in terram Iſraël.* Ibid. Terra Iſraël ampla erat. In quem ejus locum concedat Joſeph, non determinat Angelus. Forte ut Joſeph iterum re-

currat ad Deum, & de loco inquiret. Gaudet enim Deus frequentiore nostra secum communicatione. Ideo non omnia simul declarat, quæ à nobis vult fieri: da ergo hoc Deo gaudium: sæpius ad eum recurre. Hæc via est, se cum eo magis uniendi.

F E R I A III.

De reditu ex Ægypto.

1. *Qui consurgens accepit puerum, & Matrem ejus, & venit in terram Israël.* Matth. 2. Considera æquam omnino Josephi, & B. Virginis promptitudinem ad adeundam, ac ad deserendam Ægyptum. Nec aliô titulô est reditus gratior, quam quòd Deo ita placeat. Nec displiceret remanere diutius, etiam in æruinis, si ita Deo placeret, ab hujus enim nutu cum omni indifferentia pendebant. Quæ vero tua est indifferentia? ad mandata es morosus: quod potes, recusas: quod non potes, expetis: de bono, & malo judicas, prout tibi sapit bene, aut male: fingis te non posse, quod non vis; tanquam debitum petis, quod amas; tanquam injuriam accipis, si petenti negatur, &c.

2. *Audiens autem, quòd regnaret Archelaus in Judæa pro Herode Patre suo, timuit illò ire.* Ibid. Considera nihil quidem fuisse, quod Joseph timere posset in Judæa. Nam *mortui erant, qui querebant animam pueri.* Habet tamen Joseph, quod optimæ conscientiæ habent: etiam in securitate timent, ne perdant Jesum. Estne & tibi hujus rei sollicitudo. Quam vero necessaria in tot periculis? Hæc ademta omnia perdidisti; imò & te ipsum. Vigila, &c.

3. Ha-

3. *Habitavit in civitate, quæ vocatur Nazareth.*
 Ibid. Non elegit sibi Christus Hierosolymam caput Regni, & populis frequentatam; sed Nazareth locum vilem, à quo etiam per contemptum vocatus est Nazareus. Hoc est ingenium Christi, semper sibi humilia eligere. Quàm diversum est tuum! Ignominiam Christo facis, si alia quæris, quàm ipse. Tantò majorem facis Christum, quanto te minorem.

F E R I A IV.

De ascensu Christi cum parentibus in Têplum.

1. *Ibant parentes ejus per omnes annos in Hierusalem.*

Luc. 2. Considera piam, & constantem hanc fuisse Josephi consuetudinem, orandi causâ ad templum ascendere: quod quidem agebat ex lege, quâ omne masculinum obstringebatur. Vide, quàm accuratè legem adimpleat, & quidem constanter ex consuetudine sancta. Utinam ad hanc tu consuetudinem regularis observantiæ pervenires. Pia consuetudo, non est mera consuetudo, sed constantia. Hanc ut obtineas, quidquid agis consideratè age, & ad regulam reflecte. Quantus esses, si id à principio vocationis egisses?

2. *Ibant parentes ejus.* Considera non solum Joseph, sed & B. Virginem ascendisse in templum, & hanc quidem nullam habuisse obligationem, quia lex solis masculis data erat. Quia tamen erat opus bonum, quò obsequium præstabatur Deo, sufficit ad illam permovendam. Nimis parce cum Deo agit, qui nihil agit, nisi ad quod teneatur. Si Deus tecum ita ageret, quàm miser esses! ergo, qui tanta à Deo mere liberaliter ac-

cipis, redde aliqua supererogatoria. Fecistine hactenus? faciēsne imposterum? quæ? quando? quo affectu?

3. Considera etiam Christum ivisse in comitatu parentum, tum ut legi satisfaceret, tum ut æternum Patrem veneretur in domo sua, præscripto tempore communis venerationis. Felices parentes tanti filii comitatu! Felix tu! si semper Jesum tecum habeas! quid solatii deesse possit cum Jesu? Vide, cum quanto spiritu, & fervore hic puerulus properet! Excita in te similem, cum ad Divina accedis.

F E R I A V.

De eodem ascensu in Templum.

1. *Ascendentibus illis Hierosolymam secundum consuetudinem.* Luc. 2. Considera reducem ex Ægypto Josephum timuisse ire Hierosolymam, quod ibi regnaret Archelaus. At etiamnum regnabat. Cur modo non timet? Quia nempe hic agitur de cultu Deo exhibendo. Tunc enim exuendus est timor, & forti animo, quæ Deo debes, præstanda. Sic Deum timenti nihil eveniet mali. Dum tu ejus obsequium curabis, præstabit ille securitatem.

2. Considera Christum anno ætatis 12. ascendisse in templum, quando scilicet communi hominum opinione se primum prodere solet judicium; ut prima statim ætate ostenderet, curas suas vergere ad obsequium Dei. O si hoc exemplum secutus esses à juventute? quam felix tua esset conditio! quam securus animæ status! Dole te tam serò venisse. At saltem nunc seriò, & cum magna resolutione age, quod est ad obsequium Dei, & pone tepiditatem.

3. Con-

3. Contemplare agentium in templo modestiam, reverentiam, affectus, quas gratias reddant pro beneficiis & sibi, & universo mundo collatis: quàm fervidæ sint preces ad impetrandas hominibus gratias congruas! quàm grata Deo sint eorum oblationes, &c. Confer tuam orantis compositionem corporis, collectionem animi, fervorem spiritûs, &c. Vide, in quo deficias & emenda.

F E R I A VI.

Remanet puer Jesus in templo.

1. **C**onsummatis diebus, cùm redirent. Considera parentes Jesu non ante voluisse, quamquam potuissent, Nazareth in domum suam reverti, quàm solennitas azymorum, quæ septem dies durabat, undique expleretur. Ita ad apicem servare voluerant legem. Sit hoc & tuum studium, in iis præsertim, quæ Divina præscribunt. Noli mutilum Deo sacrificium dare, aut tempori quidquam detrachere. Quod Deo detrahis, cui addis, nisi sensibus? Volésne hoc fecisse, cùm consummati fuerint dies vitæ tuæ?

2. *Remansit puer Jesus in Hierusalem.* Considera affectum, quò Christus ad Divina ferebatur: qui, quantum de se erat, voluisset semper remanere in domo Patris sui; & ob hunc finem, etiam Matrem, quamquam sibi dilectissimam deferere. Dei enim obsequia omnibus sunt præferenda. Ex quo discam æstimare Divina, quæ Regulis præscripta sunt, affectum ad ea excitare; ac potius iis temporis aliquid addere, ubi concessum est, quàm demere.

3. *Et non cognoverunt parentes ejus.* Quamvis Christus non ignoraret absentiam suam magna

dolori parentibus futuram, voluit tamen se iis subtrahere: *ut ostenderet* (ait Beda) *se etiam Patrem verum habere in cœlis*; cui soli in iis, quæ operabatur ut Salvator, erat subjectus, sine carnis, & sanguinis respectu. Disce, quando operandum est juxta tuam vocationem, exuere amorem parentum, & amicorum. Ignorant hi, quæ sunt spiritûs, & magno sunt impedimento. Non potes esse Discipulus Christi, si in his non oderis patrem, & matrem. Luc. 14.

S A B B A T H O.

Amissum Filium requirunt Parentes.

1. *Existimantes illum esse in comitatu venerunt iter diei.* Mirum videri potest, quomodo Mater potuerit à filio sejungi, quem tantopere amabat. Sustinuit tamen id, quod crederet alios Divinâ ejus præsentia frui, ac ipsum eos morum suavitate ad se attraxisse. Ita, ut serviretur aliis, libenter caruit eô, quô summè delectabatur. Appende hîc, tuam charitatem. Quàm pauca, quàm illibenter incommoda pateris alterius causâ? Ac ut servias proximo, etiam aliquando Deus est relinquendus.

2. *Requirebant eum inter cognatos.* Quâ diligentia? quo mœrore? qua simul resignatione, quia non ignorabant eum Deum esse, & nihil non bene agere? quibus ad Deum, quibus ad Jesum suspiriis? Itâne tu perditum Jesum requiris? Sed tamen non reperiebant inter cognatos. Disce non inveniri Deum, imò perdi potius inter cognatos, inter affectus sanguinis, & sensuum, inter solatia amicorum. Dissipant ista, non colligunt affectum in Deum. Huic tantum detrahis, quantum illis adjicis.

3. Et

3. *Et non invenientes regressi sunt in Hierusalem.* Considera, qui fuerint regredientium sensus; doloris quidem, unionis tamen cum Divina voluntate, quod non ignorarent hoc altissimò consiliò factum, ut majora sui accenderet desideria, & merendi daret occasionem: spei interim eum iterum reperiendi. Disce, quod Deus faciem suam subtrahat etiam iis, quos unice diligit. Si se tibi subduxit, vade in Hierusalem, constitue te in æterna pace: quære eum iisdem affectibus.

DOM. VI. POST EPIPHANIAM.

Invenitur in templo inter Doctores.

1. *Invenērunt illum in templo.* Luc. 2. Credibile est eos nuspiam alibi quæsiisse Hierosolymis Jesum, quàm in templo. Arguebant enim eum ibi esse, ubi sciebant eum affectibus versari. Disce ergo Jesum in templo quærere, hoc est, in oratione. *Non invenitur enim in terra suaviter viventium: non in lectulo deliciarum carnis: non in vicis & plateis distractionum mundi.* Imò hìc potiùs perditur. Ne ergo te in afflictionibus tuis ad creaturas, sed ad orationem, & internam animi recollectionem converte. Ibi Jesum invenies.

2. *Sedentem in medio doctorum, audientem, & interrogantem.* Ibid. En iterum ubi Christus invenitur: Inter Doctores. Nemo sibi in rebus animi fatìs est sapiens. Magna sapientia est interrogare, & audire eum, qui spiritum dirigit: interrogare, ut scias; audire, ut facias. Confunditur in sapientia sua, qui vel sic scire negligit, vel de sufficiente sapientia sua præsumat. Securius cum Duce graderis per hanc mundi sylvam infestam, quàm

quàm solus. Ergo audi fili mi, disciplinam Patris tui, ut addatur gratia capiti tuo. Prov. 1.

3. *Stupebant autem omnes, qui eum audiebant, super prudentia, & responsis ejus.* Ibid. Videbat omnium admirationem Mater, audiebat applausum: licet conspectò filio, ingens gaudium conceperit animo, tamen mira illud modestiâ temperavit, dum ad tantos plausus non exultavit leviter, nec se ejus Matrem prodidit, unde aliqua gloriæ pars in eandem redundaret. Sicne tu etiam agis? non prodis ea, quæ tibi sunt laudi apud homines? non jactas quandoque? non libenter de tua familia, de tuis factis loqueris? Mendicas inanem laudem, veram perdis.

F E R I A II.

Verba Matris ad Filium repertum.

1. *Fili, quid fecisti nobis sic?* Luc. 2. Prior loquitur Mater; *affectus enim amoris*, ait Sim. Cass. *non potuit ampliùs cobiberi.* Vocat Filium: hoc erat omnibus notum: non Deum, quod ab aliis ignorabatur. Noluit verbum proferre, quod sibi in laudem redundaret. *Quid, non est increpazio*, ait Carthuf. *sed pia, & amorosa conquestio.* Ostendit dolorem quem habuit, ejus causam non perquirat curiose. *Quid fecisti nobis*: non ait mihi: quò significet communem Josephi dolorem: ex quo sua etiam stet laus Josepho, quod amaverit eum, quem perditum dolebat. *Sic?* magnitudinem doloris exprimit, sicut magnitudinem amoris illud: *Sic Deus dilexit mundum.* Joan. 3. Vide, quàm paucis, quàm multa imitanda exhibet.

2. *Pater tuus, & ego dolentes.* Ibid. Primas occupat Virgo alloquendo Christum: enarrando sua acta,

acta, primas desert Josepho. Illud amoris fuit, hoc humilitatis, & reverentiæ in eum, qui erat caput familiæ *Humillima* ait S. August. *nec se merito, nec in ordine nominis præferebat.* Hoc conari tuto potes, ut amore in Deum omnes antecellas; sed humilitate, & reverentiâ omnibus cede, non tam verbis, quàm vili interiûs tui æstimatione.

3. *Dolentes quærebamus te.* Ibid. Significat dolori se remedium quæsisisse. Non enim sistebant in eo, quòd amissum Jesum dolerent; sed ut doloris invenirent lenimen, quærebant. Non sufficit amissum Jesum dolere, si diligentiam non adhibes, ut invenias. Ideo quandoque se subtrahit, ut tu quæras; & delectatur quærentis studiò, & repertus cumulat gaudium. Non ergo desponde animos, si amiseris; sed quære, & invenies.

F E R I A III.

Responsum Filii ad Matrem.

1. *Quid est, quòd me quærebatis?* Luc. 2. Non sunt verba increpationis, quasi dicat: Non opus erat me quærere, qui non casu, sed altissimò consiliò à vobis recessi. Nec inde fuit vanum quærendi studium: quia multa, quæ non sunt necèssaria, ex pio tamen affectu laudabiliter fiunt. Quàm suaviter, quàm amanter hæc protulerit? quàm suavitatem parentibus ingesserit? Merebatur id parentum studium. Si amisisti Jesum, gustumque devotionis, cogita altissimò Dei consiliò factum; remitte te ejus gubernationi cum humilitate: quære tamen studiò, quòd potes. Veniet tempus consolationis.

2. Ne-

2. *Nesciebatis, quia in his, quæ Patris mei sunt, oportet me esse?* Ibid. Interrogatio hæc vim habet affirmandi; id est, *sciebatis*. Sciebant utique, & ideo eum ibi quæsierunt. Indicat tamen eum affectum, quem habuit ad ea, quæ Patris sunt: indicat propter hæc relinquendum Patrem, & Matrem: indicat hoc debitum esse, quod alia superat. Imprime hanc animo veritatem, & ubi causâ Dei agitur generosam cape resolutionem abscindendi, quidquid charum est.

3. *Et ipsi non intellexerunt verbum, quod locutus est ad eos.* Ibid. Beatissimæ Virgini non simul omnia de Christo sunt revelata, sed sicut semper crevit in gratia, ita etiam in mysteriorum intelligentia. Non intellexit ergo tunc, quare Christus illa ætate inter Doctores sapientiam suam revelaverit; sed tamen ulterius non interrogavit. Cum enim audivit opus esse paternæ voluntatis, statim acquievit. Disce iudicium subicere. Neque enim necessarium est, ut omnium rationes assequaris, quæ Deus, quæ Superiores de te disponunt. Noli eas investigare, animi quietem turbabis. Satis sit tibi, Deus vult.

F E R I A IV.

De descensu ex templo.

1. **E***T descendit cum eis.* Luc. 2. Audi narrantem Jesum, quæ sibi eo triduo evenerint. Specta audientem magna aviditate Virginem, & omnia verba corde suo observantem. Disce descendere ad sensum. D. Anton. serm. infra Octav. Epiph. *Origida superbia! quæ super altitudinem nubium moliris ascendere; descende obsecro, quia Jesus*

ſus deſcendit, non tam corpore ex edito loco templi, quàm animo per humilitatem.

2. *Et erat ſubditus illis.* Ibid. Quis? cui? Creator creaturæ, Dominus ſervo, Deus homini. O admiranda obedientia! *Erubeſce ſuperbe cinis*; ait Bernard. hom. 1. ſup. Miſſus. *Deus ſe humiliat, & tu te exaltas? Si hominis, ô homo, imitari dedignaris exemplum, certe non erit tibi indignum, ſequi auctorem tuum.* Vilior eſt tibi præpoſitus, non tam doctus, quàm tu? Nunquid ab ejus nobilitate, ab ejus ſapientia tantò es excelfior, quantò Deus ab hominis? Exemplum tibi dedit; tu eum ſequere.

3. *Et erat ſubditus illis.* In quibus? quò modò? In viliffimis quibuſque: Officina fabri non exhibebat ſplendida. Tu ea quæ fuerint, facile concipies. Agebat autem illa promptè, humiliter, exacte; nec uno tantum die, ſed uſque ad trigefimum ætatis annum. Vilia tibi mandantur, & abjecta officia? Nihil eſt vile, quod Dei imitatione agitur, qui vel vile non agit, vel agendo tollit vilitatem. Sit honor tuus vilia agere, ſi honorem tuum maximum judicas Chriſto proximè aſſimilari. Ne tempus te frangat, in totam vitam te generoſè reſolve, abjectus eſſe in domo Dei.

F E R I A V.

De proſectu Chriſti in ætate, ſapientia,
& gratia.

1. *P*uer autem Jeſus proficiebat ætate. Luc. 2. Poterat naturam aſſumere robuſtam, ac virilis ſtaturæ, ut Adamum creaverat. Voluit infantilem, & per ætates tranſire; ut omni ætati exemplo eſſet. Creſcebat ætate & viribus, ut ad graviora

viora pro me toleranda robustior evaderet. Hoc sine nutriebat corpus. Heu me! quantum absum! qui corpus nutrio ad delicias, non ad Dei obsequium, non ad difficilia pro Deo agenda, aut toleranda. Parce Domine: emendabo ad tuum exemplum.

2. *Proficiebat sapientiâ, & gratiâ.* Ibid. Plenus erat sapientiâ, & gratiâ à primo sui conceptûs instanti, ita ut nihil ei accedere posset. Externe tamen crescere videbatur ad proportionem ætatis, cui accommodabat in oculis hominum sapientiam, & gratiam. Disce, quòd dum crescis ætate, cresceré etiam debeas sapientiâ, & gratiâ. Annis crevisti, quàm parum virtute? Scientias humanas addidicisti, gratiæ, & virtutis vix rudimenta attigisti. Quomodo subsistes, dum quæretur non quantum, sed quomodo vixeris? non quid didiceris, sed quid feceris?

3. *Apud Deum, & homines.* Ibid. Exhibebat enim opera semper excellentiora: quibus hominum æstimationem lucrabatur; & eximia erant ad augendam Dei gratiam, si hujus fuisset capax. Ita in omnibus Dei placitum, & hominum ædificationem conjungebat. Hoc age & tu, ut per opera tua Deo placeas, & qui vident ea, glorificent Patrem, qui in cælis est. Vanum est, si solos homines spectes: si solum Deum, aliquid: si utrumque, optimum.

F E R I A VI.

Quid Christus egerit ad annum usque trigésimum.

1. **C**onsidera 1. ex plurium auctorum sententia, Christum transégisse cos annos in altissima con-

contemplatione. Cogita ergo tractasse eum cum Patre negotium salutis humanæ, disposuisse militantem Ecclesiam, deslevisse peccata hominum, placasse iram Patris, precatum fuisse veniam, &c. Non dubita te tuæque peccata in illa contemplatione fuisse in præsentia. Non merebaris hoc. Sola fuit illius bonitas, tui meminisse. In hanc debita tua repone. Dole, veniam, per illas lachrymas precare. Vide, ut imposterum sis ei gaudio, non dolori.

2. Considera eum fuisse solatio SS. Matri, & Josepho sua conversatione, quam credibile est fuisse potissimum de Dei bonitate, misericordia, & opere salutis, ad quod venerat. Cogita, quis fuerit utriusque parentis gustus? qui affectus? Disce, quæ tuæ conversationis materia esse debeat: quâ scilicet aliquod proximo solatium, aut pium affectum imprimas. Aliàs vel in noxia incidēs, vel tempus perdes, Egistine hoc hætenus?

3. Considera operatum esse manibus suis. Tractasse fabrilia credunt probati Authores. Hinc credi potest adjuvisse Josephum ad sustentationem. Tam miseram vitam duxit Jesus. Et tamen non illi, sed tibi dictum est: *In sudore vultus tui vesceris pane.* Et tu amabis otium? Nec pensi habet, quod nondum prædicet, aut miracula patret ad salutem hominum. Statis se agere judicat, quod agat id, quod scit Deum velle. Disce hoc agere, quod obedientia jubet: etsi tibi nihil agere, aut a Superioribus non satis pro tuis talentis occupari videaris. Satis agis, si id agis, quod per obedientiam scis Deo placere,

S A B B A T H O.

Quæ virtutes ex Juventute Christi colligantur.

1. **C**onsidera, cum Christi vita disponderetur ad mortem Crucis, voluisse eum duræ potissimum virtutis specimina edere. Ac. 1. *Humilitatis*. Amavit enim nesciri: occuluit Divinitatem, Sapientiam, vim patrandi miracula. Latuit in Nazareth ignotus omnibus in vili casa: exercuit abjecta ministeria, &c. Examina, quæ te in istis habeas. Non jactas ingenium, aut scientiam? non ambis videri? non fugis solitudinem? abhorres à vilibus. Quàm parum es Christo similis!

2. Secunda virtus *Obedientia*. 1. *Erga Deum*, semper enim, quæ erant placita ei, faciebat, ut respectu hujus omne illius opus fuerit obedientia. Æstima hanc virtutem, cujus pretium Christus omnibus suis actibus addi voluit. Potes hoc imitari in omni opere, quod ex vocatione tua facis, Scis enim certò Deum, & Superiores velle. 2. *Erga homines*: erat *subditus illis*, non in honoratis, quæ non suppetebant, sed in vilibus, constanter, promptè, hilariter. Eximium quid esse crede, obedire; quod Christus tam constanter, tot annis egit. Examina, quæ tua sit obedientia, non tantum operis, sed etiam promptitudinis voluntatis, & abnegationis judicii.

3. Tertia est *continua Patientia* in paupertate, & rerum etiam necessariarum defectu, in ærumnis, in contemptu. Hanc ille vitam meliorem, Deoque gratiorem judicavit, & elegit. O sinistra hominum judicia, quibus hæc vita extremum malorum est! dum pati fugiunt, perdunt animas suas

suas, quæ solâ patientiâ possidentur. Et quid est, quod tu pateris? quàm leve? quàm nihil, si cum eo conferas, quod prior ille passus est? Ad quid te resolves?

DOMINICA SEPTUAGESIMÆ.

Decretum SS. Trinitatis, ut Christus moriatur.

1. *Q*uid facimus? Joan. 11. Cogita te interesse consilio SS. Trinitatis consultantis, sitne perdendus homo, ut meruerat; an morte Dei hominis redimendus. Quid facimus? Cogita, adesse justitiam Divinam, quæ enormitatem delicti exaggerat. 1. Quia homo Deum vilipendit, cujus præceptum transgressus est. 2. Quia præceptum hoc erat observatu facile. 3. Quia hoc ex malitia fecit, cum esset adeò illuminatus, fultus gratiâ, & sine passionum rebellionem. 4. Quia nec motus est rigore pœnæ transgressuro impositæ, nec exemplò Angelorum. Igitur non mereri misericordiam, sed justitiam. Agnosce hinc gravitatem peccati. Detestare. Time justitiam.

2. Cogita adesse misericordiam, approbare quidem omnia, quæ allegavit justitia; excusare tamen hominem, quod fragilis sit, ex luto compositus, tentatus a dæmone, idque in despectum, & odium Dei. 2. Agere, ne perdat, quia totum genus humanum perdendum esset: non ita omnes omnino Angelos perditos: triumphaturum dæmonem, si homo damnatur: Deum habiturum nomen rigidi, non misericordis; cum misericordiæ nullus hæctenus fuerit locus, nullus futurus sit: convenire denique Dei bonitati, ut

F 2

placa-

placaretur. Exhibe te miserationis egentem hanc invoca, lauda, gratias age, spera.

3. *Expedir, ut unus moriatur homo, ne tota gens pereat.* Ibid. Cogita hanc esse SS. Trinitatis conclusionem, quæ magis in misericordiam inclinat, quam in justitiam. Quod justus enim sit, à nostra malitia habet; quod verò misericors, à sua bonitate. O quàm expedit, & pro Dei gloria manifestanda, & pro hominum salute! Agnosce, adora, lauda, ama, time offendere hanc bonitatem, spera in eam. Sed quæ tua erit in eam obligatio? quàm eam amabis? quàm illi servies?

F E R I A II.

Concilium Phariseorum adversus Christum.

1. *Collegerunt Pontifices, & Pharisei Concilium, & dicebant: Quid facimus?* Joan. 11. Qui coeunt? inimici Christi, invidi ejus gloriæ, quod miracula patret, quod à plebe honoretur. Quæ sana sententia expectari potest à judicibus odio, & invidiâ excæcatis? Quo fine coeunt? *ut Jesum dolò teneant, & occidant.* Hòcne meritis est Christus, qui pertransivit omnibus benefaciendo? Quid fecisses, si illi concilio adfuisses? quo in iniquos illos zelò exarsisses? In te converte hæc tela. Tu contra eum sæpius conspirasti. Amor proprius convocavit concilium passionum: quibus quoties satisfacis, decernis adversus Dominum. Et hoc meretur per tot tibi impensa beneficia! O ingratitudo!

2. *Hic homo multa signa facit.* Ibid. Nec nominare eum dignantur, adeò vilem æstimant. Hoc initium est ruinæ, Deum non magni æstimare. Confitentur, quod multa signa faciat, & tamen per-

perditum eunt Jesum ; quia timent regno temporali. Pluris hoc regnum æstimant : quam Deum. O infania ! sed tua. Quoties tu Deum , si non vilem , certè non pro dignitate magnum æstimâsti ? vilia illi tuarum passionum delectamenta anteposuisti ? Cape hanc veritatem , unicum tuum bonum esse , Deum amare , & illi soli servire.

3. *Expedi* , ut unus moriatur homo. Ibid. Innocens , Propheta , patrator miraculorum , Messias , non accusatus , non auditus , non convictus : & tamen expedit , ut moriatur , ne regnum pereat ? O scelerate ! non expedit tuâ , sed Dei sententiâ , qui impiô tuô decretô ad bonum generis humani utitur. Hæc Dei indoles est , ex pessimis optima eruere. Imitari potes , si ex tui contemptu eruas humilitatem , ex afflictionibus patientiam , ex creaturis Dei laudem. Ita *diligentibus Deum omnia cooperantur in bonum*. Rom. 8.

F E R I A III.

Coena in Bethania à Martha , & Maria Christo exhibita.

1. *F*ecerunt autem ei cœnam ibi , & Martha ministrabat. Joan. 12. Cœna hæc facta est in domo Simonis leprosi post Lazarum resuscitatum , Christo in gratiarum actionem. Martha ergo in domo aliena ministrabat Christo. Qui amat , ubique captat occasionem amato ministrandi. Nullus illi locus , nulla domus , ad hoc peregrina est , etiam sponte famulorum officium suscipit. At quot te prætereunt occasiones ? Si amares omnem venareris , ubivis , quovis tempore. Si hoc egisses semper , quàm gravis esses meritis ? Non ægrè feras alios sedere in quiete , te autem ministeriô

fatigari. Diversis diversa mandantur merendi studia: istud tibi. Istô Deo places.

2. *Maria accepit libram unguenti nardi pistici pretiosi, & unxit pedes Jesu, & extersit capillis suis.* Ibid. Unxerat jam antea in sua conversione. Christi pedes. Ungit hic in gratiarum actionem de resuscitato Lazaro. Expende ad Christi pedes in aliorum præsencia projectæ humilitatem, sui contemptum, amorem, gratiarum actionem, quâ pretiosissimum, quod habebat, Deo immolat. Attende, quam Christus habeat complacentiam, quam hujus actionis æstimationem? Affer & tu non vilia, non perfunctoria opera, sed pretiosa, pleno, & interno affectu exhibita, qui à Deo tam pretiosa accipis.

3. *Et domus impleta est ex odore unguenti.* Ibid. *Christi bonus odor sumus.* 1. Cor. 2. Aut saltem esse debemus. Odor operum nostrorum est ædificatio proximi. Eximia religiosi virtus totam domum replet hoc odore. Quò major es, eò magis hoc præsta. Majorum exempla trahunt minores. Vide autem magis, ne de te queratur Deus: *Fœdere fecisti odorem nostrum.* Exod. 5. Si vel aliis exemplo sis malo, vel bonis illudas.

F E R I A I V.

Murmur Discipulorum de profuso Magdalenæ unguento.

1. *Videntes autem Discipuli indignati sunt, dicentes.* Matth. 26. Murmurabant de prodigalitate, & indiscretionc Magdalenæ, qui, quo affectu hoc ageret, non videbant. Nunquam derunt, qui de justorum virtutibus sinistrè judicent, loquantur, & in malum interpretentur, sive igno-

ignorantiâ , sive malitiâ. Etiam boni suas formant censuras zelô quandoque indiscretô. Quid si & Superiores ? Si vis bonus esse Religiosus , debes ad hæc animum parare. Ad judicia Dei respice , hominum contemne : isti corticem vident ; Deus medullam. Cave autem , ne & tu aliorum acta in malum interpreteris , dum potes in bonum.

2. *Dixit unus ex Discipulis ejus Judas Iscariotes.* Joan. 12. Matthæus , & Marcus plures murmurâsse scribunt : Joannes , unicum Judam. Augustinus combinat . *eis Juda dicente persuasum esse.* Ita murmurator unus sæpe circulum integrum ad murmur trahit. Cave tu incipias , cave incipiente aliô prosequaris. Facies , si assuescas aliorum actiones apud te in bonum interpretari.

3. *Potuit enim unguentum istud venundari multô , & dari pauperibus.* Matth. 26. Ecce quod pallium obtexit iniquitati : quasi ei cura esset de pauperibus , qui fur erat , & prospiciebat furandi occasionem , si illud unguentum venditum fuisset. Ita vestiuntur plerumque malæ passiones. Irasceris , vis zelum videri : familiaritati peculiari indulges , vis charitatem æstimari : effundis te ad solatia creaturarum , vis dici fructuose conversari. Sed palliô hõc non tegeris apud Deum.

F E R I A V.

Christus defendit Magdalenam.

1. *S* *Ciens autem Jesus ait ; Quid molesti estis huic mulieri ? Opus enim bonum operata est in me.* Ibid. Semper Jesus advocatus est Mariæ. Luc. 7. contra Phariseum peccatricem arguentem. Luc. 10. Contra Martham de otio accusantem. Hic

F 4

contra

contra Judam murmurantem. En quomodo semper virtus Deum habet patronum. Quod solatium hinc fuerit Magdalenæ adhuc novitiæ in via virtutis! Quantum fuerit animata! Quid te affligunt sinistra hominum judicia, murmura, censura? Nunquid propterea virtutem deseres? absit, perge bene agere, confide: Deum habebis defensorem. Erit tempus, in quo aperietur veritas cum tuo solatio majore.

2. *Nam semper pauperes habebitis vobiscum; me autem non semper habebitis. Mittens enim hac unguentum in corpus meum, ad sepeliendum me fecit.* Ibid. Solvit rationem murmuris de cura pauperum. Non regerit Judæ intentionem furandi, quam noverat Dominus. Ut discas non te defendere per revelationem alienæ culpæ. Infirmitas innocentiae tuæ argumentum est alterius culpa. Laudat deinde intentionem Magdalenæ, quæ *prævenit ungere corpus suum*. Marc. 14. quod vel ex conversatione cum Christo, vel afflatu Spiritûs Sancti didicerat se post mortem non esse uncturam. Placent ergo Deo præventa obsequia, quorum post non datur occasio. Sic omnem gratiam æstima, omnem occasionem arripe: quia nescis, an post futura sit.

3. *Ubicunque prædicatum fuerit hoc Evangelium in toto mundo, dicetur, & quod hæc fecit in memoriam ejus.* Ibid. Silebat Magdalena ad murmur Judæ: Ecce Dominus fideles omnes ad ejus præconium excitat. Adeo placet illi silentium humile inter calumnias. Unxerat alias Magdalena Christum. Luc. 7. Non promittitur illi operi memoria sæculorum; quia erat adhuc incipiens in virtute; promittitur isti unctioni, quia progressa est in virtute, & ascendit ad caput usque Christi, quod
illô

illô unguentô imbuît ; ibi autem solum ad pedes hæsit : ibi erant purgativi affectus , hîc unitivi. Incipere necessarium est , sed progredi laudabile. Vide ergo , ne sistas , quovis die incrementum adde,

F E R I A VI.

Ascendens Hierosolymam prædicit suam passionem.

1. *ERant autem in via ascendentes Hierosolymam , & præcedebat illos Jesus , & stupebant.* Debuit insolita fuisse Christi properatio , quod stupeverint Discipuli. Quæ verò ejus causæ? 1. Ut ostenderet , quàm prompta voluntate ad patientium feratur. Ad miracula edenda ordinario ibat passu , ad passionem accelerato. Amor addidit alas. Quàm lentus sum ego , quàm refractarius ad ardua! O trahe me post te! 2. Ut ostenderet se ad labores , & dolores præire. Cur ergo præcedere tu vis ad honores , ad delicias? Quantum abes à Spiritu Christi! Mirare cum Apostolis præcedentem ; sed cum iisdem etiam sequere.

2. *Ecce ascendimus Hierosolymam , & Filius hominis traderetur Principibus Sacerdotum.* Matth. 20. Sæpius aliàs , nunc iterum passionem suam prædicit Apostolis. Cur toties? Quia , quod quis amat , semper habet in memoria , libenter de eo loquitur. Non est tibi in memoria passio Christi , quia pati non amas. Patiendum tamen est necessitate quadam. Noli pati ut brutum : ut dulcius patiaris , memento patientis Jesu. 2. Ut ad aliquid patiendum Discipulos animaret exemplô suô , qui simul ascendebant. Qui cum Christo ascendit , seu ad virtutem seu ad cœlestem Hierusalem,

F s

lem,

lem, pati debet. Sed non solus, habet secum Christum, cujus vel memoria cruciatus lenit.

3. *Et ipsi nihil horum intellexerunt.* Luc. 18. Terrena adhuc sapiebant. & magni faciebant ea, quæ mundus æstimat, delicias, honores, gloriam, &c. à contemptu autem, contumeliis, & doloribus abhorrebant. Animus, qui terrena sapit, non percipit, quod Deus æstimat. Unde tu tam aridus es in meditatione vitæ, & mortis Christi? Quia non habes æstimationem, & amorem contemptus, & afflictionum; sed honorum, vanitatum, & delectationum sensus. Desse insipientiam tuam, & disce ab optimo Magistro pati: Quia non est discipulus supra Magistrum. Matth. 10.

S A B B A T H O.

Præparatio ad solemnem ingressum in Hierusalem.

1. *ET ascendens Jesus Hierosolimam, assumpsit duodecim discipulos.* Matth. 20. Non ignorabat Christus decrevisse Judæos, ut cum dolo tenerent, & occiderent. Marc. 14. Voluit tamen Hierosolimam solemniter ingredi, & cum ea pompa, quæ à Prophetis de Messia prædicta fuit. 1. Ut ostenderet se verum esse Messiam, & præberet se agnoscendi occasionem, ut inexcusabiles essent, si non ut talem venerarentur. Omnibus enim dat Deus gratias, non omnes accipiunt. Stude, ut oblatas accipias: time., si negligas. 2. Ut ostenderet, non posse Judæos exequi decretam mortem, nisi ipse velit. A Deo pendet, quidquid decreveris. Ejus ergo gubernationi te in omnibus committe.

2. *Ite in Castellum, quod contra vos est, & statim inve-*

invenietis asinam alligatam, & pullum cum ea, solvite, & adducite mihi. Si quis vobis aliquid dixerit, dicite, quia Dominus his opus habet. Matth. 21.

Ostendit Divinitatem suam, significando absentiam. Crede non abesse à te, adora eum, ama, time. 2. Exercet dominium, quod habet in omnes res creatas. Et tu huic subiectus es. Patere eum in te dominari, cum interna te cogitatione monet, ut frangas appetitum, ut subdas voluntatem, ut linguam modereris; cogita has asinas esse, & tibi dici, *Dominus his opus habet. Negabisne hoc illi?*

3. *Euntes autem Discipuli, fecerunt, sicut præcepit illis Iesus, & adduxerunt asinam, & pullum. Ibid.* Obediunt Apostoli perfecte, sicut præcepit, nec ullam movent ulterius quæstionem. Par fuit promptitudo Domini illorum jumentorum. Auditò enim, quòd *Dominus his opus habet*; nec qui sint, nec à quo missi, nec causam, nec tempus quærit. En bonam in utrisque voluntatem faciendi, quod placet Domino. Examina, quàm bona sit tua, quàm prompta ad bonas suggestiones. Dispone eam, ut sit melior.

DOMINICA SEXAGESIMÆ.

Triumphalis ingressus Christi in Hierusalem.

1. *Imposuerunt super eos vestimenta sua, & desuper eum sedere fecerunt. Plurima autem turba straverunt vestimenta, &c. Matth. 21.* Considera obsequia Discipulorum, & turbarum officia in textu enumerata. Quis excitavit turbam, quæ non ignorabat Principes in Christum conjurasse? nisi, qui corda movet, Deus, & contra timores firmat. Quid sperare poterant à paupere Jesu, & paupere-

pauperibus Discipulis? imò timere poterant Principum indignationem. Sola æstimatio Christi eos movit, quam conceperant ex ejus miraculis, & recens suscitato Lazaro. O si magnam conciperes Dei æstimationem! quæ obsequia præstares Deo? quàm fortiter adversus teipsum, & concilia tuarum passionum dimicares?

2. *Clamabant dicentes: Hosanna filio David: Benedictus, qui venit, &c.* Ibid. Considera turbam hanc tria conjunxisse, quibus vera devotio perficitur: Cor, sive affectum, quò Christum prosequebatur: linguam, seu voces, quibus eum laudabat: manus, seu opera, quibus ramos cædebat. Non est vera devotio, quæ hæc tria non habet; quia nisi hæc Deo reddat, non reddit nos totos. Confer devotionem tuam. Vide, an verba, & opera procedant ex affectu? an, ut loqueris, ita facias? an vox sit Jacob, manus autem Esau? Totus Dei eris, si illa tria jungas.

3. *Ecce Rex tuus venit tibi.* Ibid. Cogita te invitari ad hoc spectaculum. *Ecce Rex tuus* omni titulo. Debes ergo ei omnem subjectionem. *Venit tibi*, id est, tuo bono; cui omnes suas cogitationes; studia, vitam, sanguinem est impensurus; ut te egenum ditet, periclitantem protegat, miserum, & vilem ad regnum evehat. Attolle illi portas cordis, ut introëat Rex gloriæ. Agnosce affectum, adora Regem, offer illi intellectum voluntatem, & affectus tuos.

F E R I A II.

Invidi Pharisæorum sermones.

1. *Vldetis, quia nihil proficimus. Ecce mundus totus post eum abit.* Joan. 12. Considera invidiam

diam Phariseorum. Qui occisum volebant Christum, quàm ægrè ferunt honoratum? Sed fateri debent, se nihil proficere. Noli animo dejici, si invidiam patiaris. Nihil proficiet. Solum invidum cruciabit. Noli etiam invidere, ne crucieris. 2. Dicunt plus, quàm verum sit, quòd totus mundus eum sequatur, ut magis suam rabiem acuant. Utinam vero id verum esset! sequantur eum Infideles, Hæretici, Judæi. Tu primus sis. Si alius plausum, & accursum habeat, tu non invide.

2. *Quidam autem Phariseorum dixerunt ad illum: Magister increpa Discipulos tuos.* Luc. 19. Ecce livoris ingenium: vult impeditos Christi plausus: audet ab ipso Christo id petere, ut eos prohibeat. Vocant Magistrum, ut petitioni per blandimenta viam sternant. Quid petunt? ut Discipulos increpet. Quare? estne malum, quòd applaudant Domino? Sed invidia nihil rectum videt, etiam pia, & sancta improbat. Absit à me hæc, & omnis passio, quæ sensum pervertit, & excœcat.

3. *Quibus ipse ait: Dico vobis, quia, si hi tacuerint, lapides clamabunt.* Ibid. Sensus est, quòd non silebunt hi, qui à Deo moti sunt: si tamen silerent, posse Deum etiam durissimi cordis homines ad dandam sibi gloriam excitare. Ita est. Nullum cor tam durum, quod Deus vel frangere, vel mollire non possit. Potest ergo & meum. Sed hætenus ego obstiti. Quid feci? Quoties voluit ille? Quoties ego restiti? Time, quia cor durum malè habebit in novissimo. Eccl. 3.

F E R I A III.

Flet super Civitatem Hierusalem.

1. *V*idens Civitatem flevit super illam. Luc. 19. Quid lachrymæ in æstu plausuum? Videt Hierusalem, & in ea totum mundum. Videt omnium scelera: etiam tua. Videt passionem suam cessuram multis in ruinam, ex propria eorum malitia. Poterat absolute salvare, sed vult, ut gratiis suis cooperentur. Peribimus, si non ntemur. Expende, an aliquam super te flendi occasionem dederis. Amorem ejus in te agnosce. Sed non sufficit, nisi & tu coopereris.

2. *S*i cognovisses & tu, & quidem in hac die tua, quæ ad pacem tibi. Ibid. Indicat fletus sui causam esse cœcitatem populi non agnoscentis Messiam, ex qua odium, invidia, ingratitude, & omne malum. Hinc laborat Diabolus, ut hanc cordibus nostris cœcitatem inducat, ut non agnoscamus, quantum bonum sit gratia Dei, quantum malum peccatum; non attendamus Dei inspirationibus, ne sequamur. Et hoc, *in hac die tua*, vitæ scilicet hujus, quæ sola est dies nostra: quam sequetur *dies Domini*. Vide ergo, quomodo diem tuum impendas, ne timere debeas diem Domini. Deplora priorem cœcitatem, & tandem aperi oculos, ut agnoscas, quæ gratiæ tibi dentur ad vitam æternam.

3. *V*enient dies in te, & circumdabunt te inimici tui vallē, &c. Prædicat everisionem urbis per Romanos futuram ob peccata, præsertim in Christum, commissæ. Peccata enim sunt omnium miseriarum causæ, & præparant materiam vindictæ Dei. In his exprimitur miseria hominis in articulo mortis, qui male usus est tempore suæ visita-

visitationis, & gratiæ. Circumdabunt eum inimici Dæmones: coangustiabunt præterita peccata: prosternent in terram omnes grandes, & vanas designationes, &c. Quia non bene usus est tempore visitationis suæ. Vide, quanti referat, uti gratiâ, dum tempus est.

F E R I A IV.

Paciscitur Judas cum Principibus de tradendo Jesu.

1. *T*unc abiit unus de duodecim, qui dicebatur Judas Iscariotes, ad Principes Sacerdotum. Matt. 26. Tunc, postquam intravit aviditas pecuniarum occasione effusi unguenti, vel quando scivit congregatos in odium Christi Pontifices. Unus de duodecim, in Apostolica dignitate constitutus: Judas nominatur, ne suspicio cadat in plures: Iscariotes, ne quis cogitet de Thadæo: ad Principes Sacerdotum infensissimos Christo, & morti ejus intentos. Vide, quæ evadant indomitæ animi passiones. Ardebat avaritiâ Judas; hinc murmurator factus de profuso unguento: tum cœpit odisse Christum, mox eum pretiô vendere; non amico, sed capitalibus inimicis. Time proinde passiones tuas, & ideo applica illis securim mortificationis.

2. *E*t ait illis: Quid vultis mihi dare? & ego eum vobis tradam. Ibid. Quantas, quàm pretiosas merces proponit pessimus mercator? Dei Filium: sed quàm vili æstimat, qui pretii libertatem iniquis emptoribus remittit, qui nec Jesum nominare dignatur. Résne ergo tam vilis est Deus? Ah! quoties tu eum vilioris æstimâsti! At quantô plaris ille te fecit? qui pro te se, vitâque suam dedit.

dedit. O brutum ! si non pluris æstimas , si non amas.

3. *At illi constituerunt ei 30. argenteos.* Ibid. Pretium jumenti , aut vilissimi mancipii : Quis iste Dei contemptus ? Sed altiore consilio tam parvo est venditus. *Nos ille voluit pretiosos facere in pretii vilitate* , ait D. Paulin. Ep. 4. *Ipse nobis hac vilitate pretiosior , quòd se vili vult æstimari , ut ab omnibus ematur.* Non potes grandia pro Deo dare , da parva , da curam minimorum. His libenter se tibi vendit.

F E R I A V.

Cœna Paschalis.

1. *Te in civitatem ad quendam , & dicite : Magister dicit : apud te facio Pascha.* Matth. 26. Pauperrimus Jesus , nec , ut Pascha celebret , propriam habet commoditatem. Visne tu , non tantum ad spiritualia , sed etiam ad sensualia , omnem tibi suppetere commoditatem ? Patrifamilias tantum innuit , quid placeat : *apud te facio Pascha* : & ille protinus assentitur , & servet ad obsequium. Sufficientne tibi à Deo , à Superioribus , à regula innui , quid Deo placeat ? statimne assentiris ? an quandoque servilibus cogendus es ? sic pretium operis , & meritum perdis.

2. *Desideriò desideravi hoc Pascha manducare vobiscum.* Ibid. *Hoc Pascha* , quod est ultimum vitæ suæ , quod mox sequetur , acerba passio , & mors infamis. Ideo omnino , quia post hoc scit secuturam mortem , ad quam tui amore semper aspirabat. Quò vicinior est passioni , eò majus gaudium prodit. Si Christum te amare credis , & pati fugis , tibi mentiris. Probatio amoris est passio ,

passio, præsertim, si sit cum gaudio, aut cum antecedente desiderio. O quam tu delicatus es! Non corresponderis desideriis Christi, nisi similia concipias.

3. Considera Christum hîc servare omnes legis cærimonias, & quid eæ significarent contemplatum. *In agno occiso excoriato, asso*, se ipsum occidendum, flagellis excoriandum, & igne amoris consumendum. *In seculo, non fractis ossibus*: se luxatum quidem, ossa tamen sua non fracta. *In festinatione comedentium*, festinationem furoris inimicorum. *In laelucis agrestibus*, sui fellis amaritudinem. *In baculo, quem manibus tenebat*, suam Crucem. Cogita, qui fuerint hîc affectus, se ad omnia hæc offerentis: & conare similes elicere.

F E R I A VI.

Lotio pedum.

1. **S**Ciens, quia omnia dedit ei Pater in manus surgit à cæna, & cœpit lavare pedes. Joan. 3. Quæ connexio ista? Scit omnia sibi data in manus, & cœpit lavare pedes? Ut intelligas, quanta sit humilitas, intellige, quanta sit majestas ejus, qui se abjicit. Potésne majorem cogitare? Attende vilitatem tuam: & tamen humiliari detrectas. *Omnia ei sunt data in manus.* Sed tu surripis aliquid illi: quia pedes illi tuos, id est, affectus non das. Ubi vagantur? nōne post vestigia gregum, seu creaturarum? Collige eos: conigna ei in manus, ut ille lavet à pulveribus, aut sordibus, quæ ex creaturis adhærent, & manu sua eos regat.

2. *Surgit à cæna, ponit vestimenta, accipit lintheum, parat aquam, lavat, abstergit.* Ibid. Omnia solus

Avanc. Medit.

G

agit.

agit. Cur non Discipulorum aliquis ad juvandum admittitur? Ad honorata, ad filiationem Dei, ad hæreditatem regni, ad potestatem absolvendi, & ejiciendi dæmonia admisit socios; ad ea, quæ sunt humilitatis, prævenit omnes, nec opinantes. Sic agunt veri humiles. Non es verè humilis, si in vili ministerio non certas prævenire. At tu fortè nec sequi contendis, & lentus aspicias alios. Crede mihi, aspicias etiam olim de longè, cùm illi te ad præmium antecedent, & serò dolebis.

3. *Venit ergo ad Simonem Petrum &c. Ibid.* Petrus videt hinc suam vilitatem; inde majestatem Dei, stupet: *Domine, tu mihi lavas pedes?* Pondera singula verba. *Domine* universorum, & meus: *Tu?* cujus est potestas, & imperium: *mibi*, servo vilissimo, & peccatori, &c. Obstupesce verò, quòd idipsum toties in te faciat Jesus, toties te abluat non aquà, sed sanguine suo, seu gratiâ ex meritis sanguinis. At hujus tanta necessitas est, ut, nisi te laverit, non sis habiturus partem cum illo. Dic ergo cum Petro: *Domine, non tantùm pedes affectuum, sed etiam caput cogitationum, & manus operum, ut omnia sint munda in conspectu tuo.*

S A B B A T H Ò.

Admonitio Discipulis data post pedum ablutionem.

1. *S* *Citis, quid fecerim vobis? Si ergo ego lavi pedes vestros Dominus, ac Magister vester, & vos debetis alter alterius lavare pedes. Joan. 13.* Per interrogationem revocat eos ad attentionem. Res enim attentu dignissima est humilitas Christi. 2. **Verbò**

Verbô explicat, quod prius exemplô ostendit. Efficacissima sunt docentis verba, quæ ipsius factis animantur. 3. Argumentum nervosum est: Ego lavi; ergo & vos debetis: Ego vobis; ergo & vos alteri. Vide, quàm à minori ad majus bene concludat. 4. Hic vocat se Dominum, ac Magistrum, ut efficacius persuadeat. Quid tu ad ista? stipes es, si non convinceris: lapis es, si non moveris.

2. *Exemplum enim dedi vobis, ut, quemadmodum ego feci, ita & vos faciatis.* Ibid. Vide, quo facta Christi tendant, ut sint tibi in exemplum. Quantum est de te, vitam adimis factis Christi, si non imitaris. fraudas enim ea sine suo: quia exempla cessant esse exempla, ubi cessat imitatio. Ne feceris tu hanc illis injuriam. Vide etiam, quàm bonum habeas Dominum, qui non imponit tibi jugum, quod ipse prior non portaverit: quàm bonum Magistrum, qui, ut te blandius trahat, prius facit, quàm verbô doceat. Ut bene ergo opereris, attende in singulis exemplum Christi, ut facias; quemadmodum ille. Hæc compendiosa est, & certa perfectionis norma.

3. *Si hæc scitis, beati eritis, si feceritis ea.* Ibid. Aperta doctrina est, quod non ille sit beatus, qui multa scit, sed qui facit, quæ scit. *Non enim magnum est virtutem cognoscere, sed studiosè agere,* ait Cyril. Alexand. lib. 9. in Joan. cap. 9. Non ergo satis est, quod scias exempla Domini. Ipsa scientia est quædam ad imitandum obligatio. Nam Luc. 12. Servus, qui scit voluntatem Domini sui, vapulabit multis, si non faciat secundum eam. Expende, quanta tu lumina habeas, quantam bonorum cognitionem: ô si secundum eam faceres, quàm esses beatus!

DOMINICA QUINQUAGESIMÆ.

Institutio Venerabilis Eucharistiæ.

1. *Accipite, & comedite. Hoc est corpus meum.* Matth. 20. Credo primum viva fide carnem, sanguinem, animam Christi, Deitatem, & quidquid est Deus, esse in SS. Eucharistia, sive vi verborum, sive per concomitantiam. Admirare Dei sapientiam, quæ invenit novum modum se nobis communicandi. Obstupescere, & lauda omnipotentiam, quæ unô momentô, solô verbô illa omnia sub speciebus panis, & vini ponit. Agnosce infinitum amorem, quô hoc facit. Sicut Pater sic dilexit mundum, ut Filium suum unigenitum daret: ita & Filius, ut seipsum daret, ut sit nobiscum usque ad consummationem sæculi. O admirabilis, & amabilis Deus! Quod de te cogitaverit, ut incarnaretur, quantum est? sed quanto majus, quod in te velut denuò in mundum veniat, & omnia secum adferat, quæ tunc attulit? quid retribues Domino?

2. *Dominus Jesus, in qua nocte tradebatur, accipiens panem, &c.* Considera tempus hujus institutionis. Erat illud ipsum, quô ejus vitæ struebantur insidiæ, quô fervebant odia Judæorum in illum. Sic aquæ persecutionum non potuerunt extinguere charitatem ejus. Sic amat nos etiam, cum inimici sumus. Tormenta igitur vicina, crux, infamia, non causarunt separationem Christi à te, sed majorem conjunctionem per hoc amoris, & unionis Sacramentum. *Quis ergo separabit à charitate Christi? tribulatio? an angustia? an fames? an nuditas? an periculum? &c.* Rom. 8. Conclude magno, ardentique amore; *In his omnibus superabo, propter eum, qui dilexit me.*

3. Et

3. *Et manducantibus illis accepit Jēsus panem.* Marc.

14. Considera, quos Christus adhibuerit convivas; Apostolos nempe, & inter eos, ut communior habet sententia, etiam Judam. Sed quanta sumentium diversitas! Illi corpore simul, & spiritu ardentissimæ devotionis; iste solum corpore, spiritu autem in prodicionem Christi intento. Vide belluam illam hoc amoris cibō non mitigatam: & adverte, quomodo scelera in catenam eant, cū passio, ex qua ortum trahunt, tempestive non opprimitur.

F E R I A II.

Christus super cœna insinuat proditorem.

1. *Jēsus turbatus est spiritu, & dixit: Amen dico vobis, quia unus ex vobis me tradet.* Joan. 13. Turbatio hæc fuit vehemens tristitia. Causa hujus est atrocitas criminis à Juda patrandi, ab Apostolo, à domestico. Quid non agit, ut à me ditato eum scelere reducat? Ostendit se consciū futuræ prodicionis, ut non credat Judas suū scelus latere. Non nominat proditorem, ut parcat famæ; ut non concitentur in eum alii discipuli; ut Judas hac lenitate trahatur; ne manifestè coargutus, fiat impudentior. Dum nihil proficit; dat signum proditoris: *Qui intingit mecum manum &c.* Intentat ei *Væ* æternæ damnationis. O bonitas Dei! O duritia peccatoris! O Domine, non induretur cor meum, ad tot inspirationes, quas & mihi inmittis.

2. *Et contristati sunt valde, & cœperunt singuli dicere: Nunquid ego sum Domine?* Matth. 26. *Quòd dixit: unus ex vobis, omnes perturbat.* S. Chrysost. hom. 71. in Joan. Quare? 1. Non de conscientie

reatu , sed de humana mutabilitatis incerto. S. Leo ser. 7. de Passion. Etsi non essent sibi conscii , timebant suæ fragilitati. Noli ergo & tu nimium tibi confidere. Cecidit Petrus , qui nimium sibi fidebat. 2. *Timentes , ne minus verum esset , quod in se quisque noverat.* Idem S. Leo. Etsi enim quis nihil sibi conscius sit , non ex hoc justificatus est. Time & tu , dic : ab occultis meis munda me. Audet & impudentissimus Judas idem quærere. Quid tu facis , ne te suspectum patiaris ? Quàm mansuete respondit Christus : *Tu dixisti : non , tu scelerate , tu perfide , &c.* Quid tu respondes ei , à quo offensus es ? quibus verbis ? quo vultu ? qua voce ?

3. *Continuò exiit. Erat autem nox. Et cùm exiisset , dixit Jesus : nunc clarificatus est filius hominis.* Joan. 13. Ingressus in eum Sathanas , non permisit , ut orationem expectaret , *timens ne scintillam in ejus animo accenderet , & ad meliora retraheret.* S. Cyril. Vide , quàm studeat dæmon ab oratione avertere eos , quos tentat : & collige , quàm efficax remedium esse debeat oratio. 2. Quando exiit Judas , clarificatus est Christus ; *separato inde nequissimo Juda , & secum remanentibus Sanctis.* S. Augustin. tr. 63. in Joan. quasi una iniqui præsentia gloriam Christi obscuraverit. Qui ergo inter Sanctos vivis , stude virtuti , ne tua vita gloriam Christi obfuscet.

F E R I A III.

Contentio Discipulorum.

1. *F*acta est contentio inter eos , quis eorum videretur esse major. Luc. 22. Certiores facti de morte Magistri , inquirebant , quis eorum videretur esse major , ut ceteris fieret Magister. Euth. Quam citò mutantur

tantur affectus nostri ! Paulò antè *contristari sunt valde*, quòd tradendus esset Christus : jam in ambitionem cadunt. Vide tu, ne sis in bono tam inconstans. Infirmæ virtutis sunt affectus desultorii.

2. Qui contendunt ? etiam in Christi schola, sub Magistro humilitatis ? Quæ materia disceptationis ? *Quis videretur*, coram hominibus, non quis re ipsa esset. O vanitas ! visne tu videri ? an esse ?

2. *Qui major est in vobis, fiat sicut minor.* Ibid. Hoc est pharmacum curandæ ambitioni. Nam contraria optime curantur contrariis. Excellentiorum te judicas officio, potestate, scientia, &c. Fias sicut minor. Ita lege à Christo sancitum est. Hoc ejus exemplò firmatum. *Ego autem in medio vestrum, sicut qui ministrat.* Alii solum videntur esse majores : qui se demittunt, re ipsa sunt. Credis hanc veritatem ? Et cur non huc tua tendunt studia ? cur locum, cathedram, officium, &c. honoratiora ambis.

3. *Et ego dispono vobis, sicut disposuit mihi Pater meus regnum.* Accipe hoc ad domandam ambitionem, ad sectandam humilitatem motivum. Pater disposuit Filio regnum per humilitatem, & Crucem. *Humiliavit semet ipsum ; propter quod Deus exaltavit illum, & dedit illi regnum.* Phil. 2. Filius tibi eodem modo disponit regnum. *Disponit*, veluti testamento, & ultima voluntate, quam non licet infringere. Delusoria sunt ergo principia his contraria, quæ hætenus es secutus. Illud certissimum est : *Qui se humiliat, exaltabitur*, Luc. 14.

F E R I A IV.

Sermo Christi super Cœna

1. *Sicut dilexit me Pater, & ego dilexi vos.* Mane-
G 4
12

te in dilectione mea. Joan. 15. Longus est sermo, & dignissimus, qui sæpius legatur. Tria autem potissimum eò commendavit. 1. quidem amorem Dei, non qualemcunque, sed permanentem, & constantem. At hunc ut inducat, suum in nos amorem proponit. *Dilexi vos gratis*, sine vestris meritis: *Sicut dilexit Pater*, tam intenso, tam puro amore. Nonne jure amare exigit, qui ita amat? Et quod signum amoris ei dabis? unum petit: *Si diligitis me, mandata mea servate.* quàm facile? *mandata ejus gravia sunt sunt.* Dàsne hoc signum in regularum observantia? Quem fructum feret, qui ita diligit? 1. *Manifestabo ei meipsum per plura lumina.* 2. *Pater meus diligit eum.* 3. *Ad eum veniemus, & mansionem apud eum faciemus.* Expende hæc omnia.

2. *Mandatum novum do vobis, ut diligatis invicem, sicut dilexi vos.* Ibid. 2. Commendat dilectionem proximi. Si hæc absit, non est dilectio Dei. 1. Joan. 4. *Mandatum novum*: in quo fundatur lex nova, quæ est lex amoris, in qua sub capite Christo omnes unum corpus sumus singuli autem alter alterius membra. Rom. 4. *Novum*, non vanitate diligendi, sed diligendi *sicut ipse dilexit*, gratis, etiam inimicos, cum suo incommodo, per tormenta, usque ad Crucem, ut nos salvaret. O quantum abes ab hac perfectione! Si vis discipulus ejus esse, accende hunc in te amorem. Hunc pro signo discipulatus exigit. *In hoc cognoscent omnes, quia Discipuli mei estis, si dilectionem habueritis ad invicem.*

3. *Petite, & accipietis.* Commendat orationem. Accendit fiduciam impetrandi: *Quodcunque petieritis, faciam vobis.* 2. Anget fiduciam, quòd petendum sit à Patre. *Si quid petieritis Patrem*, qui bonus est, & potens. 3. Docet, ut id, quod petitur

titur sit aliquid, id est, ut ait August. tract. 102. in Joan. *quod in beatæ vitæ comparatione non sit nihil.*
 4. Docet petendum *in nomine*, seu per merita sua, quæ, ut ait Rupert. lib. 12. in Joan. *necessarium sunt universæ orationis vehiculum.* 4. Quod petitur dirigatur ad gloriam Dei; *Ut glorificetur Pater in Filio.* Si has condiciones accurate servaveris, quod petes, accipies.

F E R I A V.

Christus consolatur Apostolos.

1. **N**on relinquam vos orphanos; veniam ad vos. Joan. 14. Consolatur de suo abitu tristes Apostolos, pollicendo semper præsens suum auxilium in omni tribulatione. Si Deus tecum, quis contra te? Non relinquet te, nisi prior tu eum relinquas. Perseverabit esse Pater, si non desinas esse filius. Etsi te modicum relinquat in desolatione, aut afflictione: iterum modicum, & videbis eum, & gaudebit cor tuum. 1. Animat eos spe præmii æterni: *In domo Patris mei mansiones multæ sunt, & ego vado vobis parare locum.* Modicum est quodcunque tribulationis, sed æternum quandoque gloriæ pondus illi promittitur. Illuc respice, ne pressus animo deficias.

2. *Quia demundo non estis, sed ego elegi vos de mundo, propterea odit vos mundus.* Joan. 16. En aliud solatium: quia signum est Divinæ electionis, si habeas, quod patiaris. Quos reprobat, patitur ire post vestigia gregum, ac delectationum suarum. Addit: *Ipse Pater amat vos, quia vos me amatis.* Quartum solatium, quia afflictiones sunt pignus amoris Dei in nos. Quam majorem consolationem petis, quam scire, quod te Deus amet?

3. *Si me persecuti sunt, & vos persequentur. Ibid.* Quintò exemplum suum in solatium adducit: *Me priorem vobis odio habuit. Sed confidite, ego vici mundum, vos quoque vincetis, quia ego vobiscum pugno.* 6. Denique: *Tristitia vestra converteretur in gaudium*; mundi verò gaudium in æterna lamenta. Quantò melius tibi est amplecti viam, cujus terminus est æternum gaudere. Ad spinas ergo, ad crucem aspira.

F E R I A VI.

Oratio Christi ad Patrem pro Discipulis.

1. **P**ater sancte, serva eos in nomine tuo, quos dedisti mihi, ut sint unum, sicut & nos. Joan. 1. Per unionem charitatis perfectissimam, ut sint unum, sicut personæ Trinitatis, si non natura, saltem intellectu, iudicio, voluntate; *idem sapiant; velint.* Vide, ut tua talis sit charitas. 2. *Non rogo, ut tollas eos de mundo, ex tribulationibus, quia volo eos adhuc pro nomine meo pati: sed ut serves eos à malo, id est, peccato.* Magis ergo sollicitus esto, ut peccatum fugias, quam crucem, & afflictionem. 3. *Sanctifica eos in veritate, per gratiam Spiritûs sancti, ut sint idonei ministri Evangelii.* Sed tu etiam, ut talis sis, gratiæ collabora, neque sis ficte sanctus, sed in veritate.

2. *Tui erant, & tu mihi eos dedisti, & sermonem tuum servaverunt.* Hoc primum motivum est, quare pro iis oret. Ex parte quidem Christi, quia illi a Patre commissi erant; ex parte verò Discipulorum, quia sermonem Dei, seu fidem, aut legem servaverunt, & gratia Dei in eis vacua non fuit; ac per hoc se dignos reddiderunt, ut pro iis oraret. Vis advocatum Jesum apud Deum expe-

experiri? Vide, ut cum veritate dicas, *Tuus sum ego*: deinde, ut gratia Dei apud te vacua non sit.

2. Motivum est, *Clarificatus sum in eis*: quia me glorificant coram hominibus. An & tu Deum glorificas affectu, verbo, opere?

3. *Non pro eis autem tantum rogo, sed & pro eis, qui credituri sunt per verbum eorum in me.* Ibid. Crede & pro te orasse, quem præsentem ut comprehensor in essentia Divina, ut viator per scientiam infusam videbat. Effectum habebit oratio, si tu non resistas. Quid verò oravit pro te, & pro omnibus? 1. *Ut omnes sint unum per charitatem inter se.* 2. *Sicut tu Pater in me, & ego in te*, ut & ipsi in nobis unum sint, per charitatem ad Deum. Duplicem ergo hunc amorem pro te postulavit. O quàm felix, si hunc habeas! at non habebis, nisi omnem alium sensualem amorem expellas.

S A B B A T H O.

A Cœnaculo in hortum egreditur, & prædicat scandalum Discipulorum.

1. *ET* egressus ibat secundum consuetudinem in montem Olivarum. Luc. 22. Ex urbe olim sibi dilecta, tot beneficiis adornata, lachrymis à se deplorata, sed quæ gratiis non est usâ, egreditur Iesus. Quis non timeat vel inter ipsa beneficia, ne à Jesu deferatur? Non ex eo securum te reddunt, quia dantur, sed quia cooperaris, quantum vales. *Ibat secundum consuetudinem*, quâ oraturus se à tumultibus subducebat, quam non deseruit, etsi se ibi comprehendendum sciret. Disce non admittere spiritualibus exercitiis impedimenta, multò minus quærere, aut prætexere.

2. Tunc dicit illis Iesus; omnes vos scandalum parietis.

ziemini in me in nocte ista. Matth. 16. Timore, ac pusillanimitate, quâ me Pastorem vestrum deseretis, ubi ea videbitis evenire, quæ toties prædixi. Aliud est de vinculis, & morte cogitare, aliud periculum præsens videre. Vix ullum terrent absentia mala, at præsentia etiam fortes frangunt. Etsi mille meditationibus pati ardua proposueris, adhuc sta in timore, & non tibi, sed soli gratiæ innitere.

3. *Respondens autem Petrus, ait illi: Et si omnes scandalizati fuerint in te, ego nunquam scandalizabor.* Ibid. Ex fervore quidem suo solito, sed non cum humilitate conjuncto hæc dixit Petrus. Qui sibi præfidit, multa jactat, pauca præstat, in gravia incidit. Sic Petrus 1. contradicit Christo primæ veritati, idque non semel, sed iteratò. 2. Christo gravius prædicenti lapsum, pertinaciter resistit. 3. Alios inducit exemplò suò, ut similiter omnes dicerent. *Debuisset dicere: dona mihi gratiam, ut, si omnes scandalum passi fuerint, ego in negationem non cadam.* Origen. hom. 35. in Matth. Neque bonis ergo tuis affectibus nimium fide, quia levito vento mutantur; sed eos in gratia Dei funda.

DOM. I. QUADRAGESIMÆ.

Christi in horto tristitia, tædium, pavor.

1. *Cœpit contristari, & moestus esse.* Matth. 26. Nec timere, nec tristari potuisset, quia verè beatus erat, nisi his affectibus licentiam dedisset animam occupandi. Excessus hic charitatis fuit, qui sponte voluit illam partem affligi, quam torquere non poterant adversarii. Causæ hujus tristitiæ fuerunt. 1. Viva repræsentatio omnium, & singulorum cruciatuum suorum, ac mortis ignominio-

miniosissimæ. Quæ per partes passurus erat, ea hoc tempore simul sensit in anima. Colligam & ego in unum fascem omnem tuam passionem, ut semper sit in corde meo fasciculus Myrrhæ. 2. Viva repræsentatio omnium peccatorum, & exigui fructus ex sua passione. Et tu ergo tristitiæ hujus causa fuisti. Christus pro te tristabatur, quia tu *exultabas in rebus pessimis*. Quantum tibi voluptatis, tantum Deo dedisti tormenti. Ah! non amplius: ne de te queratur: *Quæ utilitas in sanguine meo?* Psal. 29.

2. Tunc ait illis: *Tristis est anima mea usque ad mortem*. Ibid. Mœroris vis erupit in verba, an, ut solatium quæreretur? an, ut etiam id aperiret, quod solum in animo latebat, & cognosci ab Apostolis non poterat? *Anima mea*, quæ actu visione beatifica fruitur, cum qua naturaliter nullus mœror stare potest, illa tamen tristatur. Obstupece! Christus, ut patiatur, miracula supra naturam adhibet. O amor! ô patiendi desiderium! At; quibus hunc suum mœrorem aperit? iisdem, quos socios habuit in transfiguratione. Disce hinc, quòd, quibus Deus solatia spiritualia concedit, eos præparet ad magnos dolores. Disce non tantum esse cum Christo in monte Thabor, sed etiam in agonia in monte Oliveti.

3. *Sustinere hic, & vigilare mecum*. Ibid. Considerare hic potes, quæ Christus tristitiæ remedia adhibuerit. Primò enim aperuit hanc suam afflictionem Discipulis. Videtur dolori lenimen accedere, si reveletur amico. Experieris id ipse, si tentationes tuas animæ directori aperias. Ut hic difficile est occultis vulneribus remedium, sic facile apertis. 2. Confert se ad orationem: *Sedere, donec vadam illuc, & orem*. Non seducit procus
Regis

Regis filiam, quæ fidenter clamat ad Patrem. Fur, si clamore proditur, statim fugit. Tentatus ergo non diverte ad creaturas, sed ad Deum.

F E R I A II.

Oratio Christi in horto.

1. *Pater, si possibile est, transeat à me calix iste.* Matth. 26. Hæc prima orationis pars est. Orat ut homo, horrorem tam acerbæ mortis professus. Fortè etiam ex desiderio citius consummandæ passionis: uti S. Catharinæ Senensi est revelatum? Forte non rogat, ut calicem ipse prætereat; sed, ut ait Hilar. cap. 31. in Matth. *Ut illud, quod ad se transit, ad alios accedat; ut, quomodo ab ipso bibitur, ita ab his bibatur.* Existima ergo tibi illud à Christo propinari. Dic fidenter: *Calicem salutaris accipiam.* Et quia licet spiritus promptus sit, caro tamen infirma est, adde: *Et nomen Domini invocabo.* Psal. 115.

2. *Verumtamen non sicut ego volo, sed sicut tu.* Ibid. Altera orationis pars est. Si petivit ut homo liberari ex morte, inefficaciter petivit: & nunc corrigit naturalem voluntatem, per voluntatem rationalem, se Divinæ subjicientem. Si petivit amore citius patiendi, etiam in hoc se resignat. Si denique, ut etiam alii hunc calicem biberent, iis, quâ mensurâ dandus sit, Patri remittit. Disce inclinationem naturalis appetitûs ratione corrigere. Disce te in omnibus Divinæ voluntati committere.

3. *Iterum abiit, & oravit tertio eundem sermonem, dicens:* Ibid. Interrupit bis orationem Discipulorum gratia, qui in suis periculis dormiebant, ut eos ad orationem, & ad futuræ pusillanimitatis reme-

remedium hortaretur. Alternat ergo studium orationis, & charitatis. Sic agendum & tibi. Ubi inter homines comparueris, ad Deum redi. Aliquando & oratio abruptenda, ut proximo succurras. Opera charitatis nobiliora sunt, quàm pietatis. *Orat eundem sermonem tertio.* Non est inanis oratio, nec sterilis, in qua sæpius eosdem affectus repetis.

F E R I A III.

Agonia, & sudor Christi sanguineus.

1. **E**T factus in agonia prolixius orabat. Matth. 26. Lucta erat inferioris hominis timētis, & superioris absolute volentis, & sibi imperantis mortem. Discé hinc ratione, & superiore homine semper luctari cum inferiore, & ea tibi negare, quæ sunt sensus; ea velle, quæ ratio dicit. Neque hoc languide, sed si opus sit, etiam cum agonia. Discé deinde, quò magis tentaris, magis orationi insistere, ut Deum ad victoriam habeas adiutorem.

2. *Et factus est sudor ejus sicut gutta sanguinis decurrentis in terram.* Quò devenit mei causa miser Deus! infirmitas mea est, & ut eurer, medicus sudat. Clamabat vindictam terra animæ meæ ob peccata mea, nec aliud expectare poteram. Aspergit eam Jesus sanguine misericordiæ suæ, ut misericordiam clamet. Rupert. lib. 12. de Viç. Verb. Misericordia! Misericordia mi Deus! Plantaverat sibi vineam electam animam meam; sed, quia facta erat sterilis, & inutilis, rigat eam suo sanguine. O quantum me amasti Deus meus! Quam parum tibi reddo? Tu sanguinem fundis, ego sudorem tibi negabo?

3. *Apparuit illi Angelus de celo confortans eum.* Ibid.

Hic

Hic est fructus productæ orationis. Afflictus, per-severa in oratione: Deus velut Angelum tibi mittet internam consolationem. Consolabatur autem cum, non instruendo, sed laudando ejus fortitudinem, sapientiam, obedientiam erga Patrem, charitatem erga homines, gloriam, quæ ex passione redundabit in Deum, lætitiā, quæ in Angelos, &c. Et Creator à creatura, quā humiliter accipit. Disce afflictos animos etiam laude solari. Disce minorum officia non superbe rejicere.

F E R I A IV.

Christus ab oratione invisit Discipulos.

1. *ET venit ad Discipulos suos, & invenit eos dormientes, & dicit Petro: Sic non potuistis unā horā vigilare mecum? Matth. 26.* Visitat Dominus Apostolos, ut videat, an vigilent, & orent, ut mandaverat. Visitandi sunt subditi. Tu non ægrè feras visitari. *Invenit dormientes.* Ingentia illa Petri promissa in somnum abierunt. Quoties & tua? quoties tibi fastidiosum est unā orationis horā cum Domino agere? quoties nec unā hora vigilas, ut attendas observationi propositorum? Si increparis, tace cum Petro, qui alias ad respondendum promptus, nunc confusus tacet.

2. *Vigilate, & orate, ut non intretis in tentationem.* Ibid. Periculum instabat, ne Judæorum metu Apostoli Christum negarent, aut desererent. Ideo monet Christus vigilare, & orare. En optima contra tentationes munimenta, vigilantia, seu attentio, & oratio. Vigila; attente, reflexe, & cum consideratione operare; in multa impingis, quia inconsiderate agis, & loqueris. Ora: *in tentationem vadit, qui ad orationem non vadit. D. Chrysol. serm. 43.*

3. Tunc

3. *Tunc venit ad Discipulos suos , & dicit illis : Dormite jam , & requiescite. Ecce appropinquavit hora , & Filius hominis tradetur in manus peccatorum.* Ibid, Per ironiam dormire jam jubentur ; quasi dicat : monui vos tempore prævenire pericula : ecce jam appropinquat hora , quâ tradar , & vos pro me stare oporteret ; quid agetis non præmuniti ? Noluistis mecum vigilare , & orare : ergo vos vobis relinquam. O Domine nunquam hoc mihi fiat , ut me mihi relinquant ! Certus mihi hinc esset interitus. Volo ergo vigilare tecum , & orare , ut tecum periculis obviare possim.

F E R I A V.

Obviat turbis , & satellitibus.

1. *Surgite , eamus. Ecce appropinquavit , qui me trader.* Matth. 26. Verba sunt ad vincula , & passionem anhelantis. Unde tam animosus modò ad præsentiam liكتورum , qui paulò ante ad solam horum cogitationem , caput redere , & pavere , & mæstus esse ? Agnosce vim orationis , & perfectæ in voluntatem Dei resignationis. Hòc si utaris medio , obviabis intrepidus iis , quæ metuebas. Deficis enim in tempore tribulationis , quia ad eam te per meditationem non disponis , quia eam non accipis de manu Dei ; & ideo , dum appropinquat hora , tu fugis.

2. *Adbuc eo loquente , ecce Judas unus de duodecim venit . &c.* Ibid. Quò evasit indomita Judæ passio ? Ex avaritia fur , ex fure osor Christi , ex osore venditor , ex venditore proditor , & antesignanus sicariorum. Infelix homo , cui semel vel una passio dominatur ! Non opus est multis , ut in ruinam eas , vel una est nimium potens. Una con-

Avanc. Medis.

H

vocat

vocat turbam. Applica securim ad radicem. Et si Religiosus sis, quod metuas, habes. Judas unus de 12. erat.

3. *Qui autem tradidit illum, dedit eis signum dicens: Quemcumque osculatus fuero, ipse est, tenere eum.* Vide industriam malitiæ. Prævidet non facile dignoscendum, scit eum evasisse aliquando volentibus eum lapidare, alias volentibus Regem creare: ne & hic elabatur, monet ducendum cautè. Utinam tu cum tanta cautela, & reflexione operareris bonum! Utinam tu duceres eum cautè, ne ex corde tuo eum perderes.

F E R I A V I.

De osculo Judæ.

1. *ET confestim accedens ad eum: dixit: Ave Rabbi: & osculatus est eum.* Matth. 26. Accedit confestim; quàm impudenter, quàm simulate; vultu hilari, animò venenatò. Cui lethales struebat insidias, illi salutem offerebat: ait Viçt. Antioch. in Marc. Vocat Magistrum, à cujus discipulatu perfide recedebat. Osculatur: *ausus præcipuum dilectionis signum, organum efficere diaboli.* S. Ambr. in cap. 22. Luc. Si vidisses hæc, quid in verbis, in gestibus reprehendisses? Et tamen quantum malum! Non sufficit, ut exhibeas externa solum signa boni Christiani, aut Religiosi. Vide, ne intus venenum lateat. Non reprehenderis quidem ab homine, sed à Deo judicaberis, cui omnia patent.

2. *Dixitque illi Jesus: Amice, ad quid venisti?* Amicum vocat, ut amicum faciat. Ad quid venerit, rogat, ut in se regressus cogitet, quam grande scelus moliatur. O infinita Dei misericordia, quanta non agis, ut peccatorem reducas?

Non

Non vocat latronem, sceleratum, sacrilegum. Non attendit, quid Judæ scelus mereatur, sed quid suam deceat bonitatem. Si ita blanditur hosti, quid faciet fideli servo? Quomodo tu cum eo agis, a quo offensus es.

3. *Juda, osculô filium hominis tradis?* Ibid. Quam belluam non emollirent hæ votes tam amanter prolatæ? *Vide misericordiam inenarrabilem* ait Euthym. *siquidem donec traditus est, fuit illi cura de proditore.* Adhuc tentat illi objicere enormitatem sceleris, ut cogitet, quid agat. Quid tu fecisses? si Deus visibilis tibi peccanti dixisset: Quid agis? Filium hominis tradis! Resiliisses sine dubio. Sed etsi non videres oculis, debebas videre mente, quando subibat cogitatio: hocne ages? peccatum est: Deus offenditur. Et quoties hoc tibi in corde loquebatur? quam verò tu fuisti obstinatus?

S A B B A T H O.

Manifestat se Christus turbis, & satellitibus.

1. *I*taque sciens omnia, quæ ventura erant super eum, processit. Joan. 18. Advenerant cum furore turbæ, jam fixerat osculum Judas: non irruunt tamen, ut designaverant, sed stant immotæ: *Et Judas stabat cum ipsis.* Non poterant: quia nondum Jesus permittebat. Ideo processit ad eos. Ostendit, quidquid eveniet, se posse quidem declinare, sponte tamen, & libere passurum, imò se illa ipsa magnò animò adire. Imitare exemplum. Patientia coacta non est filiorum Dei. Ad ardua qui non procedit, etiam venientia fugit.

4. *Et dixit eis: Quem queritis? Responderunt ei? Jesum Nazarenum. Dixit eis Jesus: Ego sum. Ut*

ergo dixit eis: *Ego sum: abiérunt retrorsum, & ceciderunt in terram.* Ibid. Quærit, & quidem iteratò: non, ut sciat, qui scit omnia: sed, ut respondcant: *Jesum Nazarenum*, & ea dignitate, personæ agnoscant immanitatem sceleris. O bonitas Dei tot artibus nos quærentis! Agnosce tu personæ illius dignitatem, non tantum, ut non offendas, sed ut impensius eum quæras. Qui Deum non quærit, se ipsum perdit. Ad unam vocem: *Ego sum* non minacem, non fulmineam, *cadunt retrorsum.* Ita tractantur, qui Deum quærent, ut perdant. Quid fiet, quando in judicio voce illa tonabit: *Ego sum*, quem tu tam indigne tractâsti. Stude ergo tu eum quærere amore, & obsequio.

3. *Si ergo me quæritis, finite hos abire.* Ibid. Prodit curam, ac sollicitudinem, quam de suis habet, ne perdat ex iis quemquam. Si tantam curam paucorum habuit, crede non minorem habiturum tot millium fidelium. *Quod in paucis factum est; quomodo in pluribus negligetur?* ait Cyril. Alex. lib. 11. cap. 34. *& qui tam paucorum in tali tempore curam habuit, quomodo innumerabiles fideles non proteget?* Et tu ergo in protectione ejus es. Confide, quòd te perditum non volet, nisi teipsum perdas. 2. Consuluit eorum famæ, quos fugâ dilapsuros prævidet, ut honeste abiisse videantur. *Quomodo tu alterius defectus regis?*

DOM. II. QUADRAGESIMÆ.

Petrus defendit Christum.

1. *Petrus habens gladium eduxit eum, & percussit Pontificis servum.* Joan. 18. Factâ licentiâ injiciebant manus in Christum satellites. Petrus ex zelo, sed indiscreto, defendendi Christum: injussus,

jussus, auctoritate propria gladio ferit: quô te, & se, & alios, ac ipsum Christum graviore periculo ex ponebat, unus contra omnes. Quam bonus est zelus, tam necessaria est discretio. Etiam bonorum affectuum nimia vehementia est temperanda. Zelus charitati est jungendus, ne ira fiat, aut vindicta. Si zelum defendendi honoris Dei profiteris, in te ipso exhibe. Invenies multa; quæ feriat. Rescinde, quod Deo non est honori.

2. *Mitte gladium tuum in vaginam. Calicem, quem dedit Pater, non vis, ut bibam illum?* Ibid. Increpat, & docet Petrum, se calicem passionis, etsi adferatur ab hominibus tanquam ministris, à Patre accipere, tanquam à primo porrigente, cujus providentia gubernantur omnia. Non dicas: hic, aut ille me affligit, deprimit honorem meum vulnerat, &c. Calicem hunc ille tibi porrigit, qui Filio suo longè majorem dedit. Furaris Deo gloriam, si creaturæ tribuis, quod Dei proprium est. Ille est, & nemo alius, qui deducit ad inferos, & reducit. Solatio sit illud, quòd, qui dat calicem, Pater sit tui amantissimus, qui per eum nocere non vult, sed prodesse: forte ut medicus amara potione morbum tollere.

3. *Et cum tetigisset auriculam ejus, (Malchi) sanavit eum.* Luc. 22. Dominus quasi quadam teneretur restituendi obligatione, damnum, quod suus minister fecit, resarcit. Sanat vulnera ejus, qui venerat vulnera illaturus. Reddit pro malis bona. Et quoties tibi? *Erudiens nos, quòd in persecutores nostros, beneficos nos esse oporteat:* ait S. Chrysost. hom. 81. in Joan. 2. Sanat auriculam necessarium fidei, ac per consequens aliis illapsibus Divinis instrumentum. O si sanet interiorem tuum auditum, ut eum sanctis illius inspirationibus intendas!

F E R I A II.

Comprehensio Christi, & fuga Discipulorum.

1. **D**ixit *Iesus turbis: tanquam ad latronem existis cum gladiis, & fustibus comprehendere me. Quotidie apud vos sedebam docens in templo, & non me tenuistis.* Matth. 26. Jam jam indignissime vincendus, & raptandus nihil non suæ congruum benignitati profert. Sensum gravissimum insinuat, quod tanquam latro tractetur, qui prædas non egit alias, quam animarum dæmoni ereptarum. Utinam anima mea sit præda tua! en habe illam.

2. Ostendit eorum ingratitudinem, qui hæc reddunt sublimi suæ doctrinæ in templo traditæ, quam & ipsi toties sunt admirati. Quæ tu reddis Deo tibi per inspirationes loquenti.

3. Ostendit se non eorum vi, sed sponte capi, quando vult. Et ideo jam capiendum. quia *hæc est hora vestra*, à Patre decreta, quæ me trado in manus vestras. Ita solvit iniquitates meas; quibus ego me in manus dæmonum consignavi.

2. *Tunc accefferunt, & manus injecerunt in Iesum, & tenuerunt eum.* Matth. 26. Irruunt in agnum crudeles lupi. Expende sævitiam. Trudunt, vellunt, verberant, prosternunt, raptant, conculcant: manus, collum, pectus funibus, & catenis stringunt. Vis causam? Thren. 4. *Christus Dominus Spiritus oris nostri captus est in peccatis nostris.* Tu funes texuisti, tu catenas fabricasti peccatis tuis. De te queritur Psalm. 118. *Funes peccatorum circumplexi sunt me.* Sed time. Erit tempus, quod fortis Samson dirumpet vincula: & tunc Deus ultionum Dominus, Deus ultionem libere ager. Ergo tu impone vincula manibus tuis, ne eas extendas ad iniquitatem.

3. *Tunc*

3. *Tunc discipuli omnes relicto eò fugerunt.* Silent jam voces illæ: *Eamus & nos, & moriamur cum illo.* Joan. 11. Et illæ: *Eiamsi oportuerit me mori, &c.* Omnes: nullo, nec tam zeloso quidem Petro, aut dilecto Joanne excepto, *relicto eò*, Domino, Magistro suo *fugerunt*, ut suam cutem periculo eriperent. An magis seipsos, an magis Christum amaverint, hinc conjice. Primus ad deserendum Christum stimulus est amare seipsum. Disce tuo ipse fervori, ac propositis non fidere. Sæpe in arena deficis, qui antea tot tibi victorias de te ipso pollicebaris. Resolutiones, quas facis, factis proba.

F E R I A III.

Jesus primùm ad Annam deducitur.

1. *ET adduxerunt eum ad Annam.* Quod in hoc itinere factum est, sanctius affectu prosequeris, quàm discursu. Quàm aliud est hodie Hierosolymam ingredientis spectaculum, quàm nuper! Quàm admirabilis est hominum sensus, à lætitia in furorem, à laudibus ad contumelias, ab obsequiis ad opprobria! Et confides in homine? Quidquid molestiarum corpori; quidquid injuriarum honori excogitare poteris, id Domino Majestatis illatum crede. Compaterè: te causam agnosce, dole. Et dum ad omnia silentem Jesum contemplaris, disce sanctò silentiò longe minores tibi illatas, aut fortè tantum apprehensas injurias decoquere.

2. *Pontifex ergo interrogavit Jesum de discipulis suis, & de doctrina ejus.* Joan. 18. Reus, & sceleratus Judicem examinat. Stat modestissimus Judex ante reum. Qua superbia, quibus sannis, & irrisiõibus interrogatur? quomodo ejus doctrina eluditur! Deus ab hominibus, justus a peccatori-

toribus judicatur. Sit ergo & *mibi pro minimo*, si ab hominibus judicer. 1. Cor. 4. Meretur, ut judicia me meliorum tolerem, qui innocens tulit judicia iniquiorum. *Charitas, quæ-patiens est, & omnia suffert*, præstabit ut non deiciat.

3. *Respondens Jesus. Ego palam locutus sum mundo, & in occulto locutus sum nihil. Quid me interrogas? interroga eos, qui me audiêrunt.* Duo interrogatus, de Discipulis, & doctrina; ad primum tacet: quia Discipuli ob suam fugam non erant ei honori: bonum de iis in præsens non potuit dicere; malum non voluit. Disce hinc caute loqui de proximo. Tace, quod non est pro ejus commendatione. Vide, ut non sis confusio*n*i tanto tuo Magistro. Ad doctrinam vero suam exculpandam allegat publicam famam libere, & sine metu: *Ego palam locutus sum.* Hoc audet, qui testimonium habet bonæ conscientiæ. Poteris & tu hoc semper, si ita opereris, tanquam in publica omnium luce.

F E R I A IV.

De alapa Christi.

1. *UNus ministrorum dedit alapam Jesu, dicens: Sic respondes Pontifici?* Joan. 18. Considera gravitatem injuriæ. Percutit vilis homo: percutitur Dei Filius alapa immani, &, ut pie creditur, ferrata manu ab ingrato Malcho, cui paulò antè aurem sanaverat, ut habet S. Chrys. hom. 28. in Joan. In faciem, in quam desiderant Angeli prospicere: in consessu Principum, & Sacerdotum; ob responsum mite, verum, & reverens: laudatur percussor, irridetur percussus. Nec ulciscitur tamen Dominus, qui potest. Cogita terrenum

renum Regem sic à mancipio tractari: quod ferum, qui rogi, quæ rotæ non expedientur? O bonitas! ô patientia Jesu mei! & ego verbum quodvis, aut minimam confusionem, longe majores meritis tam fastidiose fero?

2. Respondit Jesus: Si malè locutus sum: testimonium perhibe de malo: si autem bene, quid me cædis? Ibid. Loquitur Dominus ad alapam, qui ad flagella, ad spinas, ad clavos siluit. Docuit istis silentiô commendari patientiam: illô verô patientiæ laudi nihil demi, si responsio sit mollis, & humilis, qualis erat Christi. Alterutrum horum serva, si injuria afficeris. 2. Bene loquitur Dominus, & cæditur: solvit delicta linguæ. Dum male loquor, merito mihi objicit? quid me cædis?

3. Et misit eum Annas ligatum ad Caipham Pontificem. Hic cogita, ut superius feria, 3. punct. 1. omnia illa injuriarum genera Christo illata in itinere ad Caipham. Vide confusionem Christi, affectus; quibus omnia Patri offert pro salute tua. Compatere: tibi indignare, qui causâ es omnium. Dole, gratias age, &c.

F E R I A V.

De falsis testimoniis contra Jesum.

1. *Principes autem Sacerdotum, & omne concilium quarebant falsum testimonium contra Jesum. ut eum morti traderent.* Matth. 26. Principalis eorum intentio erat Jesum occidere: altera verò non incurrere apud populum notam, quòd Jesus non sit justo judiciô occisus. Igitur quærunt falsa testimonia, qui falsa arcere debebant; *insidias suas, tribunalis schemate palliantes*, ut ait Viêt. Antiochi. in cap. 14. Marc. Quàm multa virtutis prætextu

H 5

pal.

palliantur ! Non tu idem quandoque facis ? non rerum colore contentus , minus curas de substantia ? Deponetur aliquando operum tuorum velum , & apparebunt , quid sint ?

2. *Et non invenerunt , cum multi falsi testes accessissent.* Ibid. O quàm innocens est vita Jesu mei ! Non tantùm crimen non inveniunt malitiosi homines , sed nec umbram criminis in Christo. Bene Orig. : *Adversus Jesum nec color inveniebatur , qui posset adjuvare mendacia ; adeo munda fuit vita Jesu , & omnino irreprehensibilis.* O si vita tua foret talis , ut falsus accusator fratrum , nihil in te inveniret , quod peccati speciem haberet : si jam mirandum esset , putas nihil inveniret ?

3. *Et surgens Princeps Sacerdotum , ait illi ? nihil respondes ad ea , quæ isti adversum te testificantur ?* Admirare silentium Jesu , quod ipse iniquus Judex est admiratus ! Quære causam : Quare files mi Jesu ? 1. Non egent responso testimonia : quæ se ipsa conficiunt. *Et non erat conveniens testimonium illorum.* Marc. 14. Quæ moribus , & vita satis refutantur. Vide , quàm vitæ probitas sit firma defensio. Et frustra excusâs te verbis , ubi te facta accusant. 2. Christus suô silentiô satisfacit , pro stultiloquio Adæ , quo excusavit peccatum suum. Gen. 3. Ita S. Hier. in 14. cap. Marc. Et tu illi silentium indicis , si te reum excusâs , ut nocens innocens videaris.

F E R I A VI.

Adjuratur Christus à Caipha , & condemnatur blasphemix.

1. *ET Princeps Sacerdotum ait illi : Adjuro te per Deum vivum , ut dicas nobis , si tu es Christus Filius*

Filius Dei. At ille dixit. Tu dixisti: ego sum. Matt. 26. Marc. 14. Amorem veritatis prætexit Sacerdos, reipsa calumniam quærit. Si taceat Christus, arguetur Dei contemptor: si neget, seductor, & impostor populi: si affirmet, blasphemus. Non fuisset difficile Christo hinc evadere. Affirmat tamen se Dei Filium, qui ad alia siluit; etsi sciat se inde damnandum morte. Vide, quanta libertate Deum confiteri oporteat; ejusque periclitantem honorem tueri. Sepone illusionis, & tuorum incommodorum metum, cum de Deo, aut virtute agitur. Hæc perditâ, quid prodest vivere.

2. *Amodò videbitis Filium hominis sedentem à dextris virtutis Dei, & venientem in nubibus cæli. Ibid.* Duplicem suum adventum insinuat: alterum in carne humilem, dum se *Filium hominis* vocat? alterum in majestate ad judicandum, ut meminerint superbi Sacerdotes, se ab illo judicandos, quem nunc tam impie judicant. Tunc ille sedebit in virtute, hi stabunt in trepidatione. Qui judicas fratrem tuum inique, memineris te olim æquè judicandum. Ne formides in nube Judicem, ama fratrem, qui ejus personam hic sustinet. Ne timeas sedentem à dextris, fratrem tuum ne tracta sinistre.

3. *Tunc Princeps Sacerdotum scidit vestimenta sua dicens: blasphemavit; quid vobis videtur? at illi dixerunt: reus est mortis.* En iterum pietatis specie velatum crimen. Dolorem ostendit Pontifex discissis ex more gentis vestimentis suis ob auditam, ut prætexebat, blasphemiam. Melius scidissent corda sua, quam vestimenta. Unus, quod sanctissimè dictum, blasphemiam insinulat, omnes sententiam succlamant: *reus est mortis.* Ne tu olim

esses in iudicio, Deus pro te factus est reus. Quos æstimas animi sensus Christo fuisse? eos tu imitare, dum dicta, factaque tua suggillantur.

S A B B A T H O.

De injuriis ea nocte à Christo toleratis.

1. *T*unc exspuerunt in faciem ejus, & colaphis eum ceciderunt. Matth. 26. Gravissimum contumeliæ genus est, faciem alicujus conspuere. Respice Domine in faciem Christi tui. Agnosce figuram substantiæ tuæ. Hic est Filius tuus, quem gloria & honore coronasti. Mea hæc inventa sunt. Faciem Christi conspui, quoties animam peccato maculavi. Creata enim hæc est ad imaginem Dei. Sine Domine, abstergam hæc sputa: abstergam minimas maculas animæ meæ. Discam quoque te imitari, si quis in faciem meam conjecerit calumniam. Satis hæc me convincit ratio: tu exemplo prævivisti.

2. *Et velaverunt eum, & percutiebant faciem ejus, & interrogabant eum dicentes: Prophetiza nobis, quis est, qui te percussit?* Luc. 22. Ignorantiam appingunt sapientiæ. Quomodo hoc tu ferres? Et quis tu? quis Deus? Videri se non credunt à Deo, qui scrutator est cordium. Sic prætendis nequitiae velamen coram hominibus, & non coram Deo. Videt ille, & indicare posset percussorem. Quid tu murmuras, si vel tangaris? quin & tu Deum percutis, & tacet. Differt, ut resipiscas. Id nisi facias, dicet aliquando: tu me percussisti illo peccato, illo loco, illo tempore. Quid dices, qui irrisisti? Deus videt, & judicat.

3. *Et alia multa blasphemantes dicebant in eum.* Ibid. Cogita, quidquid excogitare potes injuriarum,

riarum, à petulantissima turba, volente Principibus placere, vinò æstuante, à Dæmone instigata, nullius honorati viri præsentia coërcita, Christo illatum. Non defendis te mi Jesu? & ita te in manus peccatorum tradis? At ego ne in tuas quidem me resigno. Tam verò hoc necessarium est, quàm salutem velle. Ab nunc in manibus tuis ero. Si me percusseris alienà linguâ, factoque, non recedam à te.

DOM. III. QUADRAGESIMÆ.

De prima negatione Petri.

1. *Petrus autem sequebatur eum à longè. Matth. 26.*

Sequebatur; hoc amoris erat: à longe: hoc timoris. Fervorem jam timor infregerat, & ad languorem sequendi deduxerat. Hic mali principium. Tantum accedis ruinæ, quantum de fervore serviendi Deo remittis. Quò lentius tu pergis, hòc longius à te recedit, quem, sequeris. Quotidie ergo in novitate spiritus ambulandum.

2. *Erat autem cum eis Petrus stans, & calefaciens se. Matth. 27. Petrus sedebat foris. Joan. 8.* En fructum lentæ sequelæ. 1. *Stat*: & tandem eò devenit, ut à cœpta virtute desistat. 2. *Sedet*, & quasi conquiescit in suo torpore. 3. *Calefacit se*, quia extremo frigore corripitur, & quasi gelatur anima relicto Deo. Hæc te non invitant ad fervorem spiritus? Sed hunc ut foveas, noli te miscere turbæ, aut fociis, qui Deum non sapiunt; periculum quantum sit, Petrus doceat. At, qui amat periculum, peribit in illo. Eccl. 3.

3. *Et accessit ad eum una ancilla dicens: Et tu cum Jesu Galilæo eras. At ille negavit coram omnibus dicens: Nescio, quid dicis. Matth. 26.* Adeo nefarius

rius homo est Jesus, ut indignum ducat Apostolus, quem profiteatur? inter alios Apostolos existens Petrus! Jesum Filium Dei vivi professus est: inter sceleratos consistens dissimulat nōsse. Ecce dissolutorum commercium quō deducat? 2. Ad ancillæ vocem cecidit Petrus. Per ancillam delectamenta sensuum intellige. Turpiter labitur, qui ista audit. De hujus veritate te ipsum quære.

F E R I A II.

De 2. & 3. Negatione Petri.

1. *V*idit eum alia ancilla, & ait: Et hic erat cum Jesu Nazareno. Et iterum negavit cum juramento; quia non novi hominem. Matth. 26. Negationi secundæ juramentum addit. Ita via per unum peccatum ad gravius sternitur. Minora cave, ne in graviora incidas. Dictum veritatis est: *Qui spernit modica paullatim decider.* Non nōsti hominem Petre, qui te erexit in fluctibus, quem confessus es Filium Dei, cujus tot spectasti miracula? &c. Quam facile mutamus consilia! dum fervet spiritus, ad mortem pro Christo aspiramus: dum tepet: mollis ancilla, aut levis tentatio nos prosternit; ne nobis fidamus, sed cum timore & tremore, quisque salutem suam operetur.

2. *Q*ui stabant, dicebant Petro: Et tu ex illis es. Ille autem cepit anathematizare, & jurare, quia nescio hominem istum. Marc. 14. Quam gravi ruina collapsa est Ecclesiæ columna? Hæc est sibi præfidentium pœna, ut sibi relictī, discant, quam parum possint. Sta ergo in timore: alias *cirò subvertetur domus tua.* Eccles. 27. Ut modicum dedecus declinaret Petrus, Christum negavit. Quoties tu ob talem metum, seu ob respectum humanum

manum idem fecisti: si non verbô, certè factô, erubescendo virtutis operationem? Time illud: *Qui me erubuerit, hunc Filius hominis erubescet.* Tam pudor boni est malus, quàm pudor mali est bonus.

3. *Et a. tinuò gallus contavit: & recordatus est Petrus verbi Jesu, & egressus foras flevit amare.* Matt. 26. O misericordia Dei infinita! Adhuc loquente, & verba negationis proferente Petro. eum respicit. Quasi suarum ærumnarum oblitus, in salutem servi intendit; qui ipse eum vel maxime affligebat. Quoties Domine, cum mihi irasci poteras, es misericordiæ recordatus! suggessisti ad resurgendum media, dum laberer! Et te non amem! O bone Jesu! sed non satis amo, nisi injurias tuas doleam, nisi defleam. Incipiam ergo cum Petro flere, & nunquam desinam.

F E R I A III.

Christus deducitur ad Pilatum.

1. *M*Ane autem factô consilium intèrunt Principes Sacerdotum, & Seniores populi adversum Jesum, ut eum morti traderent. Matth. 27. Tertium hoc est consilium pejùs prioribus. In primo non omnes consenserunt. In 2. dubitatum est. In 3. in unam mortis sententiam conspirant omnes. Sic eunt per gradus etià scelerata. Tū primum si caveas, in secundum non ibis. Consentit impiis, qui cum illis in consilium vadit. Passiones suas qui consulit, facile assentitur, & quidem contra Jesum. De mane fit hoc consilium. Filii tenebrarum confundunt filios lucis, qui minùs vigilant, ut Jesum servent, quàm illi, ut perdant. Tu mane consilium ini cum potentiis tuis, quomodo Jesu servias; vel perdas passiones, quæ Jesum perdunt.

2. Et

2. *Et surgens omnis multitudo eorum, duxerunt illum ad Pilatum.* Luc. 33. Parum, aut nihil dormivit turba illa, quæ totam noctem impendit illusionibus Christi: odio tamen Christi, & amore placendi Principibus, digerit incommodum vigiliarum. Tantane tibi est promptitudo ad servendum, ac placendum Christo? *Surgit omnis multitudo:* cur tu cum omnes de mane vigilant ad fores sapientiæ æternæ, indulges superfluo somno? mane exit Christus ad opus suum, quod ei Pater imposuit, exi & tu ad tuum.

3. *Et ipsi non introiérunt in prætorium, ne contaminarentur.* Joan. 18. O scelestæ Religio? *Duces cæci, excolantes culicem, camelum autem glutientes!* Matth. 23. Legalem, & externam magis puritatem curant, quam internam: quasi scelus sit intrare prætorium ethnici, quod lex vetabat; & nullum sit scelus Christum occidere. Rupertus hic: *Contaminari exterius caveris introeundo in prætorium, & intus horribiliter pollui non timeris tractando homicidium?* Talis est Christianus, qui solum curat exterius videri bonus, non intus esse. *Quid faciet, cum inspicere cœperis Dominus.* Eccl. 2.

F E R I A I V.

Desperatio Judæ.

1. **T**unc videns Judas, quod damnatus esset, pœnitentiã ductus, retulit 30. argenteos, dicens: *Peccavi tradens sanguinem justum.* Matth. 27. Tradens Christum non credebatur damnandum, sed evasurum per miraculum. Secus evenit. Nunc demum gravitatem sui delicti agnoscit. Imaginem habes hominis, qui scelus, antequam committat, leve quid æstimat; postquam commisit, videt

videt suam miseriam. Ita diabolus exerceat, ut pecces; oculos aperit, ut desperes. Non peccasset Judas, si ad illud attendisset: *Amice, ad quid venisti?* Matth. 26. Non peccares, si prius conscientiam, aut Dei inspirationes audires.

2. *At illi dixerunt: Quid ad nos? tu videris.* D. Paschas. lib. 12. in Matth. ait: *hæc iridentes, & insultantes dixisse.* Hæc est merces eorum, qui, ut hominis gratiam ineant, Deum offendunt; ut ab ipsismet, quorum causa peccarunt, irideantur, & despiciantur. Tu pluris æstima gratiam Dei, etsi perdenda sit hominum. Si hominibus placere velis, Dei servus non eris. 2. Sacerdos anxium pœnitentem non ita rejice, ut desperet.

3. *Et Judas projectis argenteis in templo recessit & abiens laqueo se suspendit.* Ecce, quò recidit Christi Apostolus? quis credidisset modici pretii avaritiam hunc exitum sortituram? ita invalescit omnis passio, nisi in principio suffocetur. Ideo vigila, & time teipsum. Omnis mali tenue est principium.

F E R I A V.

Adducitur Christus ad Pilatum.

1. **E**Xiit ergo Pilatus ad eos foras, & dixit: *Quam accusationem adfertis adversus hominem hunc?* Responderunt ei: *Si non esset hic malefactor, non tibi tradidissemus eum.* Orditur consilium bene ab interrogatione. Sed quia cum turba luctatur, vix elustabitur. Quæ Christi sunt, non sunt tractanda cum turba nostrarum affectionum. His adversus virtutem nunquam deerit querela. 2. *Bene omnia fecit.* Marc. 7. & *malefactor* dicitur. O ingratitude! Carperis, si bene feceris? Inspice tui Jesu patientiam, & humilitatem. Nihil regere;

Avam. Modis.

I

nec

nec quære, ut de te dicatur: *Bene omnia fecit*, nisi olim à Deo. 3. *Malefactor* non unum sceleris genus, sed omne complectitur. Et hoc Dei Filius? ô injuria inaudita! adora ejus innocentiam. Gaude, si bona, quæ feceris, improbentur. Sic propior Christum imitaberis.

2. *Dixit ergo eis Pilatus: Accipite eum vos, & secundum legem vestram judicate.* Joan. 18. Quæ ista iniquitas, inimici, & accusatoris libidini accusatum relinquere? Quis Christi despectus? Quasi is ille sit, cujus nemo dignetur esse Judex? Compatere despecto Jesu. *Dixerunt ergo ei Judæi: nobis non licet interficere quemquam.* Et tamen interficitis odio, & lingua, quâ cædem ejus poscitis. Quæ ista sanctitas vestra? Deus non irridetur: videt, quid lateat in corde, etsi opere non patretur. Dicam ego, quoties passio suggerit factum Deo injuriosum: mihi non licet interficere Jesum: amabo eum, & verebor.

2. *Cæperunt autem illum accusare dicentes.* 1. *Hunc invenimus subvertentem gentem nostram.* Luc. 23. Qui venit de stercore erigere, qui mundavit leprosos, sanavit ægros, obedire Superioribus docuit. Est hoc subvertere? an componere? 2. *Prohibentem tributa dare Cæsari*, qui aperte jusserat dare Cæsari, quæ Cæsaris sunt. 3. *Dicentem se Regem esse:* qui, ne Rex crearetur, fugerat. En quàm falsâ crimina proferuntur! audit Christus: non interruptit, non excusat, non regerit iniquæ turbæ. Itâne tu agis cum oggerente defectum? Itâne cum optimo Superiore te commonente. Da te Jesu convertendum: præbe illi tributum cordis tui; adora, & venerare Regem tuum.

F E R I A V I.

Christus à Pilato examinatur.

1. *I*esus autem stetit ante Præsidentem. Joan. 18. Quis? universorum conditor Deus, Judex vivorum, & mortuorum. Coram quo? coram scelerato iudice. Cujus rei causa? quæstioni subiectus, quasi reus sententiam expectans. Huc ergo se demisit summa sanctitas, & innocentia! Et quousque tuam non deprimis superbiam? Stat Iesus: qua confusione? qua tamen animi constantia? qua modestia? qua submissione? qua in iudicem licet improbum reverentia? Disce, quid te agere oporteat, dum confunderis, dum stas ante Superiorem te corripientem.

2. *E*t interrogavit eum Præses dicens: Tu es Rex Judæorum? Dicit illi Iesus: Tu dicis. Matth. 27. Jocô, & per ludibrium quæsit Præses: serio, & ex veritate respondit Christus. Crede hunc tu & universi, & animæ tuæ Regem: huic te, huic obsequia perpetua devove. Et ausus es tu perduellis alium Regem animæ tuæ admittere, aut dicere: *Nolo hunc regnare super me?* ausus est tanquam regibus, tuis affectibus depravatis servire? heu quam sævè dominati sunt! Nunc iis renuncia: dic fidenter illis: *Non serviam: Disrumpam vincula eorum, & projiciam à me jugum ipsorum.*

3. *R*espondit Pilatus: gens tua, & Pontifices tradiderunt te mihi. Quid fecisti? Joan. 18. Respondebo ego pro te mi Iesu! fecit omnia, & nihil. Quæ bona sunt, & sancta, ab ipso facta sunt. Circumspice omnia. Quæ mala sunt, & perversa, nec ab ipso, nec in ipso sunt. Pro te scio respondere. Sed si tu ex me quæras, *quid fecisti?* hic hæreo, & confundor. Video enim, quàm abusus sim talen-

tis à te mihi datis! quàm per meam negligentiam inanis in me fuerit gratia tua! ne mihi olim dura accadat illa quæstio: *quid fecisti?* antequam quidquam faciam, ex me sollicite quæram? quid facis?

S A B B A T H O.

Continuatur idem examen.

1. **R**espondens *Jesus*: *Regnum meum non est de hoc mundo.* Non negat se Regem mundi, sed negat se eo modo, pompa, & armorum apparatu regnare, Quo Reges mundi. Quæ ergo illius regnandi ratio? paupertate, contemptu, obedientia, humilitate, cruce. His fecit, ut omne sibi genu flecteretur. Flecto & ego. Agnosco te Regem meum in vilitate tua. Hanc pro te amplector. Non potest esse vilis, qui similis tibi est.

2. *Dixit ei Pilatus: ergo Rex es tu? Respondit Jesus: Tu dicis: quia Rex sum ego.* Iterum se Regem confitetur quæsitus. Constantia, & veritas semper idem loquitur. Et ego te Regem credo, & confiteor, & dicam semper: *Rex meus, & Deus meus es tu.* Si invadat animæ dominatum passio; dicam: *Rex meus es tu.* In hoc natus sum & ego, ut factis perhibeam testimonium huic veritati; & constanter præbeo.

3. *Dicit ei Pilatus: quid est veritas? Et, cum hoc dixisset, exivit.* Joan. 18. Salutaris est quæstio. Utinam expectaret responsum. Et tu frequenter quære: *Quid est veritas?* sed & responsum attende. Multa tibi movet amor proprius animorum magus; multa Deus de abnegatione, de contemptu tui, &c. Quære, *quid est veritas?* depone larvam rebus, attende veritatibus prælicis. 2. Cave transitorium fervorem, qui bona desiderare incipis, sed
mox

mox iterum exit, & in mentis proposito non persistit.
Hugo Victor.

DOM. IV. QUADRAGESIMÆ.

Ultimò accusatus ad Herodem mittitur.

1. *EX*ivit ad Judæos, & dixit: Ego nullam in eo causam invenio. Hoc innocentiae debebatur testimonium. Quid enim reatus inveniret in eo, qui peccatum non fecit, nec facere potuit? At ego multam in eo moriendi causam invenio: quia scio, quod posuit Dominus in eo iniquitatem omnium nostrum. *Isai. 53.* Video in eo delicta mea, quæ mortem merentur. In me culpa est: in illo amor, & poena. Detestor, quod ego feci: amo, quod ille fecit, gratias ago. Non addam posthac causæ, quam imposui, sed demam.

2. *Et accusabant eum summi Sacerdotes in multis.* *Iesus autem amplius nihil respondit; ita, ut miraretur Præses.* In multis? fidem auctoritate faciunt, non probatione. Et tacet Iesus, non ex necessitate, sed ex virtute. Gravissima innocentiae defensio est, silentium, cum vita loquitur. Sic vive, ut, etsi dici possint multa, probari nihil possit. Te silente peroret vita.

3. *Ut cognovit, quod de Herodis potestate esset, remisit eum ad Herodem.* Nec damnare voluit, quem non poterat; nec absolvere, quem debebat. Timebat Dominum liberare: voluit seipsum à causæ cognitione liberare, parum sollicitus, quid Domino fieret. Amor proprius est iste, qui relinquit causam Dei, ut suam agat, Quis vilior, tu aut Deus? si alterutrius agenda sit causa; quem postpones? agenda est autem pene quotidie.

F E R I A II.

Christus ab Herode illuditur.

1. **H**erodes viso Jesu gavisus est valde. Erat enim cupiens ex multo tempore videre eum, & sperabat signum aliquod videre ab eo. Luc. 23. Quare nullum miraculum edis Jesu illi, qui tantò tui teneretur desiderio? non est desiderium pii affectus, sed curiositatis. S. Greg. in cap. 31. Job. Non querebat profectum, sed signa, vel scientiam mirari. Vide, ne per meditationes, aut pios libros magis quæras scientiam, quàm affectum. 2. Non edit miraculum Dominus, quia, ut ait Ambr. lib. 10. in Luc. jactantiam declinabat. Qui multa te scire putas, hoc quoque disce, te non jactare. Argumentum parvitatís est, velle magnum videri.

2. Interrogabat cum multis sermonibus; at ipse nihil respondebat. Ibid. Miraculum petitur; editur, & non agnoscitur. Inter calumnias, & criminationes tacet Jesus. Hoc magnum miraculum est, quod mundus non vidit. 2. Unò signò editò potest lucrari Regis, ac totius aulæ gratiam; non edit. Hoc alterum miraculum est. Potes & talia patrare prodigia. Contemptus tace, inter irrisiones tace, ania Christi amore confundi, ac deprimi, & rem stupendam patrasti. Fuge magnorum gratiam, & miraculum edidisti.

3. Sprevit autem illum Herodes cum exercitu suo: & illusi indutum veste alba. Usque ad stultitiæ nomen, & insignia humiliatur æterna Dei Sapientia, ut mea curetur superbia, qui nimis sollicitè æstimari quæro. Agnosco tuum in me amorem, quò fatuus videri voluisti. Fac, ut ego tuâ stultitiâ infatuer, qui stulta mundi elegisti. 2. Vestis alba innocentiae tuæ testis est. Hæc ipsa est, quam

quam ego in Paradiso perdididi. Tu eam reperisti, ut mihi restituas per gratiam. Gratias tibi Domine. Conservabo eam in puritate, ut decenter indutus admittar ad nuptias Agni.

F E R I A III.

Barrabæ postponitur.

1. *Q*uem vultis dimittam vobis, Barrabam, an Jesum? Matth. 27. Confertur impietas Sanctitati, scelus Innocentiæ, Sanctus latroni, Deus peccatori, quem Seraphino contulisse grandis foret injuria. Exæquationem aliquam habet omnis comparatio. Unde tantum dicitur Christus non esse peior deterrimo. Semel à Pilato hanc injuriam tulit Jesus, à te toties, quoties amorem creaturæ, illius amoris opposuisti, quoties non minus pensi habuisti, cupiditatibus tuis obsequi, quàm legi Dei. Quid egisti?

2. *Principes autem Sacerdotum, & Seniores persuaferunt populis, ut peterent Barrabam.* Ibid. Barrabas patronos habet; Jesus neminem. Tu patronum age illius, quem advocatum habebis apud Patrem. Tu defende virtutem in omni occasione. Persequere Barrabam. Dic animæ tuæ: Crucifigatur Barrabas, passio mea pessima, mortificetur, pereat. Vivat Jesus in anima mea!

3. *Exclamavit autem universa turba dicens: Tolle hunc, & dimitte nobis Barrabam.* Luc. 23. Si conferre Christum Barrabæ grandis fuit injuria, quanta erit huic eum nebuloni posthabere. Summus Deus patitur se infimo loco haberi; & indignabitur pulvis, si humiliori officio applicetur? Indignaris insanæ turbæ; & cur idem facis? quoties præponis ea, quæ sunt carnis, iis, quæ sunt spi-

ritûs? mundi honorem, honori Dèi; judicium tuum, judicio Superiorum? non est hæc palmaris injuria?

F E R I A I V.

Pilatus cedit furori plebis.

1. **D**icite illis Pilatus: quid igitur faciam de Jesu? dicunt omnes: crucifigatur. Matth. 27. Quinimum turbæ cessit, jam dominatum perdidit. Ex plebis insolentia evasit timidus Præses? ex timore Præsidis plebs audacior? ut jam timeret ille innocentem absolvere, & sententiam rogaret à furente. Compatere Jesu tuo in tanta ignominia. Disce turbæ sensualitatum ne in minimo cedere, alias fiet insolentior, voluntas ad bonum debilior. Quære ex te, quid ergo faciam de Jesu? responde: Eripiam eum tot injuriis, impediendo, ubi poterò, omne peccatum; amabo illum, quantum isti oderunt; honorabo, quantum dehonorârunt.

2. *Videns autem, quia magis tumultus fieret, lavit manus dicens: innocens ego sum à sanguine Justî hujus, vos videritis.* Ibid. Multa tentavit Pilatus, ut Jesum furori plebis eriperet: sed in omnibus simul seipsum quæsit: & superavit causâ propriâ causam Christi. Frustra jam lavat manus, qui cor inquinavit. Et quomodo sit cædis innocens, qui, ut avertat tumultum, occidit innocentem? disce 1. Depurare amorem Dei, & amore proprio non miscere. In eo, quod pro Deo agis, non respice tua commoda, alias huc omnino deflectes. 2. Non esto meticulosus in causâ Dei contra turbam passionum, alias tibi sepe imperabit. 3. Non rejice in alium culpam, quam tu patrâsti.

3. *Et respondens universus populus, dixit: Sanguis ejus*

ejus super nos, & super filios nostros. Ibid. O Divine sanguis! quàm contemptim haberis! quasi nemo te sit unquam requisiturus! quasi non sis clamaturus in cœlum melius, quàm sanguis Abel! Sed habent, quàm sibi sollicitarunt, pœnam Judæi. Dicam ego suavius: Sanguis ejus super me, in quo dealbem animam meam, & super opera mea, quæ semper uniam sanguini, & meritis Christi.

F E R I A V.

Christus flagellis cæditur.

1. *T*unc ergo apprehendit Pilatus Jesum, & flagellavit. Joan. 19. Diritatem supplicii ex delicati corporis complexione, ex instrumentorum pondere, & aculeis, ex tortorum immanitate, ex plagarum numero argue. Sed omnia tormenta superabat confusio ex nuditate castissimi Jesu. compætere dilaniato Christo. Agnosce te horum causam. Nam supra dorsum ejus fabricaverunt peccatores. Psal. 128. Disce te libenter submittere percutienti manui Dei, qui pro te se libenter submitisit manibus licitorum: & dic cum eo: *Ego in flagella paratus sum. Psal. 37.*

2. *Apprehendit Pilatus Jesum, & flagellavit.* Expende virtutes præcipuas à Christo in flagellatione exhibitas. 1. Amorem nostri eximium: quia multa flagella peccatoris. Psal 31. quæ merueramus, in se suscepit. Duris amorem proba. 2. Humilitatem ex vilitate supplicii, quod erat solum mancipiorum. Hinc Isai. 53. *Vidimus eum despectum, & novissimum virorum.* Mensura tuam humilitatem, an usque ad novissimum descendat. 3. Invictam fortitudinem, & patientiam. Lauren. Justin. *Tanquam Gigas imperterritus stetit. Quomodo*

tu stas in adversis? Tert. l. de pat. c. 3. *Patientiam hujusmodi nemo hominum perpetraret.* Quid tu ad istum vel unius verbi agis? Ambr. ser. 17. in Psal. 118. *Calumniis appetitus silentium detulit triumphale.* Potésne & tu silere? 4. Lætam suæ voluntatis cum Divina conformationem. *Conscidisti sacrum meum, & circumdedisti me lætitiâ.* Psal. 29.

3. *Et flagellavit eum.* Considera, quod refert S. August. ser. de Pass. Motum diritate supplicii licetorum quendam aliis inclamasse; *Nuncquid interficitis eum non judicatum?* & vincula, quibus ad columnam stringebatur præsecuisse; Jesum verò prolapsum in suo sanguine volutatum. Accede & tu, collige sinu ejus sanguinem, ut nec tuis, nec alienis pedibus amplius proculetur. Et dum pro te flagellatum cogitas Jesum, noli corpus tuum moliter, ac delicate tractare.

F E R I A VI.

Jesus spinis coronatur.

1. **E***T exuentes eum, chlamydem coccineam circumdederunt ei.* Matth. 27. Rex Regum, & Dominus dominantium, ut Rex jocularis, habetur. Purpura primum, quæ erat regni insigne, induitur. Sed ad hoc duxerunt eum, detrahendo cum violentia vestes, quæ toti corpori adhærebant, non sine ingenti dolore. Et quæ confusio iterum nudo Jesu in conspectu impurorum militum! Induitur deinde purpura ad ignominiam. Ita est; Christo est ignominia, quidquid mundo est honori, quidquid mundo est ignominia Christo est honori. Elige prudenter, tene constanter.

2. *Et plectentes coronam de spinis, imposuerunt super caput ejus.* Ibid. Siccine gloria, & honore coronasti

nâsti eum Domine; ita est. In Regno Christi non alienæ sunt coronæ, quàm quæ pungunt. 2. Exi, & vide Regem tuum in diademate, quô tu eum coronâsti. Tu coronâsti te rosis; Jesu tuo solas spinas reliquisti. 3. Tu pupugisti ejus caput cogitationibus, ac judiciis tuis. Agnosce, deplora; compatere Jesu tuo, & audi dicentem tibi: Non agnosco sub spinoso capite membrum delicatum.

3. *Et arundinem in dextera ejus.* (Matth.) 27. prò joculari sceptro. *Et genu flexo ante eum illudebant ei dicentes: Ave Rex Judæorum. Et dabant ei alapas. Et exspuentes in eum, acceperunt arundinem, & percussiebant caput ejus.* Joau. 19. Expende hæc ludibria. Inspice affectus Christi. Compatere amantissimo Regi. Dica ei opera tua, & obsequia. Da te tanquam arundinem in manu ejus. Genu flectens adora eum: Ave Rex meus. Deterge sputa. Excipe aut ejus loco, aut pro eo, si non alapas, alias occurrentes injurias.

S A B B A T H O.

Ecce homo.

1. **E**cce adduco eum vobis foras, ut agnoscatis, quia nullam invenio in eo causam. Joan. 19. Accede & tu ad hoc spectaculum: Cognosce, quòd nulla sit in eo causa, sed in te; ille verò causam tuam ex amore in se suscepit. Vide, si illa est facies, quæ in monte Thabor refulsit. In externis est opprobrium hominum, & abjectio plebis. Psal. 12. In internis speciosus formâ præ filiis hominum. Psal. 44. Cogita hanc tibi imaginem proponi, ut vitam tuam ad eam conformes.

2. *Et dicit eis: ecce homo.* Ibid. Pilatus Judæis, ut misericordia moti, desistant ejus mortem postulare.

stulare. Cogita tibi ab æterno Patre dici : *ecce homo* ; qui hæcenus jacebas paralyticus , & hominem non habebas , hic hominem vides , qui omnes tuas infirmitates curabit. Huic tu illas humiliter expone. In hoc homine confide : cæterum in nullo : ne tibi aliquando exprobet : *Ecce homo , qui non posuit Deum adiutorem suum.* Psal. 51. *Ecce homo , qui in te ; ut in latronem incidit , & despoliasti eum , & plagis imposuisti abiisti , & semivivum reliquisti.* Luc. 10. *Ecce homo , quem unum , & semper aspicere debes in omnibus operibus tuis.*

3. *Cum ergo vidissent eum Pontifices , & ministri , clamabant dicentes : Crucifige , crucifige eum.* Ibid. Nondum satiata est crudelitas. Addunt clamoribus rationes : *secundum legem debet mori.* Quare ? *quia filium Dei se fecit.* Ergo si filius Dei esse vis , debes mori ? ita omnino. Vetus homo mori debet , ut vivat novus. Inclama ergo tibi : crucifige veterem hominem cum concupiscentiis suis.

DOM. V. QUADRAGESIMÆ.

Iterum Pilatus pro tribunali sedet.

1. *Cum audivisset Pilatus hunc sermonem , magis timuit : & ingressus est prætorium iterum , & dicit ad Jesum : unde es tu ! Jesus autem responsum non dedit ei.* Joan. 19. Considera 1. timorem Pilati. Desiderabat Christum dimittere , quem innocentem agnoscebat , sed timebat tumultum populi. Nunc , quia audivit , quod se filium Dei fecit , & vidit opera ejus à dicto non dissonare , magis timet , forte Filium Dei condemnare. Ideo quærit ? *Unde es tu ?* si primo statim rescidisset hunc timorem , non tam periculose luctaretur. Qui semel cedit passioni , semper fortiores expetit.

ritur. Tu principiis obsta. Quære & tu: unde es? ut bene Deum noveris. 2. Nihil respondit ei, ne dimitteretur liber. Tantum te amavit! tantum opus salutis nostræ, quod susceperat, perficere desiderabat.

2. Dicit ergo ei Pilatus; *mibi non loqueris? Nescis, quia potestatem habeo crucifigere te, & dimittere te?* Respondit Jesus: *Non haberes potestatem adversus me ullam, nisi tibi datum esset desuper.* Ibid. Ecce iterum superbia opprimit lumen, quod habebat de Christo dimittendo. Ita de una passione in aliam fit saltus, & una alteram juvat in ruinam. 2. Expende responsum Christi. Applica illud tibi in omni adversitate. Verum enim est, quod nulla in te possit quidquam, nisi datum sit illi desuper. Agnosce proinde omnes ex alto venire; quamvis Deus ad eas inferendas creatis instrumentis utatur.

3. Pilatus quarebat dimittere eum. *Judæi autem clamabant dicentes: Si hunc dimittis, non es amicus Cæsaris.* Ibid. Violentia hæc est maxima. Ne perdat amicitiam Cæsaris, Deum perdit. Quàm inique? quàm præpostere? Timuit, ubi non erat timor. Quotidianum hoc est; forte & tuum. Deum contemnimus, ut hominem amicum conservemus. Expende, quàm hoc iniquum sit.

F E R I A II.

Pilati in Christum sententia.

1. **E**T dicit Pilatus Judæis: *Ecce Rex vester. Illi autem clamabant: tolle, tolle. crucifige eum.* Joan. 19. Agonizat frigida defensio, quia adhuc clamores turbarum admittit, & auscultat. Non satis bene à passione te tueris, si ei auscultas. Semper illa clamabit, ne meliori assentiaris, sed commodio-

modiori. Agnosce tu Regem, quem tollendum illi clamant. Exhibe illi solium, cor tuum. Roga, ut hic imperet.

2. *Dicit eis Pilatus : Regem vestrum crucifigam ? Responderunt Pontifices : non habemus Regem, nisi Cæsarem.* Ibid. O cæcitas ! Cæsarem agnoscunt Regem, à quo spoliabantur sua libertate : Christum, qui venerat, ut eos in libertatem assereret, rejiciunt. Quoties tu Tyrannum animi colis, Christum despicias ? illius suggestiones, velut imperia, audis ? hujus contemnis ? Dic potius : Non habeo Regem, nisi Jesum Christum.

3. *Tunc ergo tradidit eis illum, ut crucifigeretur.* Ibid. Considera 1. injustam sententiam : quia judex toties innocentiam agnovit, & tamen condemnat. 2. Crudelem, quia, ut ait Luc. 23. *tradidit eum voluntati eorum*, furentium scilicet, & capitalium inimicorum. 3. Cogita Jesum hanc sententiam non tam à præside, quam ab æterno suo Patre decretam in mundi salutem accepisse. Discam me libenter tradere voluntati Dei, qui se tam prompte *tradidit voluntati eorum.*

F E R I A III.

Crucis bajulatio.

1. **E**T *bajulans crucem exivit.* Joan. 19. Considera 1. quàm suavi affectu diu desideratam Crucem sit amplexus ; sane majore, quàm Andreas suam ; cupiens in ea delicta nostra portare. Quàm gravem tu eam tuis reddidisti ! admirare ejus affectum, & gratias age : detestare tuum, qui injecta officia querèris esse supra tuas vires. 2. Non absterret eum infamia Crucis, quæ erat supplicium latronum : non pondus debilitato corpori admodum

dum grave. Hæc sunt, quæ te plerumque terrent. At non est infamia sequi Jesum. Defectum virium supplebit ipse: vel etiam succubuisse erit gloriosum.

2. *Exeuntes invenerunt hominem, nomine Simonem. Hunc angariaverunt, ut tolleret crucem ejus.* Matth. 27. Etsi violenter particeps factus infamiæ Simon, accepit gratiam illuminationis, & deinde gloriæ. Si angariato hoc dedit Jesus, quid dabit volenti? Associa te, aut subi vices Simonis. Non deterreat te pondus, non hominum judicia, non confusio. Si compateris, & corregnabis.

3. *Sequebatur autem illum multa turba populi, & mulierum.* 1. Quam diversis affectibus! aut ut crucifigant, aut ut irrideant, aut ex curiositate, aut ex humana familiaritate! nemo, *ut tollat crucem suam, & sequatur eum.* Vide, ut tu hoc eum affectu sequaris. 2. Semel susceptam Crucem constanter tulit usque ad montem Calvariæ. Et licet tot per viam difficultates, ob pondus, debilitas vires, confusionem, irrisiones, &c. occurrerent, non dimisit. Disce non ad horam portandam tibi esse crucem, sed tota vita.

F E R I A IV.

Crucifixus Jesus.

1. *ET dederunt ei vinum bibere cum felle mistum, & cum gustasset, noluit bibere.* Matth. 27. Dulcedo cordium potatur felle. Gustavit, ut suum etiam palato daretur tormentum. Noluit bibere, ne amaricarentur viscera, quæ sunt misericordiæ. Vinum dat mundus, sed nunquam purum. Id, quò delectat, permiscet felle. Ah noli bibere; quia *in novissimo mordebit ut coluber.* Prov. 23. 2. Vinum non bibitur, quia felle mixtum, Displicent opti-

optima, quia mixta pessimis. Intentio mala, optima opera depravat. Sic ista age, ut nihil tædii, nihil simulationis, nihil commodi, aut amoris admisceas.

2. *Ibi crucifixerunt eum.* Luc. 23. 1. S. Ambr. in c. 24. Luc. ait: *Nullus crucem ascendit: talis ergo ascendat, qui sæculum vincere parat, ut sæculi adjumenta non querat.* Nihil in mundum attulit, nihil aufert pauperrimus Jesus. Non amat Crucem, qui non amat paupertatem, quia in ea nemo, nisi nudus digne pendet. 2. Cogita violentiam, quæ manus, pedesque trahuntur, dolorem ex tractatione clavorum; & patere te per obedientiam trahi, loco, & muneri etiam arduo, ac difficili applicari. 3. Cogita Christum egisse æterno Patri gratias pro illa hora, quæ consummaturus erat opus: obtulisse se in sacrificium pro mundi, ac nominatim tuis peccatis. Quid verò tanto amoris rependes, quo dilexit te, & tradidit semetipsum pro te?

3. *Et cum eo alios duos, hinc & hinc, medium autem Jesum.* Joan. 19. Hoc ad majorem ignominiam spectabat, ut pejor pessimis latronibus crederetur. Cogita tria genera crucifixorum: pessimus unus, alter conversus, tertius ipsa innocentia, & Dei Filius. Quandoquidem sua justis, & injustis crux est, noli crucifigi ut latro, aut sceleribus ansam dare cruci; noli violenter, ac proinde sine merito. Crucifigere cum Christo sponte, cum gaudio, & ex obedientia.

F E R I A V.

Sortes in vestes, titulus, & blasphemia.

1. **E**Rat autem tunica inconsutilis, desuper contexta per totum. Dixerunt ergo ad invicem: *Non scindamus eam, sed sortiamur de illa.* Joan. 19. Divisa primum est exterior Christi vestis in quatuor partes.

tes. Interior, & inconfutis servatur integra. Vestes Christi Fideles sunt. Scinduntur, qui corpori Christi non penitus adjacent. In quo non est fundamentum amoris Dei, non est etiam amor proximi: qui adhæret Deo, adhæret & proximo per charitatem. Quoties, quod non ausi sunt Judæi, ausus es tu, & vestem hanc charitatis Christianæ discidisti? dic: imposterum non scindam eam.

2. *Jesus Nazarenus, Rex Judæorum.* Ibid. Moriendi titulus datur ab ipsis hostibus, qui datus est nascenti a tribus Magis. Sic potestas ejus, & imperium firmatur. Sed heu! non agnoscitur Rex ab iis, qui erasum hoc nomen volunt, erit tamen mihi Jesus, & Salvator. Erit mihi Nazarenus, & floridus, ac in ipsis tormentis amabilis. Erit mihi Rex, cui me devoveo? nec alium anima mea Dominum admittet. Ut nunquam discedam, Christo configar Cruci, clavis timoris, amoris, & mortificationis.

3. *Blasphemabant eum*, exprobrantes impotentiam salvandi seipsum, præsumptam Regis dignitatem, fiduciam vanam in Deum, inanem Dei filiationem. Hæ omnes calumniæ extinguuntur, si descendat de Cruce. Ita enim ajunt: *Descendat nunc de Cruce, & credimus ei.* Sed frustra: Imò, quia Filius Dei est, non descendit de cruce; filiorum Dei est, in cruce suscepta constanter perseverare, ac mori, tum continua sui ipsius mortificatione, tum quotidiana vocationis suæ confirmatione.

F E R I A I V.

Primum, & secundum Christi Verbum
in Cruce.

1. *J*esus autem dicebat: Pater, dimitte illis: non enim sciunt, quid faciunt. Luc. 23. Loquitur
 Avanc. Medis. K in

in causa aliena, qui semper tacuit in sua. Et prima causa non est amantissimæ Matris, sed crucifixorum. Expende verba: *Patris* nomen usurpat, ut ad pietatem moveat, moneatque esse Patrem non tantum bonorum, sed etiam malorum; & te omnium fratrem. *Illis* non definit præsentēs crucifixoꝝ, sed etiam futuros, scilicet omnes peccatores. Quid non speres, qui te non excludi vides? *Non sciunt, quid faciunt.* Excusat quoad potest, per ignorantiam: quia vere *omnis peccator ignorans est*, nec æstimat peccati gravitatem. Offensus quid tu agis? Ora pro præsentibus. Ignosce illis. Excusa & tu, quoad potes.

2. *Domine, memento mei, dum veneris in regnum tuum.* Ibid. Latro bonus reprehendit socium blasphemantem, confitetur peccatum suum, dat testimonium innocentie Christi, credit Christum esse Deum, & plenus spe cum orat: *Domine, memento mei, dum veneris in regnum tuum.* 1. Quid non potest unô penè momento Dei gratia acceptata? 2. Non petit latro liberationem à cruce, sed sui memoriam. Satis illi provisum est, cujus Deus meminisse dignatur. 3. Duo sunt ad latus Christi, unus convertitur, quis non speret? unus damnatur, quis non timeat, etiamsi sit apud Jesum?

3. *Amen dico tibi: hodie mecum eris in Paradiso.* Ibid. Quæ benignitas Jesu? plus exhibet, quam petatur. 1. Quod promittit, non differt. *Hodie.* 2. *Mecum:* quod solatium esse cum Jesu? in paradiso cum illo esse & tu desideras? Sed esto prius in cruce. *Ad magna premia perveniri non potest, nisi per magnos labores.* S. Greg. hom. 37. in Evang. Si compassus fueris, correpnabis.

S A B B A T H O.

Tertium Verbum ad Matrem, & Joannem.

1. *S* *Tabat juxta Crucem Jesu Mater ejus.* Luc. 23.

Quis, putas, fuerit dolor SS. Matris, quæ unicè diligebat Filium Jesum, quem non ignorabat Deum, & hominem? *juxta*, quam oculis suis inspiciebat, *Crucem*, tormenta, & infamiam supremam. Et tamen *stabat*, & ipsa animo Filium pro mundi salute offerebat. *Stantem* lego *flentem* non lego, ait D. Ambr. in c. 23. Luc. *Stare namque* (addit Amadeus hom. 5. de Mart. Virg.) *in illa cordis amaritudine, magnæ adscribitur constantiæ.* Disce 1. stare in adversis mente, & ratione. 2. Voluntate constante. 3. Etiam continuo exercitio. Disce 4. nihil creatarum rerum, etiam spiritualia solatia, ita amare, quin, si Deus velit, si expediat pro aliorum salute, perdere velis.

2. *Cum vidisset Jesus Matrem, & Discipulum stantem, dicit Matri suæ: Mulier, ecce filius tuus.* Ibid. Sui loco relinquit Matri Joannem. Sed quæ comparatio utriusque, quale solatium? locô Dei purus homo. Non est dubium Beatissimam Virginem in Joanne semper speculatam esse Christum. Disce & tu in proximis agnoscere Christum, firmiter inde erit charitas; præsertim vero in Superioribus, exactior erit obedientia. Sed cur Joannes Matri? 1. Privilegio virginitatis hoc tribuit Theophylactus; Virgo Virgini, Virginem commendavit. 2. Quia ipse quoque ad Crucem stetit: *Usque adeò bonum est, inquit ille, stare apud patientem Christum. Nam in fraternitatem ejus ducit. En quibus frater Christi, quibus Virginis filius evadas. Pulchri tituli hîc constant pretiò.*

3. *Deinde dicit Discipulo: Ecce Mater tua.* Joan. 19.

K 2

S. Ambr.

S. Ambr. in exhort. ad Virg. *Vocatus à Christo reliquit patrem. Huic traditur Virgo, qui suos nescit. Quod tibi solatium esset, si ea tibi in Matrem daretur? at fieri potest, si amore Jesu tuos nescias, & carnalem ad eos affectum exuas. 2. Fieri potes frater Jesu, & hinc Mariæ filius, si exacte te voluntati Dei accomodes: Quisfecerit voluntatem Patris mei, ipse meus frater est. Matth. 12. Accipe ergo illam in tua, & dic: Monstra te esse Matrem: sed vicissim tu monstra te esse filium.*

DOMINICA PALMARUM.

Quartum, & quintum Verbum Christi.

1. *C*irca horam nonam clamavit Jesus voce magna: *Deus meus, Deus meus, ut quid dereliquisti me?* Matth. 27. S. Leo. *Vox ista non querela, sed doctrina est: erudiens nos, eoque devenisse Christi dolores, ut noluerit eos etiam interna Dei assistentia mitigare. Et tu quot solatia, non tantum à Deo, sed à creaturis mendicas? Magnum est, & valde magnum, ait Thom. Kemp. lib. 2. c. 9. tam humano, quàm Divino posse carere solatio; & pro honore Dei libenter exilium cordis velle sustinere, & in nullo seipsum querere.*

2. *Ut consummaretur Scriptura, dixit: Sitio. Joan. 19.* Sciebat omnia se implevisse, quæ de eo erant in Scriptura; hoc unum deesse: *In siti mea potaverunt me aceto. Psal. 68. Hoc ergo implere voluit. Vide, quàm ad omnem obedientiæ apicem attendat Christus. 2. Magna evacuatio sanguinis magnam sitim creabat; sed major erat sitis plura patiendi. Blos. in explic. Pass. c. 18. Habuit aliam sitim, puta, amplius patiendi, atque evidentiùs suum nobis amorem demonstrandi. O si dares animam tuam, quàm*

quàm eum reficeret ! Examina tuum in Deum, & salutem proximorum amorem. Quid pro iis tolerare desideras.

3. *Vas ergo erat positum aceto plenum. Illi autem spongiam plenam aceto, hyssopo circumponentes, obtulerunt ori ejus. Ibid.* Aceto modico, & hyssopo reficitur exhaustus, & moriens Deus. Habes in mediis etiam laboribus frangendi appetitus exemplum. Non æstima lautiora tibi deberi; in schola Christi minus illi debetur in hoc mundo, qui plura præstat. Servus Christi nunquam vult indulgentius haberi. 2. Acetum dant silenti Deo, qui optimos dies transigunt in mundanis, & carnalibus; senium vero, tanquam fæces ætatis, Deo dare volunt. 3. Vas aceto plenum sunt corda amaricata, & plena rancoris, aut impatientiæ. Evacua hoc vas, & imple suavi vino charitatis.

F E R I A II.

Sextum, & septimum Christi Verbum.

1. **C**onsummatum est. Joan. 19. Quod Pater mandavit, quod ego suscepi peragendum. Divinum est cæpta perficere. Modica laus est incepisse, maxima perfecisse. Non qui cœpit, sed qui perficit, præmium capit. Quàm multa tu ordiris? quàm pauca ad finem deducis? Imitare Dei tui constantiam, ut & tu dicere possis hora suprema: Consummatum est, quod Deus jussit per præcepta, quod suscepi per consilia, quod jubent regulæ, quod monuit gratia. Quàm felix tunc eris! sed quàm longe adhuc abes!

2. *Pater, in manus tuas commendo spiritum meum.* Luc. 24. Expende verba. Pater: fiduciæ, & amoris verbum est. Non bene id usurpas, nisi vivas

K 3

ut

ut filius amans, reverens, obsequens. *In manus tuas*, in quibus una est quies, & securitas. Ut in illis sis æternum, conjice te in illas, dum vivis, perfecta tuæ voluntatis in Divinam resignatione. *Commendo spiritum*: non corpus, quod in lectulo crucis jam quiescit. Disce spiritus majorem habere curam, quam corporis. Ut autem spiritus secure transeat in manus Dei, vide, ut corpus semper sit in Cruce. Hic solus tutus est transitus, aliis omnis periculosus.

2. *Et inclinato capite tradidit spiritum*. O sublime mysterium! Deus moritur. Hoc assequi non potes, nisi prius discas, quid amor possit. Et pro te moritur. Vide homo, quanti sis pretii apud Deum. Vere dixit Apostolus 2. Cor. 7. *Empti estis pretiò magnò*, morte Christi. Quid rependes, ne sis ingratus? & tu spiritum tuum superbum inclinato per humilitatem capite trade. 2. Inclina caput tuum per obedientiam usque ad migrationem spiritus. 3. *Inclina cor tuum ad custodiendas justificationes tuas*. Psal. 118.

F E R I A III.

Prodigia in morte Christi.

1. *E*cce velum templi scissum est in duas partes, à summo usque deorsum. Matth. 27. Ut significaret morte Christi antiquam legem esse rescissam. Operetur in te hoc ipsum mors Christi, ut vetus lex, quæ est lex membrorum, in te rescindatur. Efficacissimum argumentum occidendi veterem hominem est Jesus occi'us. 2. *Scissum est*: ne sancta amplius obumbrarentur. Frivolæ rationes sunt vela quædam, quibus Divina obvelamus: Scindantur illæ, ut ista melius perspicias. Nonne iis sæpius tui animi oculus fuit impeditus? 2. *Ter-*

2. *Terra mota est, & petra scissæ sunt.* Ibid. Hæc sunt signa condolentis naturæ. Pudeat hominem non tantum dolere mortem Christi, quantum elementa senserunt. *Terra es*, jam pridem tibi dictum; quia terram amas. Deus mortuus est. Hic succuti debes, & quidquid terrenum excutere. Condolere non potes, nisi ames: amare autem Jesum non potes, si præter Jesum aliud amas. *Petra es*, vel gravis pondere peccatorum, vel dura tui iudicii, ac voluntatis obstinatione. Si mortem Christi penetras, discindere contritione.

3. *Et monumenta aperta sunt.* Ibid. Ostenditur, quod Christus mortem nostram moriendo destruxerit, dum per eum juri mortis ipsi mortui eripiuntur. Hoc quoque operetur in te mors Christi. Aperiat, & denudetur penitus sepulchrum tuæ conscientiae ei, cui debet. 2. Aperiat sepulchrum dealbatur simulationis, ut appareas, quod es, non quod te fingis. 3. Aperiat sepulchrum malarum consuetudinum, easque omnes emittat, ut post-hac ambules in novitate vitæ.

F E R I A I V.

Varii diversorum affectus in morte Christi.

1. *Videns autem Centurio, qui ex diverso stabat, quia sic clamans expirasset, ait: Verè hic homo filius Dei erat.* Marc. 15. Ex elementorum trepidatione subortus in Centurione timor, ex timore altior ad horum auctorem cogitatio: hinc cognitio, & tam nobilis confessio. Quot alii spectarunt idem, sed immoti? Mirabilis Deus inflectendis cordibus. Tu interim disce ex iis, quæ fieri vides in natura, cogitationem ad omnium auctorem erigere, eum confiteri, & magnificare. 2. In ipsa vilitate passionis,

K 4

Deum

Deum confitetur, quid istic Divinum vidit? Certum est, si quid in te Divinum sit, id in adversitate, in contemptu potissimum elucere, & probari.

2. *Et omnis turba eorum, qui simul aderant ad spectaculum istud, & videbant, quæ fiebant, percutientes pectora sua revertebantur.* Luc. 23. Plebs aliquem animi motum prodidit, non Principes Sacerdotum. In superbos, & obstinatos vix cadit, aut raro bonus affectus. Ex illa tamen plebe nemo confessus est Deum. 1. *Quia aderant* solum tanquam *ad spectaculum*. Unde tam rarus tibi, aut tepidus ad passionem motus? forte, quia eam ut spectaculum meditaris, non ut bonitatis, amoris, ac misericordiæ argumentum. 2. *Revertebantur*. Vidisse, & abiisse quid juvat? perseverandum est ad Crucifixum, & sapius hōc objectō pascendus animus.

3. *Stabant autem omnes noxi ejus à longè & mulieres hæc videntes.* Ibid. Hæ teneris lachrymis mortem Jesu deplorabant. Non probo, quod à longè. Cominus spectanda est Christi mors. Petrus, quod à longè secutus sit, cecidit. Nolim à Jesu procul abesse. Etsi verò non propè, *stabant* tamen, ut & viderent Jesum, & à vivo adhuc viderentur. *Stabant* constantia, videbant contemplatione: accedebat animus, quò non penetrabant corpora. Persevera in assidua tibi repræsentatione vitæ, & mortis Christi.

F E R I A V.

Lancea latus ejus aperitur.

1. **A**d Jesum autem cum venissent, ut viderunt eum jam mortuum, non fregerunt ejus crura. Joan. 19. Opinioni Judæorum præmortuus est Jesus: forte indignati illi, quòd amplius sævire non possint

sint ad sensum. Dei in nos amor acceleravit mortem, ut opus redemptionis nostræ citius perficeret. Quam felix tu! si, cum dæmon, aut malignus homo te quærit affligere, jam tibi, mundo, & concupiscentiis tuis per solidam abnegationem mortuus inveniaris! Hic modus est conservandi ossa integra, hoc est, soliditatem virtutum. Alias sine mortificatione nulla virtus est solida.

2. *Unus militum lanceâ latus ejus aperuit.* Patet amoris ostium, omnium dolorum scaturigo. Vide, quantis tu cor illud doloribus affeceris, quam illud peccatorum tuorum venenô infeceris: quantum ille te amaverit: vide, quantis amoris characteribus ille te in libro filiorum Dei descripserit. Pedes dedit peccatoribus, ut Magdalenæ. Luc. 7. Manus amicis, ut Petro, Act. 3. Cor dat filiis Dei, quibus dicit, Isai. 66. *Ad ubera portabimini.* Hic memento ingratitudinis tuæ, amoris sui. Aspice eum nunc cum amore, nè olim videas cum tremore, *in quem transfixisti.*

3. *Ex continuo exiit sanguis, & aqua.* Ibid. Oportuna salutis nostræ remedia, SS. Sacramenta, quibus & ablueremur à peccatis, & adornaremur gratia. An & hoc parvum amoris signum est? quantum verò illud, usque ad ultimam guttam sanguinem pro te dedisse? *Tam copioso munere ipsa redemptio agitur, ut homo Deum valere videatur.* Euseb. Gal. hom. 6. de Pasch. Quam liberalis in te est Deus! quam tu parcus in illum, ut pro tanto sanguine nec lacrymam stilles!

F E R I A V I. P A R A S C E V E S.

Contemplatio Crucifixi Jesu.

1. *O* **V**os omnes, qui transitis per viam, attendite, & videte,

K 5

videte, si est dolor, sicut dolor meus. Thren. 1. Considera tormenta Christi. 1. in corpore, Psal. 21. *Foderunt manus meas, & pedes meos; dinumeraverunt omnia ossa mea.* Isai. 1. *Aplantapedis usque ad verticem capitis non est in eo sanitas.* 2. In animo ex contemptu sui. Psal. 34. *Subsannaverunt me subsannatione.* Thren. 3. *Factus sum in derisum omni populo meo, & canticum eorum tota die.* Ex infamia crucis cum latronibus. Isai. 53. *Et cum sceleratis reputatus est.* Ex defectu compatientis, aut consolantis. Thren. 1. *Non est, qui consoletur eum ex omnibus charis ejus. Omnes amici ejus spreverunt eum, & facti sunt inimici.* Psal. 68. *Sustinui, qui simul contristaretur, & non fuit; & qui consolaretur, & non inveni.* Ex ingratitudine hominum, & parvo fructu suæ passionis. Psal. 29. *Quæ utilitas in sanguine meo?* Isai. 5. *Quid est, quod ultra debui facere vineæ meæ, & non feci? Expectavi, ut faceret uvas, fecit autem labruscas.*

2. *Quid sunt plagæ istæ in medio manuum tuarum?* Zachar. 13. *Quære ita ex Jesu tuo, & respondentem audi; His plagatus sum in domo eorum, qui diligebant me.* Agnosce infinitum amorem. S. Aug. lib. de Virgin. *Inspice caput hoc inclinatum ad osculandum, cor apertum ad diligendum, brachia extensa ad amplectendum, totum corpus expositum ad redimendum.* Hæc, quanta sunt, cogita, hæc in statera vestri cordis appendite: ut rotus vobis figatur in corde, qui rotus pro vobis fuit affixus in cruce. *Verè dilexit nos, & tradidit semetipsum pro nobis.* Ephes. 5. *Illud â te quæri existima. Ferre amas me? Et repone toto affectu: Domine, tu scis, quia amo te.*

3. *Pro omnibus mortuus est Christus, ut, qui vivunt, jam non sibi vivant, sed ei, qui pro ipsis mortuus est.* 2. Cor. 5. *Hunc ex Christi morte fructum trahe: non tibi, non commoditati, non delectationi, non honori*

nori vive, aut actum ullum impende. Te, & tua illi debes. *Non estis vestri, empri enim estis pretio magnò.* 1. Cor. 6. *Quid ergo retribuam Domino*, ait Bernard. tract. de dilig. Deo, *pro omnibus, quæ retribuit mihi? in primo opere me mihi dedit; in secundo se: & ubi se dedit, me mihi reddidit. Datus ergo, & redditus, me pro me debeo, & bis debeo. Quid Deo tribuam pro se!*

S A B B A T H O S A N C T O

Depositio Corporis Christi de Cruce, & sepultura.

1. *J*oseph, qui & ipse Discipulus erat Jesu, occultus tamen propter metum Judæorum, audacter introivit ad Pilatum, & petiit corpus Jesu. Matth. 27. Joan. 19. Marc. 15. Patibulatum corpus Jesu unus tantum petit, quàm pauci amant Jesum Crucifixum! 2. Antè ob metum latebat, jam pendentis Jesu se declarat Discipulum. Hic fructus passionis est. In te vacuam non credam, si in confusione, & vilitate Deum agnoscas, & sequaris, idque audacter, nulla veritus pericula, præstes.

2. *Venit autem & Nicodemus ferens mixturam Myrrhæ, &c.* Joan. 19. Duo ergo ex omnibus Discipulis sunt, qui in crucifixum Jesum testantur affectum. Aude tu tertius esse. 2. Expende officia, quæ Christo exhibent: deponunt corpus de cruce, aromatibus condiunt, involvunt sindone, & suis humeris viri nobiles, eum, qui tam infamis habitus fuit, deportant. En quàm contempto Christo nobilitatem suam subjiciant, ut tu eidem contempto non neges tuam vilitatem. Exhibe eadem officia in Christi membra, seu proximos, depone de cruce affictos solatio spirituali, condi aromatibus, sive

sive cura illorum famæ, involve sindone silentii eorum defectus.

3. *Et posuit illud in monumento suo novo, quod exciderat in petra, & advolvit saxum magnum ad ostium monumenti.* Matth. 27. Sepelis in corde Christum, quoties sumis: hæc ergo observa; sit sepulchrum novum, in quo non sit ullus alius positus sinister affectus: sit in lapide immobilitatis, & constantiæ: advolve saxum efficacium propositorum: circumda custodiam sanctarum cogitationum, &c.

DOMIN. RESURRECTIONIS.

1. *Resurrexit tertia die secundum Scripturas.* 1. Cor. 15. Succedunt læta tristibus. Deus ita constituisse videtur, ut per aspera eatur ad amœnâ. Christus gloriæ resurrectionis præmisit 33. annos duræ vitæ, tres dies acerbissimæ passionis. Sic ergo & tibi eundum ad gloriam. Si commortuus fueris, & convives.

2. *Ego dormivi, & soporatus sum, & exsurrexi.* Psal. 3. Anima Christi reunitur corpori, ut, quod socium fuit, passionum, esset & resurrectionis. In momento recedunt livor, & vulnera; accedunt decor, & gratia: quô tam corporis, quàm animæ illius gaudio? quibus Patrum è limbo eductorum affectibus fidei, spei, charitatis, gratulationis, &c. Accede ad Christum paribus: &, ut gaudium tuum sit plenum, unire & tu tanquam membrum corporis Christi illius animæ per amorem.

3. *Quomodo Christus surrexit à mortuis per gloriam Patris, ita & nos in novitate vitæ ambulemus.* Rom. 6. Recipis fructum resurrectionis Christi, si ambules in novitate vitæ; sed non ambulas in novitate vitæ, nisi occidas veterem hominem. Sicut non est ingressus ad vitam æternam, nisi per mortem
natu-

naturalem ; ita nec ad novam , perfectamque vitam ingredieris , nisi *spiritu facta carnis mortifices*.

F E R I A II.

De dotibus Corporis gloriosi.

1. *Seminatur in corruptione surget in incorruptione.*

1. Cor. 15. Prima corporis gloriosi dos est , quâ & mortis , & morborum , ac vulnerum immune redditur. *Mors illi ultra non dominabitur.* Rom. 6. Quibus mediis ad hanc evasit Christus? Patiendo , & moriendo. Huc tu evadere debes , ut nec in prosperis , nec in adversis ullo pravo affectu corrumparis. Ad hoc verò , expende , quam necessarium sit mortificationis studium , juxta regulam Summarii duodecimam.

2. *Seminatur corpus animale , surget corpus spirituale.* Ibid. Secunda dos est subtilitas , quâ corpora dura , & aliis corporibus resistentia penetravit. Tu penetra omnes difficultates , & impedimenta in via virtutis. *Omnia potes in eo , qui te confortat.* Sed ad hoc quoque opus est , ut seminetur animale , & proprii commodi studiosum.

3. *Seminatur in infirmitate , surget in virtute.* Ibid. Tertia dos est agilitas , qua se , ubi volebat , momento præsentem sistebat. An ita tu agilis ad inspirationes divinas? an ad nutus Superiorum? an ad progressum in via virtutis? an ad seminandum in infirmitatis tuæ cognitione , & abiectione tui?

4. *Seminatur in ignobilitate , surget in gloria.* Ibid. Quarta dos claritas , qua longe supra solem resplenduit. *Sic luceat lux tua coram hominibus , ut videant opera tua bona.* At non erit , nisi semines in ignobilitate , & abnegatione tui.

F E R I A III.

De vulnerum cicatricibus in glorioso Corpore reservatis.

2. *Q*uid sunt plagæ istæ in medio manuum tuarum? Zach. 3. Euseb. Emiss. hom. 10. de Pasch. ait: Ideo in glorioso Corpore retenta vulnera, *ne causam ipsam gloriæ obscuraret lux gloriæ*. Voluit in æternum constare, se per vulnera emissee gloriæ. Si hoc est gloriæ pretium, quid ego olim ostendam, qui pati detracto? *Christum oportuit pati, & ita intrare*. Ergone mihi alia via pingetur.

2. *Non obliviscar tui: ecce in manibus meis descriptæ*. Isai. 49. Altera retentorum cicatricum causa est, ut sint Christo memoriale sui in nos amoris, pro quibus ea pati voluit; & ut in iis legat pretium nostræ salutis, pergatque adhuc nos amare, qui tanto illi constamus. Ergo tui memoriam in æternum vult habere Jesus. Recordare, & tu Salvatoris tui. At non sæpe recordaberis, nisi obliviscaris creaturarum, quæ memoriâ Dei impediunt.

3. *Et videbit eum omnis oculus, & qui eum pupugerunt*. Apoc. 1. v. 7. Tertia causa est, ut olim damnandis ea ostendat, exprobet sævitiam iis, qui eum peccatis suis crucifixerunt; ingritudinem, qui tanto amor non corresponderunt: Item, ut ostendat Beatis in æternum, & gaudeant de amore tanto, qui per cicatrices elucet. Quomodo tu eas aspicias? an cum confusione? an cum gaudio?

F E R I A IV.

Apparet Sanctissimæ Matri suæ.

1. *Q*ui diligit me, diligetur à Patre meo; & ego diligam eum, & manifestabo ei meipsum. Joan. 14.
Mani-

Manifestasse se Christum Matri, non tradunt Evangelistæ, ac certum creditur; quia eam præ cæteris dilexit, & præ cæteris ab ea diligebatur. Amans, ut ad centrum, properat ad amatum. Nondum sentis tibi per sancta lumina manifestari Jesum? forte non satis amas, Amantibus se manifestat Jesus.

2. *Secundum multitudinem dolorum meorum consolationes tuæ lætificaverunt animam meam.* Psal. 63. Cogita, quæ fuerit Virginis viso filio consolatio. Ut eam assequaris, magnitudinem doloris in passione habiti expende. Ad mensuram doloris datur consolatio. Quantam tu sperare possis, ex mortificationis, & toleratæ afflictionis magnitudine collige.

3. *Anima mea liquefacta est, ut dilectus locutus est.* Cant. 5. Cogita, quod fuerit expectantis Virginis desiderium; qui jam Christum aspicientis affectus demissionis, devotionis, adorationis, gratulationis de exantlato tanto opere, gaudii de triumpho resurrectionis, amoris, &c. qui omnes ex ferventi in Jesum desiderio nascuntur. Non experiris hos in te? Excita fervens videndi, & agnoscendi Dei desiderium, sequentur reliqui.

F E R I A V.

Sanctæ Mulieres tendunt ad sepulchrum Domini.

1. *UNA autem Sabbathi valde diluculo venerunt ad monumentum, portantes, quæ paraverant, aromata.* Luc. 24. Cogita harum studia. 1. Emunt aromata. Jam non habebant amplius, quod posset vanitati servire. 2. Conficiunt unguentum, etsi scirent jam à Josepho, & Nicodemo unctum, spectantes, non quid ab aliis factum sit, sed quid à se

se fieri deceat. 3. Valde manè exeunt, non citra incommo- dum tenebrarum, & fortè insomnem noctem transegere ob dolorem. 4. Veniunt ad monumentum sinè metu custodum. Amor enim eas urgebat. Vere amas Jesum, si hæc ei obsequia præstas.

2. *Et dicebant ad invicem: Quis revolvat nobis lapidem?* Marc. 16. Expendunt difficultatem, quæ obviat suscepto operi: agnoscunt vires sibi ei superandæ non suppetere. Non cedunt tamen, sed pergunt. En constantiam in bono, fiduciam in Deo natam ex amore. Usurpa tu hanc sæpe reflexionem: quis revolvat mihi lapidem hujus tentationis, difficultatis, impedimenti? ne imparatus retundaris. Fide Deo, ubi tu deficis, & susceptum opus constanter urge.

3. *Et ecce terræ motus factus est magnus, & respicientes viderunt revolutum lapidem.* Matth. 28. Marc. 16. En, ut Divina providentia constantiam, & fiduciam juvat! Terræ motu revolvitur lapis, fugantur custodes, qui opus meditatum impedire potuissent. Ita seriò Deus ad se tendentibus adest: tollit impedimenta externa aliorum hominum, aut circumstantiarum, interna malorum habituum, & consuetudinum, fugat dæmones inimicos. Expende, quoties id sis expertus; & persevera in bono, confide in Deo.

F E R I A V I.

Sanctæ Mulieres de resurrectione Christi ab Angelo informantur.

1. *R*espondens autem Angelus dixit mulieribus: Nolite timere vos, scio enim, quod Jesum, qui crucifixus est, quæritis. Matth. 28. En alterum timenti-

mentibus; sollicitè tamen Deum quærentibus solatium! sed cur non timent terræ motum, Angelum aspectu fulguris? quia Jesum quærunt crucifixum. His sua Deus mittit solatia. At carebis illis, dum teipsum, dum creaturas, dum aliud præter Jesum, & hunc Crucifixum quæres.

2. *Non est hic: surrexit enim, sicut dixit.* Ibid. Quærunt Jesum in tumulto. Dolere poterant, quod hic non esset; sed si suum Jesu bonum amabant, gaudere debebant, quod gloriosus surrexerit. Ubi tu Jesum quæris? in tuis commoditatibus in creaturis, in sensuum oblectamentis: Quoties respondent tibi Divina lumina: *Non est hic?* quoties frustra, & damno tuo quæxivisti? & nondum desistis?

3. *Venite, videte locum, ubi positus erat Dominus. Et ingressæ non invenerunt corpus Domini Jesu.* Ibid. & Luc. 24. Amor erat, quo Jesum quærebant, sed adhuc sensualis, ut eum viderent, tangerent. Ideo non invenerunt. Puro quærendus amore est. Examina intentiones tuas, an puræ sint, an soli Jesu intentæ, an nihil amoris proprii admixtum? mixta non invenies eum, qui solum pura intentione invenitur.

S A B B A T H O.

Reprehenduntur mulieres, & mittuntur
nuntiaæ ad Apostolos.

1. *C*Um timerent autem, & declinarent vultum in terram, dixerunt: Quid quæritis viventem cum mortuis? Luc. 24. Reprehendi merentur, quia Angelis clarè monstrantibus non credunt. Has imitantur, qui in rebus etiam sanctis non sequuntur ductum Patris spiritualis, & suo sensui inhærent. Quærunt Jesum, cui se dedant; sed inter-

Avanc. Medin.

L

mor-

mortuos cum iudicio, amore proprio. Ibi est Jesus, ubi nihil tui est.

2. *Non est hic, sed surrexit.* Ibid. Infallibile resurrectionis signum exhibent, quia *non est hic*. Hoc argumento probatur nostra spiritualis resurrectio: si à verace Angelo; non à blandiente sensu dici possit, non est in hac imperfectione, in hoc pravo affectu, in hac passione, in priore tepiditate spiritus. Gaude, si sic sit: si non est, cura, ut sit.

3. *Cirò euntes dicite Discipulis ejus, quia surrexit.* Matth. 28. Nomine Christi hoc mandant Angeli mulieribus. At non merebantur tam læta nuntia Apostoli, qui eum tam fœde deseruerant. Spectavit Christus, quid suus amor postulet, non quid eorum merita. Amat etiam immerentes. Hoc me indignum amore mei Domini solatur. Non intres in iudicium cum servo tuo Domine, sed fac secundum misericordiam tuam.

DOMINICA IN ALBIS.

Mulieres referunt Apostolis nuntium resurrectionis.

1. **D***icite Discipulis ejus, & Petro, quia surrexit.* Marc. 16. Exprimi nominatim Petrum, tenerioris affectus est argumentum. Erat cæterorum caput: hoc honorat Christus. Amaverat plùs cæteris Jesum, inde plùs cæteris dolebat: affectum affectu rependit. Non cessabat suum peccatum deflere. Erigit mœstum amoris demonstratione. Agnosce bonitatem, ama, in ea spem tuam reponne; non dimittet te, etiam cum ex fragilitate peccaveris.

2. *Et visa sunt ante illos deliramentum verba ista, & non crediderunt illis.* Luc. 24. Quæ nuntiant mulieres,

res, sunt ea ipsa, quæ Christus Apostolis prædixerat: concordant omnino Magistri verbis ne tamē credunt. Imitaris Apostolorum incredulitatem, qui inspirationes Divinas, ut vanas, rejicis; Superiorum monita, scrupulos, conscientiae remorsum deliria arbitraris. Attende illis: quia per illa Deus ducit. Aberras, si non sequeris.

3. *Maria Magdalena venit ad Simonem Petrum, & ad alium Discipulum, quem amabat Jesus, & dicit illis: Tulerunt Dominum de monumento, & nescimus, ubi posuerunt eum.* Joan. 20. Non dixerat Angelus *tulerunt*: sed *surrexit*. Impetus forte amoris, aut doloris fecit, ut non accurate attenderet. Etiam bonis affectibus non secus, ac ventis, ponendum, est pondus, cum rationem turbando, in errorem trahant.

F E R I A II.

Petrus, & Joannes currunt ad sepulchrum.

1. *Exiit ergo Petrus, & ille alius Discipulus, & venerunt ad monumentum.* Joan. 20. Nuntii à mulieribus accepti veritatem experiri volunt. Non retinentur aliorum non credentium exemplo. Attendant; non quid agant alii, sed quid prudenter agendum sit. Cape hujus regulæ necessitatem, & sequere.

2. *Currebant autem simul.* Ibid. Amor eos incitabat ad cursum. Hic nescit tarda molimina. Parum distant, lente velle obsequia Dei, & diu nolle. Qui amat Divina, volat ad illa: Currisne tu, an serpis? Vis progredi? ama; tantum procedes, quantum amabis.

3. *Ille alius præcucurrit citius Petro, & venit prius ad monumentum; Non tamen introivit.* 1. S. Hier. in c. 56. *Isai. Joannes alatus Virginitatis alis præ-*

cucurrit. Quia plurimum hæc virtus recedit à carne, plurimum accedit ad Deum. 2. Joannes non intrat prior. Honorat in Petro dignitatem capituli, nec considerat in eo, quòd Christum negaverit, ipse autem ad Crucem constiterit. Disce, quid debeas Superiori, licet imperfecto. Idem præstabis proximo, si in eo Christum agnoscas.

F E R I A III.

Christus apparet Petro.

1. *Abiit Petrus secum mirans, quod factum fuerat.* Luc. 24. Viderat Petrus sepulchrum vacuum. Discedit à Joanne; solus secum meditat, quæ vidit. Optima dispositio ad videndum Deum, Divinæque cognoscenda, recedere etiam corpore, multò magis affectu à creaturis. Solitudinem animæ amat Deus. *Ducam eam in solitudinem, & loquar ad cor ejus.* Osæ. 2.

2. *Surrexist Dominus verè, & apparuit Simoni.* Ib. Apparet Dominus non Joanni, qui constans ad Crucem permansit; sed Petro, qui & fugerat, & negaverat. Ita animat Deus peccatores pœnitentes, ut non dejiciantur. Ostendit, quantum æstimet lachrymas pœnitentis. Qui hic affectus Petri? quæ confusio ob scelus admissum? quis dolor? quæ lachrymæ? Excita in te eosdem ad pedes Jesu.

3. *Visus est Cepha.* 1. Cor. 15. Christus non exprobrat Petro scelus admissum, sed blandissime solatur. Disce, qua benignitate peccatorem contritum excipias: qua charitate obliviscaris injuriarum à proximo acceptarum. Quod facis proximo, expecta a Deo. *Si non dimiseritis hominibus, nec Pater vester dimittet vobis.* Matth. 6.

F E

F E R I A IV.

Magdalena ad monumentum.

1. *M*aria autem stabat ad monumentum foris plorans. Dum ergo fleret, inclinavit se, & prospexit in monumentum. Joan. 20. Considera amoris signa: stat ad monumentum, flet, sæpius inspicit videnti Jesum desiderio. Repeti de illa potest: *Dilexit multum*. Expende curam, qua tu Deum quæris. Stasne in propositis? dolésne amissum? considerasne ubi, quomodo reperias?

2. *Et vidit duos Angelos in albis sedentes*. Ibid. S. Cyril. Alex. lib. 12. in Joan. cap. 46. *Cum circa monumentum perseverat plorans, voce Angelorum ad cognoscendum Christum juvatur*. Ut Angelos seu spiritualia lumina assequaris, non obiter exigenda est meditationis hora: sed perseverandum, & attentione, & affectu; etiam sua deploranda est cæcitas.

3. *Dicunt ei illi: Mulier, quid ploras? Dicit eis: Quia tulerunt Dominum meum; & nescio, ubi posuerunt eum*. Ibid. Causa fletus est amissus Jesus: optima, & una lachrymis digna. Sed, si flet illa, quod tulerunt invitæ, & ignoranti, quid te agere decet, cui scienti, & volenti tuæ passiones, & mali affectus toties Jesum tulerunt?

F E R I A V.

Christus apparet Magdalene ignotus.

1. *C*onversa est retrorsum, & vidit Jesum stantem; & non sciebat, quia Jesus est. Joan. 20. Dum quæritur Jesus, adstat à tergo Magdalene. Vide, quam non procul est ab iis, qui eum quærunt in toto corde. Sed dissimulat quandoque præsentiam suam, ut non apprehendamus hic Jesum esse, sed

nos desertos cogitemus. At respiciamus post tergum, sive ad exitum nostrarum afflictionum, videbimus ibi Deum.

2. *Dicit ei Jesus: Mulier, quid ploras? quem quaeris?* Ibid. Drogo Host. de Sacram. Psal. *Occultat se, ut ardentius requiratur, & requisitus cum gaudio invenitur; inventus cum sollicitudine teneatur.* 2. Interrogat non ignorans, sed quia delectatur, nos quandoque affligi sui ipsius desiderio. Si videaris tibi a Deo desertus, ardentius Deum require; iste est inveniendi modus.

3. *Dicit ei (Maria) Domine, si tu sustulisti eum, dicito mihi, ubi posuisti eum, & ego eum zollam.* Ibid. Vide amoris vim, qui solum Christo intentus, quid loquatur, vix advertit. *Dominum* vocat hominem vili hortulani veste indutum: addit, *si sustulisti eum*; quem? non exprimit, quasi obviis quisque ejus affectus intelligat. Novit, quis fuerit Judæorum furor, & ait, *se eum ablaturam*, ubi ubi sit, sine omni periculorum metu. Ita amor animosam reddidit, ac resolutam. Quantum tu ab his resolutionibus distas? quia plurimum distas ab amore.

F E R I A V I.

Christus manifestat se Magdalenæ, & mittit eam ad Discipulos.

1. *D**icit ei Jesus: Maria. Conversa illa dicit ei: Rabboni.* Joan. 20. Unô Christi verbo *Maria*, alterô *Mariæ Rabboni*, magni affectus clauduntur; in Christo benignitatis, suavitatis, affabilitatis, familiaritatis: in Maria verò reverentiæ, humilitatis, adorationis, amoris, gaudii. Ille ex uno verbo noscitur: illa unô verbô se eum nôsse significat. Ita Deus paucis verbis multa homini; ita homo

homo paucis verbis multa Deo loquitur. Plura de Deo cogita, quam loquaris.

2. *Dicit ei Jēsus: Noli me tangere.* Ibid. Expende causam, cur eam tactu prohibeat, fuisse, ut nimium fervorem, quō illa se ad pedes Jēsu projecerat, non nihil temperaret. Amor enim pene reverentiam exuerat. Amari vult Deus; sed & reverenter coli. Ut Deo ergo familiaris esse debes per intimam cum eo communicationem; ita debes esse & reverens, tam externo corporis situ, quàm interna animi compositione.

3. *Vade ad fratres meos, & dic eis: ascendo ad Patrem meum, & Patrem vestrum.* Ad pedes Christi suos exerere affectus Maria desiderabat; Christus verò quantocyus suos consolari. Ideò accessu eam prohibet, & ad discipulos ablegat, quos, ad exprimendum amorem, fratres vocat. Vide, quàm Deo placeat, ut tu à spiritali consolatione abstineas, ut alium mœstum consoles. Curat eis significari ascensum suum *ad Patrem vestrum*: ut incipiant de Christi recessu cogitare, se ad illum tolerandum disponere, & confidere in Deum, quem sciant affectu Patrem esse.

S A B B A T H O.

Apparet aliis mulieribus.

1. *E*ccē Jēsus occurrit ihs, dicens: avete, Affecuta fuerat illas Magdalēna. significaverat se vidisse Dominum; dolebant se ad sepulchrum non expectasse, desiderabant & ipsæ videre Dominum. Ita dispositas primus salutat: avete. Ita benignus est Deus iis, qui eum desiderant, & obsequia deferunt. Non diu differet te consolari, si serium ejus desiderium concipias. Omnis perfectionis initium est desiderium.

L 4

2. *Ille*

2. *Illæ autem accefferunt, & tenuerunt pedes ejus, & adoraverunt eum.* Ibid. Expende gaudium, reverentiam, & dulcissimos affectus ad Christi pedes. Arcuerat paulò ante Magdalenam à pedibus suis; jam eam cum reliquis ad eorum osculum admittit. Non omne simul solatium præbet, differt quandoque: exhibet autem perseverantibus: sed horà, quà sibi placet. Tuum est insistere bono, de tempore consolationis curam Deo remitte. Non aberit a se desiderantibus.

3. *Tunc ait illis Jesus: Nolite timere: ite, nuntiate fratribus meis, ut eant in Galilæam, ibi me videbunt.* Ibid. Expende verborum suavitatem tum ad mulieres, tum de Apostolis sui nuper desertoribus. Sed suaviorem crede fuisse animum; neque enim aversionem ab iis, quamquam graviter offensus, concepit. Eum, qui te offendit, fratrem cogita, suavi alloquio, & affectu dignare. Galilæam illis designat, ubi videatur, locum scilicet quietum, & a tumultibus submotum. Ut gustes Deum, recede a strepitu mundi, vanitatum, passionum tuarum.

DOM. II. POST PASCHA.

Jungit se Christus duobus Discipulis euntibus in Emmaus.

1. *E*cce duo ex illis ibant in castellum nomine Emmaus. Luc. 24. Tristes de Christi morte, dubitantes de resurrectione, solatium quærunť à villa. Convertuntur ad sensualia, qui expectare debuerant Divina. Promissus tertius dies aderat, accefferat mulierum, Petri, ac Joannis testimonium: isti tamen adhuc dubitabant. Quam parum sustinemus Dominum, qui nos tot annis sustinet! quam

quàm facilè ad sensualia convertimur! Immodicam tristitiam cave; si aliqua te tangat, noli à creaturis remedium quærere. Expecta Dominum, & intendet tibi.

2. *Et ipsi loquebantur ad invicem de iis omnibus, quæ acciderant. Et factum est, dum fabularentur, & secum quærerent, & ipse Iesus appropinquans ibat cum illis.* Ibid. Errabant oves, adest Pastoris charitas, ne perdantur. Dissimulat habitum, ut prius eos ad Divinum solatium recipiendum disponat. Vult enim ad suas gratias nos præparari. Dum fabulantur de passione, se illis miscet. Tantum Domino placet, suam à nobis mortem commemorari. Assuesce non inania, sed Divina loqui, ut Jesum habeas itineris tui socium.

3. *Oculi autem illorum tenebantur, ne eum agnoscerent.* Ibid. Hoc exhibebatur foris, quod agebatur in mente. Nec enim eum fidei oculo agnoscebant, nec corporis. Quâ causâ tenebantur oculi? credibile est; nimia tristitia, quæ animum, plerumque confundit. Adest Deus iis, qui afflicto sunt corde; & tamen, dum tangimur, abesse credimus; tunc fide firmandus est animus: sapiens est Deus, scit; Omnipotens, potest; Bonus, vult adesse. Expecta ergo, viriliter age, & confortetur cor tuum.

F E R I A II.

Qui sint eorum sermones, exquirat Christus.

1. *A*t Iesus ad illos. *Qui sunt hi sermones, quos confertis ad invicem, & estis tristes? Et respondens unus dixit ei: Tu solus peregrinus es in Jerusalem, & non cognovisti, quæ facta sunt in illa: Luc. 24. Quærit, quod sciebat, ut ulcus suum detegerent, ac pharmacum susciperent, ait Theophil. En benigni-*

L 5
tatem

tatem Christi! 2. Quia gaudet rememorari suam passionem, præbet narrandi occasionem. Narra ergo tu Deo per gratiarum actionem, quanta pro te passus sit. Qui sunt tui sermones? de iis rebus, quæ sunt in corde. Expende, quæ sint, an Divina? an humana? Denique ulcera animi non cæla, ut medicinam capias.

2. *Quibus ille dixit: quæ? & dixerunt de Jesu Nazareno, &c. Ibid.* Quærit tanquam ignorans, aut quasi jam oblitus injuriarum suarum tam immanium. An tu sic minutarum oblivisceris? 2. Quærit, *Quæ?* tanquam tota illa passio res esset adeò minuta, ut ei memoria exciderit. Amor tam ingens tui parva illi repræsentat ea, quæ pro te fecit. Parvus ergo est meus in Jesum amor, qui me pro eo egisse multa existimo. Conabor præstare plura, sed ero tamen servus inutilis.

3. *Nos autem sperabamus, quia ipse esset redempturus Israël. Ibid.* Aperiant ulcus modicæ fidei. Non credebant enim illam ipsam Christi mortem esse redemptionis medium. Si consilia Dei in humanis eventibus assequi non potes, acquiesce illis. Optimum est, quidquid decernit ipse: per media à nobis judicata contraria fini, ad finem pervenit.

F E R I A III.

Christus reprehendit duos Discipulos incredulos.

1. **E**T ipse dixit ad eos: *O stulti, & tardi corde ad credendum!* Ibid. Acerba reprehensio, sed nulla indignatio. *Stultos* vocat, non pro convicio, sed pro officio charitatis. Si corripis, sic age; si corriperis, sic suscipe. Et tu tardus es corde ad credendum præfice, quæ passus est Christus.
Nam

Nam etsi credas mente, at non opere & imitatione.

2. *Nonne hæc oportuit pati Christum, & ita intrare in gloriam suam?* Ibid. Causa reprehensionis allegatur, quod hanc veritatem non satis credant. Tu eam crede. Oportuit ob necessitatem satisfactionis, ob utilitatem redemptionis, ob vim sui in nos amoris, ob exemplum imitationis. Christum pati oportuit; & tu te à mortificatione eximes? & quidem, ut in suam ille gloriam intraret, & tu sine cruce intrabis in alienam?

3. *Et incipiens à Moysè, & omnibus Prophetis, interpretabatur eis in omnibus scripturis, quæ de ipso erant.* Ibid. Vide modos, quibus se iis insinuavit. 1. Blande alloquendo. 2. Corripiendo. 3. Instruendo. His & tu utere, si cum iis agis, qui duro sunt corde. Ausculta tantum Doctorem interpretantem. Confer id, quod docet declarando, cum eo, quod fecit opere: &, quod ipse doces, opere confirma.

F E R I A I V.

Longius ire se fingens Christus, invitatur à Discipulis.

1. *ET appropinquaverunt castello, quò ibant, & ipse se fuxit longius ire.* Luc. 24. Decreverat apud illos manere: fingit se abire: non quia hoc volebat, ait Bern. ferm. 74. in Cant. sed quia volebat audire: *Mane nobiscum Domine.* Vult Deus tibi gratias conferre; sed vult desideriis rogari. Non queraris gratiarum inopiam, si aut nulla sint tua, aut lenta desideria. 2. Fingit Deus se à te recedere; sed non abit. *Cum ipso sum in tribulatione.* Psal. 90.

2. *Et coegerunt illum dicentes: Mane nobiscum Domine,*

mine, quoniam advesperascit. Ibid. Invitant ignotum, tu nec notum serio rogas: imò forte plures anfas præbes ad recedendum. Cogunt illi sanctis desideriiis, quæ vim quasi quandam in ipsum Deum habent. Rationem addunt, *quia advesperascit.* Imò diescebat apud illos, quia interpretatio scripturæ jam eos illuminabat. Sed apud te advesperascit, quia hunc ipsum diem cum nocte dividis. Coge ergo Dominum, vim tibi inferendo, ut is apud te maneat hodie, tanquam si ultimus esset vitæ dies.

3. *Et intravit cum illis.* Ibid. Quæ felicitas habere hospitem Dominum! Quam, putas tu, eum honorifice exceperint, & quidem adhuc ignotum, si non rerum copia, saltem affectuum! Credere licet, eum prima sede locatum, eidem sollicitè ministratum. Quis primum apud te locum tenet in æstimatione, in amore! tu ipse: an Deus? Inspice opera, cogitationes &c.

F E R I A V.

Agnoscutur Christus in fractione panis

1. *A*ccepit panem, & porrigebat illis. Et aperti sunt oculi eorum, & cognoverunt eum. Luc. 24. Credunt SS. August. serm. 140. de temp. Chryl. serm. 17. Imperf. Christum panem isthuc consecrâsse, & porrexisse, & ex eo agnitum esse. Hic est SS. Eucharistiæ effectus, mentes illuminare ad percipienda Divina. At cum hanc toties sumas, unde tam hebes ad Divina, tam vivax es ad sensualia? causa effectum poneret, nisi impedires. Tolle ergo impedimenta.

2. *Et ipse evanuit ex oculis eorum.* Ibid. Cur non expectabat ab illis ea, quæ cognitionem sequi solent, adorationem, gratiarum actionem, obsequia? &c.

&c. Monstrat se, & mox se eripit. Disce etiam Divina solatia in hac vita non esse diuturna; imò à Deo eripi, ut te patientia, humilitate, longanimitate exerceat. Sed nec expedit ea esse diuturna.

3. *Et dixerunt ad invicem: nōne cor nostrum ardens erat in nobis, dum loqueretur in via.* Ibid. *Christi sermones*, ait Orig. *accendebantur corda ad amorem Divinum.* Legis pios libros, meditaris documenta Christi, audis adhortationes; Deus tibi loquitur: accenderis, nisi resistas. Sed quando dicunt se exarsisse? non in fractione panis, dum eum agnoscerent; sed in via, dum adhuc lateret. Etiam desolationes (cum Deus à te absconditur) ad hoc tibi serviant, ut inflammeris desideriis, amore, affectibus adhærendo Deo, &c.

F E R I A VI.

Apparet Discipulis congregatis.

1. *Cum serò esset, & fores essent clausæ, ubi erant Discipuli congregati, venit Jesus.* Luc. 24. Ubi non est dispositio, tardat Deus. Nondum credebant: varia ad eos resurrectionis nuntia miserat, ut disponderet, per quæ & desiderium accenderet. Ideo sero venit, quia sero disposuerunt. Ut visiteris à Deo, pone congruam dispositionem. 2. *Cum fores essent clausæ.* Deus non intrat in cor; si portæ sensuum non sint obseratæ. Dissipatus est spiritus, ubi sensus non sunt custoditi, ubi creaturarum affectus ultro citroque meant. Inspice portas tui cordis.

2. *Veni Jesus, & stetit in medio;* Ibid. Ut æque omnibus esset conspicuus Dux, Magister, Pastor, Protector suorum. Ubi duo, vel tres congregantur in nomine ejus, adest ipse. Congrega ergo poten-

potentias animæ tuæ in oratione, claude portas sensuum, mox tibi aderit, Dux ad animosâ propoſita, Magiſter ad ſolidas veritates, Paſtor ad ſolatia, Protecſor contra tuos hoſtes. Quia verò medium amat, etiam tu cum in medio cordis reponere, ut nihil præ illo æſtumes, ames, timeas.

3. *Et dixit eis: Pax vobis, Ego ſum, nolite timere.* Joan. 20. Luc. 24. Omnia ſingularis ſolatii verba. *Pax vobis*, quam olim ſpondit, quam paſſione ſua comparavit. Pacis Deus eſt. Pax ergo tibi ſit cum Deo, per tuæ cum illius voluntate conformationem? cum proximo per charitatem, patientem, benignam, non inflatam, &c. tecum per affectuum pravorum mortificationem. *Ego ſum*: addit Chryſoſt., ſerm. 81. *Qui vos per gratiam vocavi, elegi per veniam, pietate ſuſtinui, portavi charitate, & modo vos ſola benignitate ſuſcipio.* Dic etiam animæ meæ: *Ego ſum: & ſi conſurgant adverſum me prælia, non timebit cor meum.* Pſal. 26.

S A B B A T H O.

Conturbatis, & conterritis cicatrices vulnorum exhibet.

1. *Conturbati vero, & conterriti exiſtimabant ſe ſpiritum videre.* Luc. 24. *Discipuli rudes adhuc, & imperfeci non credunt*, ait Beda, *tertia die potuiſſe reſurgere. Putant ergo ſe videre ſpiritum ſeu phantaſma; tamen ſi jam audierint: Ego ſum.* Quoties nos ſancta dictamina, & veritates practicas aut putamus, aut nobis mentimur eſſe illuſiones? quia timemus ſcilicet agendi difficultatem; & magis nobis illudimus. Nunquam tu ita timuiſti? an poſthac timebis?

2. *Et dixit eis: quid turbati eſtis, & cogitationes aſcen-*

ascendunt in corda vestra. Ibid. Christus in repentinis eos timere, ac turbari non probat. Ideo amice corripit. Repentina probant animum constantem, Deoque nixum. Ut nihil tibi repentinum eveniat, quo sternaris, assuesce prævidere omnia, ac te præmunire. Id si fecisses, quantas difficultates gloriose superasses, quibus turpiter succubivisti? id ut obtineas, expugnandus omnino est amor proprius.

3. *Videte manus meas, & pedes meos, quia ego ipse sum.* Ibid. Ad pellendum timorem, ad firmandam fidem hoc fecit. O benignitas Christi! venerare sanctum latus, manus, ac pedes transfossa. Inhære huic spectaculo, quamdiu potes. Si vero te terreat difficultas aliqua, aut munus grave suscipiendum, inspicere illa vulnera, nuper acerba, nunc illustria, & spera tua quoque vulnera, & adversitates tibi cessuras in gloriam.

DOM. III. POST PASCHA.

Christus manducat cum Discipulis.

1. *Adhuc illis non credentibus & mirantibus præ gaudio, dixit: Habetis hic aliquid, quod manducetur?* Luc. 24. Vide, quot modis se Jesus suis insinuet, ut ipse esse credatur. Mittit, per quos nuncietur; ipse se videndum, audiendum, tangendum præbet: hic etiam, licet in glorioso corpore, ad manducandum petit, ut incredulos reducat. Animarum salus, non uno remedio peragitur: tentanda sunt plura, etiam ut tuam emendes. Non elanguesce, si uno non proficias. Zelus tuæ, & alienæ salutis id efficiet, & plura suggeret.

2. *At illi obtulerunt ei partem piscis assi, & favum mellis.* Ibid. Tenuitati Discipulorum aliud non sup-

suppetebat. Optimum, quod habebant, porrexerunt. Fac Jesum à te petere, quod manducet: quid porriges? da optimum, quod habes te ipsum; sed assum, tum interna, tum externa mortificatione; aliter placere Deo non potes. Sed adde mel promptæ ad ejus obsequia voluntatis, puræque intentionis: quo condimento si careant opera dissipant Deo.

3. *Gavisi sunt Discipuli viso Domino.* Joan. 20. Viderant utique statim ingredientem, at primum post longiorem conversationem gaudent. Forte quòd non exprobet turpem fugam. Unde ex hac benignitate subit spes omnium olim promissorum bonorum. Quam hic Discipulis, tibi sæpius fugitivo exhibuit benignitatem. Gaudere potes, & à tam benigno Deo plura bona sperare.

F E R I A II.

Aperit illis sensum scripturarum.

1. *Hæc sunt verba, quæ locutus sum vobis: quoniam necesse est impleri omnia, quæ scripta sunt.* Luc. 24. Agit suæ passionis & mortis memoriam; ostendendo hæc non casu acta, sed ex Dei decreto. Quæ autem decrevit Deus, necesse est impleri omnia. Disce, si quid patiaris, ex Dei decreto venire. Non ergo te oppone, quia necesse est impleri. Utinam id semper egisses!

2. *Tunc aperuit illis sensum, ut intelligerent scripturas.* Ibid. Non tantum, ut ipsi intelligerent, sed ut eundem etiam nobis sensum, tanquam Magistri, traderent. Sed quid est, quod a tam bono Magistro sensum scripturarum, & doctrinæ Christi nondum capimus? Amor proprius, & affectus inordinati excæcant nos. Isti ergo tollendi sunt. Nónne te hætenus hi obfuscant?

3. *Et*

3. *Et dixit eis: quoniam sic scriptum est, & sic oportebat Christum pati. Ibid.* Expende illud *Sic*, ex amore erga homines, ex obedientia erga Patrem, ex necessitate satisfactionis *pati oportebat*; quia decretum fuit, quia elegi, & suscepi. Quid tu ad ista? Vis pro tuis peccatis satisfacere? oportet pati: amas salutem hominum? oportet pati: vis obedire Patri? oportet pati.

F E R I A III.

Dat illis Spiritum sanctum, & potestatem absolvendi.

1. **D***ixit ergo eis iterum: pax vobis. Sicut misit me Pater, & ego mitto vos. Joan. 20.* Creat Apostolos, & Legatos suos. Mittit eos eodem fine, quo à Patre missus est, ad salutem hominum. Vult eos illam operari eodem amore, quo ipse egit, usque ad effusionem sanguinis. Quantum est cooperari Filio Dei in salutem animarum! hæc vocatio tantum à te zelum exigit, quantum Christus habuit. Quam procul abes? Exigit, ut hoc zelo complura patiaris. Meretur id Deus, meretur unius animæ pretium.

2. *Hac cum dixisset, insufflavit, & dixit eis: accipite Spiritum sanctum. Ibid.* insufflavit: ut sciremus, quemadmodum unus Dei afflatus Adamo dedit vitam, vigoremque naturalem, ita per Spiritum sanctum dedit vitam, vigoremque supernaturalem. An tu hanc vitam habes? Certe dare toties ille voluit, quoties menti sancta inspiravit. Quis evades, si hos afflatus accipias?

3. *Quorum remisistis peccata, remittuntur eis. Ibid.* Agnosce Christi in nos amorem. Offenditur à nobis Deus, & dat hominibus potestatem reconciliandi.

Avanc. Medis.

M

Quam

Quam facilem nobis veniam reddit : poterat post passionem naufragantes deferere : suggerit secundam tabulam. Æstima hoc beneficium Ecclesiæ factum , & , si te peccatis obstrictum vides , magna spe veniæ hoc remedio utere.

F E R I A I V.

Thomæ Apostoli incredulitas.

1. *Thomas unus ex duodecim non erat cum eis , quando venit Jesus.* Joan. 20. Audierat Discipulos , qui ex Emmaus reduces narrabant se vidisse Christum , & , quia non credebat , recessit. Caruit igitur hoc solatio præsentiæ Christi. Duo autem commisit , judicium suum illorum asserentium judicio anteposuit , & à communitate recessit. Cave tu utrumque. Prima ad errorem via est judicium proprium. Adest Christus charitate conjunctis , subtrahit se iis , qui cum charitatis læsione sunt singulares. Expende , qui te in his habeas.

2. *Dixerunt ergo ei alii Discipuli : Vidimus Dominum.* Ibid. Sed Thomas prius duobus nunc omnibus , forte & Beatissimæ Virgini asserentibus non credit , sui tenax judicii. Sic de malo , quod semel cœpimus , in pejus ruimus. Cave ergo malorum principia , & eorum radices tolle. O si priusdem hoc fecisses ?

3. *Ille autem dixit eis : nisi videro in manibus ejus fixuram clavorum , & mittam digitum meum in locum clavorum , & manum meam in latus ejus , non credam.* Ibid. Ita protestatur , ut suum sustineat judicium. Et quanta hinc mala ? incredulitas pertinax , superbia suum omnium judicio præferentis , præsumptio modum suæ conversionis Deo præscribentis. Apostolus huc recidit : quantus quantus sis , time , & cum humilitate judicium submitte , cui debes. **FE-**

F E R I A V.

Christus apparet Discipulis præsente Thoma.

1. *Post dies octo iterum erant Discipuli ejus intus, & Thomas cum eis: venit Jesus januis clausis.* Joan. 20. Dies octo in sua incredulitate duravit Thomas; perstitisset diutius, si Christus non occurrisset. Ita labi, & in malo perseverare possumus, resurgere non possumus, nisi per Dei misericordiam. Quoties id es expertus? ama hanc bonitatem. 2. Unum quærebat. ad omnes venit: ut, qui coram omnibus peccaverat, coram omnibus resipisceret: qui omnes contristaverat, omnes exhilararet. Nam iis debes exemplum bonum, quibus malum exhibuisti.

2. *Venit Jesus januis clausis.* Ibid. Agendum erat de gravi culpa Thomæ, de eaque iste corripendus. Noluit Jesus ad hoc patere portas, sed totum clausis peragi. Bonus Pater in latebris domesticis increpat filium malum, ne ejus famam lædat. Sit tibi etiam cura famæ alienæ: & noli aperire januam oris tui, ut quandoque lædas.

3. *Sterit in medio, & dixit: Pax vobis.* Ibid. Quasi dicat, quando sum in medio, est pax, alias nulla. Thoma, non eras cum iis, in quorum medio fui: ideo tibi nulla pax. Disce, quod, nisi Jesus sit in medio, & solus omnium tuarum actionum centrum, non habebis pacem. Noli ergo te centrum tuarum actionum ponere.

F E R I A VI.

Verba Christi ad Thomam, & Thomæ ad Christum.

1. *Deinde dicit Thomæ.* Joan. 20. Cur ad unum
M 2 cen-

convertitur ? adsunt digniores , Petrus , Joannes , & , ut creditur , Beatissima Virgo ; unum Thomam alloquitur , ut ejus se causa venisse ostendat : non attendit ad plurimum dignitatem , sed ad unius necessitatem. Quam amans , quam benignus Deus ! tu avertisses te ab eo , à quo recenter offensus es : disce , non rogatus benigne alloqui , à quo offensam acceperis. Hæc nota filiorum Dei est.

2. *Infer digitum tuum huc , & vide manus meas , &c.* Ostendit se Deum , & præsentem fuisse , cum Thomas protestaretur , Id si animo cogitasset Thomas , cautius locutus fuisset. Hoc tu præsentia Divina remedium adhibe , ut caute agas , & loquaris , 2. Condescendit Thomæ in omnibus , quæ dixerat Thomas ; addit tamen admonitionem : *& noli esse incredulus*. Sic suaviter tractandus delinquens , ut tamen increpatione erudiatur.

3. *Respondit Thomas , & dixit ei : Dominus meus , & Deus meus.* Ibid. Magnos affectus paucis verbis conclusit. Nec dolor , nec amor plura eum loqui patiebantur : dolor ex delicto suo ; amor ex benignitate Christi , cum meritis ipse esset indignationem. *Dominum* vocat , quem timeat : *Deum* , quem amet. Agnoscis tu quidem Christum esse Dominum tuum , Deum tuum ; sed necdum ut Dominum , aut ut Deum habes. Si Dominus est ; cur non times offendere ? Si Deus est ; cur non amas super omnia.

S A B B A T H O.

Apparet Discipulis ad mare Tiberiadis.

1. *D*icite eis Simon Petrus : *Vado piscari. Dicunt ei : Venimus & nos tecum.* Joan. 21. Mirus charitatis consensus. Unus voluntatem indicat , omnes

con-

consentiunt. Noli tu esse charitatis dissipator, ubi actio est licita, & honesta. Mira exempli vis, præsertim à Superiore! subditi enim ad illius exemplum rapiuntur. Si subditus es, habes majorum exempla, quæ sequaris: si præes, habes, quos exemplo trahas.

2. *Et ascenderunt in navim, & illa nocte nihil preceperunt.* Ibid. Deo disponente factum est, ut nihil caperent ea nocte, ut discerent se sine Jesu nihil posse, quantumcunque laborent: & in nocte peccati, pravæ intentionis, aut præsumptionis inaniter laborari, & sine merito. Ut ergo fructum e laboribus feras, ambula in luce gratiæ, & uni te Deo cogitatione, affectu, fine, & oratione.

3. *Mane autem facto stetit Jesus in littore: non tamen cognoverunt Discipuli, quia Jesus est.* Dicit ergo eis Jesus: *pueri, nunquid pulmentarium habetis? dicunt ei: non.* Ibid. In mari versamur, & in nocte, dum sumus in hac vita. Qui piscantur honores, delectationes, vanitates, fatebuntur olim se nihil cepisse, sed non sine dolore. Sic ergo laborem impende, ut rogatus olim à Deo. *nunquid pulmentarium habes?* respondere possis: per gratiam tuam hoc, illudve cepi. Interrogat autem Christus, non ut discat, sed ut ipsi paulò post advertant, quàm sit inanis se absente, quàm fructuosus præsentia labor. Sine te nihil possum, Domine.

DOM. IV. POST PASCHA.

Christus detegit se Discipulis.

1. *D*icit eis: *mittite in dexteram navigii rete. Miserunt, & jam non valebant illud trahere præ multitudine piscium.* Joan. 21. Dominus jussit, licet nondum notus. Prompta fuit Discipulorum obe-

dientia: hinc tam copiosa captura. Quæ ex obedientia facis, Dominus benedicet. Dominus potentia sua collegit ad dextrum latus pisces, ut obedituris in promptu essent. Ut capias animas, a Deo præparandæ sunt. Non artis illud fuit, sed pietatis Domini. Nil fide tibi, sed Domino. Ad dexteram jaci rete jussit, ut discas sancta, non sinistra intentione operari. Sic laborans non fraudaberis fructu.

2. *Dixit ergo Discipulus ille, quem diligebat Jesus, Petro: Dominus. Ibid. Cur primus Joannes Dominum videt? S. Hier. lib. 1. contr. Jovin. Jesus stabat in littore, nec sciebant Apostoli, quem viderent; solus virgo virginem agnoscit. Virginitas ad Deum, Divinaque cognoscenda conducit plurimum. Beati mundo corde, quoniam ipsi Deum videbunt. 2. S. Chrys. ser. 78. Primus, qui diligitur, videt; quia semper vivacius, qui diligitur, insuetur. Redde ergo te dignum, ut ameris a Deo, per amorem; & diliget te, & manifestabit se tibi. 3. Joannes Dominum esse Petro significat. Quæ de Deo capis, sine invidia communica.*

3. *Simon Petrus, cum audisset, quia Dominus est, unica succinxit se, & misit se in mare. S. Hier. in cap. 24. Luc. Non contentus vidiſſe, impatiens desiderii, negligens captionis, immemor periculi, ubi Dominum vidit in littore, serum æstimat, si cum cæteris navigio perveniret. Ita fervor nec patitur moras, nec timet pericula. Confer tuam tepiditatem. Quam lente, aut quam parum operaris, etsi multa cognoscas! abrumpe moras, & impedimenta. Petrus non est merſus: nec tu frangaris.*

F E R I A II.

Christus in littore parat cibum, & invitat
Discipulos.

1. **U**T ergo descenderunt in terram, viderunt prunas
positas, & piscem superpositum, & panem. Joan.

21. Dum piscantur, Christus eis cibum parat. Etiam in glorioso corpore non dedignatur vile ministerium. Et dedignaberis tu in mortali carne officium humile? 2. Ignorabant Apostoli, unde pisces illi assi (nam plures erant) unde panes, ac formatum prandium. Indicare voluit Christus sibi omnia parere, ac illam ipsam tot piscium capturam suam esse beneficium. Agnosce, si quid boni habes, à Deo venire. Redde ergo illi, & ad ejus gloriam impende.

2. *Dicit ei Jesus: afferte de piscibus, quos prendistis nunc.* Ibid. Petrus illico traxit in terram 153. magnos pisces. Voluit Christus, ut ex multitudine, & magnitudine piscium, post irritum noctis laborem, uno tractu captorum cognoscerent id se ejus beneficio habere: unde ad impensius amandum moverentur. Adverte ergo quæ ab eo accipis beneficia, & illis ad amandum moveare, ejusque gloriæ impende.

3. *Dicit eis Jesus: venite, prandete.* Ibid. En quanta suavitas, & affabilitas Christi invitantis, & comprudentis. Ama hanc bonitatem. Hunc autem cibum paravit Dominus, ut benevole Discipulos à labore per cibum refocillet, ait Euthym. Piscare & tu sedulo animas in hoc mundi mari nantes. Confidè, quod Dominus in littore patriæ invitabit te, ut edas, & bibas super mensam suam in regno suo. Luc. 22.

F E R I A III.

Christus committit Petro suas oves.

1. **C**um ergo prandissent, dicit Simoni Petro Jesus: Simon Joannis, diligis me plus his: dicit ei: etiam Domine, & tu scis, quia amo te. Dicit ei: pascere agnos meos. Joan. 21. Destinatur Petrus supremus Pastor. Hunc multus labor manet; qui, nisi sit amor, non toleratur. Hinc Aug. tract. 124. in Joan. Interrogatur amor, imperatur labor. Major ergo apud Christum est, qui plus amat. Pro hac tu magnitudine contende, cæteras ride. Petrus respondet: Tu scis: jam doctus sibi non credere. Nec addit: Plus his: memor suæ præsumptionis confusæ. Noli te aliis præferre. Deficit enim fervor, & confunditur præsumptio.

2. Dicit iterum: Simon Joannis diligis me? Dicit illi, &c. Ibid. Repetit quæstionem ad exigendam amoris constantiam in Pastore animarum. Sine hac neque tu animas bene gubernabis. Felix Petrus! qui respondere potuit: amo te. Infelix ego! respondere deberem: amo me, amo mea commoda, amo creaturas: &, si te quandoque amo, quàm cito deficio, & tepeasco? at non ita posthac.

3. Dicit ei tertio: Simon Joannis amas me. Ibid. Quare tertio quærit? Optat. Milevit. cont. Parmen. Ne Apostoli severe contemnerent eum, qui negaverat Christum. Ita consulit Superiorum auctoritati. S. Ambr. in c. 82. Luc. Quia tertio negaverat, tertio confitetur. Quoties peccasti, negasti? an toties confessus es per veros vivæ fidei, & amoris actus? assuesce ad frequentes fidei actus, quia sunt origo omnis boni. Contristatus Petrus, quod tertio quæreret: quia vel rediit antiqui sceleris memoria,

ria,

ria, & dolor; vel subiit timor suiipsius, etsi nihil sibi conscius esset. Time & tu, quia in hoc probatus non es, quod non sis tibi conscius.

F E R I A I V.

Christus prædicit Petro martyrium.

1. **C**Um esses junior, cingebas te, & ambulabas, ubi volebas: cum autem senueris, extendes manus tuas, & alius te cingat, & ducet, quo tu non vis. Joan. 21. Post trinum amoris examen timuit Petrus, ne, sicut post protestationem moriendi Christum negaverat, ita post amoris potestatem labe- retur. Christus ergo eum certum reddit, quod pro suo amore sit manus extensurus in cruce. Dum non possum esse certus, quod pro amore Jesu me alius crucifiget, crucifigam carnem meam cum concupiscen- tiis. Sed & si ab aliis aliqua afflictio veniat, ex- tendam manus meas in amplexum.

2. Ex cum hoc dixisset, dicit ei: sequere me. Conver- sus Petrus vidit alium Discipulum. Ibid. Prædixit Petro Crucem: qui ferenda sit, docet: sequere me: exemplum meum sit tibi præ oculis. Ex hoc nos capite sub Cruce deficimus, quod non respiciamus in Jesum. Respiciam ergo in auctorem, & consum- matorem Jesum. 2. Petrus vocatur; sequitur & Jo- annes. Qui amat, non expectat mandata, sed sponte sequitur Jesum. Unde tu lente sequeris, nisi quia tepide amas?

3. Hunc ergo (Joannem) cum vidisset Petrus, di- xit Jesu: hic autem quid? dicit ei Jesus: sic eum volo manere, donec veniam: quid ad te? tu me sequere. Ibid. Redarguitur Petri curiositas: quam melius tua? investigas aliena, quæ domi, quæ foris accidunt: quid ad te? observas, quid, cum quibus, quam diu

agant alii : *quid ad te?* immisces te negotiis alienis : *quid ad te?* tuum est Jesum sequi. Ad hoc unum attende, reliqua Deo committe.

F E R I A V.

Christus apparet in monte Galilææ, plus
quam quingentis Discipulis.

1. *Undecim autem Discipuli abierunt in Galilaam in montem.* Matth. 28. Memorat Paulus 1. Cor. 15. Fuisse plures quingentis Discipulos. Excitatos fuisse credo relatione scæminarum, & aliorum dicentium, quod sponderit se in Galilæa videndum. Christus charitatem suam non restrinxit ad paucos, sed in omnes extendit. Communica affectum omnibus, non uni particulari, in quo multus est sensualitati locus. 2. Apostoli, qui Christum viderant, commonent alios, ut & ipsi tanti boni participes fiant. Quod tibi datum est, sine invidia communica. 3. Considera expectantium affectus, & desideria.

2. *Ubi constituerat illis Jesus.* Ibid. Observat condictum locum, & tempus suæ apparitionis Jesus, ut fideliter adimpleat, quod promissit. Quam fidelis Deus in promissis! quam tu parum ei fidelis! quanta proponis, quam pauca agis! quam infidelis est mundus, & quam accurate ei servis!

3. *Et videntes eum, adoraverunt. Quidam autem dubitaverunt.* Ibid. Ex iis nempe, qui eum antea non viderant, licet ex aliis omnia antea facta intellexerint. Hæc cordis nostri est durities ad Divinas inspirationes. O tolle à me, Domine, cor lapideum! Principio dubium fuit paucorum, in fine tamen communis omnium adoratio: cum qua reverentia, humilitate, amore, & gaudio? ascende

de & tu montem altioris virtutis, ut talem consolationem merearis.

F E R I A VI.

Destinat Discipulos ad conversionem mundi.

1. **E**T accedens Jesus locutus est eis : data est mihi omnis potestas in cœlo, & in terra. Matth. 28. Quam hæreditario jure habebat, vi unionis hypostaticæ ut naturalis Dei Filius, potestatem, eam sibi datam ait per Crucem, & merita passionis. Vim seriæ mortificationis agnosce, per quam datur tibi potestas in cœlo, seu in parte rationali, & in terra, seu in parte animali, in qua sunt praviæ affectiones. Agnosce hunc Dominum omnis potestatis, adora eum, subijce te ejus potestati : roga, ut eam exerceat per Superiores tuos, prout est ad gloriam suam.

2. *Euntes ergo docete omnes gentes.* Ibid. Expende illud : ergo. Quia data est mihi potestas ; ergo vos docete. Quomodo hoc sequitur ? ostendit se summæ potestati conjungere optimam voluntatem, & potestate hac uti ad benefaciendum. Ama hanc bonitatem, quam non semel expertus es. 2. *Docete omnes* : etiam in te respexit, neminem exclusit. Si doces, *doce omnes* ; non sperne pauperem. Assiste tam miseris, quam felicibus : imò illis potius, quia de illis habes : *quod fecistis uni ex his fratribus meis minimis, mihi fecistis.* Matth. 25.

3. *Baptizantes eos in nomine Patris, &c.* Ibid. Abrogatur rigida lex circumcisionis in remedium peccati originalis, & instituitur Baptismus suavior. Age gratias Deo, quod per legem Evangelicam jugum suave, & onus leve reddiderit. Accepisti & tu hoc Baptismi beneficium. quo carent tot
paga-

pagani. Quid debes Domino? factus es de familia Christi, Christianus. Sed nomen pulchrum est grande convitium, si facta desint. Vives ergo, ut statum tuum decet, ut decet filium tanti Patris.

S A B B A T H O.

Continuatio instructionis Apostolis datæ.

1. **D**Ocentes eos servare omnia, quæcunque mandavi vobis. Ibid. S. Hier. hic: *Fussit, ut primum docerent, deinde fidei tingerent sacramento, post, quæ essent observanda, præciperent.* Servare dixit, non scire: quia finis legis Evangelicæ est, ejus observatio. Omnia, non aliqua. *Qui enim offendit in uno, sit omnium reus.* Jacob. 2. *Observa ergo: ab hoc pendet salus tua. Et mandata ejus gravia non sunt.* Imposuit enim ille, qui te amat.

2. *Qui crediderit, & baptizatus fuerit, salvus erit: qui vero non crediderit, condemnabitur.* Marc. 6. Intellige, quid sit damnari, quid salvari? utrumque à tua voluntate pendere. Vis salvari? Ad hoc Fide, & Baptismo opus est: Fide autem non mortua, quæ est sine operibus; sed viva, & operibus probata. Age gratias pro Baptismo, & Fide; sed expende, quomodo eam operibus probes. Comparere, & ora pro iis, qui in tenebris sedent.

3. *Signa autem eos, qui crediderint, hæc sequentur.* Ibid. Miraculis probanda fides prædicitur, quibus post probata est. Tu hæc spiritualiter operare: Demoniam ejiciunt; S. Bern. serm. 1. de Ascens. *Cum eradicantur è corde peccata.* 2. *Linguis loquuntur novis: Idem, cum recedunt vetera de ore eorum.* 3. *Serpentes tollunt: Idem, cum venenatas suggestiones extinguunt.* Mortiferum sine noxa bibunt, cum tentationes sentiunt, non consentiunt. 4. Super ægros manus

manus imponunt, & bene habent: Id est, cum aegras affectiones bonis operibus operiunt.

DOM. V. POST PASCHA.

Spondet nobiscum esse usque ad consummationem sæculi.

1. *E*Cce ego vobiscum sum omnibus diebus, usque ad consummationem sæculi. Matth. 28. Mittebat Discipulos tanquam oves inter lupos. Quantæ ergo illos manebant adversitates? en solat um: *Ecce vobiscum sum.* Hoc tibi quoque sit solatio: *Ne timeas, quia ego tecum sum.* Hier 1. *Non, ut nihil patiaris,* ait Prosp. lib. 2. de Voc. gent. c. 1. *sed, quod multo magis est, ut nulla scævientium crudelitate supereris.*

2. *Ego vobiscum sum:* & qua Deus, & qua Homo-Deus. Deus per immensitatem. Etsi non videar à vobis, video vos, & observo, quæ agitis. En stimulum ad bene agendum. Fervor accedet, si oculum Domini semper præsentem cogites. Qua Homo-Deus, per præsentiam in Eucharistia. Expende, & ama tantum beneficium.

3. *Ego vobiscum sum.* 1. Per gratiam habitualement, quæ nos Deo conjungit. Quanta cura hujus vinculi est habenda. 2. Per gratias actuales, dando vires ad operandum supernaturaliter. Sed per me stat, ut sint efficaces. O si eas semper acceptassem! quanto alius essem! Per specialem providentiam regendo quemque ad finem suæ vocationis. Tot modis mecum es Domine: ero. & ego tecum semper corde.

FERIA

F E R I A II.

Apparet ultimo recumbentibus in cœnaculo.

1. *Novissime recumbentibus illis undecim apparuit, & exprobravit incredulitatem eorum.* Marc.

16. Specta humanitatem Christi, qui, etsi in corpore glorioso, & jam jam ascensurus, cum Discipulis tamen recumbere non dedignatur. In quocunque sis honore, par cæteris esto. Exprobratio illa amoris est, volentis suos magis purificare. Nemo se isthic excusat. Quando tu sic accipies correctionem, & amorem æstimabis?

2. *Vado ad eum, qui misit me.* Joan. 16. Etsi hic, quid ulterius locutus sit, non prodatur, credi tamen potest, manifestasse illis jam tempus esse, ut vadat ad Patrem, & quædam ex ultima cœna repetivisse. Considera, quo doloris sensu id acceperint, quod privandi essent Christi præsentia. Tu magis dolo, si abeat à te per gratiam, quia magis est perniciosum. Non quære sensibilem devotionem, sed in hoc te Deo remitte: veram autem, & solidam ne dimitte.

3. *Vado ad eum.* Ut Christus suos repentino nuncio sui abitus non prosterneret, sensim eos disposuit, raro illis, ad breve tempus in gloriosa carne comparendo. Ægrius separamur ab iis, quibus sæpius, & familiarius utimur. Hoc tu modo a creaturis, à tuis commodis te remove. Raro, & non nisi in transitu iis utere primum, postea facile carebis.

F E R I A III.

Christus abiturus suos Apostolos consolatur.

1. *Expedit vobis, ut ego vadam.* Joan. 16. Etiam hoc repetivisse crediderim mœltis. Non dicit:

cit : *Expediit mihi* : quamquam & ipsi expediret — quam plurimum , ut post passionem frueretur gloria , & sederet ad dexteram Patris : sed , *Expediit vobis*. Ut intelligant eum in humana carne tam passibili, quam gloriosa, non sibi, sed suis intentum fuisse, & etiamnum, quod agit, eorum bono se agere. Nónne decet, ut & tu non te constituas centrum tuarum operationum? nónne, ut quidquid agis, pro Deo agas, qui omnia pro te agit.

2. *Si enim non abiero, Paracletus non veniet ad vos.*

Ibid. Amabant Apostoli Christum adhuc carnaliter : & in hoc amabant se ipsos. Expediebat, ut hoc, quod in sensu est, totum converteretur in spiritum, & perficeretur eorum fides, spes, & charitas. Vult ergo Christus, ut amore ita puro, & spirituali diligatur, ne affectus erga illum mixtus amore proprio impediat Spiritum sanctum : & quomodo eum non impedient tot inordinati affectus? *Spiritualis gratiæ plenitudinem occupata mens non admittit.* S. Bern. ser. 6. de Asc.

3. *Si autem abiero, mittam eum ad vos.* Ibid. Spiritus sancti adventus pendeat à Christi in cœlum ascensu; quia ita decretum fuit à Deo; ut consolatio una adhuc carnalis tolleretur; mitteretur alia omnino spiritualis. Et credo hoc etiamnum esse statutum à Deo, ut non gustet quis cum suavitate cœlestia, & spiritualia, nisi terrena, & carnalia sibi eripiat. Vide, ubi hæreas? in quibus terræ, & carnis affectibus? inde tibi non sapiunt spiritualia. Sapient hæc, si illa tollas.

F E R I A IV.

Educit Discipulos ad montem Olivarum.

1. *S* *Edete in civitate, quoadusque induamini virtute*
ex

ex alto. Luc. 24. Expende verba, cape mysteria, vide, quæ à te exigatur ad Spiritum sanctum promissum præparatio. 1. Monet *sedere*, indicans quietem maxime animi a creaturis, à suis passionibus non inquietari. 2. *In civitate*, etiam inter negotiis intentos quietem habendam. 3. *Donec*: non insinuat tempus, ut accendat desiderium, & Divinæ dispositioni acquiescant. 4. *Induamini virtute*. Ut nos cognoscamus esse omnino nudos, sine Spiritu sancto, & posse nihil: ab hoc solo esse omnem nostram virtutem. Hac etiam hodie resiste adversariis tuis.

2. *Eduxit autem eos foras in Bethaniam*. Ibid. Vadit in Bethaniam, ut credere licet, valesfacturus Marthæ, & Magdalenæ, & eas ad suum triumphum deducturus. Adverte, quantum eas amaverit. At meruerunt amari: altera per hospitalitatem erga Jesum, altera per contemplationem. Quam non obliviscitur Deus officiorum, quæ ei præstas! quam tu oblivisceris gratiarum, quas accipis!

3. *In montem, qui dicitur Oliveti*. Act. 1. Cogita, qui fuerint Apostolorum Christum comitantium affectus, gaudii dolore mixti: quæ valedicentium lachrymæ? quæ, & quam suavia vulnorum oscula? quæ preces, &c. 2. Montem Oliveti subit, ad cælos inde ascensurus. Recogita, quod ibidem suam passionem sit auspicatus: & intellige adversitates esse principium gloriæ. Non ibis ergo ad gloriam per mundi delicias, & sensuum oblectamenta. Aut pati ergo, aut mori, dic cum S. Theresia.

F E R I A V.

De Ascensione Domini.

1. *E* Levatis manibus benedixit eis. Luc. 24. Quibus
ver-

verbis benedixerit, non constat. Cogitare licet, eam fuisse, quam in cœna dedit. Joan. 17. *Pater sancte, serva eos in nomine tuo, quos dedisti mihi, ut sint unum, sicut & nos.* Benedictio autem Christi efficax est, dans gratias, quas precatur. O Pater mi! benedic etiam mihi benedictione cœlesti, non terrena, quia nec satiatur, nec amplius sapit.

2. *Videntibus illis elevatus est.* Actor. 1. Non mere videntibus, sed, quod rem adeo insolitam, gloriosam, & amabilem spectantibus accidere solet, comitantibus affectu admirationis, gaudii, ac desiderii. Unde singulos dixisse credas: *trabe me post te.* Comitare tu iisdem. *Elevatus est*, non momento abreptus, ut diutius illi suis affectibus inhærerent. Momentanei non agunt radices. Quos tu in meditatione excitaveris, saltem in eum diem foveas, & proferas.

3. *Humiliavit semetipsum, &c. propter quod & Deus exaltavit illum.* Philip. 2. Ibi ascendere incipis in cœlum, ubi te deprimis. *Quod enim ascendit, quid est, nisi quia & descendit.* Ephes. 4. Humilitati hoc promisit Christus: *Qui se humiliat, exaltabitur.* Tanto altior erit ascensus, quanto profundior humilitas. Potesne tibi cœlum polliceri, si pergas eâ viâ, quâ hactenus? inspicere vias Domini, & sequere.

F E R I A V I.

Adstant duo Angeli, prædicunt secundum Christi adventum.

1. **E**T *nubes suscepit eum ab oculis eorum.* Actor. 1. Gratissimum oculis objectum, & unicam lætitiæ materiam nubes involvens eripit oculis. A Deo productam cogitare licet, non aliunde advocatam. Deus aliquando est, qui nubem ponit

Avane, Medis.

N

intel-

intellectui nostro, ut non penetremus Divina; ne contemplationi intenti prætereamus opera charitatis in proximos; aut ut in ipsa desolatione humiliter tolerata plus illi placeamus. At vide, ne aliæ sint in te nubes exhalantium passionum; ac pravorum affectuum, quæ tollunt aspectum Dei. Veni cœlestis Auster, & dissipa has nubes.

2. *Cum intuerentur in cœlum euntem illum, ecce duo viri adstiterunt, qui & dixerunt: Viri Galilæi, quid statis aspicientes in cœlum?* Ibid. Postquam absconditus ab oculis Discipulorum est Jesus, reprehenduntur. 1. *Quod stent.* In hac vita sumus in via, ergo non est standum, sed de virtute in virtutem procedendum. 2. *Quod aspiciant in cœlum.* Non solum aspiciendo, aut desiderando eo pertingitur: laborandum est pro eo regno, quia *vim patitur*. Sed forte tu hanc correptionem non mereris, qui intentione tua raro cœlum aspicias? *Posthac oculi mei semper ad Dominum: Psal. 24.*

3. *Hic Jesus, qui assumptus est à vobis in cœlum, sic veniet.* Ibid. Ingerunt secundi ad judicandum adventus memoriam: *Sic veniet*, quoad majestatem quidem, non tamen quoad finem; qui jam vadit in cœlum, ut advocatus sit noster: tunc veniet, ut judicet. Volunt ergo hujus adventus memoriam abeunte Jesu, apud nos remanere, qua timeamus offendere eum, quem habituri sumus Judicem. Sic ergo sequere ascendentem, ut non debeas timere judicantem.

S A B B A T H O.

De triumphali Christi in cœlum comitatu.

1. *Ascendens in altum captivam duxit captivitatem.*
A Psal. 67. Comitantur ascendentem sanctæ
 è lim-

è limbo animæ, amoris vinculis captivæ, & angustum reddunt triumphum. Meminerunt angustiarum suarum; vident, & gaudent se liberar. Adjunge te illi comitatu. Aspice, quàm dilecta tabernacula Domini virtutum, & sordebit tibi tellus. Aspira ad libertatem filiorum Dei, qui victus teneris tuarum cupiditatum catenis. Denique discce Apostolicum virum non debere solum, & sine comitatu cœlum ascendere, sed secum prædas animarum orco ereptarum deducere.

2. *Currus Dei decem millibus multiplex, millia læsantium.* Ibid. Occurrunt triumphanti Angeli. Gratulantur Christo, ut Victori debellatum infernum; ut Pastori, repertam ovem, quæ perierat; ut Parenti hominum, recuperatum filium prodigum, &c. Gratulare cum illis Christo. Recogita, quanti steterit hic triumphus. Agnosce & te ereptum inferis, te esse ovem illam, quæ abieras in errores concupiscentiarum; filium prodigum, qui dissipaveras omnem substantiam. Gaude, gratias age, propone.

3. *Ascendit Deus in jubilatione.* Psal. 47. Cogita, quæ fuerint jubantium voces. Dixerint animæ, quo nihil audit libentius Triumphator: *Redemisti nos Domine Deus in sanguine tuo, &c.* Cecinerint Angeli: *Dignus est agnus, qui occisus est accipere coronam, &c.* Tu cum his, & illis applaude Christo. Cum illis agnosce te sanguine Christi redemptum: agnosce tuam inde nobilitatem, ne degeneres. Ab his vero discce, coronam dari occiso, ut & tu veterem hominem occidas.

DOM. VI. POST PASCHA.

Triumphalis Christi in cœlum ingressus.

1. *P*ater, opus consummavi, quod dedisti mihi, ut
N 2 faci-

faciam: & nunc clarifica me tu Pater, &c. Joan. 17. Ubi Filius ante Patrem constitit, hæc, aut similia dixisse puta. Repræsentat expletam obedientiam, ostendit vulnera, offert animarum spolia: & ideo gloriam petit. Fac te ante eundem Patrem consistere: potesne cum veritate dicere: *Opus consummavi?* quam imperfecta est tua obedientia! quam pauca pro Christo sustines! quam frigidus es ad salutem proximi! age, ut? cum hora venerit, ita dicere possis æterno Patri.

2. *Dixit Dominus Domino meo: Sede à dextris meis.* Psal. 109. Crede humanitatem Filii ad dexteram Patris invitata: ab Angelis, & Beatis patriæ cultu adorata: *sedere* jussam ad majestatem, potentiam, & super omnes creaturas excellentiam indicandam. At, qui hic gloria & honore coronatur, est frater tuus; ille ipse est, qui *humiliavit semetipsum factus obediens usque ad mortem.* Sed propterea exaltavit illum Deus, ut discas humilitatem certam esse viam ad gloriam.

3. *Sedet à dextris Dei.* Marc. 16. Ad imperandum, & judicandum. At nihil imperabit, nisi quod ipse fecit. Ut suaviora nobis sua redderet imperia, ea exemplo condivit. Quam durus est servus, qui ad illa opera se applicare detrectat, quæ Dominus non dedignatur! sed quoties tu detrectasti? Judicabit autem abscondita cordium. Si non amas Patrem, fratrem, ac Dominum; time Judicem. Si hominem fallis, hunc fallere non potes.

F E R I A II.

Fructus Ascensionis Christi.

1. **A** *Trrollite portas Principes vestras, & elevamini portæ aternales.* Psal. 3. Primus fructus est, quod

quod portas cœli per peccatum nobis clausas, Christus sua Ascensione reſeraverit, ut intrare nobis liceat ad gloriam, modo velimus. Cogita, quæ fuerint Patrum lamenta, dum eæ eſſent clauſæ; quæ gaudia, dum apertas viderunt. Gaude & tu de hoc tibi beneficio facto. Sed quale monſtrum eſt peccatum, quod unum tibi iterum eas portas claudere poteſt? declina ab hoc, & abhorre, ne, dum pulſaveris, audias: *clauſa eſt janua.*

2. *Vado parare vobis locum.* Joan. 14. Alter fructus Ascensionis Chriſti eſt, ut nobis locum paret. Ita, qui paſſionem ſuam, & mortem voluit nobis ſervire, vult etiam gloriam ſuam nobis prodeſſe; ut, ubi eſt caput noſtrum, ibi & nos ſimus ejus membra. Quam bonus eſt Deus, qui totus eſt meus! visne & tu totus eſſe Dei? visne per infamiam, & bonam famam, per gloriam, & ignobilitatem? hoc certe meretur Deus, qui tantum de te eſt meritus.

3. *Advocatum habemus apud Patrem, Jeſum Chriſtum juſtum.* 1. Joan. 2. Tertius hic fructus eſt. Toties rei, toties recidivi, habemus advocatum, qui interpellat pro nobis, & vulnera ſua Patri oſtendit, ut eorum objectu mitiget iram, quàm promeremur. Redde te dignum, & committe te totum, ut pro te interpellat. Sed ſcito, quod *non pro mundo roget.* Joan. 17. Ideo non mundi, ſed Chriſti legibus vive.

F E R I A III.

De noſtra Aſcenſione.

1. *Aſcenſiones in corde ſuo diſpoſuit in valle lachrymarum.* Pſal. 83. Aſcenſio Chriſti noſtram invitât. Hæc non una eſt: 1. eſt in valle lachrymarum,

rum, sive in animæ purgatione. *Hic ascende super equos* indomitaram tuarum passionum. *Elevabunt nos, si fuerint infra nos.* S. Aug. ser. 176. Per ea ascendis, quæ calcas. Calca ergo & mundum, & te ipsum generoso contemptu.

2. *Ibunt de virtute in virtutem.* Ibid. Altera ascensio est per profectum in virtute. Nullus est terminus præscriptus: quia, quibus dicitur: *Estote perfecti, sicut Pater vester cælestis*, semper habent, quo progrediantur. Quotidie ergo hic adhibendus conatus est, omnis captanda occasio. Et quot tu prætermittis nunquam amplius redituras? excita novum fervorem.

3. *Donec videatur Deus Deorum in Sion.* Ibid. Tertia ascensio est per unionem: quando eo pervenies, ut Deus sit tibi omnia, extra Deum nihil velis, ames, timeas. O quando ascendam in hunc montem Domini? O quam adhuc amo terrena! quam me ipsum! quam facile humano respectu à bono avocor! O Deus meus, & omnia!

F E R I A IV.

De regressu Discipulorum in Hierusalem.

1. *ET ipsi adorantes regressi sunt in Hierusalem.* Luc.

24. Obsequuntur monentibus Angelis, relinquunt locum, in quo cum magno suo solatio diutius hæssissent. Si jubearis mutare locum, si aliud, etiam cum tuo incommodo, & privatione solatii spiritualis, attende pretium obedientiæ. 2. *Adorantes* osculis vestigia relicta. Adora vestigia virtutum Christi, cum desiderio iis insistendi.

2. *Cum gaudio magno.* Ibid. Quod viderint gloriam Domini: quod acceperint benedictionem ad labores, quos sperant a Domino prosperandos? quod,

quod, cum parandi sibi loci promissionem acceperint, sperent etiam se aliquando eo ascensuros: in his gaudent servi Dei: in vanis, & noxiis mundus.

3. *Intraverunt cenaculum, & manebant ibi. Act. 1.*

1. Mandato Christi obedientes, qui eos iussit redire in Hierusalem. 2. Ex cognitione suæ imbecillitatis; ne, si prodirent non induti virtute ex alto, deficerent. Cognosce & tu, quam parum possis sine eo, qui solus potest omnia: & ut possis aliquid, imbecillitatem tuam illius omnipotentiae junge.

F E R I A V.

De electione S. Matthiæ.

1. *Portet impleri scripturam: Episcopatum ejus accipiat alter. Act. 1.* Ut loco Judæ alius substituatur. Vide providentiam Dei, quæ nec in Ecclesia aptos ministros, nec in Religionibus servos suos deesse patitur; & cum unus deficit, de alio providet. Accepisti & tu in Religione alicujus defuncti locum. Sta in timore, & humilitate, cum vides Apostolum defecisse.

2. *Et statuerunt duos, Joseph & Matthiam, & orantes dixerunt: Tu Domine ostende, quem elegeris. Ibid.* En medium bonæ electionis oratio, & indifferentia ad Dei nutum. Sine his quam male elegisti multa! quanto melius elegisses, si hæc adhibuisses! sape tuo damno.

3. *Et dederunt sortes eis, & cecidit sors super Matthiam.* Præfertur Matthias Barsabæ, nec ille effertur, nec iste murmurat, tamen si forte præferendus videretur, quod & prior nominetur, & elogio Justii honoretur. A Deo dictatum uterque accipit. Si alteri præponaris, esto Matthias; si postponaris, esto Barsabas.

F E R I A VI.

De expectatione Spiritus sancti.

1. **S***edete in civitate.* Luc. 24. Ad hoc Christi mandatum subducunt se Apostoli à conversatione, & forensi tumultu, expectaturi, quem promiserat Deus, Spiritum sanctum. Itaque vivebant illo tempore abstracti à rebus sæculi, & hominum commercio. Spiritus sanctus lingua est Dei; sed *non auditur in compitis, non percipitur in foris.* Secedendum est ab extraneis ad interna, ut percipiat. Discede ergo à distractionibus, & te intra te collige. Anima dissipata non est cum Deo. Si id fecerunt, quibus Christus revelavit adventum Spiritus sancti, quanto magis te decet id præstare.

2. *Donec induamini virtute.* Ibid. In illa recollectione spirituali expectabant illud *Donec.* Cum enim venturum certo crederent Spiritum sanctum, horam autem ignorarent, ita agebant, ut semper parati reperirentur. In dilatione erat longanimitas, & patientia cum ardente desiderio, æquanimitas, & indifferentia, ut tum veniret, cum Deo placeret. Debes etiam ad consolationes spirituales habendas, aut non habendas, indifferens esse: & id unum spectare, ut Dei voluntas fiat, tui alias desiderii nulla ratio habeatur.

3. *Erant perseverantes in oratione.* Non ignorabant, quod *dabit Spiritum bonum petentibus eum*, ideo in illo secessu orationi vacabant. Crede petivisse eos illum variis titulis: ut *lumen cordium*, tum ad sua, tum ad aliena corda illuminanda, ut flammam ad accendenda sua, & aliena corda ad amorem Dei, & ad omnia, quæ sunt Apostolicæ vocationis. Oratione trahis Spiritum sanctum. Esto certus, si petieris ut debes, accipies.

S A B-

S A B B A T H O.

Peculiaris Apostolorum ad accipiendum Spiritum sanctum præparatio.

1. *Erant omnes perseverantes.* Act. 1. Hinc neque Thomas abest, jam semel expertus, quanto se bono privet, qui à communitate se separat. Magnus Sanctus evadit, qui, quæ sunt Religioni communia, observat. Ab his neque majoris spiritualis commodi causa est recedendum. Nam communes gratias perdis per singularitatem, & hoc defectu mereris, ut particulares non accipias. Esto ibi, ubi filii Dei sunt omnes.

2. *Erant perseverantes unanimiter.* Ibid. In summa concordia, & animorum consensu, qui apparuit in electione Matthiæ. Quod charitatis vinculum nec solvit numerosa congregatorum multitudo, nec nationum diversitas, nec discrepantia naturalis generis. Sed erat cor unum, & anima una. Spiritus sanctus est amor essentialis, & vinculum charitatis. Quomodo eum præstolari potes, si solvis vinculum? si cum plurium offensa adhæres uni? si diversos generis, aut natione fugis? &c.

3. *Cum mulieribus, & Maria Matre Jesu.* Ibid. Maria, ut docent Theologi, merita est accelerationem Incarnationis; cogitare licet, impetrasse etiam Spiritus sancti adventus accelerationem. Efficacissima est ejus oratio apud Filium. Credibile est Apostolos suas cum illius orationibus conjunxisse. Concipe magnam Beatissimæ Virginis æstimationem, ex æstimatione amorem, ex amore fiduciam; preces tuas illi committe, Deo offerendas, & reddendas dignas, ut in conspectu Dei appareant.

N s

DOM.

DOM. PENTECOSTES.

De adventu Spiritus sancti in vento.

1. **C**um complerentur dies Pentecostes, erant omnes pariter in eodem loco. Act. 2. Tempus non vacat mysterio. Dies erat idem, quo olim data fuit lex timoris; cui hodie sufficitur lex amoris, quam venit Spiritus sanctus scribere in cordibus fidelium, ut efficiatur per illam jugum Christi suave, & onus leve. Vere enim amanti nihil difficile. O si & hodie ad me veniat, & scribat *legem suam in medio cordis mei*: ut non ex necessitate servili, sed ex amore filiali Deo serviam!

2. *Factus est repente de cælo sonus, tanquam advenientis Spiritus vehementis.* Expende verba: *Factus est sonus*: qui omnes occupet, ut, si quis esset incurius, percelleretur, Quam altum ego dormio, qui necdum hoc sono excitor! *Repente*: quia visitatio Spiritus sancti non habet definitam horam, sed, ut expectanda est semper, ita semper est expectanda. *De cælo*: unde est *omne donum*, id est Filius Dei. & *datum perfectum*, id est Spiritus sanctus. *Tanquam spiritus*, id est, venti, cujus diversas proprietates, ut Spiritui sancto convenientes considerare potes: *Vehementis*: ad notandum impetum, quo corda nostra ad actus virtutum impellit. O quam vehemente mihi spiritu opus est, qui tantum torpeo! Veni sancte Spiritus, perfla hortum, aut cor meum.

3. *Replevit rosam domum, ubi erant sedentes.* Ibid. Abundantia donorum ostenditur, quibus Ecclesia à Deo repletur; à quibus nemo, qui in cœnaculo, seu in Ecclesia est excluditur. Ora ut domum animæ tuæ totam impleat. Aperi angulos, & latebras,

bras, ut penetrare possit. At non replebit, nisi & tu sedeas per quietem internam, & animi compositionem. Non enim implet animam vagam, & ad exteriora effusam.

F E R I A II.

De ejusdem adventu in igne, & linguis.

1. *Apparuerunt illis dispersita lingua.* Non datur Spiritus sanctus Apostolis, ut res otiosa; sed ut formarentur Prædicatores legis novæ; & ut loquerentur magnalia Dei: ideo in linguæ figura illis datus est. Ex lingua tua argue, an habeas Spiritum sanctum in corde tuo. Ex abundantia cordis os loquitur: sensus, quos promissis, præhabet in corde. Si reperis eos ibi te non habere, linguam emenda.

2. *Tanquam ignis.* Alias sub aliis figuris apparuit, nubis, columbæ, fluvii, &c. hic sub ignis specie, quo Apostoli & illuminarentur, & alios illuminarent; accenderentur ipsi, & alios accenderent, ac mentes peccatorum purificarent: quæ sunt potissimæ dotes Evangelici prædicatoris. O quam tibi opus est hoc igne, ut illuminentur tuæ tenebræ ad declinandos consuetos errores! ut accendaris amore tam in Deum, quam in proximum. Veni sancte Spiritus, accende lumen sensibus, infunde amorem cordibus.

3. *Seditque supra singulos eorum.* S. Greg. Nazian. orat. 44. de Pentec. *Sessio hac, ait regis in Spiritu sancto dignitatis excellentiam significat*, quæ cordium illorum dominatum accepit. *Sedit*; non discessurus, quia Apostoli in gratia confirmabantur. O si Spiritus iste regiam in corde tuo dignitatem obtineret! ô si te tam varium, & mutabilem confir-

ma-

mare! dominabitur, si velis; si carnis dominatum non admittas, si pareas ejus inspirationibus. Confirmabit, si velis firmiter, & constanter. Totum ergo hoc à tua pendet voluntate.

F E R I A III.

De fine, quo missus est Spiritus sanctus.

1. *E*Go rogabo Patrem, & alium Paracletum dabit vobis, spiritum veritatis, quem mundus non potest accipere. Joan. 14. Finis primus est: ut sit Paracletus, seu consolator. Consolatur autem quia Spiritus veritatis est, discernens falsà à veris. Quæ nos affligunt, plerumque falsà sunt imaginationis figmenta. Detege tibi veritatem: consolatio erit in promptu: quia videbis inanès umbras fuisse.

2. Cum autem venerit ille Spiritus veritatis, docebit vos omnem veritatem. Joan. 16. Secundus finis est, ut conferat Apostolis intelligentiam eorum, quæ Christus sive aperte, sive occulte docuit, toti Ecclesiæ tradendam. En quanta cura, & providentia Dei, ut errores ex suorum mentibus eximantur. Intellectus est, qui ducit, aut seducit voluntatem. Quantum interest, ut hic fallacias detegat, & altis veritatis principiis imbuatur, ne principiis carnis, aut mundi voluntatem seducat! Quæ sunt autem principia tua? quàm conformia veritati?

3. Cum venerit ille, arguet mundum de peccato, de justitia, & de judicio. Ibid. Tertius finis est, ut per Apostolos arguat mundum, ut corrigatur. Cur arguendi munus tribuitur Spiritui sancto, qui est Spiritus amoris? ut omnis increpatio fiat in Spiritu amoris, ac lenitatis. Nota autem tria, de quibus arguet: de peccato incredulitatis: de justitia, quod mundus se justum putet; de judicio, quod

Prin-

Principem hujus mundi Diabolum faciat. Vide, quæ tua sit fides? quam firmetur operibus? anne falsa æstimatione sis justus? an audias suggestiones Dæmonis?

F E R I A I V.

Quid Spiritus sanctus in Apostolis operatus sit.

1. *Vos autem baptizabimini Spiritu sancto.* Act. 1.

Collationem Spiritus sancti Baptismum vocat, significans per illum datos esse Apostolis principales effectus Baptismi, purgationem à peccatis, remissionem pœnæ, gratiam, perfectam charitatem, & unionem cum Deo, & omnes habitus virtutum supernaturalium. O felix Apostolorum fors! infelix tua! quantum tibi horum deest! Veni sancte Spiritus! imple superna gratia, quæ tu creasti pectora.

2. *Charitas Dei diffusa est in cordibus nostris per Spiritum sanctum.* Rom. 5. Charitas ista zelus est, quem Apostoli, qui antea ad vocem ancillæ exhorruerant, aut metu mortis fugerant, conceperunt ad totius mundi conversionem pro gloria Dei, sine metu periculorum, tormentorum, & mortis. Estne zelus iste gloriæ Dei in te? quæris salvandas animas? quæris tuam? sed quas pro illa difficultates superas? quas umbras non times?

3. *Ceperunt loqui variis linguis.* Act. 2. Ut prædicare omnibus gentibus possent Evangelium, collatum est illis per Spiritum sanctum donum omnium linguarum. Gratias itaque dedit congruas ad finem vocationis eorum. Ita Deus cum omnibus agit. Quos vocat, vocationi aptat. Nec tibi deerit, dummodo utaris mediis, quæ tibi suggerit.

In

In hoc plerumque defectus est noster. **Quantus** evades, si utaris.

F E R I A V.

Quid Apostoli per Spiritum sanctum egerint.

1. **C***on*eperunt loqui variis linguis, prout Spiritus sanctus dabat eloqui illis. Act. 2. Accepto Spiritu sancto profiliunt Apostoli; prædicant magnalia Crucifixi Jesu, antea idiotæ, nunc sapientia pleni; antea timidi, & pusillanimes, nunc tormentorum, & mortis contemptores. Quem movet Spiritus, nihil timet, cum moventi obsequitur. Noli tardare, cum motum senseris: noli metuere. Ille finem dabit optatum, qui jussit.

2. *Stupebant autem omnes, & mirabantur. Alii autem iridentes dicebant: quia musto pleni sunt.* Ibid. Res sancte digna fuit admiratione, illa sapientia, linguarum notitia, facundia in explicandis mysteriis, zelus & fortitudo. Sed à malis linguis nihil intactum. Irridentur, ut *musto pleni*. Cum optime feceris, etiam de te pessime loquentur alii. Sed, ut per hoc non desistebant Apostoli inceptum proficere, tu pariter non desiste. Propter sermones hominum non cœpisti, propter eosdem non desine.

3. *Stans autem Petrus levavit vocem suam, &c.* Ibid. Occasionem ex imputata ebrietate nactus Petrus, negat ebrios esse vino, affirmat plenos esse Spiritu sancto. Exprobrat Judæis, quod Christum crucifixerint. Quibus illi *auditis compuncti sunt corde*. Disce primo apprehendere omnem occasionem boni. O quot tibi elapsæ sunt! 2. Inebriari Spiritu sancto, qui inducit rerum terrenarum oblivionem. 3. Sermones tuos eò dirigere, ut compungantur corde, qui te audiunt. Ad hoc autem zelo, & solida, non ficta, & apparente virtute opus est.

F E-

F E R I A VI.

Fructus Spiritus sancti in primis Christianis.

1. *ERant perseverantes in doctrina Apostolorum, & communicatione fractionis panis, & orationibus.*

Actor. 2. Ter mille baptizati fuerunt. Hi statim

1. sequuntur doctrinam Apostolorum, sensui arduam, & contrariam. 2. Eucharistiam frequentant, qua dispositione, qua fame, quo fructu? orant: qua fide, qua humilitate, qua constantia? confer te cum illis. Vide, in quo deficias. His stude; quia sunt primum vitæ spiritualis nutrimentum.

2. *Erant pariter, & habebant omnia communia.* Ibid. *Non erat meum, ac tuum, frigidum illud verbum.* Qui Spiritum Dei concipit, facile ab amore terrenorum avellitur. Evacua te ad perfectam paupertatem. Quò minus habueris rerum, plus Spiritus habebis. Non intrat Spiritus cor, quod aliarum rerum amore plenum est.

3. *Multitudinis credentium erat cor unum, & anima una.* Actor. 4. In tanta diversitate nationum, conditionum, talentorum, summa concordia, nulla alterius de altero querela, de nullo sinistra existimatio, minus sermo sinister. O felix societas, in qua multi vivunt una anima, & consensu. *Quam bonum, & quam jucundum est habitare fratres in unum.* Psal. 132. Vis Spiritum Dei, & tuæ vocationis? cura unionem, hac læsa semper lædis pupillam oculi.

S A B B A T H O.

De iis, qui non accipiunt Spiritum sanctum.

1. *Non permanebit spiritus meus in homine in æternum, quia caro est.* Gen. 6. Qui addictus est sensualitati, & delectationibus, non speret in se

se Spiritum sanctum. Quia caro concupiscit adversus Spiritum, & Spiritus adversus carnem. Vide ergo & hinc necessitatem sensus tuos, & concupiscentias occidendi.

2. *Spiritus sanctus disciplina effugiet fictum.* Sapient.

1. *Fictum*, intellige simulatorem, qui vult videri bonus, non studet esse; qui suis sensuum delectamentis apud superiores prætexit bonum aliquem finem; qui malis suis intentionibus colorem sanctitatis appingit. Hunc effugiet Spiritus sanctus: quia est Spiritus veritatis, quæ alium colorem non admittit. Tolle ergo fictionem, & omnem humanum respectum, pestem animæ: age candide, simpliciter, & sincere.

3. *Spiritus veritatis, quem mundus non potest accipere.* Quia mundus falsis principiis nititur; divitias, honores, oblectamenta sensuum esse querenda; fugiendam paupertatem, contemptum, & crucem. Veritas autem prorsus habet contraria principia: non potest ergo mundus Spiritum veritatis accipere. Examina utrius tu principiis innitaris. Agnosce illorum falsitatem; istorum firmitatem, & te exemplo Christi ad ista converte.

DOMINICA SS. TRINITATIS.

De mysterio SS. Trinitatis.

1. **D**ominus Deus noster, Dominus unus est. Deus est una quædam simplicissima entitas, in omni genere perfectionis infinita; primum rerum omnium principium, & finis ultimus; unicum summum bonum: ideo unicus Deus: extra quem non est alius. Non capio te, sed credo te, adoro, laudo, glorifico, timeo, amo, & tibi soli servio; tu centrum omnium meorum affectuum. Ah sero te

te agnovi, *sero te amavi pulchritudo mea!* qui multiplicavi mihi Deos, quoties me, vel creaturam aliquam plus, quam te, colui, & amavi, aut illi impensius servivi. Ex hoc tu unus eris mihi in Deum, cui omnia ossa mea dicent gloriam.

2. *In nomine Patris, & Filii, & Spiritus sancti.* Ita Deus est in essentia unus, ut tamen sit trinus in personis. Pater sui intellectione generat Verbum; Pater, & Verbum mutua dilectione producant Spiritum sanctum. Neque hic capio cum perfecta unitate perfectissimam distinctionem: sed credo, odoro, laudo, &c. Applicabo animum ad vivam Dei cognitionem, ut quoad potest in hac umbra, aliqua ejus imago in mente mea generetur; quam summi æstimem, ex æstimatione amem, & ita etiam Spiritus sanctus aliqua ratione in me producat.

3. *Sanctus, Sanctus, Sanctus Dominus Deus.* Apoc.

4. In hac personarum Trinitate summa est perfectionum æqualitas, eadem bonitas, gloria, immensitas, æternitas, omnipotentia, justitia, &c. quas omnes affectiones una sanctitas comprehendit, & ideo præcipue memoratur. Cum omnis creatura sit quædam imitatio Dei, ut omnes Dei perfectiones nos imitemur, sanctitas sola imitanda proponitur: *sancti, eritis quia ego sanctus sum:* non potentia, altitudo, scientia, quam ambierunt Angelus, & primus homo, & male perierunt. Hoc ergo age, ut Dei sanctitatem imiteris. Sed quantum abes!

F E R I A II.

De persona Patris æterni.

1. *N*Unquid ego, qui alios parere facio, ipse non pariam? Isai. 66. Pater est fons, & origo divi-

AVANG. Medis.

O

divi-

divinarum processionum, & perfectionum, qui à nullo procedit, à quo procedunt reliquæ personæ; qui cognoscendo se ipsum producit Filium, cui totam essentiam, & omnes perfectiones absolutas communicat. Hoc non intelligis: captiva intellectum in obsequium fidei: humiliter adora, lauda, glorifica, ama cum omnibus Angelis. 2. Ita generat Filium, ut tamen & in Patre sit Filius, & in Filio Pater: imo sunt unum Pater, & Filius. O Pater! da nobis, ut simus unum, sicut tu, & Filius tuus.

2. *A quo omnis Paternitas in cælo, & in terra nominatur.* Ephes. 3. Unicum ad intra, & ex necessitate generat Filium sibi consubstantialem, sed multis ad extra dat, ut sint, & nominentur filii Dei adoptivi per gratiam. Vide, quanta majestas est, quæ adoptat! quanta vilitas hominis, qui adoptatur! habes, quo confundaris, quod alios titulos tanti feceris, hanc filiationem Dei tam parvi æstimaveris: quo gaudeas, quod possis esse filius, & hæres Dei: quod timeas, & omni studio posterum caveas amittere.

3. *In manu tua est fortitudo, & potentia.* 2. Paral. 20. Etsi & perfectiones absolutæ, & actiones ad extra sint communes Trinitati, Patri tamen, quia fons omnium, & origo est, attribuitur potentia, per quam est, quidquid extra Deum est. Et tu de nihilo ab illo es, quidquid es: illi ergo te redde, cujus es. Hoc tua natura, hoc omnis creatura clamabat toties: *Ipse fecit nos, & non ipsi nos:* & tu surdus quoties magis creaturas coluisti? non pudet? & quid ages?

F E R I A III.

De Persona Filii.

1. *Unigenitus Filius, qui est in sinu Patris.* Joan. 1.

Filius intellectione Patris productus, est substantialis imago Patris, cujus habet eandem individuum naturam, easdem omnes perfectiones absolutas. *Unigenitus*, cui totum communicatur, quidquid potest Pater communicare. *In sinu Patris*, cum Patre, & intelligit, & amat, & beatus est, & Spiritum sanctum producit. Crede, lauda, glorifica, ama, &c. Cujus es tu imago? nonne Dei? ad hanc quidem creatus es: sed quam defœdasti eam!

2. *Quos præscivit, & prædestinavit conformes fieri imagini Filii sui, ut sit ipse primogenitus in multis fratribus.* Rom. 8. Unicus filius, & hæres, multos fratres adoptivos, & cohæredes admittit; imo adsciscit per assumptionem humanitatis, & gratiam adoptionis suo sanguine fundat. Habes ergo fratrem Filium Dei, quæ gratia? quæ gloria? sed quam parvi eam æstimasti? inspicere hanc imaginem denuò, ut, quid tibi desit, advertas, & repares.

3. *Omnia in sapientia fecisti.* Psal. 103. Filius est sapientia Patris. Huic supernaturalia lumina, & cognitiones referuntur in acceptis; quia *illuminat omnem hominem venientem in hunc mundum.* Ab hoc veram sapientiam pete, quæ est cognitio, & æstimatio rerum, prout sunt: ut terrena terrena æstimes, divina divina, transitoria transitoria, æterna æterna; ut transeas solum per ea, quæ transeunt, hæreas in illis, quæ permanent.

F E R I A IV.

De persona Spiritus Sancti.

1. **M**ittam vobis à Patre Spiritum veritatis, qui à Patre procedit. Joan. 15. Pater videns in Filio suam essentiam, & perfectiones, necessario amat Filium. Filius videns easdem sibi à Patre communicatas, necessario amat Patrem. Reciprocus hic amor substantialis est Spiritus Sanctus. Crede, lauda, adora, glorifica, &c. O si & ego conjungerer Deo in eodem Spiritu!

2. *Accepistis Spiritum adoptionis filiorum.* Rom. 8. Quos adoptat Pater in filios, filius in fratres, hos indies perficit Spiritus sanctus communicando seipsum, dona supernaturalia, & gratiam habitua-lem, quæ est quædam participatio naturæ Divinæ. Sed quoties tu *vestiisti Spiritui sancto.* Act, 7. ne in te hanc filiationem perficeret? *Noli imposte-rum contristare Spiritum Sanctum Dei* Ephes. 4. Quod te extra Deum magis lætificat, hoc certo Spiritum sanctum magis contristat.

3. *O quam bonus, & suavis est Domine Spiritus tuus.* Bonitas, suavitas, misericordia, etsi æque sint communes Trinitati, specialiter Spiritui sancto tribuuntur. Huic debes, quod sis deductus in terram bonam, quod fecerit tecum Deus misericordiam suam, quod lachrymis laveris peccata tua, &c. Et quid reddis? vide, ne, si ingratus esse pergas, ipse quoque à te abstrahat misericordiam suam, & cesset postulare pro te gemitibus inenarrabilibus.

F E R I A V.

De amore Christi erga nos in Sanctissimo Sacramento.

1. **H**oc est Corpus meum : Hic est sanguis meus. Mat.

26. Idem in Eucharistia est corpus, quod in Incarnatione assumptum fuit: idem sanguis, qui in Cruce effusus. Quanti amoris opus est Incarnatio, & mors Christi, tanti est suiipsius exhibitio in Eucharistia. Tantum ergo debes Christo per hanc ad te venienti, quantum totus mundus incarnato & mortuo. O Domine, quis tu es, & quis ego sum? & tamen quam parum tibi obsequii reddo! quam multum mihi ipsi, & vanitati?

2. *Qui manducat meam carnem, & bibit meum sanguinem, in me manet, & ego in eo.* Joan. 6. Sub speciebus panis & vini se abdidit, ut nobis incorporaretur, ut nostrum alimentum transfiret in substantiam. Vides amorem erga te, quo Jesus vult tecum unum fieri? quam ergo debet purum esse & immaculatum cor tuum, quam ab omni re creata avulsum, & uni Deo adhærens? qui enim amat alia præter Deum, non amat, ut debet, Deum.

3. *Caro mea vere est cibus, & sanguis meus vere est potus.* Ibid. Ut vitam viveremus divinam, divinum exhibuit alimentum. Noluit in Sacramento hoc permanere substantias, ut ipse substantia sui corporis, & sanguinis nos satiaret. Non est hoc amoris vere divini argumentum? non deberet hic cibus omnem meum appetitum satiare: toties hoc pascor, & tamen ad cæpas Ægypti, ad delictamenta sensuum, ad creata suspiro? O pudor!

F E R I A VI.

SS. Eucharistia est memoriale passionis Christi.

1. **H**oc sacramentum instituit tanquam *Passionis sue memoriale perenne.* S. Thom. op. 3. Cruentum sacrificii ut perennis extaret memoria, incruentum instituit quotidie peragendum. Semel pro
 O 3 nobis

nobis immolatus, invenit modum, quo sapius imoletur. Ergone putandum est Christum toties pro me mori? agnosce amorem. Sed nihil reddis, nisi & tu quotidie immoleris. *Qui enim sunt Christi, carnem suam crucifixerunt cum vitiis, & concupiscentiis suis.* Galat. 4.

2. *Hoc facite in meam commemorationem.* Luc. 22. Quanti ipse suam passionem fecerit, hinc æstima, quia voluit ipse seipso ejus esse memoriale. Obligat hoc te ad continuam tanti beneficii memoriam; non quæ in sola cogitatione sistat, sed quæ in affectum, & opus transeat. *Qui enim Passionis Dominica mysteria celebramus, debemus imitari, quod agimus.* S. Gregor. 4. Dialog. 59.

3. *Quotiescunque manducabitis panem hunc, & calicem Domini biberis, mortem Domini annuntiabitis.* Quoties Eucharistiam sumis, cogita te mortui Christi sepulchrum esse. Non eris dignum, nisi sis novum, voluit enim poni in monumento novo. Non eris novus, nisi veterem hominem occidas. *Necesse est, ut, dum hæc agimus, nosmetipsos Deo in cordis contrizione maclemus.* S. Gregor. Ibid. Quid ad hoc ais? expedi arma, & te hostiam ei exhibe, qui se dedit hostiam pro te.

S A B B A T H O.

De dignitate sumentis Eucharistiam.

1. *AD eum veniemus, & mansiones apud eum faciemus.* Joan. 14. Qui sumit Eucharistiam, fit Dei habitaculum. Ut advertas, quanta sit hæc dignitas, cogita uterum Beatissimæ Virginis, in quo primum homo factus habitavit. Quantis illam gratiis cumulavit. At is ipse est, qui in Eucharistia ad te divertit. Quanta est hujus habitaculi

euli dignitas! Ah noli permittere, ut in eo diver-
tant fœda animalia effrœnium passionum.

2. *Qui manducat meam carnem, & bibit meum sanguinem, in me manet, & ego in eo.* Joan. 6. Non solum fit habitaculum Dei, qui Eucharistiam sumit, sed admirabili quadam unione fit unum cum eo. Assequere, si potes, quanta hæc dignitas, uniri humanitati Christi, & veluti ea mediante ipsi personæ Verbi, & toti Trinitati, quæ concomitanter in Eucharistia sumitur. Considera, ad quid te obliget hæc dignitas: ut, qui uniris Deo, avellaris à luto creatarum rerum: ut dicta, facta, cogitata tua sint talia, quæ non dedeçant membrum Christi.

3. *Ego vivo propter Patrem, & qui manducat me, & ipse videt propter me.* Excellentiam unionis cum Christo adverte. Sicut Filius accipit à Patre essentiam, vitam, & omnes perfectiones, ut sit unus Deus cum Patre, & in eo vivat, easdemque cum illo perfectiones habeat; idem intelligere, idem velle, & operari; ita per Eucharistiæ sumptionem fis particeps vitæ, & perfectionum Christi. Debes ergo idem cum illo sentire, velle, agere, pati. Efficiet id unitus tibi Christus, nisi tu obsistas.

DOM. II. POST PENTECOSTEN.

SS. Eucharistia est Cœna magna.

1. *H*omo quidam fecit cœnam magnam, & vocavit multos. Luc. 24. Eucharistia cœna est parata vespere, seu in fine sæculorum, sumenda in nocte obscura ad fidei lumen. Magna ab Editore Deo, à ferculis humanitatis, ac Divinitatis Christi; à convivis omnibus fidelibus; à ministris Angelis.

gelis. Omnia magna sunt; tu solus parvus es, & indignus: & tamen te quoque Homo-Deus ad illam invitat. Huc totam famem, sitimque applica; *ut ne desideres de cibis ejus (mundi & carnis) in quo est panis mendacii.* Prov. 23.

2. *Et ceperunt simul omnes excusare*, seu recusare. Domini bonitas est omnes admittentis; sua cujusque malitia est, seipsum excludentis. Tria excusationum genera inducuntur: *In emptra villa dominatio, & superbia notatur.* S. Aug. Ser. 33. de Verb. Dom. In emptis bobus avaritia, aut quinque sensus, qui nos ad terrena trahunt. In ducta uxore, carnis voluptates. Priores rogant se excusari: venire tamen contemnunt. *Humilitas sonat in voce, superbia in actione.* Greg. hom. 13. Tertius solus ait: *Non possum venire: quia animus ad voluptates propensus, infirmus est, & invalidus ad exequenda, quæ Dei sunt.* Cyril. Alex. lib. 2. de Adorat. Hæc tria plerumque sunt, quæ, si te non abstrahunt à cæna, fructum imminuunt Vide, ne recuses.

3. *Tunc iratus Paterfamilias, dixit servo suo: Exi cito in plateas, & vicos civitatis: & pauperes, ac debiles, & cæcos, & claudos introduc huc.* Ibid. Merito irascitur Dominus, cujus tanta humanitas, tantum beneficium respuitur. *Pauperes, & debiles dicuntur,* ait S. Greg. hom. 36. *qui judicio suo apud semetipsos infirmi sunt.* Quam ille ardet habere convivas! quam tu languide accedis! ille undequaque conquirat, nec avertatur *infirmi mundi.* Non avertaris infirmitate tua; quia, quem vocaverit, dignum facit, si sequatur. S. Ambros. lib. 1. de poenit. cap. 6. *& sanat omnes infirmitates tuas.*

F E R I A II.

De dispositione ad SS. Eucharistiam sumendam.

1. *I*N sole posuit tabernaculum suum. Psal. 18. Curanda summe puritas animæ, in quam venturus est Eucharisticus Deus. Exigit hoc summa puritas, & Majestas hospitis. Expende enim quis, ad quem ingreditur? Si Matrem, quæ conceptura erat Filium Dei, decebat tanta puritate nitere, quæ major infra Deum excogitari non potest, te idem decet, qui eundem excipis. At puritas non est sola ab omni peccato immunitas, sed etiam affectuum purgatio, & virtutum ornatus. Potēsne sic te mundum dicere? quanto labore adhuc opus est, ut huc pervenias? pervenies, si serio voles. Dic cum leproso Matth. 8. *Domine, si vis, potes me mundare.* Confide, extendet manum suam, & dicet: *Volo mundare.*

2. *Vincenzi dabo edere de ligno vitæ, quod est in Paradiso.* Apoc. 2. Id est, ut ait Richard. à S. Laur. de laud. B. V. lib. 12. quod est *in Ecclesia militante per præsentiam corporalem in Sacramento Altaris.* Ut hoc fruaris mysterio, necesse est, ut te vincas, & appetitum rationi, rationem Deo subjicias. Non satis ergo digne accedis, si te non vincis. Quantum tibi in teipso victoriarum campus! superbia, ambitio, tui æstimatio, vanæ gloriæ cupiditas, ira, impatientia, languor in spiritu, tepiditas, & alia, quæ tu nosti. Hæc devince, & dabitur tibi *de ligno vitæ.* Quam alius esses, si quoties ad hanc escam accessisti, vel unum ex his hostibus subjugasses!

3. *Ecce ego pluam vobis panem de cælo; egrediatur populus, & colligat.* Exod. 16. Promittitur hic

manna, figura Eucharistiæ, & quidem ad instar pluvix super justos, & injustos cadentis. Quæ bonitas Dei se tam prodige largientis! sed, ut eo potiarius, necesse est te egredi. Unde, aut quo? respondet Rupertus lib. 3. cap. 11. in Exod. *De pristina conversatione, de vetustate vitæ. Nondum enim deposito vetere homine, non est nobis hoc manna colligere.* Expende, quam vivat in te vetus homo, quanta in eo occidere debeas, ut induas novitatem vitæ.

F E R I A I I I.

Item de dispositione ad SS. Eucharistiam sumendam.

1. *Pauperes ejus saturabo panibus.* Psal. 131. Felix paupertas, quæ sola, ut ait Rupert. in cap. 6. Joan. *Edit magnam eleemosynam Regis Regum, quam dat ipse; non aliam, quam seipsum.* Datur ergo ille panis ut eleemosyna magni Dei. Exinanire, exinānire, ut pauper fias illa dignus. Ejice amorem sæculi, & vanitatem ejus. Indigne eleemosynam accipit, qui dives est; indigne Eucharistiam, qui sæculo afficitur. Scito, *qui esurientes, seu pauperes, implet bonis, ille divites dimittit inanes.* Et hæc est forte causa tam parvi fructus à te relati, ex tam frequente hujus mysterii sumptione.

2. *Si quis sitit, veniat ad me, & bibat.* Joan. 7. Sitis quædam & fames, ac vehemens desiderium afferendum est ad hunc cibum. Fons ille Sacramentalium gratiarum non patet, nisi sitienti: *sitienti dabo de fonte vitæ.* Apoc. 6. *Oportet namque, ait Bern. ser. 31. in Cant. ut sancti desiderii ardor præcedat faciem ejus ad omnem animam, ad quam est ipse venturus.* O tepida anima! nōne sacrilegium crederes nauseare cibum istum pretiosissimum? certe pro-

proximus nausæ es, si non desideras. Excita ergo, quoties accessura es, fervens desiderium; quod nascetur ex actuali fide dignitatis hujus cibi, amoris in te Dei, fructuum ex Eucharistia emanantium, &c.

3. *Cum invitatus fueris ad nuptias recumbe in novissimo loco.* Luc. 14. Ad nuptiale convivium Dei se tibi desponsantis accessurus es. Quis tu? quis ille? agnoscis in ejus majestate, tuam indignitatem? sed dignus fieri potes, si corde sincero sis humilis. *Respexit humilitatem ancillæ suæ.* Luc. 2. ut ejus sacratissimum uterum subiret: non despiciet pariter tuam humilitatem. Et quanta te deprimendi materia, si bene expendas, quis tu? quis ille?

F E R I A I V.

De effectibus SS. Eucharistiæ sumptæ.

1. *A*ccedite ad eum, & illuminamini. Psal. 33. Accedentium ad Christum fructus est, quod intellectu illuminentur ad cognoscenda altissima mysteria. Ipse lux est, *quæ illuminat omnem hominem.* Joan. 1. Expende tenebras tuas. Heu quantum ad Divina cœcutis! scisne, quod in fractione panis aperti sunt oculi Discipulorum? Luc. 24. Ecce idem cœcitatæ tuæ medicus est. Idem, quod ex cœco olim Hierichuntino, ex te quærit: *quid tibi: vis, faciam?* Luc. 18. O benignitas prævenientis! dic fidenter cum eodem: *Domine, ut videam te, videam me.*

2. *Qui replet in bonis desiderium tuum, renovabitur, ut aquila, juvenus tua.* Psal. 102. Senescit, cum viget: Senio hoc frequenter & tu occuparis: sed in novitate vitæ ambulandum est. Ut renovetur autem juvenus tua, aptissimum remedium est, ut

ut Deus repleat in bonis desiderium tuum. Si ergo per S. Hier. in cap. 3. Ezech. hoc solum habemus in presenti sæculo bonum, si vescamur carne Domini, ex hac digne sumpta juvenesces. Æstima, lauda, ama, anhela; & quoties accedis, aliquid veteris hominis depone.

3. Exurgens Maria abiit in montana cum festinatione. Luc. 1. Effectus hic fuit concepti Dei. Quo enim jam Deo plena, ait Ambr. lib. 2. in Luc. nisi ad superiora cum festinatione contenderet? eundem accipis in Eucharistia, quem Virgo concepit. Idem in te, nisi tu obsistas, operabitur: ut ardente voluntate ad ardua virtutum contendas, & quidem magna festinatione ad apicem perfectionis pervenias. Cooperare id desideranti Deo, ne te semper per tuum languorem in imo reperiatur. Elevabit te Deus, sed non sine te.

F E R I A V.

De aliis effectibus SS. Eucharistiæ sumptæ.

1. *P*Anem Angelorum manducavit homo. Psal. 17. Dicitur SS. Eucharistia panis Angelorum, non quod Angeli ea vescantur; sed quod homines sumentes veluti Angelos efficiat. Ita Hugo Card. in cap. 31. Prov. Datus est hominibus, ut fiant Angeli. Quæ tua est felicitas, si fias veluti corporis expers, totus spiritualis, tentationum immunis, expers passionum: certe si nondum factus es talis, tu impedivisti: & quæ hæc tua infania, cum possis, nolle ad Anglicam perfectionem evadere?

2. Quotquot autem receperunt eum, dedit eis potestatem filios Dei fieri. Joan. 1, Effectus sanctissimæ Eucharistiæ est, ut te faciat filium Dei, non quidem naturalem, sed adoptivum. Per quod simul intras
in

in jus hæreditatis. *Si enim filii Dei, sumus & hæredes.* Rom. 8. O mira dignatio ! expende, quem Patrem habeas : quem fratrem ? quo affectu, reverentia, fiducia in eum ferri debeas ? sed quam degener tu fuisti hæctenus filius, & frater ! non te pudet ! sed quid eris imposterum, ut digne Patrem voces Deum, Fratrem Jesum.

3. *Qui manducat meam carnem, & bibit meum sanguinem, in me manet, & ego in eo.* Joan. 6. Altius ascendit dignitas, quam per Eucharistiam obtines. Non tantum sis filius Dei : sed unum cum Deo, ut is in te maneat, tu in illo. Sed necesse est ad hoc, ut moriatur in te, quidquid tu es ; vivat solum, quod Deus est. O quando erit illud tempus, quo cum veritate dicere poteris : *Vivo ego, jam non ego ; vivit vero in me Christus !*

F E R I A VI.

De infinita Dei perfectione.

1. **E**X ipso, & per ipsum, & in ipso sunt omnia. Rom. 12. Quidquid concipere potes perfectionis, bonitatis, sanctitatis, pulchritudinis, sapientiæ, potentiæ, felicitatis, &c. Hoc in Deo est infinite perfectiore modo, quam tu concipias. Ex hoc, & per hunc sunt omnia, quæ aliquid perfectionis habere videntur. O Deus meus & omnia ! tu es esse necessarium à te ipso : omnis creatura nihilum necessarium ex seipsa. Quid ergo amorem ad nihilum converto, a te avertō ? tu es Deus meus, & solus dignus amore meo. Felix ego, si tantæ majestati digne possim servire.

2. *In ipso sunt omnia*, non tantum eminentiali modo essendi, sed etiam ut in idea, seu exemplari omnis perfectionis : præsertim vero intellectu-
lium

lium creaturarum, quas ad imaginem, & similitudinem suam creavit, & usque modo per conservationem ad eandem similitudinem efformat. Quam eximium tibi propositum est exemplar, quod miteris? lauda, gratias age, ama. Sed confer vultum animæ tuæ cum illo: proh quantum abludis! adnitere ergo Deum assidue intueri: exue, quod modo refers; refer eum, quem debes.

3. *In ipso sunt omnia.* Perfectiones illæ omnes innumeræ per creaturas dispersæ, in Deo sunt unica eademque res, quæ est sapientia, bonitas, misericordia, &c. sine omni compositione, sine omni distinctione: unde quæ unum sunt, & in eadem unitate multa, magis Deum referunt. Esne tu unus, unitate intentionis? unam forte habes, sed non eadem unitate multiplicem? sed diversas, & pugnantes; placendi Deo, & hominibus; serviendi sensibus, & Deo. Unam habe, qua Deum respicias, sed idem opus ex pluribus virtutum motivis age; erit unum opus, multiplex perfectio.

S A B B A T H O.

De sapientia Dei, & suiipsius contemplatione.

1. *Omnia nuda, & aperta sunt oculis ejus.* Hebr. 4. Scit enim, quidquid sciri potest; quidquid in Deo est, quidquid extra Deum conditum est, aut condi potest, & ipsa cordium secreta; sapientia inventrix omnium, quæ in mundo sunt, disponens omnia in numero, pondere, & mensura: in cujus comparatione omnis Angelorum scientia est mera ignorantia. Crede, æstima, lauda, ama, spera in omni casu adinventuram tibi remedium; consigna te illius sapientissimæ dispositioni. Imitare nihil agendo temere, sed adhibita consideratione. Attende, quid agas, quia Deus videt. 2. *Nota*

2. *Non est ulla creatura invisibilis in conspectu ejus.* Ibid. Non tantum quæ fuerunt, sunt, aut erunt; sed etiam quæ non erunt quidem, sed essent tamen, si conditio aliqua poneretur. Hac scientia composuit v. g. te, cum omni tempore, loco, & circumstantia possibili, & vidit, quid in quavis circumstantia acturus esses. Quid non debes ergo Deo, quod te non produxerit ex parente Idololatra, in tempore & loco infidelitatis, non conjunxerit iis circumstantiis, in quibus certo eras periturus, &c.? lauda, magnifica, ama, time, si forte aliquam circumstantiam viderit, qua esses cum derelicturus, quæ forte à teipso, à tua gratiam acceptandi negligentia dependeat.

3. Considera primum essenziale, & necessarium objectum Divinæ cognitionis esse Deum ipsum, quoad essentiam, attributa, perfectiones omnes tam absolutas, quam personales. Ex hac cognitione oritur suiipsius infinita æstimatio, amor, gaudium, & beatitudo. Hæc cognitio immutabilis est, & æterna; & cum tanta eodem temporis momento moliatur, a sui contemplatione nunquam avocatur. Lauda, adora, &c. Hoc quoque sit tuum primum objectum. Vide, ut ab ejus contemplatione non quavis musca avoceris. Per ejus contemplationem eo tende, ut magnam de eo æstimationem concipias.

DOM. III. POST PENTEC.

De potentia, & Dominio Dei.

1. *Mrabilis potentia ipsius.* Eccl. 43. Quia infinita est, & potest, quidquid de se est possibile, mundum hunc, & infinitos alios de nihilo condere, destruere, annihilare: à qua omnis vis est

est causarum secundarum, in cujus comparatione omnis alia potentia, est mera infirmitas. Admirare, adora, benedic, æstima, implora hanc in tuis necessitatibus. Junge te humili confidentia huic omnipotentia: etsi ex te nihil possis; omnia poteris ea te corroborante.

2. *Tu Domine universorum, quia nullius indiges.* 2. Mach. 14. Supremus, absolutus, necessarius, æternus omnium Dominus est, tam dominio jurisdictionis, quam proprietatis. Primo quidem titulo creationis ex nihilo; à quo proinde res omnes essentialiter dependent, secundum omnia, quæ sunt, & possunt. Agnosce te opus manuum ejus. Offer illi, quidquid es, quidquid potes. Sive te deprimat, sive elevet, sive affligat, sive soletur; Dominus est, faciat, quod ei placitum est.

3. *Dominus omnium es.* Esther. 3. Alter absoluti & supremi Domini titulus est (ut infinitos alios taceam) conservatio continua illius esse, quod per creationem dedit; qua nos continuo producit, & esse communicat, ac suspensas tenet creaturas, ne rursus in abyssum nihili sui ruant. Hinc omnes tuæ actiones Dei sunt; nec licet tibi potentiis tuis abuti. Injuriam ergo ei facis, si his ad tuam gloriam, ad tuum commodum magis utaris, quam ad illius. At quoties id fecisti? hinc ulterius omnes tuos affectus debes illius affectibus, ac voluntati conformare.

F E R I A II.

De Sanctitate, & Immutabilitate Dei.

1. *Sanctus Dominus Deus noster.* Psal. 98. Sanctitas ex S. Dionysio, est munditia ab omni immunditia libera, perfecta, & omnino immaculata. Cogita san-

sanctitatem ejus *ad intra* in infinita cognitione sui-
 ipsius, quæ est generatio Verbi: in amore infinito
 sui, qui est productio Spiritus sancti: in gaudio,
 quo in se, de se fruitur: quid hic non infinite di-
 stat ab omni macula? Exclama viva fide, gratula-
 tione, adoratione, tui confusione: *Sanctus, San-
 ctus, Sanctus*. Apoc. 4. Imitare Dei sanctitatem,
 ama puritatem, execrare immunditiam in cogita-
 tionibus, in affectibus tuis.

2. *Sanctus in omnibus operibus suis*. Psal. 144. Co-
 gita sanctitatem ejus *ad extra*, quæ relucet in ope-
 ribus ejus: quæ sive consideres in se ipsis, sive ex
 fine, quo à Deo fiunt, sancta omnino sunt, pura,
 & immaculata, ita ut nulla possit imperfectio in-
 tervenire, hoc ipso, quod à Deo fiant. Imò non
 potest non omne malum, quod sanctitati contra-
 riat, immutabili, & æterno odio prosequi. Lau-
 da, glorifica, ama, detestare omnes animi tui ma-
 culas, opera tua redde immaculata.

3. *Ego Dominus, & non mutor*. Malach. 3. Amat,
 odit, operatur libere, nec tamen mutatur: guber-
 nat universum, eodem momento se omnium re-
 rum motibus impendit, producit, ac destruit in-
 finita, & tamen est semper idem. Blasphematur,
 injuriis afficitur infinitis, & non turbatur. Admi-
 rare, lauda, pete hanc perfectionem, qui minimo
 moveris. Ut imiteris, tolle ex animo immodera-
 tos motus, extermina præcipientes gestus, altera-
 tionem vocis, asperitatem vultus, &c.

F E R I A III.

De amore Dei, quo se, & nos diligit.

1. *Deus Charitas est*. Joan. 4. Quia se compre-
 hensive cognoscit esse summum bonum sine
 P omni

Avant. Medit.

omni admixtione mali, se quoque infinitè amat per Spiritum sanctum, qui est amor substantialis. Hinc se æternum laudat, & quidquid operatur, ad unicam suam gloriam refert. Huc etiam me, meaque omnia dirigit. Quàm alte me evehit Deus? sed quantum ego ejus intentioni sum reluctatus, operationes meas ad meum honorem, meaque commoda detorquendo?

2. *Ipse enim Pater amat vos.* Joan. 16. Quia omnia, quæ fecit, cognoscit esse bona: hinc *nihil odit eorum, quæ fecit.* Quia ergo amat, & amor est quædam effusio sui in amatum, se quoque nobis communicat, conferendo esse naturale, facultates corporis, & animi, gratiam, & dona supernaturalia, esse suum personale naturæ humanæ, seipsum mihi in Eucharistia. Admirare, lauda, gratias age, ama, ob eos fines, ob quos te Deus amat: impende dona ad eos usus, ad quos dedit.

3. *Omnia, quæcunque voluit, fecit.* Psal. 144. Cum se tot modis communicat, non facit id ex necessitate, aut coacte, sed libere ex sola sua bonitate, ac amore. Deinde nihil inde sui emolumenti quærit, quia nullius est capax. Admirare, lauda hanc benefaciendi propensionem, gratias age. Confundere, quod, nisi coactus, vix reddas obsequia; quod tua in omnibus quæras commoda. Dic cum David Psal. 53. *Voluntarie sacrificabo tibi.* Et Psal. 113. *Non nobis Domine, non nobis, sed nomini tuo da gloriam.*

F E R I A I V.

De Suavitate, Misericordia, & Justitia Dei.

1. **S**uavis Dominus universis. Psal. 144. Leges nobis imponit, sed viribus commensurat; ad

ad observationem earum gratia sua juvat : & nobiscum cooperatur ; non necessitate , sed gratia inducit : non exigit à nobis omnia , quæ possumus , quod utique ut supremus Dominus posset : errantes amanter revocat , &c. lauda , adora , ama , confundere , quod in proximum sis asperior : quod plura ab illo exigas , quam Deus. Imitare verborum lenitate , suavitate morum religiosâ , non affectata.

2. *Et miserationes ejus super omnia opera ejus.* Ibid. Etsi in Deo perfectiones omnes sint æquales , quia sunt ipse Deus , quoad nos tamen , & in ordine ad effectus , supereminet misericordia , qua sublevat omnes misérias nostras corporis , animæque necessitates , vel præveniando , vel eruendo , vel coadjuvando , & consolando. Quantam in peccatores exhibet quotidie , qui *diffimulat peccata hominum.* Sap. 11. & expectat pœnitentiam ! quantam in te ? quid ei debes ? lauda , adora , fiduciam concipe exemplo filii prodigi.

3. *Ulciscens in omnes adinventiones eorum.* Psal. 98. Ut ut misericors sit Deus , est tamen etiam justus vindex. Infinite Sanctus peccato læditur : ideo punitione injuriam reparat. Nullum est seu in justis , sive in reprobis , seu grave , seu leve peccatum , ne otiosum quidem verbum , cujus pœnam non exigit. Quia non decet ejus majestatem impune lædi. Hinc morbi , mors , bella , pestis , &c. sunt pœna peccati. A Deo ergo accipiendæ ad expiationem scelerum , quia eo fine à Deo discernuntur. Admirare , lauda , time , justitiam , quæ nulli parcit. Imitare , sumendo de te ipso pœnas ; acceptando humili , & hilari animo , quas Deus de te sumit , &c.

F E R I A V.

De Providentia Dei.

1. **D***ominus regit me, & nihil mihi deerit. Psal. 22.* Providentia est ordinatio, & applicatio mediorum, quibus Deus quamlibet creaturam ad suos fines vult deducere. Ab hac nullam excludit creaturam, cui *aqualiter cura est de omnibus.* Sap. 6. Non muscam, non vermiculum, non improbos, non atheos, &c. à quibus gravissime offenditur. Quamvis creaturam ita curat, quasi ea unica extaret in universo. Recogita per quæ media te duxerit: quàm suaviter, quàm efficaciter. Ubi potes esse securior, quàm si te totum Divinæ Providentiæ committas, quoad corpus, animam, locum, &c. Quam spem potes concipere, si ejus dispositioni non obsistas?

2. *Vos cogitastis de me malum, sed Deus vertit illud in bonum.* Genes. 50. Providentia sua Deus immittit res adversas, famem, pestem, bellum, tentationes dæmonis, persecutiones, morbos corporis, afflictiones animæ: sed facit, ut *diligentibus Deum omnia cooperentur in bonum.* Josephi venditi recordare. Utitur enim illis ut mediis ad suos fines. Æstima ejus omnes dispositiones. Nec fallitur Sapientia, nec fallit Bonitas. Nihil tibi accidet, quod tuo non sit emolumento. Afflictionem ergo accipe à Deo, læto, hilarique animo. Et dic cum Filio Dei: *Calicem, quem dedit mihi Pater, bibam illum.* Joan. 18. & posthac: *In manibus tuis sortes meæ.* Psal. 30.

3. *In pace in idipsum dormiam: quoniam tu Domine singulariter in spe constituisti me.* Psal. 4. Qui omnem spem suam fundat in Dei providentia, ideoque se totum illi committit; vere dormit, & quiescit in sum-

summa animi tranquillitate, in cordis jucunditate, quæ nullo rerum eventu turbatur. Et quanta hæc voluptas? hæc propria est libertas filiorum Dei. *Omnem ergo sollicitudinem tuam projice in eum, quoniam ipsi cura est de te.* 1. Pet. 5.

F E R I A V I.

De Immensitate, & Præsentia Dei.

1. **C**œlum, & terram ego impleo. Jerem. 22. Ubi spatium quodcunque est, imò, ubi quodcunque fingi potest, ibi Deus est. Nusquam ergo tibi tutæ sunt latebræ à facie ejus. Quò fugis, Deus est: ubi lates, Deo pates: ubique pariter Deo frui potes. Si Deum quæris, invenies eum in omni loco, ad quem te destinat obedientia. Nullus illi tam vilis est locus, in quo non sit: & cur tu fugis?

2. *Cœlum, & terram ego impleo.* Cogita modos, quibus Deus est ubique. 1. Per essentiam secundum suam totam Divinitatem. Hic ergo, ubi ego sum, est Pater, generatur Filius, spiratur Spiritus Sanctus. Ergo nunquam sum solus: ergo semper habeo, cum quo amicè versari possum: ergo ubique Deum revereri debeo; ergo ubique timere. 2. Per præsentiam, non veluti mortuam, sed advertens, & cognoscens omnia. Adest oranti, tentato, afflicto, bonum operanti. Crede, ama, confide, illius solius oculis placere stude. 3. Per potentiam, ubique enim operatur, conservando, coagendo, &c. Non despondebo ergo animum in adversis, *quoniam tu mecum es*: tu adjuvas infirmitatem meam.

3. *Non est procul ab unoquoque nostrum.* Actor. 17. Cogita etiam tibi Deum esse præsentem, longe intimius, quàm sit ipsa tua anima. Intra te est Pater, Filius, Spiritus Sanctus, ac tota Divinitas,

per essentiam, præsentiam, & potentiam. Ejus Bonitas dat tibi esse, Sapientia intelligere, omnipotentia agere, &c. Gaude, admirare, confide, ama, Deum intra te ipsum quære, stude, ut sis dignum ejus Majestati habitaculum; ne ei displiceas, quem semper tecum habes.

S A B B A T H O.

Jesus baptizatur à Joanne.

1. *T*unc venit Jesus à Galilæa in Jordanem ad Joannem, ut baptizaretur ab eo. Matth. 13. Considera Christi humilitatem. Qui formam peccatoris assumpserat, induit etiam poenitentis. Non est, nec esse potest peccator, & haberi nihil pensi habet. Vitam activam ab humilitate auspicatur. Admirare, lauda, gratias age pro exemplo imitare, cura, quis sis, non, quis habearis. Quæ cum proximo agis, in humilitate funda. At Joannes prohibebat eum, dicens: Ego à te debeo baptizari; & tu venis ad me. Ibid. Agnoscit eo momento Christum, quem nondum viderat. Hinc reverentia, admiratio venientis ad se; humilitas se baptismo indigere profitentis. Tantum est semel nosse Deum. Si nitereris bene Deum nosse, quantos illa cognitio excitaret affectus?

2. Respondens autem Jesus dixit ei: sine modo; sic enim decet nos implere omnem justitiam. Ibid. Ut tu baptizes, ego baptizer: ego me demittam, tu obedias. Ergo omnis justitia, seu sanctitas continetur humilitate, & obedientia. Nondum bene hanc veritatem es affectus. Nunc igitur subjicere non tantum majori, aut æquali, sed etiam minori exemplo Christi.

3 Baptizatus autem Jesus, confestim ascendit de aqua:

aqua: & ecce aperti sunt cœli. Matth. 3. Tria post Christi baptismum evenere. 1. Cœli aperti sunt. En clavim, quæ tibi cœlum reſerat, humilitatem: quia humilibus datur gratia, gratia eſt ſemen gloriæ. Aspira ad cœlum; ſed ſcito, quòd vim patitur, quam tibi inferas te deprimendo. 2. *Vidit Spiritum Dei descendantem ſicut columbam.* Ibid. Ita humiliantem ſe Spiritus Dei honorat. Non nega ei guſtum, quem dare poteſ per tuam humilitatem. At venit ſuper humilem in ſpecie columbæ puræ, & innocentis: quia humilitas conſervat innocentiam. 3. *Audita eſt vox de cœlis dicens: hic eſt Filius meus dilectus, in quo mihi complacuit.* Ibid. Qui ſe inter peccatores abjicit, declaratur Filius Dei. Teſtatur Pater, ſibi Chriſtum placere in hac humilitate. O ſi tibi diceret Deus: Tu eſ Filius meus dilectus, quantùm exultares, amares, &c. At dicet, ſi te cum Chriſto humiliaveris: *quia humilia reſpicit, & alta à longe cognoscit.*

1

DOM. IV. POST PENTEC.

Chriſtus in deſertum ſecedit, & tentatur.

1. **T**unc Jeſus ductus eſt in deſertum à Spiritu; Mat. 3. utique ſancto; non vano, non mundano. Filius, & Filii Dei Spiritu Dei aguntur. *Ductus eſt in deſertum*, non in frequentem civitatem; ut fugiat plauſum, quem forte dediſſet populus motus reſeratione cœli, deſcenſu Spiritus, & voce audita. Quo tu ſpiritu duceris, aut potius raptaris? & quorſum? confundere, & ſine te à Spiritu Dei agi, ab hominum frequentia, ad fugam laudum & plauſum. *Ut tentaretur à diabolo.* S. Ambr. in Luc. *Ut diabolum provocaret.* Hic finis illius ſeſſus

cessus fuit. At cur tentari voluit Dei filius? ut discas tentationes etiam in filios Dei cadere, ne in tentationibus pusillanimis fias. 2. Ut habeas vincendi Magistrum. Assume animos; &, ut vincas, exemplo Christi pugna.

2. *Et tentabatur à sathana.* Audet diabolus, quia Deus permisit, qui prohibere poterat. Quanto plus audebit in te, qui prohibere non potes. Sta in timore. Ex occasione famis arripit statim occasionem eum gula tentandi. Ita vigilat in omnem occasionem nocendi. Disce vel ab ipso diabolo vigilare in id, quod tuæ est professionis: vigilare in omnem occasionem mali, ne tibi noceatur.

3. *Accedens tentator dixit ei: Si Filius Dei es, &c.* In tribus his Christi tentationibus adverte, quibus potissimum argumentis, seu fraudibus uti soleat. In prima, quia famet Christus, persuadere vult necessitatem cibi. In secunda, ad præcipientium sollicitat *sub specie boni*, quod Deus per Angelos assistet. In tertia regna mundi tantum ostendit, cum dare non possit, & *Imaginationi* tanquam quid magnum *objicit*. Reflecte te, an non sub specie necessitatis, aut boni, te tua passio seduxerit? an non æstimaveris magni, quæ apud Deum nihil sunt, &c. *Qui respondens dixit: scriptum est.* Considera, quid Christus egerit. 1. Statim resistit tentatori. Noli cum tentatione tricari. Facile vincitur, qui principio non resistit. 2. Rejicit uno verbo; *scriptum est*; non objiciendo id, quod Deus mandat. Dic & tibi in tentatione prohibet Deus: plectit Deus æternum. Tunc accedent ad te Angeli, seu veræ consolationes spirituales.

F E R I A II.

De tribus tentationibus, & victoriâ Christi.

1. *SI filius Dei es, dic, ut lapides isti panes fiant.*

Matth. 4. Incitat Christum ad inordinatum affectum cibi per miraculum quærendi. Christus huic tentationi obviat per generosum contemptum. *Non in solo pane vivit homo*: quasi dicat, se hoc medium contemnere, cum alia supersint plura. Ita obviandum est tentationibus sensus. Facilius contemnes, quàm positivè lusteris. Aliæ sunt voluptates homine dignæ; sensuum dedignare.

2. *Si filius Dei es, mitte te deorsum, &c.* Ibid. Est tentatio vanitatis specie boni, seu confidentiæ in Deum testâ: huic obviat: *non tentabis Dominum Deum tuum.* Larvam detegit, & ostendit esse tentationem, quod ut bonum objiciatur, ut confidat Deo, se præcipitando. Ita obviandum est tentationibus specie bonitatis. Non statim sanctum æstima, quod speciem boni habet: sed examina fines, intentionem, circumstantias. Quoties sic aberrasti?

3. *Hæc omnia tibi dabo, si cadens adoraveris me.* Ibid. Impudentissima hæc est ambitionis tentatio, per quam cultus Deo debitus, creaturæ tribuitur. Hanc cum indignatione repellit. *Vade sarbana.* Ita indignare tentationibus, quæ Dei honorem violant, quæ affectum ad creaturas rapiunt: dic magno animo: *Dominum Deum meum adorabo, & illi soli serviam.* Vide etiam, quanti æstimet dæmon peccatum mortale, ut omnia regna pro uno proponat. Tu tanti fac salutem tuam.

F E R I A III.

Testimonium Joannis de Christo.

1. **M**iserunt Judæi Sacerdotes, & Levitas, ut interrogarent eum, tu quis es? Joan. 1. Vitæ austeritas, sanctitas, & zelus, magnum nomen Joanni fecerant. Hinc orta quæstio, an ipse Christus sit. Magnum nomen quo plus quæris, minus obtines; sanctitatem vitæ sequitur sponte. Ad hanc obtinendam multum proderit sæpe quærere: tu quis es? & respondere sibi: *non sum ego Christus*: agnoscere suam vilitatem, abjecte de se sentire, & loqui. Humilitas enim est fundamentum sanctitatis.

2. *Quid ergo? Elias es tu? & dixit; non sum.* Ibid. Poterat Joannes & Eliæ, & Prophetæ nomen acceptare, qui à Christo dictus fuerat *spiritu Elias*, & *plus quàm Prophetæ*: quia tamen id etiam negare poterat, responsum illud elegit, quod ad sui contemptum magis facit. Hæc veræ humilitatis est regula. Quomodo tu eam observas? Quid Joannes de se? *Ego vox*. Quid tu de te? nihilum te fortè dicis, sed non sentis: & idipsum quod dicis, vis non credi; & sub pallio humilitatis tegis superbiam: confundere, & posthac *non veniat tibi pes superbiæ*. Unum enim tantum habet pedem superbiæ; hinc facili impulsu prosternitur.

3. *Quid ergo baptizas, si tu non es Christus, &c.* Ipse est, qui post me venturus est, qui ante me factus est, cujus ego non sum dignus, ut solvam ejus corrigiam calceamenti. Ibid. Effunditur in laudem Christi, & per sui honoris dispendium, honorem Christo asserit. Confer te cum Joanne. Quam tu parcus in aliorum laudes; quasi tibi decedat, quod alterius meritis tribuis? quam ambiciosus tuarum, quas etiam non mereris? quam facile, ut tuum cures, honorem Dei negligis?

FE-

F E R I A I V.

Alterum Joannis testimonium de Christo.

1. **A**ltera die vidit Joannes Jesum venientem ad se, & ait: Ecce Agnus Dei; ecce, qui tollit peccata mundi. Joan. 1. Cyril. lib. 1. in Joan. cap. 1. Propheta simul, & Apostolus, quem venturum prædixerat, jam demonstrat præsentem. Præcursor constitutus primam oblatam prædicandi Christum occasionem arripit. O si & tu nullam sineres elabi occasionem Christum tibi, & aliis manifestandi, laudandi, &c. & verbo & opere! spera id futurum, si veniat Jesus ad te per gratiam, sine qua nihil potes: si videas tu Jesum, & cum reflexione adertas ad occasionem. Hoc ora Jesum.

2. Ecce agnus Dei; ecce, qui tollit peccata mundi. Ibid. Expende ipsa verba testimonii. 1. Agnum vocat, ut reducat in memoriam illud: Ego quasi agnus, qui portatur ad victimam. Jer. 21. 2. Agnum Dei: quo ipsius divinitatem manifestat. 3. Qui tollit peccata mundi: finem, ob quem venerit, ostendit. Cogita hujus Agni mansuetudinem, patientiam, obedientiam. Vide, qui possis imitari, & te quoque illi victimam facere. Gratulare mundo, & tibi, quod tollat peccata. Spem tuam solum in eum pone. Ecce. Sæpius illum menti tuæ objice; sæpius illum, ubi occasio est, aliis demonstra.

3. Et ego vidi, & testimonium perbibui: quia hic est Filius Dei. Ibid. Joannes venit in testimonium: ut testimonium perhiberet, vidit, testatur: Hic est Filius Dei. Disce testimonium dare de proximo. 1. Vide, & observa ejus virtutes, non defectus. 2. Ubi occasio est, lauda eum, non te: sed dic: ego nesciebam hanc virtutem: ego sum longe illo infir-

infirmior : *hic est Filius Dei* , quia habet spiritum Dei , ergo vero spiritum mundi , & vanitatis , &c.

F E R I A V.

¶ Tertium Joannis testimonium cum fructu Discipulorum.

1. *Altera die iterum stabat Joannes , & ex Discipulis ejus duo. Et respiciens Jesum ambulantiem dicit : Ecce agnus Dei. Et audierunt eum duo Discipuli loquentem , & secuti sunt Jesum. Ex destinato Christus se exhibet , ut Joannes ansam habeat de Christo testandi , discipuli sequendi. Ita prævenit nos gratia : sed quoties non audimus ! Joannes ansam arripit , tu nullam boni negliges. Plures cum Joanne fuerunt , duo tantum ad sequendum Christum moventur. Dei est cor tangere. E quot millibus te Deus respexit ? agnosce beneficium vocationis : gratias age , time , nisi satisfacias.*

2. *Conversus Jesus , & videns eos sequentes se dicit : Quid quaritis ? Qui dixerunt ei : Rabbi ; ubi habitas ; Dicit eis : Venite , & videte. Ibid. Intellige 1. Christi respicientis gratiam. Sine hac ubi esses ? à te petit Jesus , quid quæris ? ut te invitet ad se quærendum. At tu mundum , te ipsum , tua commoda quæris ? 2. Discipuli compellendo Jesum , Magistrum , ostendunt desiderium , quod habent ab eo discendi. Quem tu Magistrum habes ? mundum , tuas pravas affectiones. Transi ad scholam Christi. Ita vive , ut in morte à Christo invitante audias , veni , & vide me in æternum.*

3. *Venerunt , & viderunt , ubi maneret , & apud eum manserunt die illo. Ibid. Vide , ut statim obsequuntur invitanti. Quid viderint nisi meram paupertatem , & incommoda ! non quære Jesum*
in

in affluentia commodorum. Cogita suavem illius noctis conversationem, & discipulorum attentionem, & gustum, Confundere, quod tam facile te divinorum tædeat, ut etiam horulæ spaciū cum Deo agendi tibi sit molestum. Etsi gustum quærere non debeas sensibilem; habebis solidum, si permaneas cum Jesu. Qui citò satiatur, tepide cum Deo versatur.

F E R I A VI.

Andreas Petrum ad Christum ducit, vocatur Philippus.

1. *Invenit hic (Andreas) primum fratrem suum Simonem, & dicit ei, invenimus Messiam.* Joan. 1. En fructus habitæ cum Christo conversationis: cognoscit Messiam; gaudet de invento; zelum concipit fratrem suum ad eam cognitionem deducendi. Si contraria in te experiris, cogita, quod non solidè cum Christo per spiritualia verferis, & emenda. Quanta erit tua felicitas, si tandem *invenias Messiam!* quia in eo habes omnia. Ut invenias ergo, danda sunt omnia.

2. *Et adduxit eum ad Jesum. Intuitus autem eum Jesus dixit: tu es Simon filius Jonæ: tu vocaberis Cephas.* Andreæ zelus Petrum adducentis ad Christum: Petri promptitudo ad accedendum, quantum te confundunt? Tergiversatio ad divina est semper noxia. Aspectus Jesu cor Petri movet. O Jesu! & me aspice tua gratia. Imponit nomen Petri, ut solidus sit, & constans. Et tibi nomen imposuit focii Jesu. Vide, ut nomini facta respondeant.

3. *Invenit Philippum, & dicit ei Jesus: sequere me. Quæsiturus discipulos in Galilæam abit, quæ inter*

ter Judææ terras erat maxime rudis, & ignobilis, *ut non crederetur sermo ejus esse in sapientia mundi, sed in doctrina Spiritus sancti*, ait S. Chrysost. Ubique ad magna humiles elegit. Attende vocationis verba: *sequere me*. Quis? quem? quæ dignitas Christum sequi? quo fervore id agendum? quo tempore id agis? &c.

S A B B A T H O.

Nathanaël à Philippo ad Christum ducitur.

1. **I**nvenit Philippus Nathanaël, & dicit ei: *Invenimus Jesum Filium Joseph à Nazareth. A Nazareth potest aliquid boni esse? dicit ei Philippus; Veni, & vide.* Joan. 1. Philippus agnitum Jesum vult & ab aliis agnoscī. Deum non satis amat, qui ut ametur ab aliis, non laborat. Dubitat Nathanaël; quia putat à vili Nazareth nihil esse boni. Jesus tamen elegit Nazareth in patriam. Ita amavit unde quaque vilitatem. Nihil tam humile, ubi Jesum non invenias. *Veni, & vide*, ad experimentum provocat. Qui Deum gustant, sciunt, quid sit.

2. *Vidit Jesus Nathanaël, & dicit: ecce verè Israëlita, in quo dolo non est. Dicit ei Nathanaël: Unde me nosti? dixit ei Jesus: cum esses sub ficu, vidi te.* Offendi poterat Christus Nathanaëlis dicto, quod nihil boni esset à Nazareth? excusat hoc à sinceritate, *sine dolo*. Qui Jesum sequuntur, aliena dicta in bonum sensum accipiunt. Inde quietem non perdunt. Laudat Jesus Nathanaëlem à candore animi: *Vere Israëlita*. Potestne de te dici: *Vere sine dolo*? Vere Religiosus, & non tantum apparens? Denique absentem vidit Jesus, qui ubique te videt.

3. Re-

3. Respondit ei Nathanaël: Rabbi, tu es Filius Dei, tu es Rex Israël. Ibid. Egregia confessio. Unde agnoscit Filium Dei? quia audit se visum sub ficu, quod videat eum scire, quæ putantur occulta. Crede hoc de Deo, & in oculis ejus ambula, quia omnia videt. Tria de Christo profitemur. 1. Quod sit Magister. Estne etiam tuus? audis, & seque-
ris doctrinam ejus? 2. Quod sit Filius Dei: ergo & Frater tuus. 3. Quod sit Rex Israël, seu filiorum Dei. Audisne ejus mandata?

DOM. V. POST PENTEC.

Nuptiæ in Cana Galilææ.

1. **N**uptiæ factæ sunt in Cana Galilææ, & erat Mater Jesu ibi. Vocatus est autem & Jesus. Joan. 2. Regulas mensæ hinc desume. 1. Contentus esto tenui mensa, qualis fuit hic pauperum sponforum. 2. Tolerata defectum cibi, aut potus: nam & hic vinum defecerat. 3. Sit tecum Jesus, & Maria, exemplar modestiæ, sobrietatis, &c. Deinde adverte, quid Mater egerit: *Et deficiente vino, dicit Mater Jesu ad eum: vinum non habent.* Ad necessitates sponsi advertit, & Filio insinuat. Quid non speres à magna Matre? revela illi necessitates animæ tuæ. Illa proponet Filio: *vinum non habes* fervoris, zeli, charitatis, consolationis, &c. Roga, ut tibi impetret. *Dicit ei Jesus: quid mihi, & tibi est mulier? nondum venit hora mea.* 1. Dat Matri occasionem humilitatis, mulierem nuncupando, qua sciebat eam delectari. 2. Docet se ad horam à Deo præscriptam magis attendere, quam ad preces parentis, nec ante his obsequendum. Noli Deo præscribere tempus auxilii; sed confide, aderit, cum venerit hora ejus. Multum lenit

lenit sua mala , qui cum spe , & longanimitate sustinet.

2. *Quodcunque dixerit vobis , facite.* Ibid. Beatissima Virgo à Filio non matris , sed *mulieris* nomine compellata , petitionis , ut videri poterat , repulsam passa tacet , in confusionem tui amaroris , quem concipis è quovis durioris verbo. Constanti fiducia decet te repulsam passum non desperare. *Tuum erit facere , quodcunque dixerit.* Sola illa spes non confunditur , quæ operibus fulcitur.

3. *Dicit eis Jesus : implete hydrias aqua.* Ibid. Voluit dare indigentibus vinum : noluit prius , quàm data ab ipsis aqua. Vult tibi benefacere , sed vult , ut conferas de tuo. Usque ad *summum* , ex parte tua agendum est , quidquid potes. Unde tam parum habes ? nisi quia tam parum contulisti. Parum est in te vini consolationis , quia non implevisti cor aqua compunctionis. Dilaudatum fuit hoc vinum. *Omnis homo primum bonum vinum ponit : Tu autem servasti bonum vinum usque adhuc.* Mores Christi contrarii sunt moribus mundi , & carnis. Hi post momentaneas delectationes offerunt vinum acerbum anxietatis : Christus præmittit acerbitates , & postea dat veras animi consolationes. Elige , utrum velis : sed cogita , quod postremum est , æternum fore.

F E R I A II.

De ejectis è Templo negotiatoribus.

1. **I**nvenit in Templo vendentes boves , & oves , & columbas , & nummularios sedentes. Joan. 2. Sub prætextu habendi in promptu res sacrificiis necessarias , avaritia Sacerdotum induxit in templum mercaturam. Cura divini cultus videtur , & est

& est lucri. Atque ita locus Deo destinatus fit stabulum. *Templum Dei es tu.* 1. Cor. 13. Quomodo se habet? nunquam prætextu boni tegis amorem proprium? cave! hinc incipit anima tua fieri stabulum suarum passionum; ubi amor proprio nimium concedis. Si quæ illic reperis animalia, examina, an non hæc viâ intraverint, & fortè jam sedeant.

2. *Et, cum fecisset quasi flagellum de funiculis, omnes ejecit de templo.* Ibid. Ostendit dominium, exercet potentiam: unus, & contemptibilis reputatus omnes percellit. Nemo se opponit, quia sub flagello agnoscunt Dominum. Agnosce & tu Dominum, cum te flagellat in anima, in corpore, in fama. Prædica ejus potentiam sancto silentio, & humili subjectione. Gaude, quia hîc flagellô ejicit ex templo animæ tuæ terrena desideria, &c. Cogita etiam zelum, quem ostendit, gloriæ Dei. Quem tu habes honoris tui zelum, converte in zelum gloriæ Dei.

3. *Et his, qui columbas vendebant, dixit: auferte ista hinc, & nolite facere domum Patris mei domum negotiationis.* Ibid. Habuerunt hæc verba suam in Judæos vim, omnes enim sublatis rebus suis diffugerunt. Quoties dictum tibi: tolle hanc passionem, hanc vanitatem, illum affectum: & adhuc sedes in eo. Vide indignitatem. Si non times hic, quasi flagellum, time ibi verum flagellum.

F E R I A III.

Colloquium Christi cum Nicodemo.

1. *ERat homo ex Phariseis Nicodemus nomine; hic venit ad Jesum nocte.* Joan. 3. Motus ea auctoritate, & zelo Christi, quem in mercatores ex-

Avanc. Medit.

Q

ercuit,

ercuit, credidit Jesum plus esse, quàm hominem, *Nemo enim*, inquit, *potest hæc signa facere, nisi Deus fuerit cum illo.* Vide, quàm zelus habeat admirandam vim animos attrahendi, etiam fastuosos. *Venit nocte*, ob timorem, & respectum Judæorum, quod quidem tolerari potest in eo, qui Christum nondum noverat. Sed quomodo tolerabuntur humani respectus in te, qui te ejus sectatorem profiteris? qui homines præ Deo respicit, despicitur à Deo.

2. *Et dixit ei: scimus, quia à Deo venisti Magister.* Ibid. Credisne & tu Christum venisse Magistrum? si credis, unde tam parùm proficis? quia docentem non quiete audis: garris enim cum vanitatibus & terrenis desideriis. Auditis non credis serio, viva, & actuali fide. Credita non exercises, semper languidus, ubi operandum est. Si vis proficere: hæc emenda.

3. *Respondet ei Jesus: nisi quis renatus fuerit, &c.* Ibid. Attende capita, quæ Christus docet. 1. Baptismum in aqua, & Spiritu Sancto, ob ejus necessitatem. 2. Incarnationem: sic Deus dilexit mundum, &c. & Passionem: sic Moyses exaltavit serpentem, &c. quia ista sunt præcipua motiva amandi Deum; amorem imitandi. His etiam te accende. Adverte ad docilitatem Nicodemi, qui exinde se professus est palam discipulum Jesu, constans perseveravit; & Apostolis fugâ dilapsis corpus Domini de cruce deposuit. Si amares, palam te profitereris posthabito omni humano respectu: non attenderes doctrinæ mundi, &c.

F E R I A I V.

Doctrina Trinitatis Nicodemo à Christo tradita.

1. *S*ic Deus dilexit mundum, ut filium suum unigenitum daret. Joan. 3. Docet Personam Patris, & ejus in te amorem, quò major esse non poterat, etsi Pater seipsum pro nobis dedisset. Adora Patrem, agnosce amorem, gratias age. Redde amorem; da illi quidquid sensui charum est, imò quidquid animæ elevatæ. Illi potentias tuas omnes vicissim impende. Meretur, quia Pater est, etiam tuus, licet sis filius degener.

2. *Lux venit in mundum, & dilexerunt homines magis tenebras, quàm lucem.* Ibid. Docet Personam Filii sub nomine lucis: quæ scilicet illuminat omnem hominem doctrina cœlesti, & exemplis. Vis esse filius lucis; sed tenebræ tuæ hanc lucem non comprehenderunt cogitatione, viva fide, & imitatione. Fortè magis tenebras mundi, quàm exempla, & doctrinam Christi.

3. *Spiritus, ubi vult, spirat, & vocem ejus audis; sed nescis, unde veniat, aut quò vadat.* Ibid. Docet Personam Spiritûs Sancti. Crede, confitere, & adora eum: audi vocem ejus, quia loquitur tibi per scripturas, per creaturas, per inspirationes. Ingrati est, nescire, unde veniat, seu non attendere principiis inspirationum, & gratiæ; aut quò vadat, seu non ad finem respicere, ad quem dirigit, ut coopereris. Quàm profunde tu huic miseriæ es immerfus!

F E R I A V.

Quartum Joannis de Christo testimonium.

1. *Venerunt* (discipuli Joannis) *ad Joannem, & dixe-*
Q₂

dixerunt : cui tu testimonium perhibuisti , ecce hic baptizat , & omnes veniunt ad eum. Joan. 2. Tanguntur invidiâ discipuli Joannis. Hic affectus etiam Sanctos quandoque invadit. Videntur in modo loquendi Joannem Christo præferre , quia secundum sensum amabant. Præfers tacite Deo , quidquid extra ipsum amas. Addunt : omnes venire ad Christum , cum tamen actu multi venirent ad Joannem. Invidio aliena felicitas est grandis , sua est nulla. Absit à te invidia , sed æmulare charismata meliora.

2. *Qui habet sponsam , sponsus est : amicus autem sponsi , qui audit eum , gaudio gaudet propter vocem sponsi. Ibid. Non movetur dictis Discipulorum ad indignationem , minus ad invidiam ; non approbat eorum sensum ; sed Christum Messiam , & Sponsum Ecclesiæ proficitur ; se amicum illius ait , & ideo gaudere de ejus gloria. Quis tuus est sensus in gloria alterius : probásne , si crescat ? juvásne , ut exaltetur : facies , si amicus sis amore verè Christiano.*

3. *Illum oportet crescere , me autem minui. Ibid. Multa ibi elogia attribuit Christo : sed omnia huc confert , ut exaltetur gloria Christi , ipse verò deprimatur. Vide duas bases , in quibus te stare oportet ; in zelo gloriæ Dei , & humiliatione tui.*

F E R I A VI.

Joannes incarceratur.

1. *H*erodes misit , ac tenuit Joannem , & vinxit eum in carcere. Marc. 6. An indignatus , an questus est Joannes , nuper ut Messias cultus jam reus & confusus ? tu hæc agis : at Joannes sui similis , imperturbatus , cum humilitate & gaudio afflictio-

etionem suscepit. Frangis afflictionem, si ad sensum non admittis : huc non pertinges, nisi tibi sis mortuus.

2. Dicebat enim Joannes Herodi : non licet tibi habere uxorem fratris tui. Ibid. Hæc vinculorum causa fuit. Quia sanctum opus fecit, ex zelo admonendo Regem, in vincula trahitur. Hæc sæpe est merces justorum, malum pro bono recipiunt. Utinam tu nullâ aliâ causâ, nullâ tuâ culpâ patiaris ! patienti ipsa erit innocentia solatium. Adverte cum libertate modestiam admonentis : sine improprio veritatem, non ex se, sed ex lege proponit.

3. Herodes metuebat Joannem, sciens eum virum justum, & sanctum ; & custodiebat eum, & auditû eò multa faciebat, & libenter eum audiebat. Ibid. Virtus etiam hosti est amabilis, ac venerabilis. Sed, si amat Joannem, cur incarcerat ? Judæorum importunitati, Herodiadis precibus id tribuendum est. Ut hominibus satisfaciât, ab æquo discedit. Respectus hominum generat despectum Dei ; respectus Dei despectum favoris humani. Elige, quem recipias.

S A B B A T H O.

Colloquium Christi cum Samaritana.

1. **J**ESUS fatigatus de itinere, sedebat sic supra fontem. Joan. 4. Zelô unius animæ, & peccatricis fatigatur, sistit, & expectat eo loco, quò scit certò venturam. Nulla Christo est vilis anima. Etiam viliorum salutem quære : quia animas Deus æstimat, non divitias, non dignitates. S. Ambr. lib. 2. de Spiritu Sancto. *Fatigatus est etiam in te, quia diu te quæsvit*, per omnes suos labores,

Q 3

& cru-

& cruciatus. Sedet, & expectat: quid moraris accedere: imò cur longius recedis?

2. *Venit mulier de Samaria, & dicit ei Iesus: da mihi bibere.* Ibid. Felix mulier! quia venit eâ horâ, quâ expectabatur. Una quandoque neglecta occasio, infelicitatis est origo. O si sæpe hoc cogitares, quam attentus esses gratiis tibi datis! petit ab ea parum, ut det multum, aquam scilicet salientem in vitam æternam. Hæc indoles Dei est: ubi parum das, dat tibi multum. Da ergo etiam minima. Minimorum cura generat maxima: minimorum neglectus ad gravia præcipitat.

3. *Dicit ei mulier: quomodo tu, Judeus cum sis, bibere à me possis, quæ sum mulier Samaritana?* Ibid. Ecce mulieris, & nostram erga Christum rusticitatem! Quod inimico negare est nefas: Christo negamus. Quoties sitit, & petit ea, quæ sunt ad salutem tuam, & tu ei negas? & quanta est Christo sitis salutis tuæ: quia magis te amat, quam demon oderit. Et tanto amoris, tantæ siti poteris aliquid negare? cujus demum fructus est? tuus.

DOMINICA VI. POST PENTEC.

Convertitur mulier, & nunciat Christum Samaritanis.

1. *R*espondit Iesus, & dixit ei: si scires donum Dei, & quis est, qui dicit tibi: da mihi bibere; tu forsitan petiisses ab eo. Joan. 4. Mulier nescit donum Dei præsentis, nescit, quid ipse petat. Hinc nondum petit ipsa aquam vivam. A præsentia Dei omne bonum salutis pendet. Si præsentem cogitares, nonne ferventior esses in ejus obsequio? nonne affectus tuos magis reprimeres? Per hoc inducit illam ad plenam instructionem de Messia,
de

de adorando Deo in spiritu, & veritate, & movet ad detestationem vitæ prioris. Ita Deus prævenit nos, & invitat. Sed, *qui fecit te sine te, non salvabit te sine te.* S. August.

2. *Domine, da mihi hanc aquam, ut non sitiam, neque veniam huc haurire.* Ibid. Effectus colloquii cum Christo. Accenditur in ea desiderium aquæ cœlestis; ex manifestatione occultorum suorum criminum agnoscit Messiam; de peccatrice fit Apostola, relinquit hydriam, currit ad civitatem, invitat omnes ad Christum: *Venite: & videre.* Vide, & imitare progressum animæ. Excita desiderium aquæ gratiæ: pete eam reverenter: relinque hydriam veterum consuetudinum: gaude te invenisse Jesum; cura, ut alios ad illum trahas.

3. *Interrogabant eum Discipuli, dicentes: Rabbi manduca.* Ille autem dixit eis: *meus cibus est, ut faciam voluntatem ejus, qui misit me, ut perficiam opus ejus.* Ibid. S. Chrysost. hom. 33. *Hominum salutem, inquit, hoc in loco cibum appellat, ut, quantum salutis nostræ curâ, & desiderio teneatur, ostendar.* Hanc enim curando implebat voluntatem Patris. Et tu illi cibus es, quia te salvum petit. O quæ gratia! imitare: sit cibus tuus obedientia. *Quid ita in omni necessitate confortat, & sustentat, ut divinæ voluntatis executio?* ait S. Bern. Sit cibus tuus zelus animarum; tot perdis animas, teste Augustino, quot, cum potes, non rapis.

F E R I A II.

Christus sanat filium Reguli.

1. **H**ic (Regulus) cum audisset, quia Jesus adveniret, abiit ad eum, & rogabat eum, ut descenderet, & sanaret filium ejus: incipiebat enim mori. Joan. 4. Ad Christum accurrimus, cum nos pre-

mit adversitas, & ideo eas Deus immittit. Ergo mitius tolerandæ sunt. Quæ cura est Patris pro salute corporis, hæc sit tua pro salute animæ. *Nonne anima plûs est, quàm corpus?* Imperfecta est Reguli fides; sit tua perfectior: pete ab eo, cætera ejus dispositioni committe. In tentatione non differ recursum, donec *incipias mori*; sed præveni. Dilata remedia dant malo vires.

2. *Dicit ad eum Jesus: nisi signa & prodigia videritis, non creditis.* Ibid. Arguit modicam fidem, ut ad majorem disponat, & sanet ejus animam. Hæc Christi est bonitas, quæ vult plûs dare, quàm petamus, modò nos ipsi non impediamus. Perseverat precando Regulus. *Descende, priusquam moriatur.* Sed errat, quod putet auxilium Domini posse esse ferum. Solatur eum Jesus: *Filius tuus vivit.* Non sunt verba narrativa tantum, sed etiam effectiva. O si dicat mihi: *Anima tua vivit!* Regulus *credidit.* Huc tendebat Christus dilatione. Si differt, quod petis, tuo bonò id facit.

3. *Credidit ipse, & domus ejus tota.* Ibid. Audivit ab occurrentibus servis, vivere filium ab ea ipsa hora, qua Christus dixit: *& credidit ipse.* Venit in domum, vidit, narravit, quæ dixit Jesus: *credidit domus ejus tota.* Qualis est paterfamilias, tales sunt servi, & domestici. Qualis est paterfamilias animæ intellectus circa veritates practicas, talis est voluntas, appetitus, affectus. Averendus ergo est à falsis mundi, & carnis principiis; excolendus divinis, non, ut scias, sed ut facias.

F E R I A III.

Piscatur Petrus ad stagnum Genesareth.

1. *Ascendens unam navem, quæ erat Simonis, rogavit eum à terra reducere pusillum, & sedens docebat*

bat de navicula turbas. Luc. 5. Primò à turba, quæ irruerat in Jesum, disce desiderium percipiendi Divina. 2. Si Christum habes in navicula cordis, reducere debes à terra, seu terrenis affectibus. Non possunt enim misceri amor Dei, & amor mundi. Tunc *sedebit* tanquam imperans cordi, & affectibus; & docebit te solidas veritates, quas capere non potes, dum terrenis adhæres.

2. *Ut cessavit autem loqui, dixit ad Simonem: duc in altum, & laxate retia vestra in capturam.* Ibid. Non contentus Jesus, ut pusillum te subducas à terrenis, dicit tibi: *duc in altum*, ad majorem perfectionem procede, semper plus restat, quam affectus sis. *Duc in altum* per intentionis elevationem. 2. Respondit Petrus: *Tota nocte laborantes nihil cepimus.* Hic fructus est laborum sæculi circa dignitates, &c. *nihil.* Et quantum pro hoc nihilo laboratur? & pro eo, qui solus est omnia, quam parum?

3. *In verbo autem tuo laxabo rete, & concluderunt piscium multitudinem copiosam.* Ibid. Dum antea in eo ipso loco nihil cepissent. Quare modò? quia in nomine Jesu, & ex obedientia jactum est rete. Quæ hac intentione facis, apud Deum nunquam sunt irrita. 2. Sic respondit Christus Petro, quòd se in navim receperit, quòd à terra submoverit, Minimum, quod Deo præstas, magnò remunerat. 3. Ut doceret, sequentibus eum non defutura necessaria ad victum. Depone has corporis curas, & de hoc esto sollicitus, ut **JESUM** sequaris.

F E R I A I V.

Vocatio Petri & Andreæ, Jacobi, &
Joannis.

1. **J**ESUS vidit duos fratres Simonem & Andream, & ait illis: *venite post me, faciam vos fieri piscatores hominum.* Matth. 4. Quos vocat? unde? quò? vocat rudes & simplices: quoniam semper illi placet humilitas, & est optima ad gratias dispositio. Vocat fratres: ubi Pelusiota lib. 1. epist. 9. *Indicavit, se Discipulos omnes suos fraterno amore copulari velle.* Tales esse debent, qui captant animas. Quomodo te hìc habes? Vocat à mari, & vili labore. Et te ex mari mundi vocavit, ubi jaciebas retia cupiditatum ad capienda terrena. Agnosce gratiam, &c. Vocat *post se*, ut eum sequens semper habeas in oculis, ut videas, & premas vestigia ejus, ut pari zelo pìsces homines. Vide dignitatem muneris, indignitatem tuam. At quomodo id agis?

2. *Illi autem continuo relictis retibus secuti sunt eum.* Ibid. Hæc obedientiæ promptitudo tuam arguit tergiversationem. *Relinquunt retia.* Retia tua, quæ sequelam Jesu impediunt, sunt familiaritates sæculi, negotia extranea vocationi, pravi affectiones. Si vis Jesum sequi, debes relinquere, quæ sunt aliena à Jesu.

3. *Vidit alios duos fratres, Jacobum & Joannem in navi resicientes retia, & vocavit eos: illi autem statim relictis retibus, & patre, secuti sunt eum.* Ibid. Et hìc ait Gloss. *Unitatem fraternæ dilectionis probavit.* S. Bern. Serm. 2. de S. Andr. *Nihil dijudicantes, aut hæsitantes, non solliciti, unde viverent, sine mora sequuntur.* Hæc magis cæca, quam priorum videtur obedientia; quia non additur, ad quod munus

munus vocentur. Insuper carnalem erga patrem affectum superant. Vide, an tu sic obedias cæcè, statim, omni alio amore seposito.

F E R I A V.

Curatur dæmoniacus à spiritu immundo.

1. *E*Rat in Synagoga homo in spiritu immundo. Marc. 1. O infelicitas hominis à dæmone possessi! si talem haberes in corpore, quid non ageres, ut liberareris? habes in animo, in pravis affectibus, & minimum curas. *Exclamavit: Quid nobis & tibi, Jesu Nazarene?* O impudentia! negat jus Christo in creaturam suam. Ita statim ex peccato hominis sibi jus arrogat. Sed non finit Jesus, qui venit dissolvere opera diaboli. *Venisti perdere nos.* S. Hier. in Matth. 8. *Præsentia Christi tormentum est dæmonum.* Tormentum est illi, si debeat à te exire. O afflige diabolum, ut affligeres, si posses, apertum?

2. Scio, quod sis Sanctus Dei. Ibid. laudat, & adulatur Christo dæmon, vel ut non pellatur, vel ut Christum vanâ gloriâ afflet. *Si te laclaverint peccatores, non acquiescas eis.* Prov. 1. *Comminatus est ei Jesus: obmutescere, & exi ab homine.* Non placuit Christo laus ex ore peccatoris. Vide, quale est os, & cor tuum, ut digne laudes?

3. *Discerpens eum spiritus immundus, & exclamans voce magna exiit ab eo.* Ibid. Ad unum Christi verbum: *Exi*: migrat dæmon: quare non à te post tot inspirationes? tuâ culpâ: quia ei blandiris in tuis passionibus. S. Gregor. hom. 12. in Ezech. *Quem possessum non discerpserat deserens discerpit, quia plerumque, dum de corde expellitur, acriores in eo tentationes generat, quàm prius excitaverat.* Non deice ergo animum, si tentationes vehementiores sentis: signum est dæmonem exire.

F E-

Socrus Simonis curatur à febris.

1. *S*ocrus autem Simonis tenebatur magnis febribus. Luc. 4. Ita depositam invenit Jesus. Qualem te invenit, cum ad te venit? non una forte, sed multiplex tua est febris. S. Ambr. *Non minorem febrim amoris erga res creatas esse dixerim, quam caloris; febris nostra, avaritia, libido, ambitio, iracundia est.* Agnosce morbos tuos, & pericula. Admitte Jesum in domum cordis tui, quem hætenus repulisti, ut gratia, & dictaminibus divinis medeatur.

2. *Et accedens elevavit eam apprehensa manu ejus, & continuo dimisit eam febris.* Marc. 1. Actum est de tua sanitate, nisi Deus extendat manum gratiæ. Sed quoties extendit, & non apprehendis? *imperavit febre, & dimisit illam.* Luc. 4. Intelligis voluntatem, & mandatum Dei circa tuas febres, & te nondum dimittunt: quia tu illas amas, qui odisti febres corporis. Time illud: *Curavimus Babylonem, & non est sanata; derelinquamus eam.* Isai. 51. O! *derelinquamus eam.*

3. *Et continuo surgens ministrabat illis.* Luc. 4. Cum Deus solus sanat, momentò res agitur ad perfectionem. At hoc rerum ordine successive id agitur, juxta mensuram nostræ cooperationis. Velles domitas habere passionem, sed velles nullo labore tibi constare. Inania sunt desideria, ubi manus operi non adhibetur. 2. Restitutam sanitatem statim obsequio Christi impendit, & ministrat. Hoc gratitudo postulabat. Cui tu sanitatem impendis?

S A B B A T H O.

Tres, qui volunt Christum sequi, sed non,
ut oportet.

1. **D**ixit quidam ad illum : *sequar te, quocunque ieris.* Luc. 9. Verba optima, si par fuisset intentio. Ob lucra sequi voluit. Ideo non acceptat Dominus, qui non habet, ubi reclinet caput suum : quasi dicat, ut ait S. Hieron. *Quid me propter divitias, & sæculi lucra sequi vis, cum nec hospitium habeam?* Primo ergo obsequia Deo reddenda, non detorque ad tam abjectos fines gloriæ tuæ, vel commodorum. 2. Pauperem Christum imitare superfluatorum rescissione. 3. Non habenti, ubi reclinet caput, cor tuum exhibe, sed mundum, & molle.

2. *Ait ad alterum : sequare me. Ille autem dixit : Domine, permitte mihi primum ire, & sepelire patrem meum.* Ibid. Non acceptat Dominus, sed ait : *sine, ut mortui sepeliant mortuos suos.* Pietatis erat sepelire patrem : sed cum Deus aliud mandat, vel obedientia, etiam pia sunt relinquenda : imò Deus propter Deum : quia mensura perfectionis est voluntas Dei.

3. *Et ait alter : sequar te Domine ; sed permitte mihi primum renunciare iis, qui domi sunt.* Ibidem. Neque hunc acceptat Dominus, ait enim : *nemo mittens manum suam ad aratrum, & respiciens retrò, aptus est regno Dei.* Ubi de suo servitio agitur, non vult Deus consilia agi cum domesticis, cum affectibus nostris : quia & periculosum est, & mora trahitur. 2. Qui vult sequi Christum, antrosum aspiciat affectu, & desiderio, non retrorsum ad terrena, quia simul non consistunt.

DO-

DOMINICA VII. POST PENTEC.

Sedatur tempestas maris.

1. *Ascendente Jesu in naviculam, securi sunt eum Discipuli ejus. Matth. 8. Discipulus bonus etiam in arduis à Magistro non discedit. Et ecce motus magnus factus est in mari. Etiam ubi Christus est, est tentationi, & afflictioni locus. Ideo, etsi sis in gratia, esto vigilans: sed non concide animo, quia Dominus non est tecum. Ipse verò dormiebat. Qualis animus, qui in tempestate est quietus!*

2. *Et accesserunt ad eum Discipuli. Ibid. Huc recurrendum, cum premeris. Et suscitaverunt eum dicentes: Domine, salva nos, perimus. Duo peccant. 1. Defectu fidei: quòd credunt dormientem non posse salvare. 2. Perturbatione animi ex timore: ideo arguuntur: quid timidi estis? Tu contrà in omni tentatione confide in Dei providentia: animum serenum retine, quia omnis turbatio non profutura, aut noxia media arripit.*

3. *Tunc surgens imperavit ventis, & mari. Ibid. Prius ventis, tanquam causæ commotionis, deinde mari. Si vis malum aliquod extirpare, à causâ, & radice illud aggredere. Et dixit mari: tace, obmutesce. Marc. 4. Dum commoveris animo, tace, obmutesce, ne in querelas, in murmura, in indignationem erumpas. Sæpius hoc tibi dixit Deus, raro es obsecutus. Et facta est tranquillitas magna. Confundunt te insensibiles creaturæ, quæ tam promptæ obsequuntur Deo.*

F E R I A II.

Legio dæmonum expulsa.

1. *Occurrerunt ei duo habentes dæmonia, de monumentis exeuntes, sævi nimis. Matth. 8. Miseriam*

seriam horum fusiùs describit Marc. cap. 5. *Neque catenis quisquam poterat eum ligare; in montibus erat clamans, & concidens se lapidibus: & vestimenta non induebatur.* Ita dæmon tractat hominem; & tamen amatur, cum amatur peccatum. Minimum pejus est omni excogitabili pœna, & licet pœnam minimam fugias, peccatum non horres. Rumpis catenas legum divinarum: laceras vestem gratiæ, &c.

2. *Videns autem Jesum à longè, cucurrit, & adoravit eum.* Marc. 5. Confundunt te dæmones, qui Jesum præsentem timent, quem præsentem tu offendere non vereris. Adorat cum timore: tu amore id præsta. Addunt: *adjuro te per Deum vivum, ne me torqueas*, expellendo me: quia inexplicabili odio tentare homines desiderant. Quanta igitur opus circumspectione? *Interrogatus, quod tibi nomen est? respondit: Legio.* Ubi unus intrat, plures trahit. Una passio non domita, multas excitat. Unum peccatum patratum, ad multa trahit.

3. *Dæmones autem rogabant eum, dicentes: Si ejcis nos hinc; mitte nos in gregem porcorum.* Ibidem. Vide, quàm parùm possint: ne quidem porcum occupare: quantò minus in te poterunt, nisi tu assentiaris? ex petitione collige, ad quam vilitatem per peccatum venerint nobiles spiritus. Concessit, quod petiverunt, Jesus, ut doceret tanti esse animam, ut pro ea à jugo dæmonis liberanda, omnis jactura temporalis sit postponenda: ergo & tu honoris & commodi, &c.

F E R I A III.

Christus rogatus à Gerasenis discessit.

1. **E**T veniunt ad Jesum, & vident illum, qui à dæmonio vexabatur, sedentem, vestitum, & sanæ mentis.

mentis. Marc. 5. Hic status est hominis à peccato liberati. *Sedet*, mira animi quiete; *ad pedes Jesu*, affectibus humilitatis. *Vestitus gratia*, & donis supernaturalibus. *Sana mentis*, suarum dominus passionum, quæ eum exerrare fecerunt. Quanto felicior hic status priore? hunc tibi precare; &, ut conserves, à pedibus Jesu non discede.

2. *Et rogare caperunt eum, ut discederet de finibus eorum.* Ibid. Cajet. hic: *damnum porcorum, timorem majoris damni excitavit*: ne patiantur temporarium jacturam, præeligunt carere Christo, quod summum est malorum. O infania! tu eum tene, & non dimitte. Ut serves Jesum, etiam vitæ, & sanguinis jactura est ingens lucrum.

3. *Cumque ascenderet navim, capit illum deprecari, qui à dæmonio vexatus fuerat, ut esset cum illo.* Ibid. Accepta gratia hoc desiderium excitavit. Quoties eandem accepi, & necdum habeo desiderium Deo adhærendi! *Jesus non admisit eum, sed ait: vade ad tuos, & annuncia illis, quanta tibi dominus fecerit, & misertus sit tui.* Non rejicit illum, sed prædicatorem facit illum beneficii. Quibus? illis ipsis, qui rogabant, ut discederet. Quare? ut vel sic agnoscerent Jesum, & in illum crederent. O bonitas! quærit eos, à quibus rejicitur. O quoties te sic quæsit! Quid debes tantæ bonitati!

F E R I A IV.

Offertur Christo Paralyticus.

1. **E**T veniunt ad eum ferentes Paralyticum, qui à quatuor portabatur. Marc. 2. Miserabilis hujus hominis status, sed miserabilior animæ tepidæ, quæ nec manus ad operandum, nec pedes affectuum ad se movendam firmos habet. Expertus es id aliquando in te ipso? utinam non etiam nunc!

vis

vis sanari ? quatuor bajulos adhibe : cognitionem tuæ miseriæ, cognitionem bonitatis Dei; & hinc spem salutis, & amorem Dei. Certa est salus hæc conjungenti.

2. *Et quarebant eum inferre, & ponere ante eum; non invenientes, qua parte eum inferrent præ turba.* Luc. 5. in domum non dabatur accessus præ turba : Paralyticus tamen per illos quatuor ab omni parte quærit aditum. Agit, quod potest, ne occasio elabatur. Hoc & tu age in negotio animæ. Quod hodie potes, non differ in crastinum, etsi impedimentum quandoque sufficiens videatur, rationabilius est, ut tentes perumpere.

3. *Nudaverunt tectum, ubi erat, & patefacientes submiserunt grabatum, in quo Paralyticus jacebat.* Marc. 2. In bajulis constantem in ægrum charitatem adverte, & imitare. Eandem cogitare potes in domino domûs, qui non prohibet tabulatum cubiculi perumpi, in quo Christus prædicabat. Paralyticus verò non timet nomen inurbani, aut importuni, nec confunditur comparere æger. Tantum facit amor sanitatis. Et non faciet in te plus amor sanctitatis ? Generosa utere resolutione.

F E R I A V.

Sanatur à Christo idem Paralyticus.

1. **E**T videns Jesus fidem illorum, dixit Paralytico : *confide fili.* Matth. 9. O verba amoris, quæ faxeum cor emolliant ! *remittuntur tibi peccata omnia.* Non hoc petivit æger, sed sanitatem corporis. Sed majus esse malum animæ docet, quod prius curat. Quam cæcus es, qui hoc non agnoscis ! Hinc major tibi cura sanitatis corporis, quam animæ. 2. Peccatum est morborum, & afflictionum causa ; ut

Avanc. Medit.

R

curet

curet ergo morbum, tollit causam. Non bene mederis morbis animæ, nisi radicem evellas passionis.

2. *Erant autem illic quidam de Scribis sedentes, & cogitantes in cordibus suis: quid hic loquitur! blasphemat.* Marc. 2. Nunquam deerunt, qui, quod sancte feceris, perverse accipiant. Non deerunt, qui prætextu zeli, tegant invidiam. Si talis es, cogita te cum Scribis illis redargui: *Ut quid cogitaris mala in cordibus vestris?* confundere, & ne similia posthac judices, cogita, quod, sicut Jesus vidit cogitationes eorum, ita videat tuas omnes, seu bonas, seu malas.

3. *Tunc ait Paralytico: surge, & tolle lectulum tuum, & vade in domum tuam.* A paralyti animæ libera te, ne iterum relabaris. 1. Surge per generosas, & sæpius repetitas resolutiones. 2. Tolle lectulum, id est, ut ait Glossa, *Carnem* à carnalibus desideriis, ad voluntatem spiritus attolle. 3. Vade in domum conscientie tue, & illic habita.

F E R I A VI.

Acta post sanatum Paralyticum.

1. **P**ropterea sequebantur Judæi Jesum, quia hæc faciebat in Sabbatho. Joan. 5. Sub prætextu religionis malitiam exerunt. Bonum opus Jesus præstitit, & persecutione rependitur. Persecutio certa mihi est, si bonus sum inter dysscolos. O si tueri, aut solari me possim cum Christo: *Pater meus usque modo (hoc ipso Sabbatho) operatur, & ego operor:* id est, operor opera Patris mei. At infelicem me! non potero. Opera mea sapiunt mundum & sensum. At non amplius! operabor cum, & in Patre, ad, per, & propter Patrem meum.

2. *Pro-*

2. *Propterea magis querebant Judæi eum interficere, quia Patrem suum dicebat Deum.* Ibid. Quò devenimus? per ipsam regularum observantiam, per opera, quibus merentur esse filii Dei, incurrimus odia dyscolorum. O quam felix ego, qui ideo tantum sim exosus, quia Deus est Pater meus; quia operor, quæ Patri placent. Patiar mi Deus odia; sed non alià causâ, quam, quòd sim filius tuus, tu Pater meus.

3. *Opera, quæ ego facio, testimonium perhibent de me.* Ibid. Probat Christus Divinitatem suam, allegando testimonium Joannis; sed eò non nititur: majus & firmitus addit, opera sua, *quæ nemo alius potest facere.* Probare aliquando ad tribunal Dei debebo, me esse filium Dei, si gloriâ potiri velim. Quid allegabo? nihil proderunt elogia hominum, ubi solum pensantur opera singulorum. Quid fiet, si non inveniantur opera tuâ plena? Apoc. 3. Quid agendum nunc, ut tunc te laudent in portis opera tua? Prov. 31.

S A B B A T H O.

Matthæi vocatio.

1. **C**um transiret inde Jesus, vidit hominem. Matth. 9. Chrysol. serm. 30. *Vidit illum Deus, ut ille videret Deum.* Ita nec cognoscere Deum potes, nisi ille per gratiam se exhibeat. O vide me Jesu, ut videam te! *in telonio sedentem*: tanquam in lucris temporalibus quiescentem. O falsa quies! *Matthæum nomine*: exprimit ipse nomen, ut sciatur sua indignitas, & dignatio Dei. *Et ait illi.* Etiam dum sedes in peccato, dum actu peccas, tibi Deus ad cor loquitur: sed quoties dissimulas audire! *Et secutus est eum*, statim, quia Jesus transibat. Gratia

R 2

venit,

venit, & vadit; pertransit, nisi occupes. *Relictis omnibus.* Cognoscenti Deum vilescunt omnia.

2. *Et fecit ei convivium magnum Levi.* Luc. 5. Ut gratus esset, ut gaudium testaretur, ut alios hac occasione ad Christum pertraheret. Aderat enim turba multa publicanorum, & aliorum, qui cum illis erant discumbentes. Esne tu tam gratus Deo? quærisne occasiones boni? non dedignatur hanc mensam Christus, etiamsi posset inde vilior æstimari, quòd cum peccatoribus ageret; quia erat occasio plures convertendi. Curasne ita salutem proximi? etiam ubi crederes te viliozem habendum?

3. *Et Pharisei dicebant Discipulis: quare cum Publicanis, & peccatoribus manducat Magister vester?* Lauda tu Jesum, quòd cum peccatoribus versetur: aliàs ubi tu esses? lauda, quòd non tantum manducet cum peccatoribus, sed etiam ab iis manducari velit. Tanta tui est dignatio, ô vilis homo! noli murmurare; aut aliena facta sequius interpretari; quia intentionem ignoras.

DOMIN. VIII. POST PENTEC.

Mulier à sanguinis fluxu curatur.

1. *M*ulier, quæ erat in profluvio sanguinis annis duodecim, & erogaverat omnia sua, nec quidquam profecerat. Marc. 5. Calamitas corporis, melioris statûs accendit desiderium: æstimat sanitatem, dum eâ caret, erogat omnes suas facultates, ut eam recuperet; plus daret, si plus haberet. Quanto melior est sanitas animæ! æstima hanc: si habes, cura, ne perdas, huc animi facultates, intellectum, memoriam, voluntatem impende. Si non habes, desiderium accende; sed non fatiſ: facultates impende.

2. *Cum*

2. *Cum audisset de Jesu, venit in turba retrò, & tetigit vestimentum ejus.* Ibid. Cum humilitate, reverentia, & viva fide reparandæ sanitatis. Ita ad Eucharistiam eundum. Nec te impediatur turba tuorum affectuum pravorum. Semove illam, ut accedas. Quærit: *quis est, qui me tetigit?* non ut sciat, qui nihil ignorat; sed ut se prodat fides mulieris, & illuminentur alii, & mulier ipsa à fide ad alias virtutes progrediatur. Disce semper proficere, & desiderio Christi in hoc satisfacere.

3. *Mulier verò timens, ac tremens.* Ibid. Ne increparetur, quòd immunda mundum tetigisset: & tu non times tot passionibus immundus non tangere fimbriam, sed ipsam Divinitatem sumere? *venit, & procidit ante eum, & dixit ei omnem veritatem,* de morbo suo, coram omni populo humilis, & confusa. Vide profectum à fide ad confessionem suorum defectuum, & publicam confusionem. Tu nondum huc es progressus? at ille dixit: *confide filia.* Statim ubi se humiliat, vocatur *filia.* Digna est hæc gloria, ut per humiliationem à te ematur. *Fides tua te salvam fecit.* Si deficis, certe defectu fidei deficis. Assuesce actualem fidem sæpius exercere, maxime circa Deum, & ejus attributa.

F E R I A II.

Jairi filia resuscitatur.

1. *E*cce princeps unus accessit, & adorabat eum, dicens: *Domine, filia mea modò defuncta est: sed veni, impone manum tuam super eam, & viveret.* Luc. 8. Filia unica, nobilis, tenera moritur. Ne crede ætati. Ubique mors est, forte hic dies est ultimus. Domine tu scis insipientiam meam. Si scis me peccaturum aliquando, potius hòc momentò, etiam fulmine, me tolle. 2. Si cadas,

R 3

modò,

modò, in momento recurre ad Deum. Differre velle pœnitentiam, est velle sæpius cadere.

2. *Et cùm venisset, & vidiſſet turbam tumultuantem, dicebat: recedite.* Ibid. Ubi Christus accedit, debet recedere, quidquid est mundi. Non sanatur in solidum anima, nisi turbam passionum ejicias. Dic ergo tuis resolute in omni occasione: *recedite.* Addit: *Non est mortua puella, sed vivit.* Forte respicit ad eos, qui adolescentes se Deo dedicant. Moriuntur civiliter, sed mors hæc somnus est suavis, & quies; dum vere mundum deserunt cum concupiscentiis suis. Si ergo adhuc in te vivunt concupiscentiæ, nondum es mundo mortuus, sed dormis ad tempus, sicut ignis sub cinere.

3. *Ipsæ autem tenens manus ejus, clamavit, dicens: puella surge.* Ibid. Qui per te cadis, sine manu & auxilio Dei non surges. Agnosce tuam infirmitatem: apprehende robur gratiæ. *Et reversus est spiritus ejus.* Quoties tibi dixit: *Surge:* & non est in te reversus spiritus? anima separata obedit Deo; cur non etiam unita corpori? ratio utrumque postulat. Quia *sive vivimus, sive morimur, Domini sumus.* Rom. 14. Ah non queratur de te Deus! *usquequò non vis subjici mihi?* Exodi 10.

F E R I A III.

Duo cæci à Christo illuminantur.

1. **E**T transeunte Jesu secuti sunt eum duo cæci, clamantes: *miserere nostri fili David.* Matth. 9. Cæci oculis corporis, non animæ, qui fide agnoscunt Messiam, credunt potentiam, sperant misericordiam. Fortè tu animo magis cæcus es, dum nebulas offundunt praviæ affectiones, ut non videas viam veritatis, nec intelligas sublimem Christi do-

sti doctrinam. *Animalis homo non percipit ea, quæ sunt spiritûs.* 1. Cor. 2. *Et nescis, quàm sis cæcus, & miser.* Apoc. 3.

2. *Dicit eis Jësus: credistis, quia hoc possum facere vobis? dicunt ei: utique Domine.* Toto processu nec respondit eis Jësus; perseverarunt tamen eum sequi, & clamare. Sequere Jësum, etiamsi te non soletur. Sustine Deum cum patientia, & longanimitate. Tandem, quod quærit, non est sciendi causâ, sed vult grandem de sua potentia opinionem haberi. Sublimis de Deo sensus, est magnarum actionum origo.

3. *Tunc texit oculos eorum, dicens: secundum fidem vestram fiat vobis.* Ibid. Ecce ad mensuram dispositionis mensuratur gratia. Hinc intellige, quare sis tam egenus gratiarum; quia valde modica tua est dispositio; & conare te posthac ad ampliores disponere. *Sanatis comminatus est, dicens: videre, ne quis sciat.* Non fuit mandatum, sed mysterium docentis, si quæ egerimus apud populum plausibilia, occulta optemus. Non vult laudari Christus, & cur tu, qui sine eo nihil potes?

F E R I A IV.

Doemonium mutum ejicitur.

1. *Obtulerunt ei hominem mutum, dæmonium habentem, & ejecit dæmoniò locutus est mutus.* Matth. 9. Magna est offerentium charitas, major Dei benignitas. Hanc admirare, illam imitare. Agnosce te mutum, si te loqui vetat de Deo affectus vanitatis, pro Deo respectus humanus, cum Deo mentis ad creaturas evagatio.

2. *Mirata sunt turbæ, dicentes: nunquam apparuit sic in Israël.* Ibid. Candidi, & simplices animi

laudent, quæ vident bona. *Pharisæi autem dicebant: in Principe dæmoniorum ejicit dæmonia.* Invidus animus pessimus dat alienis rebus colorem. Tanti refert, quô animô sis, ut bene loquaris. Magus pronuntiatur Jesus, & tacet, ac tolerat: & quomodo hæc cogitans indignaberis, si quid de te sinistrum proferatur?

3. *Et circuibat civitates, & castella, docens in Synagogis, & curans omnem languorem.* Ibid. En, quid rependit tantæ injuriæ? cumulabat in eos beneficia, miracula. Non propterea desiste à bono, quia de factis tuis sinistrè loquuntur homines. Si propter eos non cœpisti, propter eos non desistas. Respice, cui servias, & decerne non curare, si hominibus non placeas.

F E R I A V.

Ad piscinam invenit Paralyticum.

1. *Accebat multitudo magna languentium, cæcorum, claudorum, aridorum, expectantium motum aquæ.* Joan. 5. Typum habes morborum animæ. Languidi sunt, quos progredi tædet in via virtutis: cæci, qui non erigunt se ad æterna, sed in caligine periturorum hærent: claudi, qui in utramque partem jam ad Deum, jam ad mundum inclinant: aridi, qui suâ culpâ succum devotionis non gustant. Vide, an non te reperias in hac multitudine. Cum quanta longanimitate, & attentione expectant motum aquæ desiderio sanitatis corporalis! utinam tantum tibi esset desiderium sanitatis animæ, tanta attentio ad remedia!

2. *Qui primus descendisset in piscinam post morionem aquæ, sanus fiebat.* Ibid. Quanta fuerit, quam continua singulorum attentio ad Angelum descen-

scendentem, quanta concurrentium lucta? at primus solum sanabatur, non magis æger, non diutius expectans; sed primus, & maxime diligens. Vide, quid à te requiratur, ut in anima saneris: attentio ad Angeli inspirationes, ad motum aquæ, seu cordis tui affectus, & diligentiam operandi. Vide, an, & quantum in his deficias.

3. *Erat quidam homo ibi triginta octo annos habens in infirmitate sua. Hunc cum vidisset, dicit ei: vis sanus fieri?* Ibid. Non dubitabat de ejus voluntate Christus, sed ad infirmitates tuæ animæ respiciebat, quæ curari non possunt, nisi tu velis. Ideo ex te quærit, an revera velis: quia hæc voluntas est primum movens. *Visne?* forte solum velles. Nam si vis, cur repellis media? si vis curari superbiam, cur fugis humilitatem? &c.

F E R R A V I.

Christus sanat eundem Paralyticum.

1. **R**espondit ei languidus: *Domine, hominem non habeo, ut, cum turbata fuerit aqua, mittat me in piscinam.* Joan. 5. An murmurans hoc dicit, & tacite incusans ministros aquæ, quod ad ditiores accurrant, se miserum deserant? an nudè miseriam suam exponens? fac, ut neutro modo tuâ causâ de te dicatur à Superiore, à subdito, à discipulo, à pœnitente: *hominem non habeo.* In miseriis animæ tuæ id queri non potes. Nam *Ecce Homo*, Jesus tuus, qui mittit te in piscinam sui sanguinis.

2. *Dicit ei Jesus: surge, tolle grabatum tuum, & ambula.* Ibid. Tria hîc habes adversus languorem spiritualem remedia. 1. *Surge*: non expecta, ut sola gratia te erigat, sed tu quoque cooperare. Nec tu solus potes quidquam, nec illa

R 5

sola:

sola : tu cum illa potes omnia. 2. *Tolle grabatum cupiditatum, ac passionum. Tolle, tolle, crucifige. Tolle eas, rationis, ac voluntatis manibus regendo, in quibus antea & ratio, & voluntas quiescebat.* 3. *Ambula de virtute in virtutem, studiò ac desiderio proficiendi.*

3. *Postea invenit eum Jesus in templo, & dixit illi: Ecce sanus factus es; jam noli peccare, ne deterius tibi aliquid contingat.* Ibid. Commemorat beneficium, prohibet peccatum, minatur supplicium. Ab imperfectionibus te cohibeant hæc, & ad fervorem spiritus moveant: amor, quo tibi benefacit Deus: mandatum illius, ac, nisi feceris, secuturum supplicium.

S A B B A T H O.

Christus excusat Discipulos vellentes spicas.

1. *Abiit Jesus per sata Sabbatho: Discipuli autem ejus esurientes caperunt vellere spicas, & manducare.* Matth. 12. Cogita austeram Christi, & Discipulorum ejus vitam ad eam usque famem deductam. Non sunt eis, ut tibi, præparata fercula; nec panis quidem. *Admirare*, ait Chrysost. hom. 60. in Matth. *quomodo nullam corporis curam habebant: neque tamen à Christo abscedant.* Præsentia Christi eis supplebat defectum, & condiebat insipida. Si hanc seriò cogitares, sollicitam, quam habes, corporis curam converteres in animam, nec defectus cibi, aut commoditatum te à Christo avelleret per impatientiam, & murmurationem.

2. *Pharisæi autem videntes dixerunt ei: ecce Discipuli tui faciunt, quod non licet facere Sabbathis.* Ibid. Ecce quomodo observant eum, ut criminentur, & famæ demant per miracula acquisitæ: & invidia
vesti-

vestitur zelô violatæ legis. Graviora à se patrata Sabbatho invenirent, si se inspicerent. Sed talpæ in se, lynces in aliis, minima taxant. Vides, quàm turpe sit observare alios, & se ignorare? ubi se objicit festuca in oculo fratris, converte tu cogitationem ad trabem, quæ est in oculo tuo.

3. *At ille dixit eis: non legistis, quid fecerit David, quando esuriit? quomodo intravit in domum Dei, & panes propositionis comedit?* Ibid. Tacuerunt Discipuli ad redargutionem etiam sibi factam, ut est apud Sanctum Lucam: ideo Dominus eorum defensionem suscipit. Si vis omnibus injuriis, & calumniis respondere, multa incurres, unde plura patiaris. Si taceas, verbum Dei pro te loquetur. Est enim ei suorum cura: etsi premi eos patiatur, non sinit opprimi. Reposita est hæc spes mea in sinu meo.

DOMINICA IX. POST PENTEC.

Sanatur manus arida.

1. *E*Cce homo manum habens aridam: & interrogabant eum: si licet Sabbatho curare? Matth. 12. Ut, si affirmaret, accusarent eum apud Principes; si negaret, immisericordem apud plebem proclamarent. Utrunque imminabat periculum, ut errorem tamen confutet, eligit Sabbatho curare. Quid tu faceres pro veritate, ubi prævideres aliquid te passurum? ne timeas à facie hominum. Age, quod æquum, & justum est, discretô zelô; & sine cœlum ruere. In manu verò *dextera arida*, considera arida tua opera virtutis. Exarescat tibi sinistra, & vivat dextera.

2. *Et ait homini habenti manum aridam: surge in medium.* Marc. 3. Ut miseria visâ moveat affectum

Etum se opponentium. *Et ait eis : licet Sabbathis benefacere , an malè ?* id est , an omittere beneficium. Christo ergo idem est : non benefacere indigenti , cum potes , ac eidem nocere. Examina , quo affectu demandata charitatis opera suscipias. Forte & tu ibi curris , ubi extrahenda est ovis ex fovea , ubi proprium aliquod commodum affulget : & langues , ubi proximo est succurrendum.

3. *Et contristatus est super cecitate cordis eorum.* Ibid. Quod nec eum Messiam agnoscerent , nec doctrinam de juvando proximo etiam in Sabbatho probarent. At quantò major est cecitas tua , quam nebulae passionum inducunt ! ah noli contristare Christum Domini. *Et dicit homini : extende manum tuam , & extendit , & restituta est.* Tibi dici puta : extende manum ad opera virtutis. Quid juvat proponere , aut desiderare , si nunquam ad opus progrediaris. *Exeuntes autem consilium faciebant , quomodo eum perderent.* Unde meliores fieri debebant , inde peiores effecti sunt. Hæc & tu reddis Deo , quoties beneficiis ad malum abuteris.

F E R I A II.

Eliguntur duodecim Apostoli.

1. *Factum est autem in illis diebus , exiit in montem orare.* Luc. 6. Cogitabant Judæi , quomodo eum perderent ; Christus , quomodo eos salvaret per Apostolos , ut instrumenta. Quantum distant consilia Dei à consiliis hominum. 2. Subducit se , ut cedat eorundem iræ , & docet , incendio non suggerendum pabulum. 3. Docet interpolanda contemplatione opera vitæ activæ , ut colligatur spiritus ad majora. 4. Docet , ut rectè ores , scedendum a strepitu tam externo negotiorum , quam interno passionum. 2. *Et*

2. *Et erat pernoctans in oratione Dei.* Ibid. Totam noctem orat, antequam Apostolos deligat; ut doceat, quæ in negotio salutis sunt statuenda, esse cum Deo conferenda: idque non obiter, sed aliquanti temporis deliberatione, humana prudentia deficit ad ea, quæ sunt Dei. Errâsti sæpè, cum Deum non consuluisti; forte nunquam, ubi consuluisti.

3. *Et, cum dies factus esset, vocavit discipulos suos, & elegit duodecim ex ipsis, quos & Apostolos nominavit.* Ibid. Et te vocavit Deus, ad Apostolicam vitam, & gratis. Quanta vocationis dignitas? quanta tua indignitas? ne præsume de vocationis gratia; si eam non firmes operibus: etiam Judas fuit inter illos, & tunc temporis te sanctior; & tamen defecit. Quod & tibi evenire potest, sapienter cave.

F E R I A I I I.

Sermo Christi in monte habitus.

1. **E**T, cum sedisset, accesserunt ad eum discipuli ejus: & aperiens os suum docebat eos. Matth. 5. Ubi sedet ad docendum Magister, accedunt Discipuli, & audiunt doctrinam. Insidet Deus Magister cordi tuo, aperit os suum per inspirationes: accede, si vis esse Discipulus; & ubi vocem ejus audieris, noli obdurare cor tuum. Æstima doctrinam, quam tantus Magister tradit. Statue te illi conformare potius, quam doctrinæ mundi, & carnis. Beatos pronuntiat eos, quos mundus & caro miseros. Deus non fallitur, ergo mundus. Intelligis hoc? & tamen hujus principia sequeris?

2. *Bea-*

2. *Beati pauperes spiritu.* Ibid. Qui amore Dei abrenunciant caducis omnibus, & animo eorum cupiditatem evellunt, ut nudi nudum Jesum sequantur. Expende, num terrena fastidias, num æstimes, spernas, aut iis adhæreas. Quid de iis tibi statuendum sit, ex Christi exemplo discce. At quomodo eum imitaris? *Quoniam ipso- rum est regnum cœlorum.* Est convincens beatitudinis probatio. Qui habet regnum cœlorum, beatus est: quis neget: *pauperum est regnum cœlorum*: veritas æterna hoc dixit: ergo beati sunt pauperes, non quidem possessione illius regni, sed jure ad illud. Quanta bona lucraris, si caduca penitus animo extirpes? 2. Beati sunt beatitudine hujus vitæ, quia nihil desiderant. 3. *Possident regnum Dei.* De quo Paulus; *intra vosest*, quia possident animam suam.

3. *Væ vobis divitibus, quia habetis consolationem vestram.* Luc. 6. De iis est sermo, qui affectu immoderato ad caduca feruntur. Ut pauperibus certitudo cœli promittitur, ita his vœ æternum intonatur. Cor enim illorum ligatum est, ut non valeant ad Deum illud constanter, & integre erigere. Nam, *incidunt in tentationes, & laqueos Diaboli.* 1. Timoth. 5. *Habent consolationem*, non Dei, non solidam, sed suam & apparentem. Non es in horum numero? gratulare tibi, Deo gratias age: & cura, ut animam magis, ac magis à caducis abstrahas, ut sit unicus thesaurus tuus is, qui est omnia.

F E R I A I V.

Secunda, & tertia Beatitudo.

1. **B** *Beati mires.* Matth. 5. Non tantum qui cohibent turbulentos, & vel minimos iracundiæ motus, sed etiam, ut ait Clemens Alexandr. lib. 4. Strom. *Qui insidam, quæ est in anima, pugnam iræ, & cupiditatis, & eorum, quæ sub ipsas cadunt, sedant.* Hic tibi de te cogitandi tam latus est campus, quam late se explicat irascibilis, & concupiscibilis appetitus. Confer te cum exemplo Christi in tractandis peccatoribus, in ferendis injuriis, &c. Cogita tibi ab eo dici: *discite à me, quia mitis sum.* Matth. 11.

2. *Quoniam ipsi possidebunt terram.* Ibid. Quam? olim *terram viventium*: nunc autem terram sui cordis. Hanc non possident iracundi, quia æstu quasi extra se rapiuntur: at, *qui acquiescit increpationibus, possessor est cordis.* Prov. 15. Id est, qui non irascitur, non commovetur. Quanta est felicitas, hac interna pace, & tranquillitate frui! *sicut miserabilis est civitas, quæ, licet bene sit munita, intus tamen sepe proditores.* Ait S. Chrysost. hom. 34. in Joan. *Ita nihil beatius, quam intestinò liberari bello.* Hanc beatitudinem ipse tibi dare potes: & quid vetat?

3. *Beati, qui lugent.* Ibid. Ex compunctione sua; ex compassione aliena peccata; ex devotione, misérias hujus vitæ exulantis a patria; ex desiderio vitæ æternæ dilationem. Vide, quid tu lugeas, an Deum perditum, an carnis comoda? an mala corporis, an animæ? *Quoniam ipsi consolabuntur.* A quo? à Deo totius consolatoris. Ubi? non tantum in cælo, ubi *absterget Deus omnem lacrymam*, sed etiam in hac vita, ubi
luctum

luctum compunctionis, & devotionis, vel comitatur, vel sequitur incomparabilis consolatio. At *va vobis, qui rideris* cum mundo, & ducitis in bonis dies vestros, quia in æternum *lugebitis & flebitis*. Luc. 6.

F E R I A V.

Quarta, & quinta Beatitudo.

1. **B***eatii, qui esuriunt & sitiunt*. Matth. 5. Ardente desiderio *Justitiam*, seu omnem Deo serviendi, & placendi rationem, qui desiderio quodam ardente feruntur in actus virtutum, non tantum eos, qui aliquid honoris habent adjunctum, sed etiam qui videntur abjecti, & viles vel difficiles, & ardui. O quantum ab hoc ardore deficiis! sitis, sed *cisternas dissipatas mundi, quæ continere non valent aquas salutis*. Jerem. 2. Quam facile tibi desipit virtus, cujus exercitium est amarum. Visne servire, & placere Deo? in hoc consistit salus tua æterna. Excita ergo hanc sitim, sine qua languet omnis virtus.

2. *Quoniam ipsi saturabuntur*. Ibid. Olim, cum apparuerit gloria Dei. Psal. 16. In hac verò vita, quia nihil ultra desiderabunt. Per ipsum enim desiderium habent, quod desiderant, quia sic Deo serviunt, & placent. Item semper habent, unde faturentur, quia semper habent, ubi justitiam operentur, ubi Deo servant: *sive manducent, sive bibant, sive aliud quid faciant*. 1. Cor. 10. Nonne hoc ita vis? Nonne saltem velle, concupiscis? ô utinam à primo momento vitæ! *Deus det nobis cor omnibus, ut colamus eum, & faciamus ejus voluntatem, corde magno & animo volente*. 2. Machab. 1.

3. Bea-

3. *Beati misericordes.* Ibid. Tum corporali, tum spirituali misericordia, intentione pura, motivo virtutis, affectu amplo, etiam ad minimos se extendente. *Quoniam ipsi misericordiam consequentur:* olim quidem, quando te coronabit in misericordia. Psalm. 102. In hac vita verò per remissionem peccatorum, & abundantiam gratiarum. Quid diceres, si ante horam ivisses ad æterna supplicia, & revocareris ad vitam, vestireris gratiâ, ducereris ad cœlum? nōne magna esset misericordia? Hanc Deus toties exhibuit tibi, quoties peccatum remisit. Vide ergo, unde hanc misericordiam tibi certam facere possis.

F E R I A VI.

Sexta, & septima Beatitudo.

1. *Beati mundo corde.* Matth. 5. Ii dicuntur, qui, tametsi suas habent imperfectiones, procul tamen sunt ab omni gravi peccato, ac proinde vestiti gratiâ, qui ipsos affectus habent purgatos, & à creaturarum amore avulsos, & ad Deum conversos; qui minimas etiam imperfectiones, quantò possunt, studiò devitant, & toti, Deo adhærere connituntur. Inspice in hoc puncto statum animæ tuæ: quàm es à creaturis avulsus? quàm Deo unitus? quò studiò declinas imperfectiones? &c.

2. *Quoniam ipsi Deum videbunt.* Ibid. Olim quidem facie ad faciem, nunc autem per speculum in enigmate, sive in creaturis. Videbunt illum memoriâ præsentiæ ipsius, hinc delectatio etiam in adversitatibus: *memor fui Dei, & delectatus sum.* Videbunt contemplatione, & cognitione sublimium veritatum, & videndo amabunt, & aman-

do inhærebunt. Maxima hæc beatitudo hujus vitæ : sed quemadmodum ad claram Dei visionem nihil coinquinatum pervenit, ita neque ad istam pertingit anima immunda. Ut illam obtineas, velles in agone Angelo purior inveniri. Sic ergo quotidie vive, mundus esto, quia fortè hic dies est ultimus.

3. *Beati pacifici.* Ibid. Qui carnem spiritui, passiones rationi subjecerunt; qui cum proximo in pace vivunt, & charitate; qui alios componunt ad pacem, & conciliant. Quære hæc in te ipso. Si invenis, Deum lauda: sin minus, ab hodie illa cura tantò studiò, quantò cupis esse filius Dei. Nam isti *vocabuntur filii Dei*: qui est Deus totus spiritus sinè carne, totus ratio sinè passione, Deus pacis, & non offensionis, quò magis ad hanc similitudinem te credis accedere; tantò certius habes te esse filium Dei.

S A B B A T H O.

Octava Beatitudo.

1. **B***eat*i, qui persecutionem patiuntur propter justitiam. Matth. 5. Non autem propter sua delicta. Certum est, quòd omnes, qui volunt piè vivere in Christo Jesu, persecutionem patientur. 2. Tim. 3. Ergo, si non vis recedere à justitia, debes paratus esse mori magis, quàm patrias Dei leges pravari. 2. Mach. 3. Sed quis tibi tunc animus; cum vel sustinendum aliquid; vel virtus aliqua, aut regula est violanda? Prætendis te Jesum sequi, & hunc crucifixum, sed clavos non vis tolerare: ne quid patiaris, & virtutem, & regulam deseris. Aut fatere, te non imitari Jesum, aut patere.

2. Quo-

2. *Quoniam ipsorum est regnum cælorum.* Ibid. Tam consummatum in patria, quàm inchoatum in via: quod est *justitia, pax, & gaudium in Spiritu Sancto.* Rom. 14. Nam justitiam non potest perdere, qui mavult mala quæque tolerare, quàm vel unam regulam violare. Compara tibi hoc regnum, in quo est certitudo futuri. *Nihil horum timeas, quæ passurus es.* Apoc. 2. à mundo contradicente, à dæmone affligente, à carne adversus spiritum concupiscente.

3. *Beati estis, cum maledixerint vobis homines, & dixerint omne malum adversus vos, mentientes propter me.* Ibid. Quis neget beatum, cui Deus benedicit? nam *benedictio Domini divites facit, non sociabitur eis afflictio.* Prov. 10. At Deus benedicit iis, quibus propter justitiam mundus maledicit: *Benedictio Domini super caput iusti.* Prov. 10. *Maledicent illi, & tu benedices.* Malach. 2. Et tamen nonne amas, laudes, & benedictiones hominum; ergo eligis vituperari à Deo? an ignoras illud: *Væ, cum benedixerint vobis homines!* Luc. 6.

DOMIN. X. POST PENTEC.

De triplici qualitate Virorum Apostolicorum.

1. *Vos estis sal terræ.* Matth. 5. Natura salis, ait Plin. lib. 31. cap. 7. *est mordens, adurens, repurgans, extenuans, exsiccans.* Debet ergo homo Apostolicæ professionis quoad se esse in viâ purgativa perfectus, & alios prius per hanc viam ducere, quàm per illuminativam, & unitivam. Quid dicis de te ipso? quantum in hac viâ profecisti: nonne plus superest?

§ 2.

2. Vos

2. *Vos estis lux mundi.* Ibid. Secundus gradus viæ Apostolicæ nomine *lucis* exprimitur, & intelligitur via illuminativa, in qua perfectus esse debet, quoad se in praxi virtutum desumptarum ex vita, & doctrina Christi. Non sufficit enim purgatum esse, nisi & ornatus sit quoad se, & plenus virtutibus, ut aliis communicare possit, illuminando, errores dissipando, movendo animos. Habesne tu vel unicam virtutem in gradu perfecto? quot tibi desunt? quomodo iis studes, ut aliis apteris? quomodo talenta excolis? an ponis lucernam sub modio?

3. *Non potest civitas abscondi supra montem posita.* Ibidem. Unitiva hic exprimitur. Ut *civitas est multitudo civium per se sufficiens ad vivendum.* Arist. 3. Polit. ita perfecti, dum uni Deo inhaerent, sibi, & aliis abunde sufficiunt ad perfecte vivendum. Vide, an tuâ sufficientia sit unice in Deo? an soli illi, nihil creatoris adhæreas? an omnia in illum referas? an nihil extra illum quæras?

F E R I A II.

De bono exemplo dando ad gloriam Dei.

1. *Sic luceat lux vestra coram hominibus, ut videant opera vestra bona.* Matth. 5. Non omnia agi possunt in occulto, non omnia debent in aperto: at, quæ agis in aperto, sint bona, non apparenter, sed verè, ut *unusquisque proximo suo placeat in bonum ad ædificationem.* Rom. 15. Examina verba tua in communi conversatione, maxime coram minoribus, qui facile à majore discunt, an vana, jactabunda, &c. mores, quam compositi? facta, quam regulis consentientia?

2. *Et glorificet Patrem vestrum, qui in caelis est.* Ibid. Habes hic præscriptam intentionem cordis, quâ operandum est bene in aperto: primum quidem,

quidem, ut tu placeas Deo, deinde verò, ut Deus ab aliis glorificetur, quatenus agnoscitur auctor boni. Potes ergo & mutus gloriam Dei promovere. Detrahis gloriæ Dei, si quo hominum respectu non agis bonum in aperto, quod congruenter potes, aut debes. Examina ergo intentiones tuas, an huc tendant; & statue impofterum: *Ego autem ad Dominum aspiciam.* Mich. 7.

3. *Attendite, ne justitiam vestram faciatis coram hominibus, ut videamini ab eis.* Ibid. Prohibet quærere gloriam inanem. Maximam injustitiam facit, qui facit justitiam, ut videatur; qui usurpat sibi, quod Dei est, ipso invito, & prohibente. Est enim solus Deus *Rex & Dominus gloria.* Psal. 23. *Soli Deo honor & gloria.* 1. Tim. 1. Tu sine gratia nihil potes: Dei gratia est, *quæ operatur velle, & perficere.* Quod ex opere resultat, est gloria. Tu, qui nihil fecisti, voles omnem surripere Deo, qui totum fecit?

F E R I A III.

De exacta legis observantia.

1. *Non veni solvere legem, sed adimplere.* Matth. 5. Lex ante Christum non erat impleta, seu perfecta, venit, ut impleret, seu ad perfectiora deduceret: iussit enim illi addi animam, seu affectum internum; adjecit consilia, &c. Nobis verò adjecit merita sua, ex quibus est gratia ad facilius observandam legem. Vide, quid debeas Legislatori. Observa non esse satis, legem *non solvere*, sed oportet insuper *implere*, hoc est, cum perfectione opera regulæ exercere.

2. *Amen dico vobis, jura unum, aut unus apex non præteribit à lege, donec omnia fiant.* Ibid. Exem-

plum suum proponit, qui legem omnem, & ea, quæ de ipso scripta erant in Prophetis, exactissime usque ad minimum servare voluit; ita ut potius cælum, & terra sint peritura, quam ipse non impleat minimum. Esne tu ita ad legem Dei? ad regulas Religionis affectus? Conare omni modo, ut unus apex à te non prætereatur. Rem maximam procuras, si curas minima.

3. *Qui ergo solverit unum de mandatis istis minimis, minimus vocabitur in regno cælorum.* Ibid. Post propositum suum exemplum, quid à te exigit, insinuat, ut etiam minima mandata, & regulas serves. Nullum tam parvum malum, quod non inclinet ad pejus. Nota vocem; *Solverit*: insinuare, omnia mandata esse colligata; si solvis unum, venis facile ad dissolutionem plurium. Vocat *minima*, ut facilitatem observandi doceat. Hæc te moveant, ut attendas minimis; &, si spernis modica, time, ne paulatim decidas.

F E R I A IV.

De studio legis observandæ.

1. *Nisi abundaverit justitia vestra plusquàm Scribarum, & Phariseorum, non intrabitis in regnum cælorum.* Matth. 5. Plura à Christianis exigit Deus, & sublimiora, quam exegerit à Judæis. Illis sufficiebat cortex legis, opus imperatum ponere, vel non ponere prohibitum: a nobis operis anima, seu affectus desideratur; quia majores gratias dat. Hinc colliges etiam majora exigere à Religioso, quam à Sæculari, ob eandem causam. Pudeat te, quod a tot Sæcularibus in virtute supereris. Time, ne Deus gratias subtrahat non cooperanti. Æmulare charismata meliora.

2. *An-*

2. *Audistis, quia dictum est antiquis, &c. Ego autem dico vobis.* Ibid. Expende, quantum in omnibus excellentior sit lex gratiæ lege antiqua. Nam 1. rudioribus data, solum crassiora prohibebat: hæc etiam minuta. 2. Illa in exterioribus hærebat, hæc medullas animæ petit. 3. Illius observationi præmium temporale dabatur: hujus æternum. Gratias age, quod te Deus ad hanc legem reservaverit. Non siste in cortice legis, sed medullam observa.

3. *Estote ergo vos perfecti, sicut Pater vester celestis perfectus est.* Ibid. Ita est ille perfectus, ut omnis sit in illo perfectio, nulla autem, sed nec minutissima imperfectio. Si cures, ut nulla sit in te imperfectio, curabis, ut sit maxima perfectio. Curabis enim, ut summè diligas Deum, in quo est summa perfectio; & diligaris ab eo, in quo est summa felicitas. Nam quò minus de proprio, aut imperfectione admisceas operi, tantò purior est charitas, ex qua operaris. Habes ergo in manu tua & perfectionem, & felicitatem tuam. Sed quàm multa tibi tollenda est imperfectio.

F E R I A V.

De tollendo scandalo.

1. *S* *I oculus tuus dexter scandalizat te, erue eum, & projice abs te.* Matth. 5. Per oculum Superiores, qui sunt majoris auctoritatis, intelligit S. Chrysost. Hi scandalo tibi esse possunt, si humano eorum ducaris respectu, si, quod agunt illi contra regulam, sumas in exemplum, si ex eorum affectu regulam transgrediaris. Perpende, qualis sis in eo genere. *Erue* hunc oculum, mortifica hunc affectum. Regulam attende potius, quæ a Deo est,

quàm exemplum, quod ab homine. Si non sufficis tollendo, manifesta, cui debes, habebis auxilium,

2. *Si dextera manus tua scandalizat te, abscinde eam, & projice abs te.* Ibid. Per manum propinqui, & æquales intelliguntur, in quos plerumque affectus solet esse major, quia amor est inter æquales ut plurimum. Scandalo tibi esse possunt familiaritate nimia, aut particulari, frequente visitatione, colloquio, blanditiis, ex quibus animus tuus sensim emollitur, & tepet in amore Dei. *Abscinde conversationem, colloquia, &c.* Et plus cum Deo versare,

3. *Si pes tuus scandalizat te, amputa eum.* Ibid. Per pedem inferiores intellige, filios spirituales, discipulos, subditos. Scandalo tibi sunt, si ex nimio affectu plus æquo indulges, eorum culpas dissimules, aliis præferas cum illorum offensa, inutiliter cum iis verferis, &c. Agnosce, quam periculosus sit hic affectus, quia ut plurimum specie pietatis tegitur, ut vix agnoscatur, donec pereas. Adde, quod sic causa esse possis, ut alter pereat, & anima ejus de manibus tuis requiratur.

F E R I A VI.

De dilectione inimicorum.

1. *E*rgo autem dico vobis: diligite inimicas vestras. Matth. 5. Quis? qui prior dilexit nos. 1. Joan. 4. Et cum inimici essemus, reconciliavit nos Deo per mortem suam. Rom. 5. Cogita, quod inimicus, sit creatura Dei, ut tu; quod, si Deum Patrem habes, ille sit frater tuus: quod sit ad eundem tecum finem ordinatus, eodem sanguine redemptus. Dilige eum propter te, quia tibi utilis est, quia te exercet ad gloriam, quia si dimittis illi, dimittet & tibi Deus. Et cui noces, si ode-

si oderis, nisi animæ tuæ? quia majus est tibi malum ipsum odium, quàm quòd ab illo tibi inferatur. Dilige, & diligèris à Deo.

2. *Benefacite his, qui oderunt vos, & orate pro calumniantibus vos, Ibid.* Ad cordis affectum, adjicienda est oris, & operis dilectio. Non satis est non odisse, sed mandat *diligere*. Dilectio autem non est otiosus affectus: sed opere demonstratur. Quid facis ei, qui te oderit, qui calumniatus fuerit? Non reddis pro malo malum? quid loqueris de eo? sequerisne Paulum, *maledicimur, & benedicimus*? Sequerisne Christum, qui orabat pro crucifixoribus?

3. *Ut sis filii Patris vestri, qui in cælis est, Ibid.* En quid lucraris inimicorum dilectione? Vis filius Dei esse? habes expeditam ad hoc viam; *Dilige inimicum*. In quo scies, quòd sis filius Dei, nisi fueris similis Deo, ait S. Chrysost. in imperf. hom. 31. *Hic nonne solem suum oriri facit super bonos, & malos? Non te conservat, dum tu eum offendis? non dimittit toties tua peccata?*

S A B B A T H O,

Dispositio ad orandum, & prima petitio.

1. **T**U autem, cum oraveris, intra in cubiculum tuum, & clauso ostiò ora Patrem tuum. Matth. 6. Ut recte ores, secedendum est à strepitu, & corpore, & animo. Objecta movent sensus, sensus sunt fenestras animæ: si patent, omnis aura ingreditur. In solitudine loquitur Deus animæ ad cor. Ita Christus oraturus secessit ad montes. Multo autem magis secede à tumultibus animæ. Unica passio mota, alias de Deo cogitationes non admittit. Hinc collige, unde tuarum orationum tam modicus

S ;

fru-

fructus, quia nec sensus compescis, nec animæ motus. Ut in oratione sis ita compositus, debes extra tempora orationis huic compositioni asuescere.

2. *Sic autem orabitis : Pater noster, qui es in cælis.* Ibid. Hic omnis orationis sit ingressus, ut cogites, quem ores. *Patrem :* Hinc reverentia, fiducia, & amor comites orationis. Nonne tibi meritò exprobrat Deus : *Si ergo Pater sum, ubi est honor meus?* Malach. 1. Quàm indignus tu tanti Patris filius. Hinc humilitas, tuique abjectio. *Noster.* Ergo omnes sumus ejus filii, ergo omnes fratres, ergo omnes à te amandi, ergo ingratum est munus, quod offers, nisi ames. *Qui es : & solus quidem es.* Hinc magna Dei æstimatio. *In cælis.* Hinc fervor, cum oratio tua usque ad cælos penetrare debeat. Hinc scopus petitionum in cælis, ut non petas terrena, Hæc omnia in te examina, & sic statue.

3. *Sanctificetur nomen tuum.* Ib. Hoc primum est ex omnibus desiderandis, ut agnoscatur ab omnibus Deus, colatur, eique uni serviatur : æstimetur ejus sanctitas, ametur ejus bonitas, timeatur ejus justitia, subdatur ejus potentiæ omnis creatura. Atque hic est finis noster, ad quem omnia, & singula debemus dirigere. Nonne hoc verbis solum petis, factis autem per superbiam evertis? quid petis, dum te tantopere æstimas, & æstimari quæris? *Non nobis Domine, non nobis, sed nomini tuo da gloriam.* Psal. 113.

DOM. XI. POST PENTEC.

Secunda, & tertia petitio.

1. *A* *Dvenias regnum tuum.* Matth. 6. Petis, vel ut Deus regnet in te : *Regnum Dei intra vos est.* Luc. 17. Vel ut ubique gentium : *Domini est regnum, & ipse dominabitur gentium.* Psal. 21. Vel pro-

proprie regnum Beatorum per felicem mortem obtinendum : quò simul indicas, te jam paratum esse, nihil esse, quod te remoretur. Sentisne verè id animo ? an tibi, & Deo illudis ? Non te remoratur amor vitæ ? non affectus terrenorum ? Explora, hòc momentò moriendum est : quid dicis ? Hòc momentò renunciandum est omnibus : quid sentis ?

2. *Fiat voluntas tua.* Ibid. Quid justius ? Illa est regula nostræ voluntatis : abusus est nostræ, si cum illa non consentit ? Dominus, & Pater noster est : *Omnia, quæ præceperit Dominus noster Rex, libenter exequemur, servi tui.* 2. Reg. 15. *Omnia, quæcunque præcepisti mihi, faciam Pater.* Tob. 5. Facisne, quod verbò dicis ? facis voluntatem Dei absolutam, per legem, & regulas intimatam ? Exples voluntatem beneplaciti in iis, quæ quidem non imperat, sed scis ei placere ? an potius vivis voluntate, & placito tuo, ac passionum inclinatione ?

3. *Sicut in cælo, & in terra.* Ibid. • Modum hic petis faciendæ in terra voluntatis Dei, sicut fit à Beatis. Et cur minùs à nobis ? An quia liberi sumus ? Ergo *velamen habebimus malitiæ, libertatem ?* 1. Petr. 2. At quomodo fit in cælo ? Ex puro Dei amore, promptissime, in omnibus, sine discussione. Reperisne hæc omnia in anima tua ? Quid si Deus per Superiores ardua imperet, & sensui contraria ? O miser ! quam parùm hic voluntatem Dei respicis.

F E R I A II.

Quarta, & quinta petitio.

1. *Panem nostrum supersubstantialem da nobis hodie.*

Matth. 6. Petis corpori, & animæ alimoniam, tanquam *mendicus ante fores divinæ gratiæ.* Corpori quidem *panem*, non luxum, non delicias,
ut

ut habentes, quò alamur, hòc contemni simus. Si ita petis, communi, eoque frugali victu contentus eris. Si deterior obtingat tibi, cogitabis te mendicum accipere illud de manu Dei: Animæ verò, vel verbum Dei, in quo vivit homo, vel Sacratissimam Eucharistiam, quam, etsi non sumis hodie, petis tamen hodie per communionem spirituales. Ergo sic vive, ut merearis quotidie accipere.

2. *Et dimitte nobis debita nostra.* Ibid. Quanta tu debita contraxisti. 1. Totum, quod es, illi debes, à quo totum habes. S. Bern. 2. Talenta naturæ, & gratiæ Deo debes. Quàm ingratus es, si eis ad offendendum abuteris, quæ tibi dedit, ut amares. 3. Peccata enorme sunt debitum, quod solvere non potes, nisi ex meritis Christi. Agnosce te peccatorem, unde te humilies; sed Deum misericordem, unde ad fiduciam erigaris. Sed, qui deprecaris hodie, noli hodie iterum debita contrahere.

3. *Sicut & nos dimittimus debitoribus nostris.* Ib. Conditio est: petis non dimitti tua, si non dimittis aliena. Si enim dimiseritis hominibus, dimittet vobis Pater vester. Ecce bonitatem Dei! In tua potestate futurum de te iudicium ponit, ait S. Chrysost. At Deus dimittit statim, cùm rogatur, prævenit rogantem gratia excitante, dimittit plene, toties, quoties rogatur. Hòcne modo etiam tu dimittis? an statim? an sol occidit super iracundiam tuam? an prævenis alloquendo? an ais: non teneor illi loqui? an toties, quoties? an ais: non semel, sed multoties id mihi fecit? an plene? an dicis: non odi illum, sed non possum ei esse familiaris?

F E R I A III.

Petitio sexta, & septima.

1. **E***t ne nos inducas in tentationem.* Matth. 6. Contra tracta debita elui petivisti; petis, non contrahere nova. Versaris inter hostes potentissimos homo fragilis, & concupiscētiis tuis assidue pulsaris. Unus tibi non sufficit: auxilium postulas, ut resistas. Examina, quæ tuæ, quam periculosa sint tentationes; & cogita de mediis obfistendi. De grātia non dubita, eam *Deus facienti, quod in se est, non negat.* Sed adverte: facienti, quod in se est.

2. *Et ne nos inducas.* Ibid. Non petis non tentari, sed non vinci. Tentari sæpe prodest, & ad meritum, & ad humilitatem, & ad fiduciam in Deum. Vinci, aut non vinci in tua est libertate. Sed Deum irrides, si petis sic uti, & libere te ipsum inducis in tentationem: non minus, quam qui se ipsum in fluvium præcipitaret, & oraret Deum, ut non maderet. Non ergo serio petis, nisi te ipsum abducas ab his, per quæ induceris ad consensum.

3. *Sed libera nos à malo.* Ibid. Qui nullum specificat, omne malum intelligit, prout adversatur salutis: sive id sit corporis, sive animæ. Quamquam corporis mala, non sint ex se, sed ex fragilitate tua salutis adversa. Vide, ne opere obfistas ei, quod petis, per tuam acediam, aut teporem: forte vis, & non vis piger? forte procrastinas, aut fingis impossibilitatem; aut dicis: *Leo est foris.* Prov. 22. & ideo manum non adhibes?

F E R I A IV.

Non thesaurizandum in terra, sed in coelo.

1. **N***olite thesaurizare vobis thesauros in terra.* Matth. 6. Id est: *Nolite diligere mundum.*

1. Jo-

1. Joan. 2. Intellige ergo de concupiscentia carnis, oculorum, & honoris. Et quare? quia mors, ut *tinea demolitur*, & ut *fur effodit*. Ut amorem trahicias ad futura, memineris migrandum à præsensibus. Inde illa nondum constanter amas, quia his nimium afficeris. Sed, si *hac nocte repeant animam tuam à te*, hæc, in quibus quiescebas; *cujus erunt?* quid proderunt? imò quantum oberunt!

2. *Thesaurizate autem vobis thesauros in celo.* Ib. Ibi est patria tua; illuc migrandum est; nisi præmittas thesaurum, æternum exulabis. Non est ibi comparandus: sed hic colligendus, eò transmittendus, ut te expectet, & eò fruaris. At non parum transmittendum est: *thesaurus* sit oportet, & magna, ac pretiosa copia. Conclude ergo 1. Nul- lum tempus, aut occasionem bene agendi præter- eundam. 2. Magnis, ac eximiis operibus instan- dum.

3. *Ubi est thesaurus tuus, ibi est cor tuum.* Ibid. Quod æstimas, hoc amas, huic cor affigis. Amor enim æstimationem sequitur. Amans autem fit id, quod amat; terrenum, si terram; cœleste, si cœlum; Divinum, si Deum. O infelix, si *sta- uis cor tuum declinare in terram!* O insane, si amo- rem, quo unico pretio Deum tibi potes compa- rare, expendis ad emendum lutum! Intelligis hoc, & tamen adhuc cor tuum affigis creaturis.

F E R I A V.

Oculus simplex, & nequam.

1. *L*ucerna corporis tui est oculus tuus. Matth. 6. Oculi nomine intelligitur Superior. Ut oculus dirigit gressus, & alias operationes corpo- ris, ita Superior te. Ad oculi ductum sequuntur mem-

membra: quomodo tu Superioris ductum? Non utitur imperio oculus, non vi coactiva, non minis in membra, & tamen sequuntur. Superior tibi à Deo oculus datus est. Hunc crede colores discernere, te passionibus excœcari. Assentire vel nutui. Examina te circa reg. 33. Summarii.

2. *Si oculus tuus fuerit simplex, totum corpus tuum lucidum erit.* Ibid. Oculi nomine intellectum intelligit S. Chrysoft. hom. 15. in imperf. Hic *simplex* sit oportet, id est, non obfuscatus, non erroris principiis imbutus, quæ à mundo, & carne suggeruntur: tum omnis actionum series lucida, & Deo placens erit. Ab intellectu enim ducitur voluntas. Vide, quæ sint tua principia; an simplicia, ad unum Deum tendentia? an duplicia, ad Deum, & propria commoda? Conare puris, veris, & simplicibus, Deoque consentientibus principiis intellectum imbuere, & mundo, & carni non acquiescere.

3. *Si oculus tuus fuerit nequam, totum corpus tuum tenebrosum erit.* Ibid. Oculi nomine intentionem intelligit. S. August. lib. 2. de serm. D. Hæc semper nequam est, quoties aliud respicit, quam Deum. Sicut servus nequam, qui suo Domino detrectat obsequia, alteri impendit; multò magis, si hosti. At tu hoc facis, quoties respicis vanitatem, & magis tua commoda, quam Dei gloriam. Expende ergo necessitatem, & utilitatem puræ intentionis. Fac, ut hic oculus sit simplex, & purè in Deum propter Deum tendat.

F E R I A VI.

Non serviendum duobus Dominis.

1. **N**emo potest duobus Dominis servire. Matth. 6. dum diversa, aut contraria imperant. Duos habes

habes Dominos; unum legitima, alterum arrogata potestate; Deum, & sensum Deo rebellantem. Infelix homo, qui hunc non Dominum, sed tyrannum pateris, te quovis momento prementem! Sed infelicior, quod sponte pateris! Elige nunc, cui servias. Quid frustra tentas utrique, quod *nemo potest*. Dic ergo Deo: *Servus tuus sum ego*.

2. *Unum odio habebis, & alterum diliges*. Ibidem. Causa, cur non possis his duobus servire, est, quod contraria imperent: unus ea, quæ amas, alter ea, quæ odisti. Quis possit contraria jubentibus eodem tempore parere? Quid jubet Deus? sensum opprimere, cupiditates frangere, &c. Quid sensus? sibi indulgere, frui creaturis, &c. Non potes ergo servire utrique. Ergo legitimum adora, te ei devove: & *subter te sit appetitus tuus, & tu dominaberis illius*. Gen. 4.

3. *Unum sustinebit, & alterum contemnet*. Ibid. Altera causa est ex parte tua; quia non potes simul idem velle, & nolle; deberes hoc, si utrique servires. Deberes nolle servire tuis cupiditatibus, quia unus sic habet; deberes velle eisdem servire, quia alter imperat. Alterutri ergo renunciandum est: Elige, quem vis? Ipsa nomina Dominorum sufficiunt, ut determines.

S A B B A T H O.

Ponenda temporalium sollicitudo, Regnum
Del quærendum.

1. *Deo dico vobis, ne solliciti sitis animæ vestræ, quid manducetis, neque corpori vestro, quid induamini*. Matth. 6. Nimiam circa corpus, & ejus necessaria sollicitudinem prohibet: quia non minus inutilis est, quam si quis vellet *adjicere ad staturam suam*.

suam cubitum unum. Quia cura hæc nimia derogat curæ animæ, quæ potior esse debet: *Nonne anima plus est, quàm esca?* Quid ergo sollicitus es tantopere de loco, de functione, de tuis commoditatibus? Quò plus angeris circa ista, minùs animæ provides. Et quàm parvam habes curam animæ? Expende, quantò pluris sit anima.

2. *Scit enim Pater vester, quia his omnibus indigeas.* Ibid. Docet horum curam Deo remittendam, qui pascit aves, qui vestit lilia. Ille enim scit, non scientiâ speculativâ, sed scientiâ paternæ providentiæ. Tua sollicitudo hic, aut ibi sanius vivendi, hoc, aut illud munus ob sanitatem non suscipiendi, est argumentum diffidentiae. *Nonne hæc omnia gentes inquirunt, quæ fidem non habent?* Conjice te ergo in providentiæ Divinæ sinum, quoniam ipsi cura est de te. 1. Peir. 5.

3. *Quærite ergo primùm regnum Dei, & justiciam ejus.* Ibid. Regnum Dei est gloria ejus, & beatitudo nostra. Justitiæ verbò nomine intelliguntur media à nobis ponenda. Huc ergo prima vertenda cura: alias curam hujus postponis alteri curæ. Sed si postponis, certò non acquires. Non potest enim Deo placere, si minoris æstimes, quæ ipse mandat pluris æstimanda. Unde fit, ut gratias subtrahat. Deinde tu ipse in id magis laboras, quod pluris æstimas. Si ergo sit alterius rei, quam regni cælorum potior æstimatio, in eam convertes laborem. At nonne stultum est Dei gloriæ, & cælo aliud præponere? Sit ergo prima tua cura, quàm Jesus mandat. In finem, ad quem creatus es, respice, in media indefesse incumbe.

DOMINICA XII. POST PENTEC.

Vitandum judicium temerarium.

1. **N**olite judicare, ut non judicemini. Matth. 7. Deus non te creavit judicem alterius, sed socium. Pater omne judicium dedit Filio, qui judicat, ejus jurisdictionem sibi arrogat. Justitia postulat, ut, qui non probatur malus, præsumatur bonus esse. Charitas exigit, ut, quidquid potes, in meliorem partem interpreteris. Vide, quantum peccetur unô judiciô temerariô. Examina te ipsum, an & tu judicium Dei tibi arroges. Melius feceris, si te ipsum judicaveris, ut non judiceris.

2. In quo enim judicio judicaveritis, judicabimini. Ibid. Hæc pœna est temere judicantium. Justo judicio permittit Deus, ut pariter tales aliorum judicio patiantur. Imò, ut in eos defectus incidant, quos aliis appingunt: *Quid judicas fratrem tuum: omnes stabimus ante tribunal Christi.* Rom. 2. & tantò rigidiùs feremus judicium, quantò rigidiùs proximum quisque judicaverit. *Inexcusabilis es ô homo omnis, qui judicas.* Quid graviùs? Time ergo Dei judicium, & cum unusquisque hominum pro se redditurus sit rationem. Ibidem. Causæ tuæ disponendæ potius invigila.

3. Hypocrita, ejice primùm trabem de oculo tuo, & tunc videbis ejicere festucam de oculo fratris tui. Ibid. En remedium tollendo judicio: tuos ipse defectus inspice: si bene perpendas, graviore invenies. *Tuorum tibi conscius peccatorum, quomodo potes de alterius judicare peccato.* S. Ambros. in Psal. 118. si re ipsa bonum est, quod malum judicas, agnosce, quanta tua sit sic judicantis malitia; si dubium est, quare in pejus interpretaris! si aperte malum est,

excu-

excusa intenzionem, si opus non poret, ait S. Bernard. serm. 4. in Cant. Puta ignorantiam, puta subreptionem, puta casum.

F E R I A II.

Commendatur Oratio.

1. *P*etite, & dabitur vobis; querite, & invenietis; pulsate, & aperietur vobis. Matth. 7. Medium hoc est ad gratiam, & ad gloriam. Eges gratiâ? *pete* per humilem orationem; *quære* per debita media orationi conjuncta, *pulsa* per longanimitatem. Hinc tuam orationem inspicere, qualis sit: an satis humilis? an ex agnitione propriæ miseriæ procedat? an ita quæras? Petis fortè humilitatem, sed non vis humiliationem: Paupertatem, sed non vis ullum rerum defectum: Patientiam, sed non vis doloris sensum, &c. Hoc verò ipsum est idem velle, ac nolle, petere, ac rejicere. Agnosce tuam stoliditatem, deprecare, & statue id observare: Si *queritis, querite; convertimini, & venite.* Isai. 21.

2. Omnis enim, qui *perit, accipit; & qui querit, invenit; & pulsanti aperietur.* Ibid. Hic effectus orationis est certus, & infallibilis, quia Deus promissit. Crede, & confide: modo velis ordinata voluntate, hoc est, id, quod vult Deus: quia, si aliud velis, vis, ut ægrotus, quod nocet. *Quodcumque petierimus secundum voluntatem ejus, audit nos.*

1. Joan. 5. At hoc semper obtinebis, seu concedat Deus, quod petis, seu neget: dat enim æquivalens, quod magis prodest. Forte non sic orasti, sed divinam ad tuam flectere, non tuam divinæ voluntati subdere voluisti. Grandis hic error est; non fiducia, sed præsumptio.

3. Si vos, cum fratribus malis, nostris bona data dare filiis vestris, quando magis Pater vester dabit bona petentibus se. Ibid. Argumentum hoc est, quod nostram firmat fiduciam Divina bonitas, & ejusdem amoris in nos propensio Paterna. Filios per adoptionem nos suos fecit, se Patrem. Ut Deus, & Pater scit, potest, & vult, quod nobis prodest. Nec aliud velle potest, nisi nos eum cogamus. Nonne id millies in te prestitit? Quantum tam bono Deo debes? Quid posthac in eum fiduciam concipies?

F E R I A III.

Angusta, & spaciofa via.

1. **L**ata porta, & spaciofa via est, quae ducit ad perditionem. Matth. 7. Homo, dum vivit, in via est, non in termino. Sed in via quam multi errant! O miseri in æternum! Est via, quae videtur homini iusta, & novissima ejus deducunt ad mortem. Proverb. 14. Via lata est, quae non constringitur lege Dei, & ratione; & abit in effusionem sensuum. O quam multi ambulant per eam! O anima mea, quamdiu ambulasti hanc viam! regredere tandem ab errore: arcta concupiscentias tuas intra terminos Legis, ac rationis; prospice, quia via cupiditatum tuarum, in qua es, ducit ad perditionem.

2. Quam angusta, & arcta est via, quae ducit ad vitam, & pauci inveniunt eam. Ibid. Via coeli angusta est, quia non admittit id, quod libet, sed quod licet: non potes per eam ire cum jumentis tuarum passionum, cum sarcinis cupiditatum: solus cum solo Deo incedere debes. Non admittit dilationem pompæ, non comitatum honorum. Abrenunciandum omnibus, si hanc ingredi velis. O miser, tandem adverte, quam procul ab ea fueris. Pauci

inve-

inveniunt eam, & tu non fuisti inter illos : Fatuus splendor rerum terrenarum perstrinxit tibi oculos animi, passionibus excœcârunt, ut non videres!

3. *Contendite intrare per angustam portam.* Luc. 13. Per latam ut eas, non est contendendum, naturali impetu raperis. O misera conditio tua, nisi in adversum labores. Per angustam ut penetres, magna contentione est opus, vis tibi inferenda, ut seriô velis, seriô opereris; detruncandæ passionibus, & affectibus ad creaturas; abjiciendæ sarcinæ honoris, & amoris proprii, &c. Visne hæc? ut velis, respice finem, quia hæc ducit ad vitam.

F E R I A I V.

Cavendum à falsis Prophetis.

1. *A*ttendite à falsis Prophetis. Matth. 7. Seu Doctoribus. At qui sunt hi? in teipso, concupiscentiæ, pravi affectus, amor proprius, & creaturarum. Quantæ ab his falsitates? bonum esse, æstimari; malum, contemni: bonum, solatia à creaturis captare, malum, negligere, &c. Extra te sunt, dyscoli amici, quorum exempla sequeris; tanquam faces veritatis, à quibus discis Superioribus resistere, parva non æstimare, tibi indulgere, &c. Et nonne horum Doctorum principia es secutus? sed quô tuô damnô? volésne etiam impostum.

2. *Veniunt ad vos in vestimentis ovium, intrinsecus autem sunt lupi rapaces.* Ibid. Nullum malum aperta facie venit, sed speciem boni induit. Quàm facile ergo illudit, nisi intellectus sit purus, & defœcatus, & fidei, ac virtutum principiis assentiat: nisi animus contra laxorum verba, & exempla sit obfirmatus. O miser! nonne expertus es

lupos, quos credebas esse oves: saltem nunc damno tuò sapiendum est. Non attende imposterum, quid blandiatur externe, sed quid in re ipsa sit, quò ducat, quid sequatur.

3. *A fructibus eorum cognosceris eos.* Ibid. Sicut arborem nòsti. Expende nonnihil, quos in te tulerit fructus amor tui, amor creaturarum, nonne eos, quos Deus nauscat? quos tulerint familiaritates laxorum? nonne eos, qui in tua conscientia vermem alunt? Agnoscis hoc, & non emendas? Time, ne excidaris: *Nam omnis arbor, quæ non facit fructum bonum, excidetur, & in ignem mittetur.* Ibid.

F E R I A V.

De facienda Dei voluntate.

1. **N**on omnis, qui dicit mihi: Domine, Domine, intrabit in regnum cælorum; sed, qui fecerit voluntatem Patris mei. Matth. 7. Non probat eos

1. Qui opera quædam præstant ex se bona ex devotione, sed omittunt ea, quæ sunt ex obligatione. 2. Non probat, multa dicere, & pauca facere, multa de Deo cognoscere eximia, & pro illo pauca velle. Nonne ex horum numero es? scis, & dicis de Deo, de virtute multa: sed quid præstas? in angustiis clamas: Domine, Domine: sed quid adhibes tuæ operæ?

2. *Qui fecerit voluntatem Patris mei, qui in cælis est, ipse intrabit in regnum cælorum.* Ibid. Effatum est infallibile: alia viâ non intrabis, quàm faciendo voluntatem Dei. Sed quæ est voluntas Dei? hanc per Superiores indicat. *Qui vos audit, me audit.* Luc. 10. Hanc regulæ manifestant, quæ non sunt inventum hominis, sed Dei. *Nisi custodieris; & feceris omnia verba Legis, augebit Dominus plagas tuas,*

tuas , quoniam non audisti vocem Domini Dei tui. Deut. 28. Vide , num facta tua voluntati Dei consentiant. Quomodo te habes ad Superiorum dispositiones ? quomodo ad regulas ?

3. *Multi dicent mihi in illa die : Domine , Domine , nonne in nomine tuo prophetavimus , & demonia eiecimus , &c. Ibid. Tunc confitebor illis : quia nunquam novi vos.* Docere , peccatores absolvere , motus magnos in populo ciere , sunt gratiæ gratis datæ. Si hæc tantum ad Deum adferas , audies : *non novi vos.* Ergo aliud à te postulat Deus , quod aliquò modò tuum sit , tuam cooperationem , tua merita. O quam egenus es hætenus ! Itane coram Deo comparebis ? Adde , quod potes : nam *exsi feceris , quidquid potes , adhuc servus inutilis eris.* Deus tamen non ultra id , quod potes , à te exiget.

F E R I A VI.

Mundatur Leprosus.

1. *E*Cce Leprosus veniens , adorabat eum , dicens : *Domine , si vis , potes me mundare.* Matth. 8. Confitetur Dominum , credit omnipotentem , fatetur voluntatem potentiæ æqualem ; neque ait : munda me : sed desiderium sanitatis ejus voluntati submittit. Agisne ita cum Deo tuo ? exercēsne actum fidei , cum quid petis ? credisne esse Dominum ; posse tibi pro arbitrio concedere , vel negare ? subjicisne te , & petita tua ejus dispositioni cum plena resignatione ? Ita verò agendum , alias petis , quod non vult.

2. *Extendens Jesus manum , tetigit eum , dicens : Volo mundare.* O prompta Jesu mei benignitas ! O si , dum me in S. Eucharistia tangit , dicat : *Volo mundare à lepra animæ tuæ.* Ostendit se æquè

velle, quod rogatur, ac potest. Ergo in iis, quæ spectant ad salutem animæ, *non dicas, per Deum abest*, Eccl. 15. Non dicas, vellem, sed Deus non dat mihi gratiam. Non dat? an quia non potest? Hoc non credis. An quia non vult? falsum est: Non vult quidem per miraculum, vult tamen cum conditione tuæ cooperationis. Tuum ergo est conditionem implere, ut absolute obtineas. At hic est infirmitas tua.

3. *Et confestim mundata est lepra: Et ait illi Jesus: Vide, nemini dixeris*, Ibid. S. Ambr. lib. 5. *Præcipitur, inquit, nemini dicere, ut doceret, non vulganda nostra beneficia*. S. Chrysost. hom. 69. ait: *Docens, quàm esset alienus ab aura gloriæ, & jactantia pompa?* Disce hoc & tu; noli aucupari inanes ventos: noli teipsum prædicare, sed Jesum, à quo habes, si quid in te est, quod laudem meretur.

S A B B A T H O.

Sanatur servus Centurionis.

1. *Accessit ad eum Centurio, rogans eum: Domine, puer meus jacet in domo paralyticus, & malè torquetur*. Matth. 8. Dominus orans pro servo, confundit eos, quibus est potior cura canis, quàm servi. Hoc tu indignum reputas, sed æquè indignum est, quòd potior sit tibi cura corporis, quàm animæ. Nonne hæc jacet paralytica? scis, quid agendum; sed, ut agas, non est nervus generosæ voluntatis. Hujus defectu quàm parùm es progressus? Nec plus spera, nisi emendes.

2. *Ait illi Jesus: Ego veniam, & curabo eum*. Ib. O prompta Jesu mei benignitas! vides infirmitatem meam Domine: dic etiam mihi; *Ego veniam, & curabo eum*. Discam proximi mei necessitatibus,

bus, ac morbis promptè advolare. Respondens Centurio, ait: *Domine non sum dignus, ut intres sub tectum meum.* Agnosce viri humilitatem; Concipe vilem de teipso opinionem, non ægrè feras contemni. Quod quisque de se sincere judicat, ab aliis judicari, & dici non horret. Quid dicis, quando Jesus sub tectum animæ tuæ venit? sed quamdiu durat sensus ille humilitatis? O turpis in toties repetito proposito inconstantia!

3. *Jesus miratus est, & sequentibus se dixit: non inveni tantam fidem in Israël.* Ibid. Miratur fidem Gentilis hominis; præfert eam Judæis cognitione Dei illuminatis. Addit multos venturos ab Oriente, & Occidente ex gentibus ad Regnum Dei, & filios ejiciendos. Quot sunt ex iis ipsis, quos tu contemnis, qui te virtute superant? Amore, & æstimatione tui deciperis. Time, qui per vocationem religiosam destinatus es filius regni, ne excidas, & alius subintret. *Vade, & sicut credidisti, fiat tibi. Et sanatus est puer in illa hora.* Vide, quid possit fiducia cum humilitate apud Deum.

DOM. XIII. POST PENTEC.

Filius Viduæ suscitatur.

1. **C**Um appropinquaret portæ civitatis, ecce defunctus efferebatur, filius unicus matris suæ; & hæc vidua erat. Luc. 7. Filius unicus ætate & opibus floridus inopinatò moritur. Quis vitæ fidat? Hoc adolescentibus cogitandum sæpe. Plures moriuntur juvenes, quàm senes; sed sæpe imparati; quia spes vitæ, quæ lactat, decipit. Quid si hæc esset hora migrandi? Hoc age, quod ageres, si certò id scires. Intervenit Jesus, non casu, sed de-

T 5

stina-

stinatò. O bonitas ! quoties & tecum id egit ? offendit eum *in porta civitatis* , ubi olim judicia celebrabantur. Mors porta æternitatis est. Hic judicaberis. O Jesu hìc adsis !

2. *Dominus misericordiâ motus , dixit illi (matri) Noli flere.* Ibid. Habes anima mea Deum , cui proprium est misereri. In hoc figenda spes : ab hoc solo petendum solatium. *Noli flere.* Quæ defles perditâ , amâsti possessâ. Quid amas , quæ pereunt ? flebis olim amâsse. Id ama , quod est æternum , quod perdere non potes , nisi sciens rejicias.

3. *Et accessit , & tetigit loculum ; & ait : Adolescens , tibi dico , surge.* Ibidem. Hæc in animam tuam per peccatum mortuam agit Deus. *Accedit* per gratiam prævenientem. Unde enim alias de tuo resurgeres ? *Tangit* te , vel timore , vel spe futurorum. *Inclamat* per tot inspirationes , *surgere.* Ecce , opus Dei est , quod resurgas. Jam autem , quid tuum adverte. 1. *Hi autem , qui portabant , steterunt.* Animam tuam portabant indomitæ passiones : jam stare illas oportet , & reprimi. 2. *Resedit , qui erat mortuus :* debes te erigere ad æterna. 3. *Et cepit loqui cum Christo , gratias agere , laudare , &c.*

F E R I A II.

Joannis Baptistæ ad Christum Legatio.

1. *Joannes mittens duos de Discipulis suis , ait illis : Tu es , qui venturus es ? an alium expectamus ?* Matth. 11. Unde mittit ? ex carcere. Ergo nec in periculo capitis omittit officium sibi demandatum. Quæ molestia tam levis , quæ cogitationes tuas non avocet à Deo ? 2. Non sui causâ quærit ,

rit, qui Christum jam digito demonstraverat, sed Discipulorum, ut eis ansam præbeat, illi adhærendi. En zelus animarum, & dexteritas lucrandi.

3. Quære etiam ex te, an Jesum, an alium expectes? an spem tuam ex integro in eo ponas? an in creaturis? &c.

2. *Euntes renunciate Joanni, quæ audistis, & vidistis.* Ibid. Quid hoc ad quæstionem? seipsum esse, non verborum jactantia, sed rerum exhibitione probat. Eo ipso enim tempore, quò aderant Joannis Discipuli, curabat cæcos, claudos, leprosos, surdos, excitabat mortuos, & pauperibus prædicabat. His factis respondet. Proferis te imitari Christum? operibus hoc probandum est, non nudis verbis asserendum. *Qui interrogabis opera vestra.* Sap. 6. *non pascetur verbis.* Cura, ut opera vocationi respondeant.

3. *Beatus est, qui non fuerit scandalizatus in me.* Ibidem. Hoc adjicit, ut Joannes ansam sumeret præmuniendi, ne eo tempore scandalizentur ejus humilitate, opprobriis, morte. Sed etiam tui causâ dicitur, ne, qui imitator vis esse Jesu, pudeat te ejus humilitatis, contemptûs, patientiæ, &c. Verè enim scandalizaris, & offenderis his, qui post tantum exemplum hæc fugis.

F E R I A III.

Joannes à Christo laudatur.

1. *Q*uid existis in desertum videre? arundinem vento agitatam: hominem mollibus vestitum? &c. Matth. 11. Ex occasione quæstionis factæ, poterant existimare turbæ Joannem, qui Christum Messiam prædicaverat, jam mutasse sententiam, aut saltem dubitare. Laudat ergo eum à constan-

tia

tia sententiæ, quod non sit *arundo ventô* huc illuc *agitata*; & à dura educatione, quæ multum conducit ad animi firmitatam. Oppone hic tuam inconstantiam; surgis: incipis domare passionem, desistis; proponis recte agenda, sed, cum agendum, omittis; recedis à creaturis; mox iterum accedis: Dole, emenda.

2. *Etiâ dico vobis, plusquàm Prophetam. Ipse enim est, de quo scriptum est: Ecce ego mitto Angelum meum ante faciem tuam.* Ibid. Plus quàm *Propheta*, quia Christum non prædixit, sed monstravit: *Angelus*, ab eodem officio Præcursoris ritè administrato. Ita fidelem servum Christus non laudat, nisi ab officio: & hoc est verè laudari. Non, qui officium majus gerit, ille laudabilior est, sed qui suum exactius administrat. Quid ad te de aliis? tu tuum, quod obedientia imponit, adimple. Hôcne curas? vide, quo deficias: & quantum vis à Deo laudari, tantum fidelis esto.

3. *Inter natos mulierum non surrexit major Joanne Baptista.* Ibid. Eximia Joannis laus! sed quâ dignum se præstitit. Non potest Deus laudare, nisi quod dignum est laude. At, ut dignus sis, Deus facit quidem, sed non sine te. Placeret tibi, si laudareris à Christo; obtinere potes, si Joannem animi constantiâ, asperitate vitæ, seu mortificatione tui, zelo Christum glorificandi, Angelicis moribus imiteris.

F E R I A IV.

Magdalenæ Conversio.

1. **M**ulier, quæ erat in civitate peccatrix, ut cognovit, quod Jesus accubuit in domo Pharisæi, *arctulus alabastrum.* Luc. 7. Magdalena ob vitæ licen-

centiam erat urbis scandalum. Deus, qui non vult mortem peccatoris, movit illam interne. Ita bonitas illam amat, etiam cum offenditur. Ut cognovit fide Deum, illustratione se ipsam, & sua peccata; prudentiâ occasionem opportunam: statim sine dilatione accurrit: sine respectu domûs alienæ, hominum præsentium, convivii. Quanta te docet! Exercere sæpius fidem; cognoscere teipsum; arripere primam boni occasionem; capere generosas resolutiones; non respicere homines, cum de salute tua agitur. O si hæc observasses hætenus!

2. *Et stans retrò secûs pedes ejus, lachrymis cepit rigare pedes ejus, & capillis capitis sui tergebat, &c.* Ibidem. *Retrò.* Ex humili confusione declinat oculos Christi: ac convivarum nil pensi habet. At tu, si confunderis, oculos hominum declinas. Hæc est tua superbia. Quæ ex amore, & dolore lachrymarum copia, ut potuerit Christi pedes lavare? Quam modicus ergo tuus amor, & dolor, qui nec guttam ebullit, ac vide, ut eum accendas motivò tantæ bonitatis Dei.

3. *Et osculabatur pedes ejus, & unguentò ungebat.* Ibidem. Omnia peccatorum instrumenta coëgit in obsequium. O si & tu, quod tibi turpiter exhibuisti, jam Deo laudabiliter offeras: & quor in te habuisti oblectamenta, tot de te invenias holocausta. S. Gregor. hom. 33. At Christus interim mundabat Magdalenæ animam; extinguebat amorem creaturarum, &c. In hoc tu mille lachrymas funde, ut tandem tui, & rerum creaturarum amor extinguatur.

F E R I A V.

Christus defendit Magdalenam.

1. *Phariseus dicit intra se, dicens: Hic, si esse Prophetam, sciret utique, quæ, & qualis est mulier, quæ tangit eum: quia peccatrix est.* Luc. 7. Uno iudicio quot errores committit? Christum non esse Prophetam. 2. Christum ignorare statum Magdalensæ. 3. Magdalenam jam contritam esse adhuc peccatricem. 4. Christum debuisse hanc mulierem repellere. Immundum fieri iustum, si tangatur a peccatore. Errat, qui temerè alium iudicat: & quàm graviter? Tu teipsum ad censuram revoca. De alio, si Christum in ejus Persona intuearis, meliora senties.

2. *Vides hanc mulierem? Intravi in domum tuam, aquam pedibus meis non dedisti: hæc autem, &c.* Ibid. Sub iudicium Pharisei venerat & Christus, & Magdalena: hujus patrocinium suscipit, de se tacet; sed & Magdalena tacet. Sile, si cujuspiam murmure tangaris; Deus pro te loquetur. Quia ipsa veritas est, non ita, ut homines. Videt, quod es: non quod alter iudicat. Hujus iudicium time, non hominum.

3. *Remittuntur tibi peccata tua.* Ibid. Quid senserit ad hæc verba Magdalena? O solatium! sed quod à dilectione pendet. *Quoniam dilexit multum.* O si id & ego audire merear! mererer utique, si diligerem multum. Nota: non parùm, sed multum diligendus est Deus, saltem appretiative, ut creaturis omnibus præferatur. Itane amas? Pondera, quanta tibi tui, quanta Dei cura: quis in res creatas, quis in Deum affectus. Non spera remissionem, nisi dederis dilectionem.

FERIA

F E R I A V I.

Ejicicur dæmonium cæcum & mutum.

1. **O** Blatus est ei dæmonium habens, cæcus & mutus, & curavit eum, ita ut loqueretur, & videret; & stupebant omnes turbæ. Matth. 12. Astutus dæmon occupat sensus, quibus est via ad fidem (*fides ex auditu*) & ad cognitionem Dei (*invisibilia ejus à creatura mundi, per ea, quæ facta sunt, intellecta conspiciuntur. Rom. 1.*) Ubi ergo via ad cognitionem Dei erepta, quæ boni spes superest? ergo cave; ne hos sensus tibi dæmon occupet. Audi verbum, quò erudiaris; vide in creatis increatum Deum. Benignitatem sanantis expende, quod non rogatus præstat: quid faciet tibi, si ardentem roges? scit murmuraturos Phariseos, quid tum? si attendas hominum sermonibus, nunquam serio Deo servies.

2. *Quidam autem ex eis dixerunt: In Belzebul Principe demoniorum ejicit dæmonia. Luc. 11.* Invidia semper de optimo venenum fugit. Liberatum à Dæmone negare non poterant: ergo id occulto pacto Christi cum dæmone tribuunt. Si Christo tam gravia imputantur, quid miraris leviora tibi assigni? Esne Deo tuo sanctior? Id potius attende, qui Christus tulerit. Non ulciscitur, cum posset, non commovetur. Confutat cum modestia calumniam: Non esse dæmonum se invicem ejicere. Itane tu calumniis petitus, non sentis? mansuete toleras? solius intuitu Dei refutas? an magis, ne tuus honor periclitetur?

3. *Si in digito Dei ejicio dæmonia, profectò pervenit in vos regnum Dei. Ibid.* Ex eo, quòd Christus

stus non ejiciat dæmonia in Belzebub, infert, quod ejiciat in virtute Dei: alia enim virtute non possunt ejici. Vide, quàm præcludendus omnis diabolo in animam ingressus, cum nulla vi tua eum possis exturbare. Invigila ergo portis sensuum: quia per hos plerumque accessum habet. Nihil concede sensui, quod recta ratio non dicet concedendum.

S A B B A T H O.

Signum Jonæ Prophetæ.

1. *M*agister, volumus à te signum videre. Matth. 12. Quæ impudentia? viderunt mortuos excitatos, morbos sanatos, cæcos & surdos restitutos, & signa quærent: non ut credant, sed ut tentent. Idem tu cum Deo agis. Petis sola ejus virtute fieri, quod in hac providentia facere non potest: intrare regnum Dei, sine violentia: liberari à tentatione, sine tua resistantia: virtutem aliquam, sine mediis à te adhibendis. Ita verò Deum tentas: & quæ tua est impudentia?

2. *Signum non dabitur ei, nisi signum Jonæ Prophetæ.* Ibid. Id est signum suæ mortis: ut scias, sicut Christum oportuit pati, & ita per violentiam intrare in regnum suum; ita tibi non obventurum, nisi vim inferas. Ergo magnanimitate, & generosa resolutione est opus. Et in hoc miser deficis. Vide, quàm tepidæ sint tuæ resolutiones; & quid mirum, si nullus est effectus?

3. *Viri Ninivite surgent in judicio cum generatione ista, & condemnabunt eam.* Ibid. Quia Ninivite, ut ut Barbari, & Gentiles, prædicante Jona, poenitentiam egerunt. Tibi dici existima: seculares surgent, & te confundent, quia gratiam Dei non

non in vanum acceperunt, sed sua cooperatione efficacem reddiderunt. Et quid tu agis socors religiosè? signa petis? Non est signum gratia vocationis? Non sunt signa tot inspirationes Dei, tot exempla, tot monitiones, &c.

DOMIN. XIV. POST PENTEC.

Qui sint Mater, & Fratres Jesu?

1. **E**cce Mater tua, & fratres tui foris stant, quærentes te. Matth. 12. S. Hieron. hic ait, hoc Christo nunciatum ad insidias tendendas, utram spiritali operi canam, & sanguinem præferat. At Christus, quasi indignans, reponit: *Qua est Mater mea? & qui sunt fratres mei*: quasi diceret: cum Dei negotium agitur, nihil mihi est cum Matre. Exuisti & tu omnem carnis affectum? Nihil sanguini concedis in præjudicium Dei? Cave, illud audias: *Qui amat patrem, aut matrem plusquam me, non est me dignus.*

2. Et extendens manum suam in discipulos, dixit: *Ecce Mater mea, & fratres mei.* Ibid. Gregor. hom. 3. in Evang. *Qui Christi frater, & soror est credendo, Mater efficitur prædicando*; si per ejus vocem amor Domini in proximi mente generatur. Ecce virorum Apostolicorum dignitatem, qui spiritali modo Christi Matres fiunt prædicando, convertendo, accendendo ad Dei amorem alios. Accende in te Apostolicum spiritum, ut hac dignitate potiaris.

3. *Quicumque fecerit voluntatem Patris mei, qui in cælis est; ipse meus frater, & soror, & Mater est.* Ibid. Vult Christus dicere spiritualement sibi cognationem intercedere cum iis, qui faciunt voluntatem

tem Patris sui. *Una enim, ait Chrysost. hom. 45. in Matth. Sola & vera necessitudo cum Christo est; ut voluntatem facias: ad quam sequitur amor tenerior. Vides pretium obedientiæ. Superior Vicarius Dei est, à quo regitur: si quid imponit, ne te subtrahes. Hoc unum te moveat: amaberis a Christo.*

F E R I A II.

Parabola seminantis, & seminati.

1. *EXiit, qui seminat.* Luc. 8. *Seminator Deus est, qui exiit bonitate se communicando Creaturis, potentiâ producendo, providentiâ gubernando. Mirare, & ama bonitatem, subde te potentiæ, committe providentiæ.* 2. *Seminator Christus est; qui exiit à Patre, & venit in mundum, ex amore nostri incarnatus: Agnosce amorem, & redde.* 3. *Est quisque vir Apostolicus, qui exit ad proximi curandam salutem. Huic zelo, & solida virtute opus est; ne, dum quærit alicnam salutem, perdat suam. Vide, quantopere in tua vocatione solidas virtutes tibi debeas comparare: quæ defunt.*

2. *Seminare semen suum.* Ibid. *Semen sunt 1. creaturæ, mundus ager. In hoc & tu positus es. Memento Creatoris & Gubernatoris tui.* 2. *Sanguis, ac merita Christi, & inde profluentes gratiæ, quæ omnibus dantur. Terra est, anima tam sterilis quam fœcunda. Admiranda Dei bonitas! miseranda tot animarum sterilitas!* 3. *Est doctrina Evangelica, inspirationes internæ, ager est intellectus, æque etiam sterilis, qui præter cognitionem, non ulterius dirigit; ac fœcundus, qui voluntatem inclinat. Quantâ curâ excolendus intellectus supernaturalibus principiis! Quam admirandæ inspirationes divinæ!* 3.

3. *Dum seminat, aliud cecidit secus viam.* Ibid. Triplicis generis inutilis est terra: 1. Secus viam, est anima ad creaturas effusa, intra se non collecta, aperta obviis quibusque cogitationibus mundi; tanquam viatoribus, quæ conculcant bonas inspirationes. Unde nullus gustus, una orationis hora, unus annus videtur, cujus finem vix expectas, ut revertaris ad tua solatia. O misera anima, per quam omnia meant, præter Deum! *Sepi ergo viam tuam* horaria, aut etiam frequentiore recollectione. Urge interdum matutina proposita, &c.

F E R I A III.

Continuatio ejusdem Parabolæ.

1. *Aliud cecidit supra petram, & natum aruit, quia non habebat humorem.* Luc. 8. Petrosa terra est anima jam indurata pravis habitibus, assueta vivere secundum sensum: cui ideo non est, nisi modicus devotionis succus, ac inde mille proposita, & agnitæ veritates nullam agunt radicem; quovis affectu amoris, timoris, humani respectus, &c. exsiccantur. Talis semper incipit, & incipiendo desinit. Si talis es, quid facies, cum venerit Paterfamilias, & ab agro suo fructum requireret? Conclude, quam studere debeas pravis habitibus edomandis.

2. *Aliud cecidit inter spinas: & simul exorta spinæ suffocaverunt illud.* Ibid. Spinosa terra est anima negotiis immersa, & curis inutilibus obruta; cui cura sui, Dei, & æternitatis est postrema; quæ agnoscit veritates supernaturales, sed ob alias curas v. g. studiorum, aut officii, sibi tempus non assumit eas maturandi. Infelix anima, in qua suf-

V 2

foca-

focatur spiritus Dei! cui studia, vel nimius cum proximo citra necessitatem agendi affectus, tempora Deo danda suffuratur! Intelligis, quàm omnes alias curas moderari debeas?

3. *Aliud cecidit in terram bonam, & ortum fecit fructum.* Addit. Matth. cap. 13. *aliud centesimum, aliud sexagesimum, aliud trigesimum.* Hæc est anima bona, & optima, opposita tribus prioribus; quia *audit verbum Dei* cum gustu: quia *intelligit* illud expendendo, & dirigendo ad praxim: *fructum adfert in patientia*, sive constantia superando difficultates. Talis esse debes, terra optima, quam nulla prætereat particula boni, quâ totis viribus nitaris ad virtutem, ut Deo placeas; nec contentus sis fructum dare trigesimum, sed connitaris ad centesimum, hoc est, ad *majorem & semper majorem Dei gloriam.*

F E R I A IV.

Parabola Zizaniorum.

1. **S**eminavit bonum semen in agro suo; cùm autem dormirent homines, venit inimicus ejus, & superseminavit zizania. Matth. 13. Quæ seminat Deus, etiam in terra optima, corrumpere nititur diabolus, mundus, & caro; idque tam artificiosè, ut, dum sunt in herba, sive in principio, non distinguas facile granum bonum a zizaniis ob amorem proprium, qui falsis veri colorem inducit. Expende, si quæ habes bona, quantis sint mixta malis, respectibus humanis, intentione minus pura, amore proprio? Et hoc fit, dum *dormiunt homines*: quando non serio sibi ipsis invigilant. Quàm ergo in omnem partem vigilandum.

2. *Cùm*

2. *Cum autem crevisset herba, & fructum fecisset, tunc apparuerunt & zizania. Accedentes autem servi Patrisfamilias dixerunt ei: Domine, nonne semen bonum seminasti in agro tuo? unde ergo habet zizania? Et ait illis: Inimicus homo hoc fecit.* Ibid. Ad te dici existima: videbaris bonum semen in herba tyrocinii, jam apparent in te zizania, & cadit spes illa, quæ de te habebatur. Quô animô hoc exciperes? *Inimicus homo* 1. tu ipse, qui nimis amor proprio indulgisti. 2. socii; dum te iis adjunxisti, in quibus plus levitatis, quam spiritus; & hinc eorum mores contraxisti, &c.

3. *Servi autem dixerunt ei: Vis, imus, & colligimus ea? Et ait: Non; nè fortè colligentes zizania eradicetis simul & triticum;* Ibid. Vide patientiam Dei, & Superiorum cum tuis defectibus. Tolerant subinde eos, ne omninò eradicetis, cum spe tamen emendationis. Hæc si non sequatur, quam timere debes, ne in tempore messis, seu mortis, dicat Deus; *Colligite primum zizania, & alligate ea in fasciculos ad comburendum igne purgatorii.* Non blandiaris tibi, esse modicum, quod igni datur: forte tunc videbis immanes fascies lolii, parum tritici. Si hoc sanctè timueris, tunc firmius sperabis.

F E R I A V.

Parabola grani Sinapis.

1. *Simile est regnum cælorum grano sinapis, quod accipiens homo, seminavit in agro suo, quod minimum est omnibus seminibus.* Matth. 15. Granum hoc, sunt Evangelicæ veritates. Quàm viles mundo, & abjectæ! Beatos esse pauperes, & qui persecutionem patiuntur: divitias esse spinas: Ju-

gum Christi esse suave, &c. Sed seminandæ sunt in animam, per veram earum apprehensionem, & ruminationem. Dic mihi, Jerem. 12. *Quare desolatione desolata est omnis terra animæ tuæ? quia non recogitas corde.* Noli eas æstimare secundum carnem, ut hactenus æstimasti.

2. *Cum autem creverit, majus est omnibus olivibus, & sit arbor.* Ibid. Hæ veritates, si eas in bono corde semines, & intelligendis studeas, crescent in arborem ferentem fructus dulces gutturi Jesu, fructus honoris, & honestatis; dum e contrario falsa mundi, & carnis principia ferunt fructus turpitudinis. Attende, quàm hoc verum sit; & tantò magis penetra verum & genuinum sensum dogmatum Christi, cum desiderio practicandi.

3. *Ita, ut volucres celi veniant, & habitent in ramis ejus.* Ibid. Volucres, intellige sanctos affectus unionis cum Deo, qui, cum bene intellecta est Christi doctrina, in animo oriri solent. Hinc enim est studium placendi Deo, omnem ejus voluntatem implendi, non minus in arduis, & adversis, quàm in facilibus, & prosperis. Hinc collige, cur tu tam generosis actibus careas.

F E R I A VI.

Parabola thesauri, margaritæ, & lagenæ.

1. *Simile est regnum celorum thesauro abscondito.* Matth. 13. Hic est religiosa perfectio ob copiam gratiarum: sed absconditus ab oculis mundi, & imperfectorum, qui non æstimant. *Qui invenit, abscondit: non quæris, ut invenias? Præ gaudio illius vadit.* Non habes tuum gaudium in rebus ad perfectionem spectantibus; sed adhuc in
vani-

vanitatibus , in oblectamentis sensuum? *Vendit omnia , quæ habet , & emit agrum illum*: Non relinquis omnia? adhuc tibi per amorem proprium , adhuc creaturis adhæres? sed quid tandem reperies in manibus tuis.

2. *Simile est regnum cælorum homini negotiatori , querenti bonas margaritas.* Ibid. Negotiator es ; cui dixit Deus : *Negotiamini , dum venio.* Luc. 19. Sed qualis? scruta mundi quæris , an margaritas cœli? Margarita optima , charitas Dei est , seu unio cum Deo. Hanc ut obtineas , quid agis? Ille abiit , & vendidit omnia , quæ habuit. Abire te oportet à te ipso , à rebus creatis abstrahendus affectus , qui obstat perfecto amoris. Quàm parùm id hætenus fecisti! Ideo friget cor tuum. O si saltem ab nunc id præstes !

3. *Simile est regnum cælorum sarena missa in mare , & ex omni genere piscium congreganti.* Ibid. Sarena est Christiana quævis , & religiosa Congregatio , quâ a Deo boni & mali , seu tepidi religiosi in mari hujus mundi capiuntur. Es in sarena , noli tibi blandiri : non enim ideo bonus , aut tutus : sed talis tuo conatu , aut fervore fieri debes. Age id mature , quia sarena sensim ad littus æternitatis trahitur. Ibi eligentur boni in vasa , mali autem foras mittentur. Redde te dignum meliore sorte.

S A B B A T H O.

Christus malè accipitur in sua patria.

1. **E**T *veniens in patriam suam , docebat eos in Synagogis eorum.* Matth. 13. De Nazareth sermo est , ubi vixit Christus usque ad 30. ætatis annum. Noluit hic auspicari Evangelii prædica-

tionem, quia illico contemptus fuisset, si à fabrili officina ad cathedram profiliisset. Voluit ergo comparatâ per alias civitates famâ, eorum animos ad se desiderandum, & acceptandum disponere. Quid ergo agis? removenda sunt impedimenta, & ponenda merita.

2. *Ita ut mirarentur, & dicerent: Unde huic sapientia hæc, & virtutes? Nonne hic est fabri filius? &c. Et scandalizabantur in eo.* Ibidem. Gaudere eos decebat de Concive suo tantæ sapientiæ, & potentiæ, tam ab aliis honorato, ut passim eum sequerentur; & ecce indignantur. Quantas gratias Nazaretho contulit? hic incarnatus est, hic habitavit, hanc exemplô suô crudivit. Et jam contemnitur, quia humilis conditionis est, quia fabri filius. Ita mi Jesu, te pejus tractant, qui plus debent. O ingrati! Recogita gratias, quas accepisti. Sed quomodo Deum tuum tractasti; Si non verbis, certè factis sprevisi ejus doctrinam, dum eam sequi noluisti.

3. *Et ejecerunt eum extra civitatem, & duxerunt illum usque ad supercilium montis, ut præcipitarent eum.* Ibid. Quia noluit ibi miracula edere, ut fecerat in Capharnaum. Et hoc ex amore in patriam, quia sciebat nec miraculis credituros, ne ipsa miracula essent illis majoris pœnæ occasio. In te quot signa facit? quot gratias exhibet? Quam curandum est, ne sis tibi causâ majoris pœnæ! Ingrate! toties eum ejicis extra civitatem, quoties gratiam non acceptas. Toties eum vis præcipitare, quoties imaginem ejus, teipsum inquam, in malum præcipitas.

DOMINICA XV. POST PENTEC.

Mittuntur, & instruuntur Apostoli ad prædicandum.

1. *Unztes autem prædicare, dicentes: quia appropinquavit regnum cælorum.* Matth. 10. Hæc est materia, de qua cum proximo est agendum. Ubi-que regnum Dei, & media, quæ ad illud conducunt, inspira. Recide alias inutiles conversationes, quæ spiritum dissipant, quibus conscientiam tuam gravas, tempus inutiliter absumis, proximum non ædificas. Ut verò hæc cum proximo agas, assuesce eadem tecum agere, tibi ipsi regnum Dei, & media inculca, in meditationibus, in domestica conversatione.

2. *Infirmos curate.* Ibidem. Solatio spirituali; *mortuos* Deo per peccatum *suscitare*, vel adhortatione, vel absolutione: *leprosos*, qui alios seu doctrinâ, seu exemplô inficiunt, *mundate*, inducendo ad pœnitentiam; *demonia*, pravas consuetudines, publica vitia, *ejicite*, & curate, ut nemo impune peccet. *Gratis accepistis, gratis dare*, non quærendo vestra commoda. Expende, an ita cum proximo egeris? an non hoc vocatio tua Apostolica à te exigat?

3. *Nihil ruleritis in via, neque virgam.* Luc. 12. Quæ serviat ad vos, contra violentiam, defendendos; *neque peram*, quâ cibaria deferatis; *neque panem*, etiam ad necessitatem; *neque pecuniam*, *neque duas tunicas* ad splendorem, & pompam. Ita suos amicissimos Deus tractat, quos vult sibi intime conjunctos, ideoque omnino à cura, & affectu terrenorum divulsos. Non eris ergo conjunctus Deo, nisi sis abjunctus à creaturis. O miser! quid iis adhæres, quæ te dilaniant?

F E R I A II.

Prædicat Apostolis persecutiones, quas
passuri sunt.

1. **E**cce ego mitto vos, sicut oves, in medio luporum. Matth. 10. Quod ovi inter lupos, hoc vobis eveniet. Magnò, & intrepidò animò ad prædicandum Evangelium est opus. Tradent enim vos in conciliis, & Synagogis suis flagellabunt vos. Et eritis odio omnibus hominibus propter nomen meum. Quis tibi est animus ad ista? times? erige animum: cogita illud: Ego mitto vos. Ego, qui te victorem coronabo, &c.

2. Non est discipulus super Magistrum, nec servus super Dominum suum. Ibidem. Quod te in omni persecutione animare potest, est exemplum Magistri, & Domini tui Jesu. Quas non ille innocentissimus passus est persecutiones! Tunc melior eris? cogita hoc identidem, ubi quid tolerandum occurrit: Dominus meus est JESUS, ego servus. Quæ gloria mihi, si fors mea sit eadem.

3. Nolite timere eos, qui occidunt corpus, animam autem non possunt occidere. Ibidem. Concludit pro gloria Dei, neque mortem timendam: Hæc enim animæ nocere non potest. Esne tam generosò animò? O quam felix, si vitam in ministerio gloriæ Dei ponas! Laudas alios, quibus hoc obigit: cur ipse non desideras? At non adest Tyrannus. Sis ipse interim tuus, & occide in te, quod perniciosè vivit, nempe concupiscentias tuas.

F E R I A

F E R I A I I I.

Monet Apostolos, ne affectu cognationis impediantur.

1. *N*olite arbitrari, quia veni pacem mittere in terram: non veni pacem mittere, sed gladium. Matth. 10. Pax quædam bona est, quam ascensus in cælum, reliquit Apostolis, quædam mala est, maxime Apostolicis viris, quæ innititur affectui cognationis. Hanc qui vult, Deo bellum indicit, qui vult eam ruptam. Cogita, quantum impediat hic affectus functiones Apostolicas. Quam ægre discedit à tuis? quam ad eos absens anhelas? quam facile eorum gratiâ transgredieris regulas? quam affligeris eorum afflictione? quam leviter exultas eorum prosperitate? &c.

2. *Veni enim separare hominem adversus patrem suum.* Matth. 10. Gladius, qui separat hominem à Patre, est lex amandi Deum super omnia. Hanc si observas, jam aliud nihil est, cui affectu adhæreas, quia totus amor huic impenditur. Nondum videris admovisse gladium passio. Caro, & sanguis tibi multum persuadent. Hoc primum præstandum erat, cum Religionem suscepisti, & necdum id agis. Ergo ad principia revolveris. Saltem jam id incipe.

3. *Inimici hominis domestici ejus.* Ibid. O quam id verum est! quid tibi magis domesticum, quam sanguine juncti? sed nonne hostes tui, qui inducunt, ut affectum, quem Deo debes, aut ipsis impendas, aut cum ipsis partiaris. Sed quo jure eum Deo surripis? quis tibi magis domesticus, quam tu ipse? sed quis tibi major hostis? Expende, quanta à te ipso vulnera acceperis, quam palmaria. Quod faceres cum hoste, quem semel in tuam potestatem redigeres, hoc tecum age.

FE-

F E R I A I V.

De iis , quos Christus pronunciat non esse dignos se.

1. *Qui amat patrem , aut matrem plus , quam me , non est me dignus.* Matth. 10. Quod talis sis , non fateberis. Faciam , ut deprehendas. Dic , amas Deum ? amo , inquis. Super omnia ? affirmas. Debes ergo , ut servias Deo , patrem aut amicum deserere ; debes frequentibus eorum visitationibus abstinere , quæ spiritum dissipant. Non possum , inquis , tam inurbanus esse. Vides , quid magis ames ? Et non times horrendum illud fulmen : Non est dignus Deo ?

2. *Qui non accipit crucem suam , & sequitur me , non est me dignus.* Ibid. Similitudo morum , conciliatrix est amorum. Sequatur ergo Christi mores , qui vult dignus esse amari. Universa Christi vita est crux perpetua. Nisi crucem tollis , non sequeris , non assimilaris , non amaris. Vides ergo crucis , & mortificationis , non tantum utilitatem , sed absolutam necessitatem ? O delicate ! quam terreris sola crucis cogitatione ! Age nunc , *scilicet Christi esse vis , crucifige carnem tuam cum vitiis , & concupiscentiis suis.* Galat. 5.

3. *Qui invenit animam suam , perdet illam , & qui perdidit animam suam propter me , inveniet illam.* Ibid. Unicus ergo animarum salvandi , seu vitam obtinendi modus est , vitam perdere propter Deum. Perdis eam , 1. Si ita mortificationem Jesu in carne tua circumferas , ut vita Jesu manifestetur in te. Durum est hoc tibi , sed necessarium. 2. Perdis eam , si per amorem totus transeas in Jesum , ut dicas : *vivo ego , jam non ego ; vivit verò in me Christus.* Sed ô quam feliciter eam invenies , quia te ipsum invenies in Christo. F E-

F E R I A V.

Jugum Christi suave suscipiendum.

1. *V*enite ad me omnes, qui laboratis, & onerati estis, & ego reficiam vos. Tollite jugum meum super vos. Matth. 11. Quàm benignus Deus, qui invitat! quàm bonus, qui nos exonerat pondere peccatorum, quò usque ad infernum deprimimur! quàm amabilis, qui nos reficit, cum in via deficimus! Sed quæ tandem est refectio? *Tollite jugum meum.* Ergo ita, mi Jesu, tuos reficis, jugum imponendo? Omnino ita. Quia nullum potest esse solidum, & verum in vita solatium, nisi in cruce Jesu, in qua sola nos *gloriarì oportet*. Vide miser, quàm erres, qui crucem fugis, & solatia aliunde mendicas, sed inania.

2. *Discite à me, quia mitis sum, & humilis corde, & invenietis requiem animabus vestris.* Ibidem. In Magistrum tuum se Christus offert, quem meliorem optas? claude mundo pseudomagistro aures, & Jesum audi. Docet te invenire requiem animæ lassatæ in via iniquitatis, per mansuetudinem, & humilitatem, quarum istà te Deo, & homini propter Deum perfecte subjicis; illà injurias ultra sensum non admittis. Hinc collige, cur jugum Christi tibi grave sit, quia illud non portas cum humilitate: & mansuetudine: cur pacem animi aliquando amittas, &c.

3. *Jugum enim meum suave est, & onus meum leve.* Ibid. Jugum vocat vel legem Evangelicam, vel adversitates, & persecutiones, vel difficultatem, quæ sentitur in lucta spiritûs adversus carnem. Vocat *suum*, quia quantumcunque sit, illud nobis cum subit, gratiâ nos suâ adjuvando. *Conjungere ergo Deo, & sustine.* Eccl. 2. Nec querere esse grave,

grave, cujus potiozem partem Deus ipse suppor-
tat. Generosa hinc resolutione est opus.

F E R I A V I.

Joannes Baptista in carcere occiditur.

1. **H**erodes natalis sui cœnam fecit Principibus, &c. *Cùmque introisset filia ipsius Herodiadis, & sal-
sasset, &c. Juravit illi: Quidquid petieris, dabo tibi.
licet dimidium regni mei.* Marc. 6. Quanti æsti-
mat levem choream insanus, pro qua dimidium
regni pollicetur? At major est insaniam tua, qui pro
una voluptatula renunciasti regno cœlorum, &c.

2. *At illa pramonita à matre sua: Da mihi, inquit,
hic in disco caput Joannis Baptiste.* Matth. 14. Con-
siliū petit ab hoste Joannis: quid mirum, si
mors ejus suggeratur? pejus tu agis, si rerum agen-
darum consiliū petas à mundo, à carne, à tuis
passionibus. Quoties tibi suggesserunt caput, non
Joannis, sed Christi, quia quoties peccas, quan-
tum est in te, Christum occidis, quia ponis ean-
dem causam, ob quam occisus est. Stulte, ratio-
nem consule in rebus agendis, non appetitum.

3. *Et contristatus est Rex.* Marc. 6. Quia Jo-
annem æstimabat, & suam insaniam advertit. Noli
præceps esse in decernendo. Age omnia præme-
ditate, post acta non poenitebit te. *Propter jus ju-
randum, & propter discumbentes, noluit eam contrista-
re.* Timet violare temerarium, & scelestum ju-
ramentum, non timet innocentis cædem. Non
vult meretriculam contristare, & non timet Deum
offendere. Nonne tu ita agis cum appetitu tuo?
Et decollavit eum, quem sciebat sanctum & inno-
centem. Ad quæ scelera deducit, vel una infræ-
nis passio? Et tot tu habes, quas nondum domas?

SAB.

S A B B A T H O.

Quinque panibus, & duobus pisciculis, satiantur quinque millia hominum.

1. *A*ccesserunt ad eum Discipuli ejus, dicentes: Desertus est locus, & hora jam prateriit; dimitte turbas, ut euntes emant escas. Matth. 14. Quàm constans & fervens turba in audiendo Christum! quàm tu languidus, & incurius ad ejus inspirationes? Discipulorum cura diffidentiam ostendit. Orant dimitti turbas, ut emant cibaria, ajunt, ducentorum denariorum panes non sufficere, &c. Tu contra, omnem tuam fiduciam in Deum conjice, maxime in iis, quibus humanis viribus mederi non potes; & dic toto affectu: *Tibi derelictus est pauper.* Psal. 10.

2. *Et cum jussisset turbam discumbere super fœnum.* Ibid. Quos pascit gratiâ; vult in humili sui cognitione quiescere. *Accepit panes, & distribuit discumbentibus, quantum volebant.* Joan. 6. In manibus Christi multiplicantur panes. Utcunque parùm ei dederis sincerò animò, cum fœnore recipies. Si nihil accipis, non est illiberalitas Domini, sed tua, qui nihil ei in manus consignas. Priva te amore illius minima voluptate, ille animo tuo incomparabilem reddet.

3. *Jesus ergo, cum cognovisset, quia venturi essent, ut raperent eum, & facerent eum Regem, fugit in montem.* Joan. 6. Habes in illa turba gratum animum, quæ per miraculum accepit beneficiò, & magnum Prophetam proclamavit, & Regem creare voluit. Quàm ingratus tu es, qui ipsis Dei gratiis ad ejus offensam abuteris! Habes in Christo honoris fugam. Ad crucem currit, quam desiderio desideravit; & immolatus est, quia ipse voluit; ab ho-

ab honoribus fugit. At tu contrarium facis. Non te pudet?

DOMINICA XVI. POST PENTEC.

Christus supra aquas ambulans.

1. *N*avicula in medio mari iactabatur fluctibus, &c. Quartâ autem vigiliâ noctis, venit ad eos ambulans super mare. Matth. 14. Tota nocte luctati sunt: Erat enim ventus contrarius. Vidit Dominus ex monte, & subvenire distulit: Erudiens nos, ait Chrysost. hom. 15. in Matth. Non citò solutionem querere advenientium laborum, ad quos eos disponebat, sed expectare tempus, quod ipse disposuit, & interim generose tempestatî resistere. Idem te in omni tempestate adversitatum, & passionum tuarum docet Jesus. Quid agis inter ventos saluti contrarios? quomodo decertas? Non ponis remum? non te das arbitrio tuarum affectionum?

2. Et videntes eum super mare ambulantem, turbati sunt, dicentes: quia phantasma est. Ibid. Illusionem putant realem Christi præsentiam, quia ambulat super undas. Quoties tibi videtur phantasma, Dei inspiratio; quæ fertur super mare tuorum affectuum; quæ dictat mare mundi calcandum generoso despectu? Et ideo, quia illusionem æstimas, pateris te potius mundi fluctibus involvi. Vide, quam in multis tibi imaginatio sit corrigenda. Id enim, quod res tibi difficiles reddit, non tam sunt res ipsæ, quam imaginatio.

3. Statimque Jesus locutus est eis, dicens: Habete fiduciam. Ego sum: Nolite timere. Ibid. In hoc discrimen adduxerat eos Jesus: quia, ut ait Marc. cap.

cap. 6. *coëgit eos ascendere in naviculam: cum in terra tuti essent. Ideo eis etiam subsidio adest. In quidquid difficultatum per obedientiam ducaris, habe fiduciam: Deus est, qui tibi id imposuit per superiorem, quem regit. Noli timere: ipse te non deseret. Tu age, quod tuum est.*

F E R I A II.

Petrus super aquas ambulans.

1. *Petrus dixit: Domine, si tu es, jube me venire ad te super aquas. Matth. 14.* Amoricus fuit, non ferentis moram veniendi ad Christum. Petit juberi, credens obedientiam suppleturam, quod viribus humanis deest. Etiam *super aquas*, & per pericula confidens, se jussu Domini tutum futurum. *Et ipse ait: veni. Et descendens Petrus de navicula, ambulabat super aquam, ut veniret ad Jesum: Vide, quàm fervens, quàm intrepidus ad jussum Domini. Si tanta tibi esset fiducia, quid non ageres per obedientiam.*

2. *Videns autem ventum validum, timuit.* A magna fiducia ad diffidentiam dilabitur. Ita mutamur repente, nisi conceptam mentem firmemus sæpius. *Et, cùm cœpisset mergi.* Non ventus fuit, qui discrimen poneret, sed timor ex diffidentia. Nihil unquam præstabis magnum, nisi singulari fiducia te erigas. Cùm enim per te nihil possis, ei debes per fiduciam jungi, qui potest omnia. *Clamavit: Domine, salvum me fac:* ipso statim principio titubationis. Non differ in tentatione ad Deum recurrere.

3. *Et continuò.* Ibid. Nec Jesus differt auxilium. *Extendens manum suam, prior, quam Petrus; apprehendit eum. Vide benignitatem, &*

Avano, Medin,

X

poten-

potentiam Jesu ; & in ea confide. *Et ait : Modicæ fidei , quare dubitasti ?* Insinuat ex modica fide fuisse periculum , non ex vento. O quoties tu arguendus es modicæ fidei , cum ob aliquam difficultatem munus quodpiam detrectas ! Ipse tibi , cum timor suboritur ad magna & ardua te resolvendi , illudingere : *Modicæ fidei , noli dubitare.*

F E R I A III.

Accusantur Discipuli de illotis manibus , & defenduntur.

1. *Quare Discipuli tui transgrediuntur traditionem Seniorum ?* Matth. 15. Pharisei exterioris solum munditiei cultores , interioris incurii , taxant discipulos , quod cibum sumpturi non lavent manus. Et quodnam hoc est delictum ? At illud est grande , quod interius sitis pleni spurcitie. Noli esse Phariseus , qui exteriora colas , interiora negligas. Quæ sub oculos hominum cadunt , per se Deus non judicat , sed quæ in animo latent. Ergo hæc tibi potius cavenda sunt.

2. *Ipse respondens , ait illis : Quare & vos transgredimini mandatum Dei : propter traditionem vestram ?* Ibidem. Quæ erat : causâ offerendi Deo sacrificii posse negari parentibus alimenta. Corripit eos , quod sub prætextu religionis infringat mandatum. Quid igitur tibi dicet , si quam infringis regulam , ut placeas homini , ut accommodes te genio aliorum ? non poteris te exculpate ; quia nihil excogitare potes , quod Deo præferre valeas.

3. *Hypocrita*, bene prophetavit de vobis *Isaias*: *Populus hic labiis me honorat; cor autem eorum longe est à me.* Ibidem. Ostendit, eos magis esse reos, quam discipulos; quia, utut scrupulosi sint in lege, non tamen ex corde, & affectu Deo serviunt. Nonne etiam in te hæc correptio procedit? Nonne magis ad oculum hominum servis, quam ut Deo placeas? Umbras virtutum colis, & interim non tollis pravos affectus, qui animam inquinant.

F E R I A IV.

Mulier Chananæa pro filia deprecatura
Christum accedit.

1. **E**T ecce mulier Chananæa. Matth. 15. Ubi audiit Christum advenire, statim à finibus illis egressa, oblatam occasionem arripit, docetque te gratiæ occurrere, ne in vanum prætereat. Clamavit: *Miserere mei Domine fili David*, plena fide, & spe suum dolorem exponit de filiæ malo: *Filia mea malè à dæmone vexatur.* Nihil petit, exposuisse contenta. Credit, ut omnipotentem posse, ut pium velle: de cætero se ei resignat. Quantis virtutibus mulier ethnica te confundit!

2. *Qui non respondit ei verbum.* Ibid. Donec omnis famina fides, modestia, ac prudentia manifestaretur, ait Euthym. Si differt petita Deus, cogita, quod plures velit à te virtutes petendo exerceri. Proinde non elanguesce, sed insiste. Discipuli, miserati sortem mulieris, rogabant eum, dicentes: *dimitte eam*, quare? an ut afflicta solamen referat? an ut miraculò glorificetur Deus? Non: sed quia clamat post nos. Ut imperfecti suam molestiam allegant. Nonne hæc quoque est tua im-

perfectio? oras nempe liberari à malo, potius quia est tibi, quam quia Deo gratum.

3. *Ipse autem respondens, ait: Non sum missus, nisi ad oves, quæ perierunt, domus Israël.* Ibid. Nihil suo clamore, nihil discipulorum intercessione videtur impetrare. Imò durior responsio à mitissimo Domino apertâ repulsâ censerî potest. Durat tamen concepta spes, & magis accenditur desiderium. Sed id ipsum est, quod Jesu summè placeat. Quare & tu rejectus non abjicere, repulsus accede. Sola perseverantia est, quæ impetrat. Venisti ad oves Domine, quæ perierunt? O quod solatium mihi, qui *erravi tanquam ovis, quæ periit*, Psal. 118.

F E R I A V.

Sanatur filia Chananææ.

1. *AT illa.* Matth. 15. Constantissima, *venit* ut desiderio plena, ita fiducia: *Et adoravit eum* cum profunda humilitate; *dicens* cum verecunda modestia: *Domine*, cui obediunt omnia, *adjuva*, quia potes, *me* in filia malo afflictam. Quot virtutes orationis comites! Qui respondens, ait: *Non est bonum sumere panem filiorum*, gratiam miraculorum promissam Judæis, tanquam filiis, & *mittere canibus*, Gentibus Idololatriis. Præter Domini morem acerba responsio! Quid tu agere soles ad falsum verbum? Quid ad repulsam repetitam? Quid verò hæc mulier?

2. *At illa.* Ibid. Sine sensu aculei, quem tu non dissimulares; sine murmure, in quod tu erupisses; *Dixit: Etiam Domine*: prudenter, humiliter admittit se esse veluti canem; & inde instantè petit tractari ut canis a tam bono Domino?

nam

nam & caselli edunt de micis, quæ cadunt de mensa Dominorum Quanta constantia, patientia, prudentia, humilitas, fides!

3. *Tunc victus constantia & humilitate* Jesus, *ait illi. Ibid.* Admirantis in morem ad præsentium instructionem, ut, dum unam exigit, plures confirmet: *O mulier, non jam canis; mutasti affectum, muto vocabulum. Tu te cognovisti canem, ego jam te agnosco hominem.* S. August. serm. 61. de temp. *Magna est fides tua.* Non sunt nihil etiam cæteræ virtutes, sed fides laudatur, quæ illas impetravit: *Fiat tibi, sicut vis.* Quasi dicat: Ecce habes ad tuum velle, meum posse. Magnum bonitatis Divinæ argumentum; in qua speres, & totus innitaris.

F E R I A VI.

Sanatur surdus, & mutus.

1. *Apprehendens eum.* Marc. 7. Surdum & mutum, quem alii adduxerant, *de turba seorsum.* Curandæ spiritualis surditatis, & mutitatis remedium est, secedere à strepitu mundi pravorum affectuum, & levitate conversationis; & recedere in seipsum humili suæ vilitatis consideratione. Anima in hac solitudine melius audit verbum Dei. *Misit digitos in auriculas ejus, ut clauderet eas vanitati: hoc est secundum remedium, munire sensus digitò Dei, seu gratiâ Sancti Spiritus, ne pateant mundo. Et tetigit linguam ejus digito suo saliva imbuto, per quam gratia designatur, quæ posthac linguam regeret: Et suspiciens in cælum: Tertium remedium est incipere considerare cœlestia. Ingemuit. Quartum remedium est ad ea respirare. Examina te, an affectu*

recedas à sæculo, an munias sensus, an regas linguam, an mediteris cœlestia, an ad ea respices. Vide, quid emendes.

2. *Et ait illi : Epheta, quod est, adaperire. Ibid. Quoties ait & tibi : Aperi mihi soror mea sponsa. Cant. 5. Et statim apertæ sunt aures ejus : Tu autem dissolutâ linguæ licentiâ loqueris vanitatem, & lingua tua est lingua iniquitatis. Et quamdiu hæc? & nondum finis est turpitudinis tuæ?*

3. *Et præcepit eis, ne cui dicorent ; Ibid. Tanquam à jactantia omnino alienus, cui tu plus fortè servis, quàm Deo. Quando autem præcipiebat, tanto magis plus prædicabant. Laus est benefactoris velle latere ; sed gratitudinis obligatio est, beneficium æstimare, & prædicare. Quanta hóc titulô debes ! Dicentes, bene omnia fecit, qui nihil mali velle potest. O si aliquando & Deus dicat de te ; Bene omnia fecit : quod tibi solatium ? si habere id cures, habebis.*

S A B B A T H O.

Reficiuntur quatuor millia hominum
septem panibus.

1. *C*um turba multa esset, nec haberent, quod manducarent, ait discipulis : *Misereor super turbam. Marc. 8. Quanta vis & gratia Domini tam multos ad se trahentis ! & tamen tu toties ei resistis ? Videre, ne recussetis loquentem. Hebr. 12. Quantus in turbas affectus & miseratio ! 1. Ob fervorem & studium, quô eum sequebantur : quidam enim ex eis de longè venerant, qui, si dimittantur, deficient in via. 2. Ob constantiam : quâ jam triduo sustinent me. 3. Ob patientiam : Non habent, quod manducant, & famem sinè murmure sustinent.*

stinent. Habes tam bonum Dominum, & cur te non committis ejus providentiæ? Tu vix ad horam illum sustines. *Væ his, qui perdidērunt sustinentiam!* Eccl. 5.

2. *Si dimiserō eos jejunos in domum suam, deficiet in via.* Ibid. Vides pro te sollicitum Deum? Quid ergo times hic, aut ibi vivere ad Superiorum dispositionem? quid deerit tibi, si Deus est tecum? Time magis, ne tu desis Deo. Et verè dees, si ejus providentiæ te non committis. Dees tibi ipsi, dum præposterâ providentiâ, Dei providentiam à te arces.

3. *Ecce accipiens septem panes.* Ibidem. Hæc erat universa annona pauperis Jesu, & duodecim Discipulorum. *Dabat Discipulis, ut apponerent.* Quam non conceperint illi fiduciam in Dei providentiam, cum viderunt tam paucos panes turbæ tantæ, virtute Dei sufficere! *Et manducaverunt, & saturati sunt.* Ita vera fiducia non confundit unquam confidentem. Quid ergo luctaris, cum demandato officio, cum loco, nimia corporis tui cura? Dic generose cum Job: *Etiamsi occideris me, sperabo in eum.*

DOMINICA XVII. POST PENTEC.

Cavendum fermentum Phariseorum.

1. **E**T cum venissent Discipuli ejus trans fretum, oblii sunt panes accipere. Match. 16. Quam suavis illis fuit cum Domino conversatio, quæ etiam necessariorum oblivionem induxit! O si tu saltem superfluum tui corporis curam deponeres! faceres, si dulcius cum Deo versareris. *Qui dixit illis: cavete à fermento Phariseorum.* Christus panem animæ magis curandum ostendit, qui est ver-

bum Dei, & curandum, ut sit sincerus, non corruptus. Ita sæpe Dominus sermonem de rebus spiritûs inducit, tibi in exemplum. *At illi cogitant, quia panes non accepimus.* Inhærent suæ inutili curæ. Ita tu sermones spirituales vel transfers ad inutiles, vel, si ab alio sancti miscentur, tu tuis levibus inhæres.

2. *Jesus autem dixit: Quid cogitatis intra vos, modica fidei, quia panes non habetis?* Ibidem. Damnat eorum nimiam de pane curam, ac corporis studium. *Non recordamini quinque panum in quinque millia hominum, &c. neque septem panum in quatuor millia ad satietatem dispersorum?* quasi dicat; mihi cura corpori vestro providendi remittatur, & ego faciam. O si huic te consignares providentiæ, quàm esset tibi facilis obedientia, quàm dulcis paupertas, quàm amabilis patientia?

3. *Quare non intelligitis, quia non de pane dixi vobis: Cavete à fermento Phariseorum?* Tunc intellexerunt, quia non dixerit cavendum à fermento panum, sed à doctrina Phariseorum. Hoc malum fermentum, axiomata mundi, amoris proprii, hominis veteris principia. Ab hoc fermento tibi cave: aliàs animam tuam putrefaciet, nec sapiet panis optimus, qui est *facere voluntatem Patris.*

F E R I A II.

Curatur cæcus Bethsaidæ.

1. *A*dducunt ei cæcum, & rogabant, ut eum tangeret; & apprehensa manu cæci eduxit eum extra vicum. Marc. 8. Quare non curat eum in ipso loco? Bethsaida erat pagus, in quo multa signa & virtutes fecerat Dominus, & tamèn nondum crede-

credebant. Unde arguuntur Matth. 11. Quòd non corresponderint gratiæ : *Va tibi Corozaim ! va tibi Bethsaida ! &c.* Eduxit ergo eum Dominus , significans , si non cooperetur , non sanandum. Ita res habet in omni animæ morbo. Quot gratias accepisti ? quàm verò parùm correspondisti ? & vis sanari ?

2. *Et exspuens in oculos ejus.* Ibid. Salivam primæ gratiæ , quâ inciperet videre , & *impositis manibus* suæ potentiæ , *interrogavit eum , si quid videret.* Et respondit : *Video homines tanquam arbores ambulantes.* Jam habet principium vivendi ; sed humana videntur ei magna , homines videntur ingentes arbores. Parùm luminis non sufficit , ut non decipiaris , cùm & confusus est visus , & quæ mundi sunt , apparent magna. Nunquid & tibi videntur magna ? Ergo parùm luminis est in te. Ora Dominum : *illumina oculos meos , &c.*

3. *Deinde iterum imposuit manus super oculos ejus , & restitutus est ita , ut clarè videret omnia.* Cur moras trahit Jesus in hoc curando ? quia nondum cæcus ob modicam fidem rite erat dispositus : voluit , ut hæc cresceret , & tunc sanavit. Dispositio tua postulatur , ut Deus in te operetur. Si manus Dei in te parca est , tu facis : quia ad majora te non disponis. Stude autem te disponere ad gratiam , ut omnia clarè videas , quàm nihil sit mundus & creaturæ , quàm Deus sit omnia.

F E R I A III.

Confessio Petri.

1. *Interrogabat Discipulos suos : quem dicunt homines esse filium hominis ?* Matth. 16. Cyrill. Hierosol. cat. 11. *Quæsit , non inanis gloriæ studiò ,*
X c
sed

sed ut suos veritatem doceret, Petrô, quod sibi revelatum erat, proditurô. Ita quærit Christus semper magis cognosci non suô, sed nostrô bonô. O Domine noverim te! 2. S. Thom. hîc: *Instruimur, ut simus solliciti, quid de nobis dicatur: ut, si malum, corrigamus: si bonum, conservemus.* Sed non alio fine, curam habe de bono nomine. Eccl. 4. *At illi dixerunt: alii Joannem Baptistam, alii Eliam, &c.* Bona hîc proferuntur: si non potes vitare, ut de te non dicantur mala, cura saltem non dare occasionem.

2. *Vos autem, quem me esse dicitis?* Ibid. Aliquid majus ab iis expectat, qui eum intimius noverant. Respondens Petrus dixit: *Tu es Christus Filius Dei vivi.* At quem tu dicis esse Christum? majus quid sentire debes de eo, quam sæcularis. Ais eum esse Deum? ubi est ergo honor, quem illi debes? quare ei tam tepidè servis? quare plùs amas creaturas, quam illum?

3. Respondens Jesus, dixit ei: *Beatus es Simon Bar Jona, quia caro & sanguis non revelavit tibi, sed Pater meus.* Ibid. Vides, quia caro & sanguis, seu mundi scientia, non revelat ea, quæ de Deo sunt. *Quia animalis homo non percipit ea, quæ sunt spiritûs.* 1. Cor. 2. Averte ergo aures tuas à doctrina mundi, ut audias Deum loquentem.

F E R I A IV.

Christus mortem suam prædicit, Petrum obfistentem increpat.

1. **C**œpit eos docere, quoniam oportet filium hominis pati multa, & reprobari à senioribus, & occidi. Marc. 8. Cur illico post confessionem suæ divinitatis, prædicit mortem suam? Primò quidem,

dem, quia non est satis credere Christum esse *Filium Dei*. 2. Ut, cum venerit hora, non scandalizentur discipuli, sed, cum scirent esse Deum, deprehenderent non ex imbecillitate, sed ex sua voluntate mori. Imprime penitus cordi tuo hoc amoris mysterium. 3. Ut doceret te laudibus occurrere aliquò, quod te humiliet.

2. *Et assumens eum Petrus, cepit increpare illum, dicens: Absit à te Domine: non tibi erit hoc.* Matth.

16. An hæc est audacia Petri, & temeritas? an nimius amor? Christus ait: *oportet: Petrus reponit: non erit hoc tibi:* quia non considerat: quod Deus decrevit quis loquatur, quem immediate ante Filium Dei professus est: sed in id statim erupit, quod humanus affectus suggererat. Ponendum linguæ pondus est præmeditatione. Si id egisses, non te tot dictorum pœniteret.

3. *Qui conversus dixit Petro: Vade post me sabbana, scandalum es mihi.* Ibidem. Quàm durum Christo retardari à morte, quam tui causâ desiderabat! quàm statim blandis superinducit aspera! Quàm non est personarum acceptor, qui beatum dixit bene loquentem, mox malè loquentem increpat. Quare tibi exemplum præbet, ut etiam amicissimos non audias, qui à recto te avertere nituntur.

F E R I A V.

Cruce post Christum ferenda.

1. *SI quis vult venire post me.* Matth. 16. Arbitrium tibi est, id velle: nemo cogitur, nemo excluditur. Bona & seria ad hoc voluntate opus est, non velleitate. Hanc qui habuerit, primò *abneget semetipsum*: non tantum deponendo
exter.

externa, sed iudicium suum, voluntatem, affectus pravos, & desideria, & quidquid est veteris hominis, ac amoris proprii occidendo. Hoc est primum Alpha perfectionis Christianæ. Deus bone! quam adhuc nihil didici! Quantum restat discendum! Et quando tandem? sane, si semper fuerit mera velleitas, nunquam.

2. *Tollat crucem suam.* Ibid. Altera in hoc perfectionis compendio regula est. Crucis nomine intellige omnes animi, seu corporis adversitates. *Tolle*, secundum omnes intensiones, secundum omnem latitudinem objecti, longitudinem temporis, celsitudinem animi, profunditatem humilitatis; hoc est, quidlibet, semper, constanter, humiliter. Si Christo crucifixo adstitisses, isque hoc à te postulasset, negâssesne illi pro te morienti? Ergo neque nunc ei nega, quia id semper à te petit, semper illi debes, quia semper meretur.

3. *Et sequatur me.* Ibid. Hic demum est apex perfectionis; quæ tribus verbis describitur: *Abstine: Sustine: Age:* Sed multorum annorum factis non obtinetur. Sequere præeuntem exemplò suò, tèque animantem. Cogita obligationem militis ad Ducem, servi ad Dominum, filii ad Patrem. Sequere: sed quamdiu, non definitur: ergo usque ad mortem. Quà viâ? non describitur. Ergo molli, & aspera, ad hanc non minus, quam ad illam promptus. Quid egisti hætenus? quid ages?

F E R I A VI.

De Transfiguratione Domini.

1. *Assumpsit Iesus Petrum, & Jacobum, & Joannem fratrem ejus.* Matth. 17. Tres de duodecim

decim ad prælibandam gloriam, qui ad ipsam gloriam paucos admittit. *Ducit illos in montem excelsum*: quia nec sublimis divinorum cognitio, nec gustus internæ consolationis acquiritur, nisi sublimitas & omnis mundi fastus transcendatur. *Ducit eos seorsum* a strepitu, & docet solitudinem internam, ac etiam externam servire animæ consolationibus. Non percipis illustrationes & solatia? *vide*, an connitaris ad montem? an intra teipsum vere secedas.

2. *Et facta, dum oraret, species vultus ejus altera.* Luc. 9. Fervens oratio immutat hominem, præsertim mentalis. Tu nunquam videris lucere? certe non meditaris fructuose. Cum fine horæ, finem facis fervoris, & propositorum. Specularis illa potius, quam ad praxim dirigas; sed quæ inde utilitas; forte majus detrimentum; quia non operaris, ut cognoscis. *Resplenduit facies ejus, sicut Sol, vestimenta autem ejus facta sunt alba, sicut nix.* Matth. 17. Ad Solem facile liquantur nives. Noli confidere solatiis internis, momento diffiunt: sed sta in timore, & soliditate virtutis, quæ rationi nititur, non dulcedini.

3. *Et apparuerunt illis Moyses, & Elias.* Matth. 16. Viri magnorum desideriorum. Tales admittuntur in terra ad gustanda cœlestia. *Et dicebant excessum amoris, quem per passionem completurus erat in Hierusalem.* Luc. 9. In mediis gaudiis de doloribus sermo: vel quia illi dolores Christi, sunt causâ nostræ beatitudinis meritoria: vel ut doceat etiam in doloribus serenum vultum, multo magis animum retinendum; & in ipsis tribulationibus gaudendum: quoniam *merces copiosa est in cœlis.*

Votum Petri in Transfiguratione Christi.

1. *P*etrus autem dixit ad Jesum : Domine , bonum est nos hîc esse. Matth. 17. Exprimît animam suâ in gustu spirituali fundantem actiones : tunc bene omnia habere æstimat , cum illô fruitur ; at in tempore tribulationis recedit , & cum Petro fugit relictô Dominô. Tua sunt ista desideria. Velles virtutem , sed velles esse dulcem & facilem , non arduam , & confragosam. Expende , quàm imprudens hoc desiderium. Si bene nôsti virtutis indolem , omnis in arduo posita est.

2. *F*aciamus hîc tria tabernacula : Tibi unum , Moysi unum , & Eliæ unum. Ibid. Ubi Petre , hîc in deliciis , licet spiritualibus , quæ tamen , ut nix ad Solem diffluunt ? sit sane bonum ad modicum nos hîc esse : at éstne bonum hîc figere tabernacula , & permanere ? Quid ais ? vere non sciebat , quid diceret. Si redarguitur Petrus , quod sistere vellet in gustu cœlesti ; quid te fiet , qui in gustu carnali tuarum commoditatum hæres ?

3. *H*æc autem eo loquente facta est nubes , & obumbravit eos. Luc. 9. Dum Petrus immodice exultat , dum de figenda in illo loco mansione loquitur , ecce omnis gaudii materia momento eripitur. Intellige hinc , quid solidi sit in sensibili devotione aut consolatione , quæ momento te deserit , & , si in ea fundamentum virtutis ponis , colaberis. Si adeo bonum est his spiritualibus deliciis frui , cur si modica nubes tribulationis veniat ! (quam sæpius venire necesse est) obumbratur tibi animus tristitia , tædio , languore , &c. Alibi ergo figendum tabernaculum.

DOM.

DOM. XVIII. POST PENTEC.

Voce de Cœlo audita percelluntur Discipuli.

1. *E*cce vox de cœlo : Hic est filius meus dilectus , in quo mihi bene complacui. Matth. 17. Testimonium filiationis Christo redditur à Patre in eo monte , in quo , ut existimant aliqui , à dæmone tentatus fuit ; eò tempore , quò tractabatur de ejus passione ; ut discas eos evadere filios Dei , qui vincunt tentationes ; qui multa pro eo tolerant. Si filius Dei esse vis , hanc viâ eundum est. *Diligite diligentes se : sed majorem dilectionem nemo habet , quàm ut animam suam ponat pro eo.*

2. *Ipsam audite.* Ibid. Magister orbis constituitur. Verbum Patris loquitur in cordibus nostris. Durus est sermo illius : sed carnalia sapientibus. Noluit illum paulò ante audire Petrus , dum diceret : *Absit hoc à te Domine ; non eris tibi hoc.* Jam audire jubetur , ea ipsa nempe , quæ cum Moyse , & Elia de sua morte loquebatur. Unde discas , audiendum tibi esse Jesum , cum tibi suggerit mortificationem , contemptum , paupertatem , opprobria , cruces , &c.

3. *Et audientes Discipuli , ceciderunt in faciem suam.* Ibid. Ex reverentia , quâ vocem exceperunt , cum humilitate se ei subdentes : ut discas omni voce Dei te humiliter subdere. *Et timuerunt valde :* quia illa voce confirmabantur , quæ Christus cum Moyse & Elia de sua Passione loquebatur ; ad quod tanquam homines expaverunt. Typum mundanorum , & tui habes , cui nomen ipsum Crucis horrore est ; quem modica adversitas prostermit. Et tamen oportet nos per multas tribulationes transire.

FERIA

Eriguntur à Christo, & descendunt de monte.

1. **E**T accessit Jesus, &c. dixitque eis: Surgite, & nolite timere. Matth. 17. Ubi timent ad confirmatum divinitus de passione discursum, adest consolator Jesus. Quòd timeas dura, & sensui contraria, humanum est; sed, ubi accedit Jesus gratiâ suâ, non est, quod timeas. Surge resolutô, & generosô animô. Si consistant adversum te castra, in hoc spera. In Deo tuo transgredieris murum. Psal. 17.

2. Levantes autem oculos suos neminem viderunt, nisi solum Jesum. Ibid. Evanuerunt vox, nubes; Moyse, Elias, splendor vultûs, candor vestimentorum; solus Jesus remansit, solum viderunt. Ut discas æque in deliciis, ac adversitatibus solum Jesum spectare. Quidquid creatum occurrat, quantumcunque spirituale, solum Jesum illic intueri, non tua commoda. O quando tam felix ero Jesu, ut te solum quæram, te solum videam!

3. Et descendantibus illis de monte præcepit Jesus, dicens: nemini dixeritis visionem. Ibid. Noluit eos gloriari de gratia, quam iis contulit. Gratiæ acceptæ à Deo humili silentio optime custodiuntur. Turpissimum est gloriari de eo, quod non est tuum; nihil est autem tuum, quod est bonum. Gratiâ Dei sum id, quod sum. 1. Cor. 15. Provide potius in humilitate, ut gratia ejus in te vacua non sit. Ibid.

F E R I A III.

Adducitur Christo puer Lunaticus.

1. **D**omine miserere filio meo, quia lunaticus est. Matt. 17. Marc. 9. In hoc lunatico considera sortem hominis, quī suarum passionum est impotens. Nam *sape cadit in ignem amoris proprii, iracundiæ, concupiscentiæ. Et crebrò in aquam pravorum desideriorum. Addit fuisse surdum & mutum; ad divina. Qui allidit illum ad terram; ut in terrenis jaceat, & non assurgat ad cœlestia. Et spumat, & stridet per verba passioni respondentia. Et arescit sine succo devotionis. Quanto gravius agnoscis hoc malum, tantò impensius tolle ejus causam.*

2. *Respondens autem Jesus. Ibid. Cum gravi increpatione, ait: Generatio incredula, quæ tot signis nondum credit Jesum esse Deum. Et perversa: quia, dum ait: Obtuli eum Discipulis tuis, & non potuerunt curare eum: tacite insinuat, id ob aliquem eorum defectum accidisse. Quamdiu vobiscum ero? qui estis contra me. Vide, an non iuste sic possit tibi Jesus indignari, qui tibi tanta præstitit, & adhuc es contra eum. Afferte eum ad me. Emoluit benignitate rigorem increpationis; ut non dimittas sine solatio, quem iuste corripueris.*

3. *Et attulerunt eum. Ibid. Peccator suis viribus ad Deum non venit, nisi per gratiam feratur. Et statim spiritus conturbavit illum, & elisus in terram volutabatur: quia quò magis mundanus homo appropinquat Christo, dum non est ei unitus, magis exercent violentiam passionēs. Et interrogabat patrem ejus, quantum temporis est, ex quo ei hoc accidit? ut rememorando tempus diuturnum, non miretur ita torqueri: quia, quo diutius indulges passionibus, ferocius sæviunt.*

Avance Medis.

X

FR-

Curatur idem puer Lunaticus.

1. *I*esus autem ait : Patri supplicanti , *si potes credere , omnia possibilia sunt credenti.* Marc. 9. Magnum fidei elogium. Sed magnum tui vituperium , qui dicis te credere , ais tamen etiam te multa posse. Verius diceres , te non velle. *Et continuo exclamans pater pueri cum lachrymis , agebat : Credo Domine , fide adhuc imperfecta , adjuva incredulitatem meam perfecta fide.* Sic , qui inchoavit , ad perfectum enititur. Tu contra multa inchoas , pauca ad perfectum deducis , inchoasse contentus. Quem putas coronabit Deus ? inchoantem ? an perficientem ?

2. *Et comminatus est Iesus spiritui : Ego precipio tibi , exi ab eo , & amplius ne introeas in eum.* Ibid. Hæc mens Dei est , cum gratiâ suâ semel à te peccatum expellit , ut nunquam redeat. Nec rediit in illum puerum. At tu diabolus expulsum iterum sponte invitas , non ignarus , quod te torqueat , & rursus in ignem , & aquam conjiciat. *Et multum discerpens eum , exiit ab eo , & factus est sicut mortuus.* Ut omnino expellantur tuæ passioness necesse est , ut discerparis , & affligaris , & fias per constantem mortificationem velut mortuus , non sentiens aut blandimenta sensuum , aut contemptum , &c.

3. *Tunc Discipuli ad Iesum secreto dixerunt : Quare non posuimus ejicere illum ? Dixit illis , propter incredulitatem vestram.* Ibid. Quereris te non posse ejicere hanc , vel illam passionem. Vis causam scire ? Tua incredulitas est. Non credis te *omnia posse in eo , qui se confortat.* Non credis te addu-
cen-

cendum in iudicium, & ob hunc, aut illum tuæ passionis actum severe puniendum.

F E R I A V.

Christus didrachma solvit.

1. *A*ccefferunt, qui didrachma accipiebant, ad Petrum, & dixerunt ei: Magister vester non solvit didrachma? ait, etiam. Matth. 17. Exactores petunt à Christo, quod non debet. Indignum hoc iudicas? Tu peius agis. Debétne tibi gratiam, ut peccata deleantur? si debitum est, gratia non est: & tamen, dum sub spe veniæ peccas, utut leviter, vis, ut pretium solvat, quò dissolvatur peccatum. Et vix peccas, quin hoc tacite involvas. Nam, si crederes non condonandum, abstineres. Nonne hoc satis impium est?

2. *P*raevenit eum Iesus, dicens: Quid tibi videtur Simon? Reges terræ, à quibus accipiunt tributum, vel censum? à filiis suis? an ab alienis? Et ille dixit: ab alienis. Dixit illi Iesus: Ergo liberi filii. Ibid. Et familia Regum temporalium. Ergo multò magis ego, qui sum Filius Dei, & familia mea. Ostendit se liberum esse, se tamen non eximit. Misere nobiscum ageretur, si Christus nihil eorum egisset, quod non tenebatur. O si tu id saltem ageres, quod teneris! sed, quid est boni, modo possis, quod non tenearis, si non iustitiæ titulò, saltem religionis, gratitudinis? &c.

3. *U*t autem non scandalizemus eos, vade ad mare, & mitte hamum, & eum piscem, qui primus ascenderit, tolle, & aperto ore ejus invenies staterem; illum sume, & da eis pro me & te. Ibid. Non vult eos scandalizare; etsi dicere posset, ut tu aliquando dicis; non dedi ansam, culpa suâ scandalizantur.

Noli offendere, dum vitare potes. 2. Pauper
 Jesus non habet vel unum staterem. 3. Pisces,
 & animalia, magis ei obediunt, quam tu.

F E R I A VI.

Commendatur humilitas.

1. *A* Cceſſerunt Discipuli ad Jeſum dicentes : Quis,
 putas, major eſt in regno cœlorum? Matth. 18.
 Unde contentio? Majores in Petrum favores
 ambitionem, & invidiam moverunt in aliis. Mi-
 ſeri piſcatores jam de regno agunt. Nemo tam
 eſt vilis, qui nolit major eſſe. Paternum ab Ada-
 mo malum in nullum non tranſiit. Nonne & tu
 eô correptus eſ? ſi non eſ major altero, vis vide-
 ri. Sed quis eſ tu? unde te tanti facis? quæ
 tua ſunt merita? Nonne majora ſunt demerita?
 Et quid eſt, quod prætendis? quo jure tibi debe-
 tur? quis eſt, quem vis minorem, ſuone, an tuô
 vitiô?

2. *A*dvocans Jeſus parvulum, ſtatuit eum in medio
 eorum, & dixit: Amen dico vobis, niſi efficiamini ſi-
 cut parvuli, non intrabitis in regnum cœlorum. Ibid.
 Non eſt arbitraria virtus humilitas, ſed neceſſaria
 ad obtinendum cœlum. Modus Chriſti loquendi
 id ſatis indicat. Ubi enim ea non eſt, impoſſibile
 eſt, non eſſe aliquem depravatum affectum. Cre-
 diſne huic patere cœlum, in quod nihil coinqui-
 natum intrat? Perſuadeat ergo tibi humilitatem
 neceſſitas, quam non perſuadet honeſtas, & exem-
 plum Chriſti.

3. *Q*uicunque ergo ſe humiliaverit ſicut parvulus
 iſte; hic major eſt in regno cœlorum. Ibid. Dic quô
 judiciô judicandum de majoritate eſt ad certitudi-
 nem, tuô, an Chriſti? Judicium infinitæ ſapien-
 tiæ

tia superat tuae stultitiæ judicium. Illud hic expressum habes. Quid habes, quod opponas, nisi judicium hominum aliter sentientium? Sed quod judiciû salvaberis, aut damnaberis? hominum, an Dei? Credis majorem inter natos mulierum esse Joannem, quia Christus dixit: *Qui minor est inter vos omnes, hic major est.*

S A B B A T H O.

De correptione fraterna.

1. **S**I peccaverit in te frater tuus, vade, & corripe eum inter te, & ipsum solum. Matth. 18. Et subditum, & superiorem hoc tangit: illum, ut corrigi amet, alias magis corripî meretur: hunc, ut corripere non negligat suo loco, & tempore. Medicum non odisti, etsi vulneret, ut sanct. Corripîens idem facit, dummodo zelû bonû. Quid indignaris correptus? quid murmuras? quid in faciem resistis? Non scis, quod Deus sanguinem tuum de manu ejus requireret? Ezech. 3. Sed & superior, medicus es; crudelis es, si vulnera negligis, peris cum eo, quem lucrari neglexeris: *Erit anima tua pro anima ejus.* 3. Reg. 30.

2. *Corripe eum inter te, & ipsum solum.* Ibidem. Modus corripiendi describitur: ut secretò fiat. Peccas frater, ac etiam superior, si coram pluribus id facias, quod potes evincere cum paucioribus, etsi id motivo charitatis agas: Charitas enim æque secretum postulat ob famæ integritatem, ubi delictum non est publicum. Multo magis peccas, qui vel secretò defectus fratri cum indignatione obtrudis, vel publice in circulis objicis. Essetne sic corripî tibi gratum? Ergo alteri ne feceris.

3. *Si te audierit, lucratus eris fratrem tuum. Ibid.* Et corripientis, & correpti lucrum est amice data, humiliter accepta correptio. Qui corripis, lucraris fratrem, lucraris alios, à quibus offensam tollis; liberas animam tuam. Qui audis corripientem, lucraris teipsum, lucraris corripientis affectum, lucraris Deum. Omnes lucrò ducimur: majus istò habere non potes.

DOMIN. XIX. POST PENTEC.

Parabola servi, cui Dominus omne debitum dimisit.

1. *Assimilatum est regnum cælorum homini Regi, qui voluit rationem ponere cum servis suis. Matth.*

18. Servus es? multa debes ob peccata. Reddenda est ratio Deo nihil ignoranti, justissimo Judici. Quò animò stabis ante Judicem? *oblatus est ei unus, qui debebat decem millia talenta. Tu es ille. Nullum est debitum peccato majus. In quantum hoc cumulasti! Cum autem non haberet, unde redderet. Quid habes, unde satisfacias? nisi ab eo accipias, cui satisfacere debes. Quid hic timere non debebis? quid sperare poteris? Fuit enim Dominus ejus venundari. Amittis enim per peccatum libertatem, & servus es peccati. O dura servitus!*

2. *Procidens autem servus ille, orabat eum, dicens: patientiam habe in me. O quoties Domine, etiam cum leviter petente patientiam habuisti? Infinitæ tuæ patientiæ debeo, quòd non extrema patior. Misericordia Domini, quia non sum consumptus. Thren.*

3. Memento, quò peccârunt, prostrati sunt Angeli: quid minùs merebar? *Et omnia reddam tibi. Sed de tuo sanguine, quem mihi dedisti, sed ego indigne conculcavi. O bonitas! ô amor! ô mea ingratitudo!*

3. Mi-

3. *Miseratus autem Dominus servi illius, dimisit eum, & debitum dimisit ei. Ibid.* Quàm facilis Deus! Quàm liberalis bonitas, quæ plus dat, quàm petatur, aut sperari possit. Quantum par erat eum servum confundi tam prono affectu? Expertus idem es non semel. Non tantum dimisit te à servitute peccati: sed & filium fecit adoptivum, & hæredem regni. Meruistine hoc, poterisne unquam mereri? Et tantam clementiam audebis posthac offendere?

F E R I A II.

Ingratitudo, & sævitia servi illius.

1. *E*gressus autem servus ille invenit unum de conservis suis, qui debebat ei centum denarios: & tenens suffocabat eum, dicens: Redde, quod debes. Et procidens conservus, rogabat eum dicens: patientiam habe in me, & omnia reddam tibi; & noluit, sed misit eum in carcerem. Matth. 18. Grandia tibi debita remittit Deus; tu ne verbulum proximo. Quantulum illud est, si tuis conféras? Videntes autem conservi ejus. Alii tantò magis tuos defectus vident, quantò tu ipse minùs. Narra-verunt omnia Domino suo, quæ facta fuerant. Benefactum. Quæ viderant: non quæ arguebant: Quæ facta fuerant: non quæ suspicabantur: narraverunt Domino, cujus erat corrigere, non iis, ad quos nihil attinebat.

2. Tunc vocavit illum Dominus suus, & ait illi: Serve nequam, omne debitum dimisi tibi, quoniam rogasti me; nonne ergo & te oportuit misereri conservi tui? Ibid. Quid indignius? vis tolerari, & nil tolerare: in tua commoda vis tibi servire omnes, tu in nullius. Alià lege tua vis expendi, alià pro-

ximorum facta. Si non imitaris Deum in reddendo aliis bono, Deus te imitabitur in reddendo tibi malo, quod aliis facis. *Unumquemque juxta vias suas judicabo.* Ezech. 18.

3. *Et iratus Dominus ejus, tradidit eum tortoribus, quoadusque redderet universum debitum.* Ibid. Non reviviscunt quidem remissa peccata, sed ingratitudo superveniens tantò majus est peccatum, quantò majus fuit remissionis beneficium. Remissa tibi sunt gravia, tu non remittis minima: ingratus es, traderis tortoribus. Sic & Pater meus faciet vobis, si non remiseritis unusquisque fratri suo de cordibus vestris nulla retenta animi amaritudine. *Omnium iniquitatum tuarum non recordatur Deus amplius, postquam se dimisisse asserit.* Itane tu etiam leves offensas oblivioni tradis? num æque, ac ante, offendenti afficeris?

F E R I A III.

Christus invitatur Hierosolymam ad festum Scenopegiæ, & recusat ire.

1. *D*ixerunt autem ad eum fratres ejus: *Transi hinc, & vade in Judeam, ut & discipuli tui videant opera tua, quæ facis.* Joan. 7. Speciosa invitantium verba sunt, ut discipuli videant opera tua: interim quærunt, ut per miracula inclarescat Christus, & honor aliquis in ipsos, ut consanguineos, redundet. Latenti ambitioni prætexebatur titulus gloriæ Christi. Quid quæro ego per opera mea? gloriam Jesu. Ah utinam! Opera videntur talia; sed quoties, quod magis intendo est meum commodum?

2. *Nemo in occulto quid facit, & quærit ipse in palam esse.* Ibid. Argumento persuadere nituntur, quasi

quasi dicerent: Vis agnosci Messias: Facis ad hoc miracula, ut agnoscaris, ergo fac ea palam, in urbe, quæ est mundi compendium. *Manifesta reipsum mundo.* Cum essent honoris cupidi, talem & Christum arbitrabantur, ut sentit. Cyrill. lib. 4. in Joan. cap. 32. Magnus error est, communis tamen, suis proximum affectibus metiri. Quidquid alteri judicando appingis, si bene examines, in te reperies. Qualem tibi facis proximum? vide, an non ipse sis talis.

3. *Dixit ergo eis Jesus.* Ibid. Recusando ascensum in Jerusalem, & hujus causam reddendo: *Tempus meum nondum advenit*: quia nondum erat voluntas Patris, ut subiret mortem, ad quam se quæri sciebat. Ita omnia voluntate Patris agebat. O si ad illam regulam respiceres semper! Causa autem, cur mundus eum oderit: *quia ego testimonium perhibeo de illo, quod opera ejus mala sunt.* Odio est malis, qui eorum operibus non consentit. Sed melius est tibi odio malis esse, quam amari. Cum illo bonus es, cum isto esse vix potes. Non ergo virtutem desere, quia odio haberis.

F E R I A IV.

Occultè ascensurus in Hierusalem non
admittitur à Samaritanis.

1. **E**T ipse faciem suam firmavit, ut iret in Hierusalem. Luc. 9. Et addit Joan. cap. 7. *non manifestè, sed quasi in occulto.* Loquendi modus resolutionem significat eundi ad eum locum, in quo sciebat se ad mortem quæri, & post anni medium cruci affigendum. Quid tibi animi esset, si destinareris ad eum locum, in quo scires te eo anno

Y 5

mori-

moriturum? at ignoras illud, & certius est non obfuturum locum, aut functionem; & tamen vel detrectas, vel luctaris. Aude & tu in ejusmodi difficultatibus firmare faciem tuam.

2. *Et misit nuncios ante conspectum suum; & euntes intraverunt in civitatem Samaritanorum. Et non receperunt eum, quia facies ejus erat euntis in Hierusalem.* Ibid. Invitaverant antea Christum ad vocem mulieris, & Messiam acclamaverant, nunc excludunt. Sic amant, qui sui causâ amant. Diffidebant Samaritani à Judæis: quia Christus ostendit se ire in Judæam, non admittitur. Mundi politica, suspectum habere, qui cum æmulo meo familiaris est. Sic, cum mundum sequimur, excludimus Christum. Et pro! quàm sæpe! Timemus virtutem, quòd affligat corpus, cum profit animæ. Quin & hìc firmamus faciem?

3. *Cum vidissent autem Discipuli ejus Jacobus, & Joannes, dixerunt: Vis, dicamus, ut ignis descendat de celo, & consumat illos?* Zelus videbatur, sed erat adjuncta vindictæ passio. Ideo eos increpat: *Nescitis, cujus spiritus estis:* qui putatis zelum honoris mei, & est iræ passio. Vide, ne & in te sub palio virtutis irrepent vitia. *Filius hominis non venit animas perdere, sed salvare.* Hæc causa est ex fine petita, cur injuriam dissimulet. Quoties perissem ô Jesu, si non venisses salvare! sed, qui finem tuum respicis, doce me meum in omni actione respicere, ut salvem animam meam.

F E R I A V.

Mundantur decem leprosi.

1. *O*ccurrerunt ei decem viri leprosi. Luc. 17. *Cogita lepram tuarum imperfectionum. Qui*
stere-

steterunt à longè, suæ sibi immunditiæ conscii : & levaverunt vocem suam ardente affectu, & clamaverunt cum plena sui resignatione : Jesu Præceptor, miserere nostri. Ita cum Deo age humiliter, ardentè, resignatè.

2. *Quos ut vidit, dixit : Ite, ostendite vos Sacerdotibus : Ibid. Ad quos ex lege pertinebat de lepra judicare. Sic in miseros charitatem exercet, ut legem non violet ; ordinata charitas poscit, ut propter charitatis obsequia in proximum, regulas instituti non violes, aut omittas, quæ præstare debes. Et factum est, dum irent cæcâ quâdam obedientiâ, non judicantes de præcepto, mundati sunt. Hic tantæ obedientiæ est fructus. Fac, quod juberis, accipies, quod non speras.*

3. *Unus autem ex illis, ut vidit, quia mundatus est, regressus est cum magna voce magnificans Deum : & cecidit in faciem ante pedes ejus, gratias agens. Et hic erat Samaritanus. Ibid. Omnes recipimus gratias, quàm pauci reddimus ! Ex quorum tu es numero ? non superant te Samaritani, qui minùs Deo obligati sunt ? Nonne meritò tibi improperet Deus : Non est inventus, qui rediret, & daret gloriam Deo. Si vis canalem gratiarum apertum, noli esse ingratus. Gratitude autem summa, est bonus usus beneficii.*

F E R I A VI.

Christus palàm docet in Templo.

1. *I* *Pse ascendit ad diem festum. Judæi ergo querebant illum (ut occiderent) & dicebant : Ubi est ille ? Joan. 7. Nec suo enim nomine dignantur : adeò contemptus pro te factus est Jesus. Et murmur multum eras in turba de eo. Quia bona præstabat,*

stabat, mala referebat. Tu, cum omnia feceris, alia a mundo non expecta. *Quidam*, sed quam pauci, dicebant: *seducit turbas*: Distorta judicia ferre debes, qui ambulas viam rectam. *Nemo tamen ex iis*, qui bene sentiebant, palam loquebatur de illo propter metum Judæorum. Quantum apud te valet respectus, & metus hominum! O si prævaleat Deus!

2. *Fam medianze die festo ascendit Jesus in templum, & docebat.* Ibid. Non primis diebus, ut cederet furori Judæorum, qui tunc fervebat. Ascendit tamen, postquam resedit furor. Disce commoto proximo prudenter cedere. Nihil temere, sed neque timide omittere: & mirabantur Judæi, doctrinam ejus: sed sine fructu. De horum genere es. Audis, legisque multa, probas illa judiciô, sed non practicô: fugis exequi, quod intellectu collaudas. Olim ad mensuram cognitionis judicaberis.

3. *Nonne Moyses vobis dedit legem? & nemo ex vobis facit legem. Quid me queritis interficere?* Gravis objurgatio! Time tu illam à Jesu: Nonne ego dedi tibi legem, & tu non facis eam. *Respondit turba: demonium habes.* Cui hoc dici? Dei Filio, exhorrescis? Et silet tamen Dei Filius; qui vera pro blasphemis refundere potuisset. Quas tu injurias ad injuriam non redderes? Discat vermis pati, quæ Deus tulit.

S A B B A T H O.

Mittuntur; qui Christum comprehendant.

1. *A*udierunt Pharisei turbam murmurantem de illo hac: quod sit Messias: & miserunt ministros, ut apprehenderent eum. Joan. 7. Simples turbæ credunt, & amant Jesum: superbi Pharisæi,

sæi, qui suæ auctoritatis jacturam timent, exacerbantur. Una passio fomes est alterius. *Dixit ergo eis (ministri) Jesus: Adhuc modicum tempus vobiscum sum. Quæretis me, & non invenietis. Infelix ego, non audiam illud: Vado! Non audiam: non invenietis. Quæram te Jesu, donec inveniam; & tenebo.*

2. *In novissimo autem die magno festivitatis, stabat Jesus, & clamabat: Si quis sitit, veniat ad me, & bibat. Ibid. Quod dictum populo, tibi dici crede. Sitis salutem tuam, quia nemo est sine desiderio. Sed sitis aquas turbidas solationum mundi. Quæ hic beatitudo? Siti, quod sitire debes, salutem tuam, & Deum. Audi invitantem: Veni, & bibe ad satietatem, quam in solo Deo reperies: nunquam extra ipsum. Quid sitivisti hætenus? esne satiatus? O miser!*

3. *Quidam ex ipsis volebant apprehendere eum. Ibid. Non ignorabat, qua intentione venirent: prosequitur tamen sermonem interritus. Unde mutata sunt eorum corda: & nemo misit in eum manus. Ita constantiæ cedunt pericula. Quod ex virtute cœpisti, non desere ex metu. Periculum adis? constantia franget.*

DOM. XX. POST PENTEC.

Remittuntur ministri, & Christum laudant.

1. *Venerunt ergo ministri ad Pontifices, & Phariseos. Ex dixerunt eis illi: Quare non adduxistis eum? Joan. 7. Quam vigilant in scelerata sua jussa Pharisei! quam investigant causas propositi sui executioni non mandati! O si tam vigil tu esses in tua proposita sancta! si tam tibi indignareris, quoties non exequeris! Proponere, & non exe-*

exequi, est esurire, & non manducare. Non satis est velle, nisi accedat, & operari.

2. *Responderunt ministri: nunquam sic locutus est homo, sicut hic homo.* Ibid. Theophyl. hic ait: *Nec curaverunt iram Pharisaorum; nec, qui ut servi missi fuerant, quæ placita erant, Principibus dixerunt.* Profitentur se captos sermonibus ejus, quem comprehendere debuissent. Laudant eum apud illos, qui eum oppressum volebant. In causa Dei laudabilis est libertas. Hâc utere in te primum; in alios uti licet; maximè ubi debes. Non loquere, quæ placita, sed quæ salubria.

3. *Responderunt ergo eis Pharisei: Nunquid & vos seducti estis?* Ibid. Cum dixissent ministri: *nunquam sic locutus est homo: Interrogare debuissent,* ait Euthym. *quid locutus esset; sed ipsi ad increpationes convertuntur.* Ira, & invidia eos excœcaverat. Ubi dominatur passio, deturbatur solio ratio. Subjungunt argumentum ab auctoritate: *Nunquid ex Principibus aliquis credidit in eum?* quasi dicant; *Nullus: sed turba hæc tantum.* Ita Deus abscondit a sapientibus divina mysteria, & revelat ea parvulis, & humilibus. Esto humilis, si divina vis sapere. Denique *maledicti sunt,* inquit, nempe qui credunt. O utinam à superbis sic maledicar; non ab humili Jesu!

F E R I A II.

Mulier in adulterio deprehensa liberatur.

1. *A*dducunt Scribæ, & Pharisei mulierem in adulterio deprehensam, & dixerunt ei: *In lege Moyses mandavit nobis hujusmodi lapidare. Tu ergo quid dicis? Hoc autem dicebant tentantes eum, ut possent eum accusare.* Joan. 8. Sciebant mitem: credebant

debant contra legem pronunciaturum: *Jesus autem inclinans se deorsum.* Declinat ferre jure judicium, qui omnia novit; & tu, qui ignoras omnia, tam es facilis ad formanda judicia. *Digito scribebat in terra.* Ut facilem se ad veniam ostendat. Ut ventus, & aqua literas in pulvere scriptas confundunt; sic lacrymæ, & suspiria delent peccata nostra, quæ in terra scribuntur.

2. *Cum ergo perseverarent interrogantes eum, erexit se, & dixit eis: Qui sine peccato est vesterum, primus in illam lapidem mittat.* Ib. Pluribus tentatus nec absolvit eam, leges observans, nec condemnat misericors, qui venit non perdere, quod invenerat; sed quærere, quæ perierant. Injicit judicio, & linguæ ad judicandum alios pronæ frænum, ut cogites ipse, an sis sine peccato. Vel ergo debes esse sine culpa, ut judices. Vel non debes judicare, si non es sine culpa.

3. *Audientes autem hac, unus post unum exhibant.* Ib. Quia, ut ait Beda, *in se cernere ceperunt singuli, quod magis damnandum cognoscerent.* Si te inspicias, horrebis tua, dissimulabis aliena delicta. Et remansit solus Jesus, & mulier in medio stans confusa, & contrita, spe veniæ plena. *Erigens autem se Jesus, ad videndam eam oculis misericordiæ, dixit: mulier, nemo te condemnavit, quæ dixit: nemo Domine: Dixit autem Jesus: nec ego te condemnabo.* Retudit Jesus adversarios, ut Patronus; absolvit, ut clemens Judex. Quid non speres à clementia ipsa? modo id observes: *Noli amplius peccare.*

F E R I A III.

Christus in Templo docens.

1 *E*Go sum lux mundi. Joan. 8. Lux est in mentibus hominum, circa bonum, & malum, verum

rum & falsum, virtutes & vitia: sinè qua *palpas in meridie*, & *non diriges vias tuas*. Deut. 28. *Posui tenebras in anima mea*, & *facta est nox: in ipsa pertranseunt bestiae sylvarum*. Psal. 103. O si oriatur lux, quæ detegat meipsum mihi! *Qui sequitur me, non ambulat in tenebris*. Ergo à contrario, qui te non sequitur, ambulat in tenebris. Jam scio, unde tenebræ mentis meæ ad divina: quia te, lux mea, non sum secutus: quia vixi eo modo, quem verbô damnas, & exemplô: qui, cùm cognovissem te Deum, non sicut Deum glorificavi.

2. *Dicebant ei: Ubi est Pater tuus? respondit. Jesus: neque me scitis, neque Patrem meum*. Ibidem. Nonne Joan. 5. dixerat: *Et me scitis, & unde sim, scitis*. Sed sciebant speculativâ scientia, non practicâ eorum, quæ ad mores nostros pertinent: quia aliter operabantur, quàm ille operandum verbô & exemplô docuerit. Nonne & tibi objicere potest: *Non nôsti me, neque Patrem meum*. Si negas, convincam te. Christus laxiorem viam damnavit, tu eam sequeris. Ille fugit honores, tu sequeris, &c. Estne hoc nôsse Deum? *Qui dicit se nôsse eum, & mandata ejus, doctrinam, & exempla non custodit, mendax est*. Joan. 2.

3. *Dixit ergo iterum eis Jesus: Ego vado, & quaeritis me, & in peccato vestro moriemini*. Ibid. Non decretoriè quidem dictum, sed sub conditione: *Si non credideritis*. Quia pauci tamen erant credituri, absolute pronuntiatur. Tale scilicet erat peccatum, ut vix converterentur. Et quod illud? *vos de deorsum estis: vos de mundo hoc estis, terrena sapientes, & affectantes*. Non te percellit tremendum hoc verbum? ut derelinquas mundi semitas, & non abeas post hæc inferiora, & mundana, ut assurgas ad æterna, & divina.

FERA

F E R I A I V.

Christo docente multi credunt.

1. *H*æc illo loquente, multi crediderunt in eum. Dicebat ergo Jesus ad eos, qui crediderunt ei. Judæos: Si vos manseritis in sermone meo, verè discipuli mei eritis. Joan. 8. Nota boni discipuli est, perfectè possidere doctrinam Magistri. Ut scientiam habeas, debes scire te scire. Scisne te scire, quæ Christus docuit? Quomodo ergo tam turpiter amas? quomodo errores mundi hujus, doctrinæ Magistri planè oppositos, sequeris? Nondum scis te scire. Ad praxim veniendum est, ut te verum discipulum probes.

2. *Responderunt ei: Semen Abrahamæ sumus, & nemini servivimus unquam. Respondit eis Jesus; omnis, qui facit peccatum, servus est peccati. Ibid.* Jactant, quod non servierint homini; quod peccato servierint, non æstimant. Hæc est servitus quanto suavior, tanto durior. Nemo non volens, & libens superatur a concupiscentia sua: à quo autem quis superatus est; hujus & servus est. 2. Petr. 2. Suavis est servitus, quia amatur; dura est, quò minùs mortificas concupiscentiam, hòc magis illa te mortificat. Solve ergo vincula colli tui, & dic concupiscentiæ tuæ animò generosò: non serviam. Jerem. 1.

3. *Si filii Abrahamæ estis, opera Abrahamæ facite. Ibid.* Monet, ut probent factis, qua sint origine nati. Apud Deum, quis ejus sit filius, non verbis probatur, sed factis. Non enim sunt omnes Christi, qui se dicunt Christianos. Vis ergo te filium Dei probare? fac opera; quæ Deus incarnatus fecit. Tantum ab hoc abes, quantum intervallum est inter dicere, & facere.

Judæi volunt Christum lapidare.

1. *Q*uis ex vobis arguet me de peccato? Joan. 8.
Fidentis hoc conscientię est: sed non tuę.
Non satis te defensum puta, si redarguenti dicas:
non est ita: nemo mihi id probare potest. Est,
qui probabit; qui statuet te contra te. Si verita-
tem dico vobis, per doctrinam meam, quare non
creditis mihi, qui sum sine dolo, sine peccato; Non
decipit te Jesus, & tamen factis doctrinam ejus
impröbas. Qui ex Deo est, verba Dei audit. Nota
hęc est filiorum Dei. Sed à te abest. Propterea
vos non auditis, quia ex Deo non estis. Expende,
quomodo audias doctrinam Christi contrariam
mundo, quomodo internas inspirationes, & an ex
Deo sis, agnosces.

2. Responderunt Judæi: nonne bene dicimus nos,
quia Samaritanus es tu, & dæmonium habes. Ibidem.
Quàm immanis calumnia: Filius Dei dæmonia-
cus! quàm miti verbo retunditur: Ego dæmonium
non habeo: Quo tu sensu ferres! quas diras non
refunderes? Ego honorifico Patrem meum: quod dæ-
mon non facit. Et vos inhonorastis me calumniā,
qui tamen Deus sum. Et hoc facit dæmon. Vi-
dete, cujus spiritus sitis. Ego non quero gloriam
meam vindicando me, quod glorię ducitur coram
mundo. Et tu vermis, quantum studes glorię
tuę? Time illud: Est, qui quęras, & judicet: qui
tibi cum confusione gloriam detrahet, & reponet
ei, cui debetur omnis honor, & gloria.

3. Dixerunt Judæi: Quinquaginta annos nondum
habes, & Abraham vidisti? Ibid. Quod paulo ante
asseveraverat Christus. Dixit Jesus: antequam
Abra-

Abraham ficer, ego sum, quia Deus ab æterno. Tulerunt ergo lapides, ut jacerent in eum. S. Aug. tr. 43. in Joan. Tanta duritia, quod curreret, nisi ad similes, scilicet lapides. Hæc agit cor durum, & in sua passione obstinatum. Verba dura in proximum sunt lapides, quibus Deum in illo petis, Jesus autem abscondit se, & exivit de templo. Ita Deum fugas, qui in proximum es durus. Exivit, ut furori cederet; ut tu discas ignem non fodere.

F E R I A VI.

Curatur cæcus à nativitate.

1. *J*esus vidit hominem cæcum à nativitate. Et interrogaverunt Discipuli: Rabbi, quis peccavit: hic, aut parentes ejus? Joan. 9. Rupert. lib. 9. in Joan. Quærunt temerarium jactantes judicium, in quod & tu facili judicio pronus es. Sed, ut isti, plerumque erras. Neque hic peccavit, neque parentes ejus. Mala enim corporis non immittuntur solum ob peccatum; sed ut manifestentur opera Dei. Sed unde cæcitas mea? utinam, ut manifestentur opera Dei sic disponentis! sed heu! supercecidit ignis concupiscentiæ, & non video solem. Psal. 57.

2. *Expuit in terram, & fêcit lutum ex sputo, & linivit super oculos ejus. Ibid. Lutum in oculis etiam videntem excæcat: quomodo cæcum illuminat? Deus quandoque per opposita media operatur mira: per tentationes confirmat, per ariditatem illuminat, per humilitatem exaltat &c. Ergo abnegatō tuō judiciō, ejus te providentiæ committe. Quod obesse videtur, convertet in bonum.*

3. *Et dixit ei: Vade & lava in natatoria Siloë. Ibid. Respondere poterat: hæc virtus non est aquis, sed tibi: tu iis non eges. Si aqua opus,*

cur non vicinâ ? risus ero populo infectus luto, *Nihil tale reperivit*, ait Chrylost. hom. 25. in Joan. *Illud duntaxat curavit, ut pareret in omnibus. Et ecce fructum cœcæ obedientiæ: abiit, lavit, & venit videns.* Ita nunquam sine solatio est executio voluntatis divinæ per superiores intimatæ.

S A B B A T H O.

Illuminatus coram Phariseis veritatem miraculi tuctur.

1. *Vicini dicebant: Nonne hic est, qui sedebat, & mendicabat?* Joan. 9. Alii asserebant, alii negabant. *Ille verò dicebat: quia ego sum. Quærebant: quomodo aperti sunt tibi oculi?* Ait: *Jesus lutum fecit, & unxit oculos meos, & dixit mihi: Va-de ad natatorium Siloë, & lava. Et abiit, & lavi, & video.* Cui tribuit beneficium? non luto, non aquis, non suæ fidei: sed ei, à quo est omne datum optimum. In hoc solo est omnium bonorum scaturigo. Si per homines accipis; sunt instrumenta. Illi gratias debes.

2. *Adducunt eum ad Phariseos.* Ibid. Quærun-
terum, quomodo vidisset. Dicunt cæco: *Tu quid dicis de illo?* Vocant parentes, petunt: *Hic est filius vester, quem vos dicitis, quia cæcus natus est?* &c. Quorsum tam longum examen? ex Dei consilio, ut pateat ad plurimum conversionem miraculum: ex intentione hominûm, ut sepeliatur fama Christi, vel ut calumnientur, quòd non custodiat Sabbathum. Quam gravis est invidio alterius fama? num & tibi proximi gloria?

3. *Vocaverunt iterum hominem.* Ibid. Sub specie religionis urgent: *da gloriam Deo.* Auctoritate sua volunt persuadere, ut contra veritatem edicat:

Nos

Nos scimus, quia hic homo peccator est. Attende defendentis libertatem; Scimus, quia peccatores Deus non audit. Nisi esset hic à Deo, non poterat facere quidquam. Nondum noverat eum esse Deum, & tantò zelò ejus honorem tuetur. Quid tu agis, qui Deum per fidem nòsti? non timet auctoritatem. Quàm facile tu ob respectus humanos desistis à bono, pateris injurias Dei? &c.

DOM. XXI. POST PENTEC.

Illuminatus ejicitur è Synagoga, & à Christo recipitur.

1. *ET* ejecerunt eum foras. Joan. 9. Causa fuit defensio Christi. Sic, qui pro virtute, pro Christo stat, non admittitur, vel non gratus est dyscolis; quia non convenit genio, non consentit sermonibus, & levitatibus eorum. Visne pro doctrina Christi, pro regula, pro virtute stare? debes ergo ad hanc injuriam te resolvere: Dyscoli te fugient. Sed quid tum? Deus te colliget.

2. *Cum invenisset eum Jesus, dixit ei. Tu credis in Filium Dei: Respondit ille: Quis est, Domine, ut credam in eum? Et dixit ei Jesus: & vidisti eum, & qui loquitur tecum, ipse est. At ille ait: Credo Domine. Et procidens adoravit eum.* Ibid. Cyrill. Alexandr. lib. 6. in Joan. cap. 10. *Cum primum ignominie notà pro Christo affectus, protinus se illi Christus presentem ostendit, & illuminat eum interne. Sit hoc tibi solatio, si propter virtutem exosus es.*

3. *Et dixit Jesus: In judicium ego in hunc mundum veni; ut, qui non vident, simplices, rudes, & despecti; illi videant, per gratiam meam illuminati: & qui vident tumida quàdam sapientià; illi non videant cœlum: quæ abscondit à sapientibus,*

bus, & revelat parvulis. Matth. 11. Christus ergo discernet, an, & quid videas: ambis interim videre divina? debes non videre, non æstimare terrena.

F E R I A II.

Christus est Ostium.

1. **E**go sum ostium ovium. Joan. 10. Corpus ostiô grandius, non ingreditur per ostium: De truncanda sunt, quæ excedunt, ut immitti possit. Humilis porta, superbum verticem non admittit. Ostium, per quod ad vitam penetres, est *verbum abbreviatum.* Rom. 8. Quomodo intrabis, qui ambulas in magnis, & in mirabilibus super te? Psal. 130. Conformata te ergo humili portæ, & non exalta animam tuam.

2. *Per me si quis introiêrit, salvabitur.* Ibidem. Nulla certior ad salutem porta, quam per humilitatem Christi Jesu. Hic humiliavit semetipsum: propterea exaltavit eum Deus. Philipp. 2. Ingredietur meditando Divinitatis arcana, quæ Deus non revelat, nisi parvulis. Et egredietur imitando ejus vitam, quæ tota fuit humilis, & contempta: & pascua inveniet: cum, ut ait Greg. lib. 1. Regist. cap. 16. *Intus mentem devotionibus impinguat, & foris se piis operibus satiat.*

3. *Ego veni, ut vitam habeant, & abundantius habeant.* Ibid. Ad quid factus est homo filius Dei? Ad quid exinanivit semetipsum? ut vitam habeas animæ. Humilitate ergo Christi constat vita tua. Sed non satis est, quod ipse pretium posuerit, ut vivas: ut abundantius vitam habeas, vult, ut de tuo quoque adjiciās, &, ut interpretatur Bonavent. quotidie magis crescas. Non crescis autem, nisi humi-

humilitas Christi transeat in tuam. An putas, quod non meretur brevem humiliationem æternitas?

F E R I A III.

Christus Pastor bonus.

1. *E*Go sum Pastor bonus. Joan. 10. Qui ovis est Christi, tres habet hostes: *Lupum*, rapacem dæmonem; *Mercenarium*, fallacem mundum; & *furem*, latentem amorem proprium. Quantis isti te impetunt! sed habes Pastorem bonum, qui te protegit Jesum. Patitur hostes tuos: sed ut tu vincendi occasionem habeas, ille te coronandi. Ille in te, & tecum pugnat. Si vinceris, non est victoris virtus, sed tuum vitium. At pastor bonus, bonam quoque ovem postulat. Esne tu talis? mitis, patiens, mansueta, &c.

2. *Et cognosco oves meas, & animam meam pono pro ovibus meis.* Ibid. Dux sunt hæ notæ boni pastoris. O quantum solatium animæ, in quacunque difficultate, si vere credat, & dicat; novit me Pastor meus. Novit me, qui novit omnia: agit mecum, ut agendum novit; tam sapienter, & provide, quam res postulat. Hinc ergo me ejus providentiæ resigno. 2. Quis animam suam pro te posuerit, expende, & nota amorem; & si non es lapis, amorem redde.

3. *Oves meæ vocem meam audiunt, & sequuntur me.* Ibid. Ovium Christi duplex est nota. Audis vocem ejus, etiam te ad dura vocantis? Quid si dicat; *Ecce ego mitto vos, sicut oves in medio luporum?* Matth. 10. Si times, si refugis; non es ovis Christi. Sequerisne eum? Quid si ducat ad arida pascua? dicisne; *Dominus regit me, & nihil*

mibi deerit. Psal. 22. Quid si ducat te ad macellum? paterisne te tanquam ovis ad occisionem duci? Aliter non eris ovis Christi.

F E R I A IV.

In Encoeniis volunt Judæi Christum lapidare.

1. **C**ircumdederunt eum Judæi. Joan. 10. Tanquam vituli multi, & tauri pingues. Psalm. 21. Et dicebant (non veritatem inquirendo, sed insidiando) Beda. quousque animam nostram tollis? si tu es Christus, dic nobis palam. Quæ perversitas? cum verbis erudiuntur, dicunt: Quod signum ostendis nobis, quod hæc facis? Joan. 2. Cum operibus ejus virtus demonstratur, dicunt: Si tu es Christus, dic nobis palam. Sic operibus clamantibus ad verba, verbis ad opera confugiunt. Sed nec verbis credunt, nec factis. Quid aliud facio, qui nec doctrinam Christi sequor, nec exempla?

2. Respondit eis Jesus: opera, quæ ego facio in nomine Patris mei, hæc testimonium perhibent de me. Ibid. Quis quisque sit, efficacius non probat, quam factis. Testimonium à rebus, ait Chrysost. hom. 37. in Matth. Credibilius est testimoniū, quod est à verbis. Itaque ex factis vult nosci Christus, qui exhibet ea signa, quæ nemo alius facere potest. Quid de te loquuntur opera tua? quam metuo, ne tibi objiciat Deus: non invenio opera tua plena. Apoc. 3. Religiosi factis, non verbis sumus. S. Cyrill.

3. Sustulerunt ergo lapides Judæi, ut lapidarent eum Ibid. Postquam illum audiverunt: Ego & Pater unum sumus. Causam prætexunt zelum vindicandi blasphemiam, quam ipsi blasphemi Deo impu-

imputant? reipsâ est odium, & invidia, quæ illos obcecabat. Quàm dolosæ sunt passiones, quæ ipsas virtutes in suum obsequium trahunt. Sic actus humilitatis, depravat superbia, zelum iracundia. Vide, ne tibi imponant. Ideo actiones tuas omni passione depura.

F E R I A V.

Missio LXXII. Discipulorum.

1. **D**esignavit Dominus alios septuaginta duos, & misit eos ante faciem suam. Luc. 10. Magistri oculus conservat attentum discipulum. In ejus facie nihil sui muneris negliget. Ambulandum tibi est in præsentia Dei. Et dicebat illis: *messis quidem multa, operarii autem pauci*: Ut unus plurium defectum suppleret; & tu disceres, dum plura potes, omnia illa velle, ac libenter suscipere pro Deo. Rogate ergo Dominum messis, ut mittat operarios. Non vult otiosos; Otiosus autem aperte es, si, plura potes, aliqua detrectes. Mitti vult operarios, non sibi deligere locum, procurare, aut extorquere munus. Expecta ergo & tu, ut per obedientiam mittaris, non verò, quò mittaris, delige. Si deligis, in te ipso stas: si mittaris, in Deo. Utrum vis?

2. *Ite: ecce ego mitto vos, sicut agnos inter lupos*: Ibid. Non sicut agnos ad amœna sensui pascua. Theophil. hic: *Prædicat eis persecutiones, ne, si repente in talia inciderent, magis turbarentur*. Quid tibi animi ad ejusmodi missiones? certus es difficultatum, sed certus etiam es ingentis gloriæ Dei. Utrum apud te præponderat? Interim, ut assuescas gravibus, tolera minora.

3. *Qui vos audit, me audit, qui vos spernit, me spernit.* Ibid. Qui à Christo mittuntur, ejusdem auctoritate muniuntur. Ut Legati personam sui Regis repræsentant. Agnosce hanc auctoritatem in tuis superioribus, & promptius, ac hilarius obediens. Quod enim difficilem tibi reddit obedientiam, est, quod purè hominem jubentem aspicias. Nam, si Deum ipsum ea mandantem videres, & audires, nonne facilius obsequeris?

F E R I A VI.

Revertuntur à missione septuaginta duo.

1. *Reversi sunt septuaginta duo cum gaudio dicentes: Domine etiam demonia subjiciuntur nobis in nomine tuo.* Luc. 10. Et si non superbiant de ejectis spiritibus, quia hoc nomini, & gratiæ Jesu attribuunt; tamen aliquem vanitatis saporem intervenisse, quod ad hæc opera idonei visi sint, tradit. Gregor. lib. 3. moral. cap. 4. Etiam in piis, & sanctis suboriri solet complacentia de munere bene gesto pro Dei gloria. Sed, sicut Deo debes, quod gesseris, ita, quod te ad gerendum elegerit: ut tibi nulla, Deo omni ex parte cures satisfacere. Nec, si dæmonia passionum tuarum subjiciantur tibi, tuum est; sed totum Dei.

2. *Vidi sathanam tanquam fulgur de cælo cadentem.* Ibid. Exultantes vanitate Discipulos memoriâ cadentis Luciferi corrigit: non quod delicto sint pares: sed quod eis velit etiam à minimâ vanitatis umbra abesse. Idipsum, cum se erigit superbia, aut de donis tibi concessis complacentia, tibiingere: *Videbam sathanam cadentem.* Adde, unde? *de cælo.* Quid tu firmum speres in terra: Quis? Nobilissimus Angelorum. Et in te tolerabitur?

Quo-

Quomodo? *tanquam fulgur*. Vix sumpsit cogitationem, adfuit pœna. Nullum peccatum velocius punit Deus, quàm superbiam.

3. *In hoc nolite gaudere, quia spiritus vobis subiunguntur. Gaudete autem, quia nomina vestra scripta sunt in cælis*, Ibid. Gratia gratis data dicendi, docendi, ingenii, agendi cum proximo, &c. etiam reprobis conceduntur. Quid est, quòd de iis exultes, quæ te in æternum perdere possunt? Vena veri gaudii de cœlo est, ubi solum est verum bonum. Si nomen tuum in libro vitæ reperiās, tum exulta: quia es cum perenni bono. Quod tu gaudium quæris? an æternum? vide, quid ames. Gaudium enim amorem consequitur.

S A B B A T H O.

Quæstio Legisperiti, & responsio Christi.

1. *Q*uidam Legisperitus surrexit, tentans illum: *Magister, quid faciendo, vitam æternam possidebo?* Luc. 10. Etsi malò animò proposita, tamen ad praxim optima quæstio. Utinam hæc tibi quotidiana esset sollicitudo! sed nota: *quid faciendo*: non speculando: ne major sit tibi cura sciendi, quàm agendi: non vacuis desideriis suspirando, sed faciendo: operibus enim ad cœlum itur. Indignus siquidem cœlo est, qui cœlum non desiderat, & pro eo comparando non operatur.

2. *At ille dixit: In lege quid scriptum est?* Ibid. Ad legem remittitur quæstionis solutio. Si tibi eadem cura vitæ æternæ est, quid facias in lege Dei, in consiliis, in regulis Religionis, & status tui reperiēs. Quantum desiderium est vitæ, tantum debet esse viæ tenendæ. Si aliam viam ambulas, quàm præcepta, & regulæ ostendant, quomodo

modo dicam te cœlum desiderare? Vide ergo, ut accuratè regulas observes. Verum enim est: *Quicumque regulam secuti fuerint, pax super illos. Gal. 6.*

3. *Ille respondens dixit: Diliges Dominum Deum tuum, ex toto corde tuo, ex tota anima tua, & ex omnibus viribus tuis, & ex omni mente tua; & proximum tuum, sicut teipsum. Dixitque illi: rectè respondisti: hoc fac, & vives Ibid.* Approbat responsum Christus, ergo id agendum est, quod respondit Legisperitus. Vide ergo titulos amandi; *Dominum: Deum: tuum.* Vide modum: *ex toto corde; tota anima, &c.* *Hoc fac.* Facisne? nihil aliud est in corde tuo, quod ames? non vanitas placet? non tu ipse tibi? &c.

DOM. XXII. POST PENTEC.

Parabola descendentis in Jericho.

1. *H*omo quidam descendebat ab Hierosolyma in Jericho. Luc. 10. In hoc homine miserum peccatoris statum intueri. *Descendit ab Hierosolyma*, seu divinorum gustu in Jericho, seu instabilium voluptatem. *Incidit in latrones, dæmones, & concupiscentias suas. Despoliant eum gratia, & donis supernaturalibus. Plagas imponunt, intellectui cœcitatem, voluntati horrorem boni. Semivivum relinquunt cum sola, & infirmi fide.* Expende hæc vulnera, fortassis aliquando tua: & si sapis, ab Hierosolyma, & divinorum tractatione non discede in Jericho, ad affectum terrenorum. Hinc enim omnium malorum origo.

2. *Accidit autem, ut & Sacerdos descenderet eadem viâ, similiter & Levita. Ibid.* Vident semimortuum, & prætereunt. *Transit Samaritanus.* In hoc Christum tui misertum concipe. *Vidit re, & misericordiâ motus est*, etiam dum inimicus esses.

Appro-

Appropians suâ gratiâ alligavit vulnera intellectûs per lumina; voluntatis per desiderium boni. Indit oleum veniæ, & vinum acre contritionis, & timoris: & imposuit te in jumentum gratiæ te portantis; & duxit in stabulum suarum ovium: & curam tuam egit divinâ suâ providentiâ. Agnosce tuam miseriam, & Dei misericordiam, cui præsentem debes sanitatem.

3. *Altera die protulit duos denarios. Ibid. Amoris & potestatis. Dedit eos stabulario, superiori tuo, Commendavit te illi: Curam illius habe, ut in integra, & constanti sanitate conserveris. Quid diceres, si æger ille noluisset admittere hospit's curam? non censeret reprehensione dignum? At tu ita agis, dum vel huic, vel illi superiori subesse fugis; vel momentum non audis. Curam ille sibi demandatam exercet, tu non admittis.*

F E R I A II.

Christus excipitur à Martha.

1. *Intravit Jesus in quoddam castellum, & mulier quædam Martha nomine, excepit illum in domum suam. Luc. 10. Sciebat illa Christum Judæis exosum, & ad mortem quæri: non timet tamen eum recipere, & affectum ostendere. Talis debet esse in Christum affectus, qui nullô periculô frangatur. Sed quam facili metu tu recedis! Times, ubi non erat, aut esse non debebat timor. Psalm. 12. Times perdere gratiam hominis, & cur non Dei, qui potest & corpus, & animam perdere in gehennam? Matth. 10.*

2. *Et huic erat soror, nomine Maria, quæ etiam sedens secus pedes Domini, audiebat verbum illius. Ib. Et, ut ait Aug. serm. 17. de verb. D. quanto humilius*

liis sedebat, tanto amplius capiebat. Vis doctrinam Domini? Sede, in quiete spirituali? ad pedes Domini per humilitatem. Confluit enim aqua, ait idem, ad humilitatis convallem. Audiebat: ad obedientiam promptam significandam. S. Bern. serm. de assum. Sedens audiebat ad obedientiam Præceptoris ad utrumlibet parata. Ita ergo vacandum divinis, ut non minus promptus sis ad opera vitæ activæ.

3. *Martha autem satagebat circa frequens ministerium. Ibid. Satagere, est satis agere. Satis agit, qui id agit, quod agendum est. Unum corpus sumus, multa membra. Singula suum agunt. Superior, oculus est: non satis agit, si agat, quod manus debet; si in singulorum officia involet, quasi nihil agatur bene, nisi ab ipso. Linguae sunt Doctores, Concionatores: non satis agunt, si agant, quod capitis est, si superioritatem sibi arrogant. Quodcunque tu sis membrum, in quocunque officio: hoc age, quod agendum est, & satis agis.*

F E R I A III.

Martha queritur de sorore, corripitur à Domino.

1. *Quæ (Martha) stetit, & ait: Domine, non est tibi curæ, quod soror reliquit me solam ministrare. Luc. 10. Queritur & de sorore, quod non serviat; & de Domino, quod non jubeat. Agit eorum personam, qui vitæ activæ intenti comparant se cum aliis, qui cum proximo minus operantur, vel quia non possunt, vel quia non licet. Hinc murmura: cur non & iste id agit? cur ego? Ut hoc evites, cogita: Domino sum curæ, quocunque occuper: sed & alter est illi curæ, etsi hic occupetur. Solus debes hoc agere? quid tum? Etiam*

Etiam Dominus solus torcular calcavit. Et quò tu es melior?

2. *Et respondens dixit illi Dominus: Martha, Martha sollicita es, & turbaris erga plurima. Ibid.* Servit Domino Martha, sed cum sollicitudine, & turbatione, ex qua etiam Dominum arguit. Id verò Domino placere non potest. Turbatus animus non dat considerationi locum: Unde effundit quædam prætextu confidentiæ, quæ non sunt hujus temporis, loci, aut personæ, aut non hęc modò dicenda. Sic ergo age, quidquid agis, ut nunquam turberis. Præmeditatio agendorum, aut dicendorum turbationem tollet.

3. *Porro unum est necessarium. Ibid.* Unum edulii genus pro corpore sustentando intelligunt SS. Hier. & Greg. quasi dicat Dominus, supervacaneam esse curam plura parandi. Unum edulii genus pro anima contemplationem Dei interpretatur Cassianus coll. 1. c. 8. Cujus tibi pascendi potior cura est? corporis, an animæ? At certe animæ potior esse debet. Ita enim Dominus probat optimam partem à Maria electam. Vide ergo, quam accuratè spiritualia, tanquam pars optima, sint peragenda.

F E R I A IV.

Christus à Phariseo invitatus hypocrisin reprehendit.

1. **R**ogavit eum quidam Phariseus, ut pranderet apud se: & ingressus accubuit. Phariseus autem cœpit intra se repuzans dicere: quare non baptizatus esses ante prandium. Luc. 11. Et quod tandem delictum est, quòd Christus accubiturus manus non laverit, cur non excusat famà, quæ de Christo erat apud omnes? superba sui ipsius æstimatio fini-

sinistrum de Christo iudicium ingessit. Qui bonus est & humilis, omnia alterius acta in bonum interpretatur. Dic, quid tu agis? Nonne facile iudicas? Nonne ex culice facis elephantem? Nonne ab externis non malis arguis internum malum? sed quis tibi revelavit, quæ soli Deo patent?

2. *Et ait Dominus ad illum: Vos Pharisei, quod deforis est calicis, & catini, mundatis; quod autem intus est vestrum, plenum est rapinâ, & iniquitate. Ib. Non damnat externam munditiam, dum moderata sit, sed maiorem curam vult internæ haberi. Cujus tibi potior cura est? conscientiæ, an cubi- culi? animæ, an vestis? calceum attendis, ne lûtô intamines, animæ verò quàm es incurius!*

3. *Stulti, nonne qui fecit, quod deforis est, etiam, quod deintus est, fecit? Ibid. Prævenit objectionem, quæ fieri poterat: externam munditiam in lege à Deo mandatam esse. At non minor est Deo cura internorum. Non rejicit exteros virtutum actus humiliationem, silentium ad injurias, &c. Sed vult ea ab interno prodire, alias sunt sinè anima, & mortua opera. Non sis pictor, qui solam actionibus tuis apparentiam tribuas: sed adde insuper, de corde puro, de conscientia bona, & fide non ficta. 1. Tim. 1.*

F E R I A V.

Renuit Christus esse Judex inter duos fratres dissidentes.

1. *At ei quidam de turba. Magister, dic fratri meo, ut dividat mecum hæreditatem. Luc. 12. Satis probat affectum ad terrena, qui ob hæc legem charitatis infringit, & cum fratre dissidet. De hæreditate æterna cum Jesu agendum erat, quam venit*

nit nobis parare, & agit de terrenâ. Quod quis amat, etiam quando cum Deo agendum est, voluit. Unde tuæ in orationibus evagationes? nisi quia, ubi affectus est, illuc rapit cogitationem. Tolle affectus pravy, tolles evagationes.

2. *Homo, quis me constituit Judicem, aut Divisorem super vos?* Ibid. Hier. in c. 13. Luc. *Non dignatur Christus Judex esse litium, & arbiter facultatum.* Quare? nonne opus erat bonum, asserere cuique, quod suum est? aut fratres reconciliare? ad finem suum attendit. Ideo ait idem Ambr. *Terrena declinat, qui propter celestia descenderat.* Disce alienis a tuâ vocatione negotiis te non implicare. Qui se Deo addixit, illi se probare debet, ideo enim se illi tradidit. *Nemo militans Deo implicet se negotiis secularibus.* 2. Tim. 2. Non tibi blandire titulo prudentiæ, aut charitatis, nec prudentia nec charitas est, ut agas, quod non est tuæ vocationis.

3. *Videte, & cavete ab omni avaritia: quia non in abundantia cujusquam vita ejus est.* Ibid. Quam errat mundus! *Beatum dicunt populum, cui hæc sunt.* Christus negat in horum abundantia esse vitam, ac felicitatem. Felicior vita est, ubi animus inordinatis affectibus liber est. Reliquisti semel omnia, ut liber esses? vide, ne, qui magna reliquisti, nugis affigas animum. Non inde affectum æstima pravum, quod ampla desideret, aut amet: sed inde, quod te a Deo avertat. Quid autem interest sive magnò, sive parvò avoceris? imò insanius est, parvò.

F E R I A V I.

De Divite avaro.

Hominis cujusdam divitis uberes fructus ager at-
tulerat. *Medici* **A a** *inlit.*

zult. Luc. 12. Vide in hoc homine misérias, quas adferunt divitiæ. *Cogitabat intra se*: quia non habebat amicum, cui confideret, *dicens*: quid faciam? ecce quam animò anxius! *quia non habeo.* Vox pauperis ista; quia avarus nunquam habet satis. *Quò congregem fructus meos.* En sollicitudo congregandi, quod adhuc potest injuriis cœli destrui. *Hoc faciam, destruam horrea mea, & majora faciam.* Ecce instans labor ædificandi, & destruendi. At, quod pessimum est, nec unam cogitationem bonam sumpsit, vel Deo gratias agendi, vel iis ad gloriam Dei utendi. Quàm felix tu, quem Deus his malis eripuit, quas non debes Deo tuo grates? Compatere iis, qui pari avaritia torquentur.

2. *Dicam animæ meæ.* Ibid. Nota hic errores. Secum, tanquam cum alio, loquitur, quasi non sufficeret concupiscentiæ, quod unus esset. *Multa bona habes.* Bona vocat, quæ nomen non merentur. Vocat *animæ bona*, quæ ejus sunt perditio. *Posita in multos annos*: cum illa aut momento eripi possint, aut ipse illis. *Requiesce.* Quietem suam in illis ponit, in quibus non est nisi labor, & afflictio. *Comede, bibe, epulare*, tanquam pecus easdem escas ponit animæ, quæ sunt corporis. Vide, quibus amoribus terrenorum amor hominem involvat! Ut merito judiciò Dei *stultus* vocetur. *Stulte hac nocte, &c.* Hinc conclude, quantò magis accedis affectu ad terrena, tantò magis es stultus; tantò sapiens magis, quantò recedis.

3. *Dixit autem illi Deus*: *Stulte hac nocte repetens animam tuam à te.* Ibid. Ecce momentum, quod claudit omnia. *Hac nocte*: ubi sunt anni plurimi, quos designabat? *Quæ autem parasti, cujus erunt?* Non fumes tecum. Quod congregasti, cedet alteri. Nudus ergo tu remanebis, qui eorum, quæ ani-

animæ profint, nihil congregasti. Sic est, qui thesaurizat, & non est dives in Deum. Alio tu igitur mentem converte, ut sis dives in Deum meritis, ac bonis operibus. Vide, ne compares pauper & miserabilis. Apocal. cap. 3.

S A B B A T H O.

Quomodo expectandus Dominus in supremam horam.

1. *S*int lumbi vestri præcincti. Luc. 12. Et per continentiam castitatis, & per constrictionem appetituum, ne ad terrena defluant. Sic enim, ut talaris vestis, pedes animæ impediunt, quo minus viam cœli expedite gradientur. Et lucernæ bonæ doctrinæ, ac sanctorum luminum, non tantum in intellectu, ut cognoscatis; sed etiam in manibus vestris, ut opere exerceatis.. Et vos similes hominibus expectantibus Dominum suum, quasi jamjam pulsantem fores: Dominus enim propè est. Vide, quid in te horum desideretur. Pendet anima per inordinatos affectus, quam sæpe lutô terrenorum fœdas! Habes lucernam intellectûs, sed non lucentem charitate. Habes lumina veritatum prædicarum, sed non in manibus, non operibus expressarum. Non expectas Dominum tuum, quia in tepore tuo dormis. Miser quid facies, si hoc momento compareat Dominus?

2. *U*t, cum venerit, & pulsaverit, confestim aperiant ei. Ibid. Nota vigilantis servi est, qui, ut pulsantem Dominum audiat, nullum tumultum patitur; qui aurem portæ intentam habet, & illico Domino aperit, qui omnia parata habet, ut non tum primum debeat lucernam accendere, aut necessaria parare. Estne ita anima tua constituta,

conscientia ordinata, domus interior meritis, & virtutibus instructa? si ita quidem, beatus es. *Beati enim servi illi, quos, cum venerit Dominus, invenerit vigilantes.* Si verò vixisti futurorum incurius, somniò torporis oppressus, nunc tandem evigila. Omne momentum trahit periculum, & à momento pendet æternitas.

3. *Hoc autem scitoare, quoniam, si sciret paterfamilias, quâ horâ fur veniret, vigileret utique, & non sineret perfodi domum suam.* Ibid. Fur observat horam, quâ ipse non observatur. Si non omni horâ vigilas: quia illam observat, quâ tu non vigilas. At dies Domini, ut fur veniet. 2. Petr. 3. & Jac. 5. *Ecce Judex ante januam assistit.* Ergo & vos estote parati, quia, quâ horâ non putatis, Filius hominis veniet. Non mirare, quod furis nomen assumat Deus: tui gratiâ id facit, ut cautum reddat. *Dedit illi incurrentibus te significationem, ut fugiant à facie arcus.* Psal. 58.

DOMIN. XXIII. POST PENTEC.

Parabola ficulneæ infructuosæ.

1. *Arborem fici habebat quidam plantatam in vinea sua, & venit quærens fructum in illa, & non invenit.* Luc. 13. Tu es arbor illa plantata in vinea Religiosi statûs, aut Ecclesiæ. A te quærit Dominus fructum conformem tuo statui. Ut enim arbor quævis fructum reddit *juxta genus suum*, ita Deus non alium à te fructum quærit, quam qui sit *juxta vocationem tuam*. Quos ergo fructus protulisti hætenus? quam paucos? plus loliorum, aut apparentiæ fuit in te, quam operum. Vestis te Religiosum magis probavit, quam vita. Nil
inve-

invenit in te Deus, O miser! Itane imposterum dimittes famelicum Jesum?

2. *Dixit autem ad cultorem vineæ: Ecce anni tres sunt, ex quo venio quærens fructum in ficu mea hac, & non invenio: succide ergo illam; ut quid etiam terram occupat? Ibid. Quot annos expectavit Dominus, ut fructum faceres? tot, quot vitæ dedit, quot Religionis. Quoties venit, per superiores, per inspirationes, per gratias quærens, & monens, ut fructum feras? Et usque in hanc diem es idem, qui fuisti, nihilo teipso melior. Quanta Dei tui in te patientia! Quanta in te sterilitas! Nonne potuit tibi dicere: *Ut quid terram occupat hanc, tam sanctam, in qua alius uberrimos fructus ferret? Quid si dicat; Mors succide illam: Superior, succide illam ab hac vinea, non est digna, quæ terram occupet.**

3. *At ille respondens dicit: Domine dimitte illam & hoc anno, usque dum fodiam circa illam, & mittam stercora; & siquidem fecerit fructum: sin autem, in futurum succides eam. Ibid. Agit hic cultor boni Superioris partes. Amat ficulneam, seu subditum, pro quo deprecatur: vult ulteriorem habere patientiam, Vult circa illam fodere increpationibus, & admonitionibus; vult mittere stercora, mortificando, humiliando, ad suæ turpitudinis cognitionem inducendo in spem reddendi fructus. Sed quorsum cultor, si culturam non admitteres?*

F E R I A II.

Mulier decem, & octo annis incurvata sanatur.

1. *E*cce mulier, quæ habebat spiritum infirmitatis decem & octo annis; & erat inclinata, nec omnino

poserat sursum respicere. Luc. 13. In hac considera in terram pronas animas, quæ oculos suos statuerunt declinare in terram. Psal. 16. Quorum affectus solum terrena sapiunt? quò fit, ut oculos cogitationum ad æterna & divina non erigant. Quid infelicius hoc homine: sed quot tu annos in hac infirmitate laborasti? quàm parùm de Deo cogitasti? quàm immerfus fuisti in limo profundi, deprimentibus te passionibus, quarum impetu ferebaris! O si nunc saltem erigaris!

2. *Quam cùm videret Iesus, vocavit eam ad se, & ait illi: Mulier dimissa es ab infirmitate tua.* Ibid. Hæc est benignitas Jesu, nos suâ gratiâ vocantis, & vota nostra prævenientis. Non dimittimur ab infirmitatibus passionum, nisi vocati accedamus ad Jesum per imitationem. *Et imposuit illi manus, & confestim erecta est.* Semel tantum tactam esse à Jesu suffecit, ut erigeretur. At quoties te tetigit manus Domini, per externas, internasque afflictiones, & nondum te erigis ad divina? quoties te toto suo corpore, & sanguine tetigit in Eucharistia, & adhuc terrena sapis?

3. *Respondens autem Archisynagogus, indignabatur prætexens violationem Sabbathi.* Ibidem. Dominus autem ostendit posse curari citra violationem Sabbathi, siquidem & asinus in Sabbatho adaquatum ducitur. Prætexit Sabbathi cultum, reipsâ invidet gloriæ Christi. Imitaris Archisynagogum, si larvâ virtutis tua tegis vitia; si ratione defendis; si externe virtutem præfers, interne tuo commodo servis.

F E R I A III.

Pharisæi suadent Christo fugam.

1. *A*ccesserunt quidam Phariseorum, dicentes: Exi, & vade hinc; quia Herodes vult te occidere. Luc. 13. Politicum hoc Phariseorum inventum. Simulant amicitiam in Christum, quem perditum vellent. Gravis illis erat gloria Christi, & plausus, quem à populo ferebat. Ideo sub alio prætextu fugam suadent. Bene agenti ferenda est invidia. Ob hanc juberis aliquando inde abesse, ubi bene es operatus; cedere officium, quò gloriam Dei promovisti? quin & magnorum odium prætexetur. Quomodo ad hæc es dispositus?

2. Et ait illis: Ite, dicite vulpi illi: Ecce ejicio demonia, & sanitates perficio. Ibid. Quasi dicat: Quod mei est muneris facio: hinc Herodem non metuo. Impenetrabile scutum contra omnes persecutiones est agere, quod muneris est, & vocationis tuæ. Quid facies inter odia, & calumnias? Ejice dæmonia passionum tuarum, ut tunc nulla tui dominetur iniquitas. Quid facies oppressus invidia? perfice sanitates, hoc est, à sana mente non discede, ut quid indignum agas, aut loquaris.

3. Verumtamen oportet me hodie, & cras, & sequenti die ambulare. Ibid. Ecce in ipso metûs objectu constantiam Christi. Perseveraturum se ait: quidquid periculi obviet. Quid tu ais, ubi molestiæ occurrunt? non petis mutare locum, non munus, ut eas declines? Hôcne verò est ambulare in via virtutis, quæ tentatione perficitur? Et hujus id virtutis est? Si ad fundum inspicias est amoris proprii, est animi suorum commodorum amanti.

Sanatur Hydropicus.

1. **E**T factum est, cum intraret Iesus in domum cuiusdam Principis Phariseorum Sabbatho manducare panem, & ipsi observabant eum. Luc. 14. Cur fit eorum conviva, quorum novit malitiam? ut eis prosit instruendo. Ita potius consulebat alieno bono, quam suo. Quid tu agis inter eos, qui tibi minus bene afficiuntur? non declinas? non evitas? Observabant eum, & censurabant acta. Esto paratus observari ab omnibus, alias non observabis omnia, quæ observanda sunt. Non enim observabis charitatem, quæ patiens est, benigna est, & omnia suffert.

2. Ecce homo quidam hydropicus erat autem illum. Ibidem. Te ipsum cum S. Aug. 2. quæst. Evang. in hoc hydropico considera. Hydropem habes concupiscentiam. In hanc quò es indulgentior, eò evadit durior. Quò enim cedis magis, magis invalescit. Utinam expertus non esses! Vide, quantò studiò sit cohibenda. Si tui non fuerit dominata, tunc immaculatus eris, & emundaberis à delicto maximo. Psal. 18.

3. JESUS dixit ad Legisperitos, & Phariseos: Si licet Sabbatho curare. Ibid. Prudens quæstio, antequam opereris: Si licet? Ipse verà apprehensum sanavit eum, & dimisit. Apprehendere, est suum facere. Sedul. l. 4. Paschal. c. 13. Festinat hominem curare, quem magis suum esse desiderabat. Nemo est animò sanus, nisi eum Christus suum faciat. Vult & te suum facere: cur reluctaris? cur magis esse tuus?

F E R I A V.

Christus dedocet Phariseos ambitionem,

1. **C**um invitatus fueris ad nuptias, non discumbas in primo loco. Luc. 14. Arcetur hoc aphorismo prioris loci, aut honoris appetentia, eò argumentò, quòd eam sequatur confusio ex justà alterius praelatione. Cui te præponis, is tibi Judiciò Dei antefertur. Et meritò; quia tu tibi Christum postponis. Absit, inquis. Imò facis, si te non omnibus postponis, Christus se omnibus postposuit, *novissimus virorum*, Isai. 53. *Abjectio plebis*, Psal. 21. Ergo, si vel uni te anteponis, antepone te Christo, qui se eidem postponit. Igitur meritò is, cui te præponis, Judiciò Dei tibi antefertur, qui *novissimum virorum* omnibus præposuit.

2. *Cum vocatus fueris, recumbe in novissimo loco.* Ib. Aphorismus hic ad humilitatem spectat. Eum tibi locum suadet Christus, quem ipse elegit: *Elegit autem abjectus esse, & semesipsum exinanivit*. Non velles quàm vicinissimus esse Christo? Ergo debes te infra omnes demittere, quia is se post omnes reposuit.

3. *Omnis, qui se exaltat, humiliabitur, & qui se humiliat, exaltabitur.* Ibid. Alius est ordo mundi, alius Dei. Quò quis inferior est in ordine mundi, eò superior est in ordine Dei, & e converso, Christus in ordine mundi postremus est, in ordine Dei primus. Igitur quantum ad Christum in ordine hominum te decessisti, tantum in ordine Dei cum eo exaltaberis. Unde ergo cœcitas tua, quâ non vis ex postremis esse? Quid amabilius, quàm esse Christo propinquum? responde tibi, & erubescere.

F E R I A VI.

Parabola de ove perdita.

1. **E**Rant appropinquantēs ei Publicani, & peccatores, ut audirent illum. Et murmurabant Pharisei dicentes: Quia hic peccatores recipit, & manducat cum illis. Luc. 15. Quam oppositus est fastui Pharisæorum Spiritus Christi! Illi superbe despiciunt, & vitant peccatores, tanquam immundos; Christus eos allicit, & blande excipit. Uter in te Spiritus dominatur? Murmurant, quod peccatores recipiat. Quam essemus miseri, si hoc non faceret! Si te non recepisset, in qua abyſſo volvereris?

2. Et ait ad illos parabolam istam. Ibid. Quā suum institutum, & finem explicat; & sic causam reddit, cur peccatores recipiat: Homo quidam (ipse Christus) ex centum ovibus, sive ex omnibus creaturis rationalibus tum in cœlo, tum in terra, unam perdidit, nempe hominem, & te per peccatum. Dimisit nonaginta novem, nempe Angelos: ivit ad illam, quæ perierat, scilicet ad te: quæſivit te, quot angustiiis, & doloribus! per quæ tormenta sua? quam arduas vias ivit, a stabulo usque ad crucem. Invenit te, sumpsit te in humeros suos, & deportavit te in hoc ovile, in quo vivis. Agnosce, quam turpiter erraveris: quā sequendo unam herbulam voluptatis, in immania præcipitia deveneris. Agnosce tui Jesu benignitatem, & amorem, qui te quæſivit, inventam in hoc ovile detulit. Absit, ut posthac erres.

3. Et veniens domum convocat amicos, & vicinos, dicens: Congratulamini mihi, quia inveni ovem meam, quæ perierat. Ibid. O bonitas Jesu mei! Ego convocare deberem omnes creaturas, ad gratulandum mihi, inventus sum, & vitam recepi: ille

ille sibi gratulatur, quasi me invento lucrum reciperet. Ah! si tantum gaudium habet Deus te invento, noli te ei iterum subtrahere; imò verò te ipsum denuò illi dona.

S. A B B A T H O.

Parabola de filio prodigo.

1. **H**omo quidam (dives) habuit duos filios, justos, & peccatores; & dixit adolescencior ex illis, peccator: Pater, da mihi portionem substantiæ, quæ me contigit: Luc. 15. Talenta naturæ & gratiæ, quæ bonis & malis Deus distribuit. Et divisit illis substantiam. Dat enim unicuique ipse sine optimò, ut eis ad vitam æternam utamur. Seu justus, seu peccator sis, quanta accepisti à Patre tuo? quæ dona naturæ? quantum cumulum gratiarum? si alteri ea contulisset, quæ non præstitisset? quid tu illis agis.

2. Et post non multos dies. Ibid. Neque enim peccator diebus multis à peccato abstinet: Adolescencior filius peregrè profectus est, procul à patriâ cœlesti, procul à Patre Deo, in regionem longinquam, ut quò remotior esset à Patre, eò licentiosius viveret, nec reverentiâ oculorum Patris refrœnaretur. Et ibi dissipavit substantiam suam, gratiam, dona supernaturalia; Intellectum quoque, & voluntatem depravavit, vivendo luxuriosè, secundum impetum suarum concupiscentiarum. Utinam tu non is sis, qui hâc parabolâ depingitur! Recogita annos adolescentiæ tuæ: Delicta juventutis meæ, & ignorantias meas, ne memineris Domine. Psal. 34.

3. Et postquam omnia consummâisset, facta est fames valida in regione illa, & ipse caput egeret. Ibidem.
Semper

Semper enim eget, qui nihil Dei habet, qui vivit secundum concupiscentias; nam concupiscentia ignis est, qui nunquam dicit: Sufficit. Prov. 30, *Et abiit, & adhæsit uni civium, seu dæmonum, seu pravarum consuetudinum. Et misit illum in villam suam, ut porcos pasceret, suos appetitus, & sensuum voluptates sequeretur. Et cupiebat implere ventrem suum de siliquis peccatorum, quas porci infernales manducabant: & nemo illi dabat ad sufficientiam, quia, quò plus peccabat, plus peccare quærebat velut famens. O misera peccatoris conditio! quò devenit, qui semel à Deo recedit, & non illico revertitur! O nobilis creatura tot ornata donis, quo sponte tua decidis!*

DOM. XXIV, POST PENTEC.

Filius prodigus in se revertitur, & pœnitentiâ ducitur,

1. *IN se autem reversus, dixit: Quanti mercenarii in domo Patris mei abundant panibus, & ego hîc fame pereor! Luc. 15.* Pœnitentis forma describitur: Ac primum quidem est agnitio miserandi sui statûs, si tuus non est tam miserandus; est tamen, qui possit esse felicior, & ad hunc aspira. Non es in regione longinqua situs, qui vivis inter filios Dei; laboras tamen multarum virtutum defectu: &, quod pessimum est, eorum famem non sentis. In via perfectionis primum debet esse fames virtutis.

2. *Surgam, & ibo ad Patrem meum. Ibid.* Est propositum non demorandi in errore impiorum. Eccl.

17. cum spe veniæ concepta ex consideratione affectûs paterni. Vidisti, in qua jaccas imperfectionum regione: Dic tandem tibi ipsi: *Surgam: Pater*

Pater meus cælestis non me rejiciet, qui non vult mortem peccatoris. Dixisti id sæpius : surgam : sed nunquam id serio præstitisti. Velleitas fuit, non resoluta voluntas. Dic ergo jam : Surgam ex hac imperfectiōe, nunquam amplius, etsi me mori oportuerit, in eandem lapsurus.

3. *Et dicam ei : Pater, peccavi in cælum, & coram te.* Ibid. Est ingenua confessio, & humilis contritio, pure, quod Patrem offenderit. Si filius improvise casu patrem vulneret, re postea cognita, quis erit boni filii sensus ? Unicum dolebit, se Patrem offendisse. Tu Patrem offendisti, non ita quidem ignoranter, ut non peccaveris ; sed non ita scienter, ut cognoveris te Patrem offendere. Ergo saltem amodo voca eum ? Pater meus es tu. Jerem. 3. *Jam non sum dignus vocari filius tuus.* Satisfactio est privativa, quâ se bono, quô gaudere poterat, libenter privat. *Fac me sicut unum de mercenariis tuis.* Est positiva, quâ vult affligi. Id tu quoque age. Quoties delinquis, priva te delectabilibus, & sensibilem pœnam impone sine indulgentia. *Et surgens venit ad Patrem suum :* est propositi executio. O si talia sint tua proposita, quæ statim ad executionem deducas ! Infelicissimum est, semper parturire, & nunquam parere.

F E R I A II.

Filius prodigus cum gaudio à Patre excipitur.

1. **C**Um adhuc longè esset, vidit ipsum Pater ipsius, & misericordiâ motus cecidit super collum ejus, & osculatus est eum. Luc. 15. Benignitatem Dei in te peccatorem hic cogita. Non exprobrat filio malos mores, qui videt, & amat eor contritum, & humiliatum. Quam debet in te fiduciam,

tiam, & amorem tanta benignitas, & misericordia excitare? Ut prius velis omnia mundi tormenta, & infamem mortem sustinere, quam ab eo amplius recedere, qui te revertentem tam benigne recepit.

2. *Dixit autem Pater ad servos: citò proferte stolam primam.* Ibid. Gratiaë justificantis; & dare annulum in manus ejus, in signum libertatis filiorum Dei; & calceamenta veræ coram Deo nobilitatis, in pedes seu affectus ejus, quibus coercantur, & adducite vitulum saginatum Christum in Eucharistia, Et epulemur. Vide, quantum gaudium super te peccatore pœnitentiam agente DEUS ostendit. Ah! noli illi hoc gaudium tollere, ut revertaris ad porcos.

3. *Erat autem filius ejus senior in agro: & cùm venires, audivit symphoniam: & interrogavit, quid hæc essent.* Ibid. Audivit reversum fratrem, celebrari ei convivium; Indignatus noluit introire, donec rogatus, & persuasus est à Patre. Considera hic non invidiam justorum, quæ carent, sed magnitudinem amoris, quò Deus revertentem peccatorem recipit, quæ invidiam justis creare posset: & erigere in fiduciam eum semper accedendi, quoties etiam leviter, delinquis: quia summa ejus voluntas est, peccatores pœnitentes recipere. Ut Pater seniori filio satisfaciat, ait illi: *Tu semper mecum es, & omnia mea tua sunt.* Hæc justorum portio est, esse cum Domino, & in bonis cœlestibus cum eodem communicare. O quale solatium, *tu semper mecum es?* O qualis felicitas: *Omnia mea tua sunt!* & quis velit à tam bono Patre discedere?

FERIA

F E R I A III.

De Villico iniquitatis.

1. **H**omo quidam habebat villicum, & hic diffamatus est, quasi dissipasset bona ipsius. Et vocavit illum, & ait illi: Quid hoc audio de te? Redde rationem villicationis tuæ; jam enim non poteris villicare. Luc. 16. In hoc villico te considera, cui Deus non tanquam Domino, sed tanquam Oeconomo dedit bona corporis, & animæ, naturalia, & supernaturalia. Nihil tui habes, etsi studiô tuô te aliquid comparasse credas. Obligaris ergo ea omnia ad placitum Dei impendere. Erit hora, qua audies: Redde rationem, in quid, quo fine, quo modo ea bona impendisti? Quidquid non cessit ad gloriam Domini, dissipatum est. Ini mature rationes, quia prope est hora.

2. Ait autem villicus intra se: Quid faciam, quia Dominus meus auferet à me villicationem? Ibid. Unde hæc villici sollicitudo? Ex conscientia pessimæ suæ administrationis, & certitudine tollendæ villicationis. At te nulla tangit reddendæ rationis sollicitudo. O si serio cogitares, quam infideliter bona tibi concredita administraveris! quam salubriter angereris! Examina, quò intellectus; cogitationes, voluntas, affectus, passionēs? &c. Non ignoras tibi hæc omnia ad Dei gloriam impendenda fuisse. Itane a te actum? quantum mundo, quantum carni, quantum amorì proprio, ac vanitati datum est? Ut ergo salubris te cura subeat, cogita nunc serio, quid facias. Postea serus erit labor, sera auxilii meditatio.

3. Et laudavit Dominus villicum iniquitatis, quia prudenter fecisset; quia filii hujus sæculi prudentiores sunt filiis lucis in generatione sua. Ibid. Sibi in futurum

turum prospicere, res magnæ prudentiæ est. Hoc est, in quo filii lucis superantur à filiis sæculi in suo genere. Quàm illi ad suos fines disponunt media, quàm nullum intentatum relinquunt! quàm instant impense, & quidem *ut corruptibilem coronam accipiant!* 1. Cor. 9. Et quid agis tu, qui filius es lucis, vocatus ad nobilius institutum, gratiâ majore cumulatus, majoribus auxiliis adjutus? Filii sæculi mundo placere quærunt, tu Deo. Quas illi vigilias impendunt, quos labores, quas difficultates, quomodo diè nocteque de mediis emergendi cogitant! an & tu ista pro Deo, pro æternitate absorbes?

F E R I A I V.

Parabola de divite Epulone, & Lazaro.

1. **H**omo quidam erat dives, qui induebatur purpurâ, & byssô, & epulabatur quotidie splendide. Et erat quidam mendicus, nomine Lazarus, qui jacebat ante januam ejus, cupiens saturari micis, quæ cadebant de mensa divitis: sed & canes veniebant, & lingebant ulcera ejus. Luc. 16. Quem tu ex duobus felicem, quem infelicem arbitraris? si sensum consulas, divitem dicēs felicem, Lazarum miserum. At fides contrarium docet. Cui assentiris? nonne sensus errat? Et tamen quantum isti indulges? quam e converso odisti necessitate premi, aut re quacunque sensui contraria molestari. Sed, quod fugis, ad salutem ducit, quod sequeris, ad perditionem.

2. Factum est autem, ut moreretur mendicus, & portaretur ab Angelis in sinum Abrahe. Ibid. Hic humilis, æruminosæ, & in mundo despectæ conditionis est finis. Breve, & morituram affli-

ctio-

Etionem immortale gaudium excipit. *Quàm momentaneum, & leve est tribulationis nostræ, quod æternum gloriæ pondus operatur in nobis.* 2. Cor. 4. Appende in balance, *momentaneum, & æternum: & vide, an sint condignæ passiones hujus temporis ad futuram gloriam.* Rom. 8.

3. *Mortuus est & dives, & sepultus est in inferno.* Ibid. Hic exitus ejus, qui secundum sensum felix videbatur. *Ducunt in bonis dies suos, & in puncto ad inferna descendunt.* Job 21. Si nondum capis, quàm infelix sit vita, quæ secundum sensum ducitur, ex fine intellige. Momentaneam, & insanam lætitiâ æternum vœ sequitur. Quàm meritò timere debes omnem sensûs indulgentiam! quam illum affligere! quam coërcere! Ut ei non nimium indulgeas, ultra necessitatem nihil indulge.

F E R I A V.

Cruciatus Epulonis.

1. *E*Levans autem oculos vidit Abraham à longè, & Lazarum in sinu ejus. Luc. 16. Vidit à longè Lazarum, quem vicinum nec intuebatur. Videt in gloria, quem in infirmitate despiciebat. Sic rerum vertitur ordo. Rogat: *Pater Abraham, miserere mei.* Sed serò nimis. Elapsum est miserendi tempus; Adest tempus æternæ justitiæ. In vita agendum est, quò fruaris in æternitate. *Mitte Lazarum, ut intingat extremum digiti in aquam, ut refrigeret linguam meam.* Nullò non cruciatur membrò, de sola lingua queritur. Gravius hujus fuisse tormentum crede, quia linguâ inopi Lazaro insultavit; quid si scomata dixeris, aculeos, detractiones? &c.

Avant. Medit.

Bb

2. Et

2. *Et dixit illi Abraham : Fili, recordare, quia accepisti bona in vita tua. Ibid. Quæ? Concupiscentiæ carnis : epulabatur quotidie : concupiscentiæ oculorum : erat dives : superbiæ vitæ : induebatur purpurâ & byss6. Et Lazarus similiter mala. Quæ? illis bonis contraria. Nam mendicus erat, ulcerosus, despectus. Nunc autem hic consolatur, tu verò cruciaris. Hæc vicissitudo est : si hic gaudium, ibi tormentum ; si hic tormentum, ibi gaudium. Noli tibi persuadere, & hic tibi posse esse secundum sensum bene, & ibi secundum animam. Ergo, quantum hic cruciatum sensui inferes, tantum gaudebis ibi : quantum hic illi concedes, tantum ibi gaudio, & gloriæ detrahes.*

3. *Hubent Moysen, & Prophetas, audiant illos. Ibid. Ita epuloni, ut Lazarus ad fratres vivos pœnarum nuncius mittatur, roganti respondetur. Noli quærere, ut Deus te per inusitata media ad vitam æternam dirigat. Ut ipse tibi compareat, ut Angelum mittat, qui voluntatem Dei explicet. Habes Superiores, per quos regaris. His te committe. Ita enim Deus statuit ordinate mundum regere. Ergo usitatis mediis utere, & accurate iis insiste, quæ statuunt leges.*

F E R I A VI.

Parabola iniqui Judicis, & Viduæ.

1. *Oportet semper orare, & nunquam deficere. Luc. 18. Si nullum sit tempus expers periculi, adversus quod oratio sit præsens remedium, tum semper oportet orare. Sed quæ hora est, quâ tibi periculum non faciunt mundus, caro, dæmon, quâ in te non est lucta spiritûs, & carnis? Hoc periculum tantò gravius est, quantò occultius. Noli ab ora-*

oratione deficere. Ubi deficis, hostis proficit. Verè, & instanter orantibus Deus assistit.

2. *Vidua quædam erat, & veniebat ad Judicem dicens: Vindica me de adversario meo. Et nolbat per multum tempus. Ibid. Etsi esset iniquus Judex, qui nec Deum timebat, nec hominem reverebatur; Vidua tamen quotidie eum interpellabat, & toties repulsâ orare non desistebat. Videris tibi à Deo repelli, quod non impetres ab hac, aut illa tentatione liberari? Non vult Deus per multum tempus. Imò tamdiu non vult, quamdiu non aufert a te spiritum orationis, quia tamdiu te hōc clypeō protegit. Si tu illum rejicias, Deum non culpa.*

3. *Post hæc autem dixit Judex: Molesta est mihi hæc vidua: vindicabo illam. Ibid. Si iniquus Judex hoc fecit, Deus autem non faciet vindictam electorum suorum clamantium ad se die ac nocte? En habes promissionem vindictæ de adversariis tuis. Si nondum eam sentis, signum est, quod non ita oras, sicut illa vidua. Dic, quo affectu oras contra illum adversarium, qui blanditur carni, & repugnat spiritui: Æstimationem sequuntur affectus. Forte nec æstimas tuum hostem, affectum carnis, amorem tui, &c. Et quomodo credam te tanto affectu contra eum orare? Agnoscere ergo debes te hostem tui, & agere, quæ in hostem ageres; & non cum hoste tuo conspirare.*

S A B B A T H O.

Parabola Pharisei, & Publicani orantium.

1. *Phariseus stans: Luc. 18. Estne hæc humilis corporis compositio ante Deum? Orabat: Deus, gratias tibi ago, quia non sum sicut ceteri hominum. Quæ arrogantia, quæ nullo excepto,*

Bb 2

omnes

omnes præ se despiciat? *Raptores, injusti, adulteri.* Tales alios iudicat, qui se magnum æstimat. *Vel etiam hic Publicanus.* Qui sibi uni magnus est, temere de alio iudicat, cujus interna non novit. *Jejuno bis in Sabbatho, decimas do omnium, quæ possideo. Quæ ista suarum opum est iactantia: quæ mica orationis est in tota hac oratione? damnas iactabundum Phariseum? Vide, ne sis talis, aliorum contemptor, tui æstimator. Ne dicas sufficiens mihi sum. Eccl. 11.*

2. *Et Publicanus à longè stans.* Ib. Sed non erecta cervice, indignum se reputans, qui propius aram accederet. *Non audebat nec oculos ad cælum levare; ex intima sui confusione. Sed percutiebat pectus suum dolore contritum, dicens: Deus propitius esto mihi peccatori.* Sibi veniam humiliter rogat. Accipe formam, quam orans sequaris. Sit oratio, & meditatio tua humilis: occupetur in tui ipsius cognitione, in expurgatione animi à pravis affectibus.

3. *Dico vobis: Descendit hic justificatus in domum suam ab illo.* Ibid. Habes hic de utroque orante sententiam Dei. Justificatur humilis, damnatur superbus. Ita tu semper melior ab oratione surges, si ejus tempore versatus fueris in humili tui cognitione, & abiectione, iisque affectibus, qui hanc consequuntur. S. Aug. in Psalm. 93. *Videte fratres, magis placuit Deo humilitas in malis factis, quàm superbia in bonis factis. Ita Deus odit superbos. Hinc nec te laudabis, nec laudari affectabis. Vives te, & Deo contentus.*

DOMIN. XXV. POST PENTEC.

Repuerascendum pro Regno Dei.

1. *Adferebant ad illum infantes, ut eos tangeret.*
A Marc. 10. Multum refert; quibus quisque imbua-

imbuatur principiis à teneris annis. Ipse hoc experiris. O si statim allatus fuisses ad Christum ! si instructionem te adducere volentium acceptasses ! Hoc non egisti ? expedit ergo , ut jam per virtutem fias parvulus , & te à Superioribus ad Christum duci patiaris : idque tantò magis , quantò in vocatione es tenerior. Quia ab hoc principio omnis reliqua vita dependet. Talis in omnem vitam eris, qualis e prima novitiatus disciplina abibis.

2. *Quod cum viderent Discipuli , increpabant eos. Jesus autem dixit : Sinite pueros venire ad me. Ibid.* Ostendit Christus , quàm charum sibi sit , animas innocentes ad se venire. Venisti innocens ? gratiam inæstimabilem es consecutus. Ex quo tantò gravius tibi incumbit debitum , innocentiam apud Christum conservandi. Roga ergo Dominum semper , ut in hunc finem in Eucharistia cor tuum tangat. Committuntur tibi juxta vocationem tuam parvuli ? Cura , ut ad Christum adducas per virtutem , quàm ut per scientias illumines. Non minùs enim ad hoc obligaris , quàm ad istud. De utroque Deo respondebis.

3. *Talium est enim regnum cælorum. Ibid.* Adverte non istorum tantum , qui non possunt peccare ; sed talium , qui per virtutem non volunt , est regnum cælorum. Ergo debes repuerascere : peccata , & imperfectiones omnino ignorare , ne facias ; simplicitate quadam velut naturali , in bonum ferri ; nisi hoc facias , statutum est : *Quisquis non receperit regnum Dei velut puer , non intrabit in illud.*

F E R I A II.

Dives adolescens eruditur ad vitam æternam.

1. *E*cce unus accedens ait ei : Magister bone , quid faciam , ut habeam vitam æternam. Matth. 19.

B b 3

Quan-

Quantum in hoc adolescente est vitæ æternæ desiderium! sed quantum est tuum? Ex cura, quam ejus consequendi causâ impendis, mensurare potes. Si parum, aut rarò sollicitus es, nullum est tuum desiderium. Et tamen est necessarium. Ergo quotidie quære potius, quid faciam, quam quid docebo, quid discam, quid loquar? scientiis & verbis non obtinetur cœlum, sed factis.

2. *Qui dixit ei: si vis ad vitam ingredi: serva mandata.* Ibid. Quod sæculari de mandatis Dei, hoc religioso de suis regulis dicitur. Non dico; non ibis ad cœlum, si regulas, quæ sub mortali non obligant, non serves: sed dico, non ibis viâ tuæ vocationis, non ibis expeditius. Imò si spernis, ægre ibis: quia, *qui spernit modica, paulatim decider.*

3. *Dicit illi adolescens: Hac omnia custodivi à juventute mea.* Quàm felix, si hoc dicere possis de juventute tua in vita sæculari! Quàm felix, si ab ingressu religionis dicere possis te regulas observasse! sed in utroque quàm procul abes! hoc ipsum tibi motivum esse debet ad accuratam earum observationem: quia Deus vult te per hanc viam ad salutem dirigere.

F E R I A III.

Diviti adolescenti suadetur perfectio.

1. *Alit illi Jesus: Si vis perfectus esse, vade, vende omnia, quæ habes, da pauperibus, & habebis thesaurum in calo.* Matth. 19. Marcus præmittit cap. 10. *Jesus intuitus eum, dilexit eum.* Sed quomodo ostendit dilectionem? docendo viam perfectionis, & thesaurum spondendo. Docet enim non tantum quomodo salvus fiat, sed quomodo in gloria major evadat. Quæ felicitas tua, si eam bene

bene assequaris, qui sic vocatus es? Quàm nihil est, quod dimisisti! quàm magnum, quod reponitur! Majorem hunc thesaurum reddere potes, si affectum à terrenis semper magis purifices.

2. *Cum audisset adolescens, abiit tristis: erat enim habens multas possessiones.* Ibid. Vide, quantum noceat affectus ad creaturas. Ille enim innocens adolescens à Christo avellitur. Sed & tu hòc malò laboras. Vis hòc commodò tuò non carere, & simul cœlum obtinere. Emendum est cœlum; non plura dando; sed minus retinendo. Isai. 48. *Elegi te in camina paupertatis.* Qui affectu purior in hoc camino est, electus est. Quis hic tibi ad hoc medium obtinendi cœlum est affectus? quàm ab omni creatura avulsus?

3. *Iesus autem dixit discipulis suis: Amen dico vobis, quia dives difficile intrabit in regnum cœlorum.* Ibid. Veritas hæc scripta plana est. Ergo à contrario pauper non difficile intrabit in regnum cœlorum. Quàm gratulari tibi potes, quòd Deus te ad viam cœli reposuerit, quâ facilius id obtineas. Sed non crede satis esse, quòd reliqueris omnia, nisi & te relinquant, & affectu à creaturis recedas. Non enim Christus tibi difficultatem cœli facit, sed tu ipse, seu affectus inordinatus.

F E R I A IV.

Proemium eorum, qui relictis omnibus Christum sequuntur.

1. **T**unc respondens Petrus dixit ei: Ecce nos reliquimus omnia, & secuti sumus te: quid ergo erit nobis? Matth. 19. Ad quæstionem de præmio duo præmittit Petrus. 1. *Reliquimus omnia.*
2. *Secuti sumus te.* Quasi tacite dicat: non auderem

auderem de pœmio quærere, nisi hæc nos præstiffisse ostenderem. Reliquiffine omnia? etiam te ipsum! curam commodorum, honoris, sensualitatum? O quàm tibi mentiris te reliquiffisse *omnia*, fi hæc non reliquiffi? Esne Christum fecutus? In paupertate, contemptu? &c.

2. *Jesus autem dixit: Amen dico vobis, quòd vos, qui secuti estis me, in regeneratione cùm sederit Filius hominis, sedebitis & vos super sedes duodecim, judicantes duodecim tribus Israël.* Ibid. Dignum est honorari a Christo eos, qui ejus amore relictis omnibus facti sunt despecti. Quàm tunc jucundum erit Christum inopem, & contemptum elegisse? Cur ergo nunc non eligis? An nunc alia veritas, tunc alia? Dies Domini revelabit falsum, quò nunc niteris; verum, quod spernis. Quoniam honor ille, præfente contemptu venalis est.

3. *Et omnis, qui reliquerit domum, vel fratres, aut sorores, aut agros propter nomen meum, centuplum accipiet, & vitam æternam possidebit.* Ibidem. Relinquenti sua spondetur præmium. Quantum? Centuplum. Neque id in alteram vitam rejicitur, sed in hæc datur. Quid utilius? Adjicitur certitudo futuræ vitæ? Quid jucundius? Quare ergo quandoque tristis es anima mea? Fierine potest, ut non vivas contenta tuò centuplò? Non recipio, inquis. Mentiris. Marc. 10. *Nemo est, qui reliquerit omnia, qui non accipiet centies tantum nunc in tempore hoc cum persecutionibus.* Si non recipisse te dicis, mendacem facis Deum. Non experior, inquis. Ergo vere non reliquiffi omnia, non te omnino exspoliast. Ergo affectum omnem evacua, ut experiaris.

F E R I A V.

Parabolâ operariorum in vinea.

1. *Simile est regnum celorum homini parrifamilias (hic Deus est) qui exiit primò manè, circa horam tertiam, sextam, nonam (in omni hominum ætate) conducere operarios in vineam suam. Matth. 20. Sive in statum quendam cuique certum vendi. Circa undecimam verò exiit, & invenit alios stantes, & dicit illis, quid hic statis tota die otiosi. Agnosce te in vineam ad societatem vocatum, & gratias age. Vide, ne hic sis otiosus, si forte, antequam conducereris, fuisti. Nihil est magis tuum, quàm tempus, cujus usus à te uno solo pendet, ut omni momento uti possis vel in vitam, vel in mortem. Sed nihil est minus tuum, quàm tempus; cujus æquè, ac vitæ tuæ abusus est vetitus. Quod enim vivimus, Deo vivimus. Et quantum tu temporis projicis otiosis colloquiis? Tantam gloriam omni hora negligis, quanta bona interim facere potuisses. S. Bonavent. l. 1. de prof. Relig. cap. 13.*

2. *Cum serò autem factum esset. Ib. (Primò post mortem momentò) dixit vineæ procuratori: voca operarios: & redde illis mercedem. Quanto hoc verbum erit solatio! sed solum operariis, non otiosis. Illum vesperum sæpe cogita. Adesse festinant tempora. Deut. 32. Reddit ergo mercedem, æqualem omnibus, etsi alii longiore, alii brevior tempore laboraverint. Deus enim in opere magis fervorem, & puritatem intentionis attendit, quàm tempus impensum. Veneris autem manè aut serò, ad mensuram fervoris recipies. Noli tibi de annis religionis blandiri. Deus ponderat fructum emendationis.*

B b 5

3. Ve.

3. *Venientes autem primi, & accipientes murmurabant. Ibid. Hic seniorum, sed tepidorum defectus est. Putant sibi plus deberi, quia diutius sunt in religione; & non cogitant, quo animo, quo profectu. Nos portavimus pondus diei; & astus: Contemnunt alios. Hi novissimi unâ horâ fecerunt: Isti juvenes, heri nati, &c. Et non conferunt suum teporem, cum illorum fervore. Denique invident: Pares illos nobis fecisti: si quid juveni bene merito concedatur, si elevetur, &c. Quibus meritò respondetur: Non facio tibi injuriam. Absint ista à te; sed, quantum tempore, tantum virtutibus, & meritis procede.*

F E R I A VI.

De Lazaro ægrotante.

1. *M*iserunt ergo sorores Lazari ad Jesum, dicentes: Ecce, quem amas infirmatur. Joan. 11. Quærunť fratris sanitatem ab optimo medico cum fiducia, & indifferentia. Non allegant sua merita, nec suum, aut fratris in Christum affectum; sed solum amorem Christi in Lazarum. Id enim, quò solò persuadetur, ut nobis beneficiat, est amor, quo in nos fertur: *Dixit ei Jesus: Infirmitas hæc non est ad mortem, sed pro gloria Dei. Sanò judiciò credere debes morbum illum fuisse Lazaro beneficium, quòd inde emergeret gloria DEI. Non aliud de tuis malis judica, ut te illis subdas humiliter, ne Deo gloriam fureris.*

2. *Diligebat autem Jesus Martham, & sororem ejus Mariam, & Lazarum. Ibid. Quomodo ergo, ut audivit, quia infirmabatur, tunc mansit in eodem loco duobus diebus? Hoc ergo est amare, non succurrere in tempore? pati amici mortem, amicorum afflictio-*

afflictionem? Ita Deus amat, non molliter, sed utiliter ad finem, ad quem nos creavit. Patitur, & vult Lazarum mori; quia hoc erat pro gloria Dei. Credisne Deum velle eas afflictiones, quas pateris? Certe si nollet, non affligerent. Ergo crede esse pro gloria Dei; quia, quidquid vult, ad hunc finem vult. Hoc si serio cogitaveris, mollis feres.

3. *Lazarus mortuus est: & gaudeo propter vos, ut credatis, quoniam non eram ibi.* Ibidem. Ostendit Jesus, ita à sua providentia ordinari ea, quæ putamus mala, ut inde emergant bona. Et hunc ex afflictionibus tuis vult fructum Deus, nisi tu impedias. Pateris? Vult, ut credas eum esse Dominum, se servum; eum posse de te ad libitum disponere, te obligatum obsequi. *Sed eamus ad eum.* Hoc in omni tribulatione solatium cape, quod ait per Psalm. 90. Deus. *Cum ipso sum in tribulatione.*

S A B B A T H O.

Venit Jesus Bethaniam, ut Lazarum resuscitet.

1. *Venit ergo Jesus, & invenit eum quatuor dies in monumento habentem.* Joann. 11. Non illico Deus adest afflictis rebus, sed desperatis; vel ut, dum humana juvare non possunt remedia, ipse adjuvisse intelligatur; vel ut nostra quoque quamdiu possumus, applicetur industria. Sic in Domino spera, ut tu quoque ad te juvandum coopereris: sic cooperare, ut spem totam in solo Deo reponas.

2. *Domine, si fuisses hic, frater meus non fuisset mortuus.* Ibidem. Duarum sororum Marthæ, & Mariæ

Mariæ hæc est querela, sed modesta, & amica. Errant, si credant, quod absens corpore mortem impedire non potuerit. Potuit; sed non voluit: imò ideo adesse distulit, ut non velle intelligeretur. Mira res, quod Dei voluntatem ad nostram trahere velimus. Oppositum faciendum est. Divina voluntas est nostra regula. Si tuam illi perfecte subternas, nihil unquam eveniet mali: quia, quàm illa est Deus, tam malum velle non potest.

3. *Martha vocavit sororem suam silentiò dicens: Magister adest; & vocat te. Ibid. Quæ fidelitas Marthæ? Vult participem solatii Mariam. Quod solatium Mariæ? Magister adest. Quæ dulcedo? vocat te. Quis affectus, & amor Mariæ? Ut audivit, surgit citò, & venit ad eum. Estne tuus tantus, ut statim properes, cum te Deus, vel obedientiæ signò, vel bona inspiratione vocat? Non detinent te aliquando solatiola humana? Maria autem reliquit Judæos, qui erant cum ea in domo, & consolabantur eam.*

DOM. XXVI. POST PENTEC.

Lazari resuscitatio.

1. *Jesus ergo, ut vidit eam plorantem, infremuit spiritu, & lachrymatus est. Dixerunt ergo Judæi: Ecce quomodo amabat eum. Joan. 11. Ex paucis lachrymis, quas Christus pro Lazaro fudit, colligunt Judæi magnum illius in hunc amorem, quem non capiunt, sed admirantur. Majora pro te fecit Christus: sanguinem fudit; vitam posuit? in S. Eucharistia se ipsum dedit: & amorem nondum intelligis? si intelligeres, redamares: non verbò,*

verbô , sed opere. Hoc certe non satis ostendis. Nam qualia sunt opera tua?

2. *Ait Jesus : tollite lapidem.* Ibid. Quæ in suscitatione Lazari aguntur , typus sunt eorum , quæ sunt , ut ab imperfectione tua surgas. Tollendus est lapis , & affectus omnis , qui impedimento esse potest ad resurgendum. Posset Jesus verbô cum tollere , sed mandat tibi , ut tollas : quia tuam vult cooperationem : tu autem velles , ut se solo te sanctum faceret , & tu nullam subires difficultatem. *Dicit ei Martha : Domine , jam faciet : quatruiduanus est enim.* Agnosco foetorem imperfectionum mearum , in quibus non quatruiduo , sed multis annis jaceo. Sed quam bonus Jesus ! non offenditur foetore , ut abstineat suscitare. Miserum me , si ejus bonitas non esset tanta ?

3. *Tulerunt ergo lapidem.* Ibid. In circumstantiis resuscitantis Jesu , & resuscitati Lazari agnosce , quid tecum agatur , ut resurgas. 1. *Ergo tulerunt lapidem.* Quia ponenda est cordis durities , & obstinatus affectus. 2. *Elevat sursum oculos :* quia cogitatio à terrenis vertenda est ad cœlestia. 3. *Vox magna clamat :* quia audiri vult , ut inspirationibus ejus obsequaris. 4. *Prodit Lazarus ligatus manus , & pedes :* quia etiam post mille proposita , quibus tibi videris resurgere , adhuc adherent tibi pravi habitus. Sed de his dicitur : *Solve eum :* ut iis tollendis seribis allabores.

F E R I A II.

Filii Zebedæi primas sedes ambiunt.

1. *Accessit ad eum mater filiorum Zebedæi cum filiis suis , petens ab eo : Dic , ut sedeant hi duo filii mei unus ad dexteram , & alter ad sinistram in regno tuo.*

1. *Respondens Jhesus dixit ; Nescitis , quid petatis .* Matth. 20. De regno agunt , dum Christus de cruce. Etiam in schola Christi reperitur ambitio. Didicisse in hac debebas humilitatem & tui contemptum. O pessime discipule , qui terrena sapias , & punctum honoris quæris , ubi Deus abjicitur ! *Verè nescis , quid petas .* Regnum Dei non acquiritur honore , sed contemptu. Hunc tu fugis , & tamen vis regnum Dei. Quæ stoliditas tua ?

2. *Ait illis : potestis bibere calicem ?* Ibid. Insinuat viam obtinendi regnum : non sedendo , sed per violentiam , per passionem , per mortificationem. *Quem ego bibiturus sum .* Si dicat tibi Jhesus ; Ego Dominus tuus , Deus tuus præcedam te. Amarus est calix , ad cujus solam cogitationem ego , sanguinem sudabo : sed tamen *bibiturus sum* : quid tu dices ? Ah resolve te : dic animose : possum per gratiam tuam , & volo. Dulcior est , postquam Jhesus eum bibit. Quid non fecisti pro noxia in terris gloria ? & vilius tibi erit cælum ?

3. *Sedere ad dextram meam , vel sinistram meam , non est meum dare vobis .* Ibid. Vobis ambitiosis ; & nondum meritis ; sed sola cognatione prætendentibus ; *Non sibi potestatem deesse asserens , sed meritum creaturis .* Ambr. l. 5. de fid. c. 2. *Regnum cælorum non persona , sed vitæ paratum est .* S. Hier. Merita ergo Christus exigit. Sed quæ sunt tua ? quam lentus affectus ! quam sterilis manus ?

F E R I A III.

Cæcus ad Jericho illuminatus.

1. **B** *Artimæus cæcus sedebat juxta viam mendicans .* Marc. 10. In hoc cæco statum animæ tuæ
con-

confidera. 1. *Cæcus* es ad divina, quibus intelligendis mentem non applicas; & , dum lucem mundi quæris, cœli amittis. 2. *Sedles* in torpore animi, dum in spiritu nihil progredieris, etiam post tot annos religionis. 3. *Juxta viam* es, non in via regularum tuarum. 4. Mendicas à transientibus creaturis solatiola, non à Deo, quem fastidis. Nonne tædet, & pudet te miseriæ tuæ?

2. *Cùm audivisset, quòd Jhesus Nazarenus est, cæpit clamare.* Ibid. Quod in cura corporis egit hic cæcus, agendum tibi est in cura animæ. 1. Captat primam occasionem: tu quot præteriisti? quæ hodie dabitur, fortè ultima est. 2. Increpitus à turba, clamat: *Jesu fili David, miserere mei.* Non placebit mundo, tumultuabuntur passionēs; perseverandum est, quia contra sensum eundum est. 3. *Pròjectò vestimentò suò exiit.* Projicienda est larva simulatæ vitæ, quæ te tegit, & in candore animi ambulandum.

3. *Jhesus dixit illi: Quid tibi vis faciam?* Bonitas Dei magna! sed perversa tua cœcitas, si quærendum à te sit: quid tibi velis fieri, & non potius cum indifferentia, & promptitudine quæras. *Domine, quid me vis facere?* Si videre nolis, quanto præstantius sit, te Dei voluntati adhærere, aut superiorum, quàm eorum voluntatem ad tuam flectere. Dic cum cœco: *Domine, ut videam voluntatem tuam;* quam, ubi vides, debes illuminatus eum sequi in via.

F E R I A IV.

Zachæus quærit Jesum videre.

1. *E*T ecce vir, nomine Zachæus; & hic Princeps erat Publicanorum, & ipse dives: & quærebas Jesum

Jesum videre, quis esset. Luc. 19. Mira, quia rara res, dives, & Princeps Publicanorum, desiderat videre Christum, sed motus instinctu Spiritus Sancti: ad quem instinctum quærebat. Ut videas non curiosum tantum, aut languidum fuisse desiderium, sed operativum. Scio, quod velis videre Jesum; sed non quæris: non adhibes constanter ea media, quæ huc faciunt. Miserum te, qui meris desideriis consumeris.

2. *Et non poterat præ turba, quia staturâ pusillus erat.* Ibidem. Duo hic habes, quæ te impediunt, quò minùs Deum perfecte videas, & ei propè jungaris. Primum est *turba*, seu tumultuantes tui affectus, & indomitæ passionēs animi, hæ, ubi te vis Deo applicare, te retundunt. Secundum est, pusillanimitas tua, quâ nec super illas emines, nec perrumpis. Agnosce ex te ipso, quàm hoc verum sit, ut cognitione hac ad eas opprimendas ducaris.

3. *Et præcurrens ascendit in arborem sicomorum, ut videret eum, quia inde erat transiturus.* Ibidem. Hic habes, quid agere debeas, ut Jesum videas. 1. Debes *præcurrere* turbam, assidua præmeditatione, & declinatione occasionum, quibus soles tuis passionibus obsequi. Laberis: quia, quid agas, non satis cogitas. 2. Debes te collocare cò loci, quò *Christus est transiturus*; id est, occasionem boni quærere, & amplecti. 3. Debes *ascendere sicomorum*, id est, *vanitatem sæculi vestigiò proterere*. S. Ambros. lib. 8. in Luc. Debes id non refugere, quod mundani censent stulticiam. Quid tibi ad hæc animi est.

F E R I A V.

Zachæus Christum excipit hospitio.

1. *S*uspiciens Jesus vidit illum, & dixit: Zachæe festinans descende; quia hodie in domo tua oportet me manere. Et festinans descendit, & excepit illum gaudens. Luc. 19. Non deerant plura Christo diversoria: Zachæi domum elegit, quia ille maximô ejus videndi tenebatur desiderio. Desideriô ergo nostrô trahitur maxime. Noli à desiderio remittere, etiam cum inveneris Christum; quia semper habes, quod quæras. Quidquid enim scias, & agas, semper plus est, quod nec scis, nec agis. Fructus desiderii est, quod Christus diverstat. Quomodo? oportet, quasi cum quadam necessitate, me manere: non transeunter divertere. Vellēsne hoc tibi evenire? Ergo accende in te desiderium Christi.

2. *S*tans autem Zachæus, jam generosus, & ad calcanda bona mundi resolutus: Dixit ad Dominum: Ecce dimidium bonorum meorum do pauperibus; & si quid aliquem defraudavi, reddo quadruplum. Ib. Quod fuit desiderium absentis Christi, migravit in amorem præsentis. Quasi non posset hic amor stare cum amore temporalium, statim horum contemptus secutus est. O quoties divertit ad te Christus, idem omnino, qui ad Zachæum! Et necdum fastidis tua commoda, & sensuum oblectamenta. Unde hoc? quia nec vivum habes Christi desiderium, nec amorem. Age, si erro, quibus operibus probas amorem?

3. *A*it Dominus ad eum: Quia hodie salus domui huic facta est. Euthymius hîc: Salus facta est ejecta perditione, quæ in ea morabatur. Audis, quod non antea fiat salus, quam ejiciatur perditio? Ex te

perditio tua. Os. 13. Non ergo antea salus, quàm tu à te ipso ejiciaris; nisi exturbas amorem excellentiæ, commoditatum, gloriæ. Si hæc mentituræ adhuc inhærent, longe es à salute: nec Christus in te inhabitat. Recede à te, & Christus, ac cum eo salus accedet ad te.

F E R I A VI.

Granum frumenti cadens in terram.

1. *N*isi granum frumenti cadens in terram mortuum fuerit, ipsum solum manet; si autem mortuum fuerit, multum fructum affert. Joan. 12. S. August. tract. 51. Seipsum Jesus dicebat: ipse erat granum mortificandum. Cecidit hoc granum in terram mortalitatis nostræ, mortificatum est per passionem & crucem. Fructum attulit salutem omnium prædestinatorum, & gratias reproborum. An & tu granum es in spica Ecclesiæ, aut Religionis, quæ ex illo grano prodiit? Debebis ergo fieri *panis Christi*, ut de de se agebat S. Ignatius Mart. Ergo debes trituri, ergo moli, ergo subigi, ergo in fornace multarum adversitatum excoqui. Non hoc ages, ac patieris, ut Christi panis efficiaris?

2. *Qui amat animam suam, perdet eam; & qui odit animam suam in hoc mundo, in vitam æternam custodit eam.* Ibid. Sensem de grano frumenti ad nos extendit, ut multum fructum feramus in vitam æternam. In qua tu classe es? amantium animam suam sensuali amore, an eam odio habentium, resistentium pravis appetitibus, & sensui nihil indulgentium? A te stat, ut hoc, aut illud eligas. At obsecro, non consule sensum, sed finem. Hic amantium est ibi perditio, & in æternum.

num. Veritas dixit. Hic mortificantium est ibi beatitudo æterna. Huc consilia dirige, quò creatus es.

3. *Si quis mihi ministrat, me sequatur.* Ibid. Ad eos sermo est, qui ministrant Christo in procuranda aliorum salute. Ab his *operum sequelam, ac imitationem exigit.* S. Chrysost. per viam solidæ mortificationis; quam cum suadere debeant omnibus, quos volunt in viam salutis adducere: necessarium est, ut & ipsi eam ambulent. Quid ergo tu agis? vis ministrare Christo, sed non vis mortificari. Si rei ipsius honestas, & Christi exemplum tibi hoc non persuadent, persuadeat præmium. *Ubi ego sum, illic & minister meus erit.*

S A B B A T H O.

Christus in Cruce exaltandus.

1. *E*Go si exaltatus fuero à terra. Joân. 12. Sermo est de exaltatione in Cruce. Suam ergo exaltationem, & gloriam constituit Christus in Crucis humilitate. Et nos *gloriarì oportet in Cruce Domini nostri Jesu Christi.* Gal. 6. Quàm vereor, ut tu gloriam tuam quæras non in confusione! sed in laude hominum, in plausu, in jactantia talentorum. Hoc verò est gloriæ Christi adversari. *Omnia traham ad me ipsum*, hoc est, meæ potestati subijciam. Per Crucem enim adeptus est Christus, *ut in nomine Jesu omne genu flectatur.* Philipp. 2. Scis, quare passionem tuam tibi non subijcias? quia non exaltaris à terra, non ascendis in crucem per calcatam superbiam. Posthac ergo *absit tibi gloriarì, nisi in Cruce Domini nostri Jesu Christi.*

2. Respondit ei turba : *Quomodo tu dicis : Oporret exaltari Filium hominis ? Quis es iste Filius hominis ?* Ibid. Hæc est ignorantia turbæ. Videt, & audit præsentem *Filium hominis*, & non agnoscit. Tu quidem ignorantiam similem non prodis verbis, sed factis. Offert se humilitatis occasio : audis interne monentem Deum : hic calca tuam superbiam. Respondet confusionis timor : erit alia occasio : non opus est hæc publicè fieri, &c. Tanquam Christus non esset in facie mundi suspensus. Merito ergo te reprehendat Christus : *Adbuc modicum lumen est in vobis*. Merito moneat : *Ambulate, dum lucem habetis*, licet modicam, quâ utendum est, ut ad maiorem pertingas.

3. *Cum autem tanta signafecisset coram eis*, turbis, non credebant in eum. Ibid. Vita prava, & corrupta adferebat impedimentum. Multa Christi dogmata intelligis mente, sed, quia pravi affectus aliò inclinant, facto non exprimis. *Veruntamen ex Principibus multi crediderunt in eum* ; quàm imperfecte ! Nam propter Phariseos non confitebantur, ut è Synagoga non ejicerentur. Quid non possunt humani respectus ? *Dilexerunt enim gloriam hominum magis, quàm gloriam Dei*. O pudor ! ne displiceas homini, eligis Deo displicere.

DOM. XXVII. POST PENTEC.

Ex lumine quisque suo judicabitur.

1. **E**GO Lux in mundum veni, ut omnis, qui credit in me, in tenebris non maneat. Joan. 12. Sedemus in tenebris intellectûs obfuscati, & in umbra mortis, quam nostræ faciunt concupiscentiæ. Offert se lux, ut inveniat nos. *Qui sequitur me, non ambulat in tenebris*. Joan. 8. Sed amamus magis tene-

tenebras. Unde? quia lux hæc non est otiosa, fides non sufficit mortua, sed operativa esse debet. Piget lucem semper se moventem, Christi virtutes sequi. Et semper ita? Ademptam corporis lucem ut recuperes, quid non ageres? tam parvi est tibi lux animæ?

2. *Qui spernit me, & non accipit verba mea, habet, qui iudicet eum. Sermo, quem locutus sum, ille iudicabit eum in novissimo.* Ibid. Absit, inquis, ut spernam Christum: immane hoc scelus: At non accipis verba ejus per inspirationes, & lumina, per regulas, per superiores tibi dicta. Atqui hoc ipsum est Christum spernere. Hæc *te iudicabunt in novissimo*. Dicetur enim: hoc lumen oppressisti, hanc admonitionem spreveristi, hanc regulam proculcasti. Vide ergo, ne, qui spernis, spernaris.

3. *Ego ex me ipso non sum locutus, sed, qui misit me, Pater, ipse mihi mandatum dedit, quid loquar.* Ibid. Quam felix in illa hora futurus es, si dicere possis; ex me ipso nihil locutus sum, nihil egi: sed omnia ex mandato Dei, vel superiorum. Sed hoc forte magis voves, quam præstes. Nihil agis ad invitationem sensûs? Nihil dicis ex passione? Hocne est agere; & loqui ex mandato Patris? Noli te supremô illô solatiô privare, quod nemo tibi alius dare, aut tollere potest, quam tu ipse,

F E R I A II.

De Ficu maledicta.

1. *M*anè revertens in civitatem, esuriit. Et videns fici arborem unam secus viam, venit ad eam, & nihil invenit in ea, nisi folia tantum. Matth.

21. In hac ficu te considera. Esurit Dominus

Cc 3

fru-

fructus operum tuorum ; quos , si ingenuus es , hoc ipso titulo reddere debes , quia ille esurit. Venit ad te per tot gratias , quas ad bene operandum impertit. Veniet per particulare iudicium in morte. Age , quos fructus pertulisti ? nihil invenit , quod sapiat ; Quâ delusisti homines , simulatio , & externa virtutis facies , fuerunt *folia tantum*. Vellēsne in illo iudicio ita fructuum vācuus inveniri ?

2. *Et ait illi : Nunquam ex te fructus nascatur in sempiternum* Ibid. Et quare ? quia tantum folia habet. Sed tamen *nondam erat tempus ficorum* , ait Marc. c. 11. Mystica est significatio. Si ab arbore extra fructuum tempus fructum requirit , tanto certius requireret à te in tempore reddendæ frugis. Et adhuc tempus negligis ? Occasiones præteris ? gratias dissipas ? Et folis contentus foliis simulas fraudulenter virtutem ? Non times illud ? *Maledictus , qui facit opus Dei fraudulenter*. Jerem. 48.

3. *Et arefacta est continuò ficulnea*. Ibid. Subtrahitò scilicet succò , quò aleretur. Hæc est eorum pœna , qui gratiis non respondent. Succus , quò alantur in fructus bonorum operum , sunt auxilia gratiæ ; hæc meritò subtrahuntur iis , qui non utuntur. Hi exsiccantur deserti gratia , sine qua certum est , non posse à nobis ullam opus meritorium fieri. Unde , qui noluerunt , cum poterant ; non poterunt , cum volent. Non satis hoc est , ut ad correspondendum gratiis te moveat ?

F E R I A III.

Parabola Vineæ elocatae.

1. **H**omo erat Paterfamilias (Deus) qui plantavit vineam. Matth. 21. Animam tuam , &
sepem

sepem circumdedit ei, mandatorum, ac regularum; & *fodit in ea torcular Sacramentorum*, ex quibus gratia fluit: *Et edificavit turrin*, sive providentiæ suæ, sive Angelicæ protectionis, sive superiorum vigilantæ, & *locavit eam agricolis*, tibi plantavit ergo te, qui creavit te, in spem fructus, ut Dominum Deum tuum laudes, & reverearis ei-que servias. At quem fructum dedisti? forte labruscas, & uvas fellis. Quoties dissipasti sepem? quoties *ferus aper*, seu depravatus affectus depastus est vineam? quæ reverentia tua in Sacramenta Sanguinis Christi? Quis respectus, & cura vigilantæ Divinæ, Angelicæ, Superiorum? Et tamen non tibi donata est hæc vinea, sed locata. Exigitur à te fructus; quid respondebis?

2. *Cum tempus fructuum appropinquasset, misit servos suos ad agricolas, ut acciperent fructus ejus.* Ibid. Quid fecerit Deus tibi, quid tu illi, exprimitur. Quoties *misit ille servos suos*, Concionatores, Superiores, internas inspirationes, monentes, ut fructum dares. At tu, sicut *Agricola apprehensis servis alium ceciderunt, alium occiderunt, alium lapidaverunt*; ita gratias in vanum accepimus, quibus noluisti cooperari, inspirationes extinxisti, admonitiones spreveristi. O bonitas Dei! O tua ingratitudo!

3. *Iterum misit alios servos, plures prioribus, & fecerunt illis similiter.* Ibid. Et quidem tertia vice. Habes perfectæ obedientiæ typum. S. Gregor. *Cum compertum haberent alios servos crudeliter caesos, cum tamen mittuntur, nec dubitant, nec rationes excusandi quærunt, sed imperata sine discussione perficiunt.* Nonne parem à te obedientiam status tuus exigit? Lege reg. 31. summarii. Estne talis tua obedientia?

F E R I A I V.

Unici Filii trucidatio.

1. **N**Ovissimè autem misit ad eos filium suum dicens : Verebuntur filium meum. Matth. 21. Post tot contemptas gratias poterat te Deus plectere. Sed usus misericordiâ , misit adhuc filium suum in viscera tua sub speciebus Eucharisticis , ut ejus te charitas accenderet , humiliatio deprimeret , crux , & passio ad mortificationis fructum dandum induceret. Debebas vereri filium Dei ; ejus doctrinam , & exempla amplecti. Sed quàm longè tu ab ejus vita abiisti ?

2. *Agricolæ autem videntes filium , dixerunt intra se : Hic est haeres , venite , occidamus eum.* Ibid. Quàm parùm reveriti sunt filium ! Neque tu magis , qui non es veritus peccare. *Ejecisti eum extra vineam , ubi locum dedisti peccato. Occidisti eum in temetipso , & sanguinem ejus indignè proculcâsti. Tu non es reveritus Filium Dei : reverebitur eum Pater , cum ad judicandum venerit , & Filii vulnera contra te perorabunt.*

3. *Cùm ergo veniret Dominus vineæ , quid faciet agricolis illis ; Ajunt illi : malos malè perdet.* Ibid. Quid aliud expectare poteras ex tam indigna Filii Dei tractatione ? sed misertus est tui Deus : Ne malè te perderet , eò te loci constituit , ubi te bene perdas per assiduam mortificationem. Hoc verò quam necessarium est tibi frænum , ne relabaris ? sed quàm facile illud excutis , & declinas ?

F E R I A V.

Nuptiæ Filii Regis.

1. **R**EX fecit nuptias filio suo , & misit servos suos vocare invitatos , & volebant venire. Matth. 22.
Pater

Pater æternus desponsavit Filium humanæ naturæ. Instruxit convivium Evangelicæ doctrinæ, & perfectionis. Ad hoc cum multis etiam te invitavit. Addixisti te venturum per susceptionem religiosi statûs. *Misit ergo servos suos* inspirationes sanctas, quæ dicerent tibi: *Prandium meum paravi*: occasio, quâ perfectioni studeas, in promptu est. Sed *neglexisti, abiisti in villam* pravorum affectuum, *iviisti in negotiationem* solationum à creaturis, spreveristi invitantes inspirationes. Advertis indignitatem?

2. *Rex autem iratus perdidit homicidas illos.* Ibid. Cur non misit alios, atque alios servos, ut superior Paterfamilias ad vineam: Cur statim iratus est, & perdidit illos? quia illic servi debitum exigebant, hic gratiam convivii offerebant. Apud Deum autem, ut insigne majestatis est, conferre gratias, ita crimen est læsæ majestatis contemptus gratiæ. Et quot tu gratias ejus contempsisti? Idem enim est contemnere, ac nolle cooperari. Ergo perdi meruisti. Misericordiæ Dei debes, quod ad te adhuc alios servos mittat, alias inspirationes, ac lumina. Vide, ut humanius excipias.

3. *Nuptiæ quidem paratæ sunt: sed, qui invitari erant, non fuerunt digni: Ite ergo ad exitus viarum, & quoscunque inveneritis, vocate ad nuptias.* Ib. Detrectasti hætenus convivium Evangelicæ perfectionis, seu tædio veniendi, seu difficultate te a terrenis abstrahendi. Indignè te egisse agnoscis. Pone ergo te ad exitus viarum tuarum, dico ad exitum vitæ. Consule mortem, quid suadeat? an eundem ad hoc convivium perfectionis? an negligendum? Accipe consilium. Quod tunc egisse desiderabis, nunc age. Serum tunc est desiderium.

F E R I A V I.

De homine non-vestito veste nuptiali.

1. *Intravit autem Rex, ut videret discumbentes, & vidit ibi hominem non vestitum veste nuptiali.* Matth. 22. Per vestem nuptialem intellige vitam, & mores statui conformes. Expende, an tui sint tales. *Et ait illi: cum indignatione: Amice, per ironiam; quomodo huc intrasti, non habens vestem nuptialem?* Non satis est apparere te religiosum; esse oportet moribus, & vitâ. Si Deus hoc momento ad examinandum te particulari iudicio evocaret, qualem, putas, inveniret? *At ille obmutuit.* Apud Deum nullam poteris excusationem prætexere: confusus obmutesces. At nunc, dum tempus habes, loquere deprecando, & vestem, quæ Domino placet, para.

2. *Tunc dixit Rex ministris: Ligatis manibus, & pedibus ejus, mittite eum in tenebras exteriores.* Ibid. Expellitur, ait Ambros. serm. de Nativ. *Quia cum peccator esset, sanctitatis sibi meritum vindicabat.* Non facile tolerat Deus in Religione eum, qui mores, & vitam Religioni non conformat. Certe, quod timeas, habes; si vita tua est alia. Etsi te latere in multitudine posse credas, Deus manifestabit abscondita. Etsi non ejiciaris à Religione, ejicieris à facie Dei, qui est lux vera, in tenebras, & cœcitatem mentis. Ligabuntur tibi manus, & pedes, ne opereris bene, laqueis tuarum affectionum. His enim plerumque stringitur, qui nimis laxus est.

3. *Multri sunt vocati, pauci verò electi.* Ibidem. Hoc est, quod te in timore tenere debet, & curam vocationis ingenerare, ut ei studeas satisfacere. Non ideo electus es, quia vocatus, vocari non

non est tuum, sed Dei gratia, etiam sinè præviam tua dispositione. At, ut elegaris ad gloriam, de tuo conferre debes. Sequere consilium Apostoli: *Sazagite, ut per bona opera certam vestram vocationem, & electionem faciatis.* 2. Petr. 1.

S A B B A T H O.

Quæstio de tributo Cæsari pendendo.

1. *M*agister, scimus, quia verax es, & viam Dei in veritate doces, & non est tibi cura de aliquo: non enim respicis personam hominum. Matth. 22. Verissima hæc Christi laus est. Utinam & tu citra adulationem hanc merereris; qui te Christum sequi profiteris. Esne verax tibi ipsi? non mentiris tibi bonum malum, & malum bonum? Tenésne viam Dei? viam mandatorum, & regularum? an vadis post vestigia sodalium, & passionum tuarum? Non est tibi cura de aliquo extra Deum? non de te ipso? Non respicis personam hominum? non huic adularis? illi te affricas? illum particulari amore amplecteris? Quam procul abes à laude Magistri tui malus discipulus!

2. *Quid tibi videtur? licet censum dare Cæsari, an non?* Ibid. Quæstio in verbis non mala: sed lateet in animis nequitia. Erat enim proponentium consilium, ut cum caperent in sermone. Ideo eos increpat: *Quid me tentatis hypocrite?* ostendens, quàm sibi displiceat dolus. Petit videre numisma: Exhibetur. Ait illis: *Cujus est imago hæc, & superscriptio?* Cujus es tu imago? Dei. Sed quàm deformis! Tu eam fecisti imaginem terreni hominis. *Tempus est, ut, sicut portasti imaginem terreni hominis, ita portes & imaginem cælestis.* 1. Cor. 15. *Reforma te ipsum, donec formetur Christus in te.* Gal. 4, & di-

& dicere possis. *Vivo ego, jam non ego; vivit verò in me Christus.* Gal. 2.

3. *Reddite ergo, quæ sunt Cæsaris, Cæsari, & quæ sunt Dei, Deo.* Ibid. Cuique suum reddendum. Dei es, quantus quantus es: corpus, anima, sensus, potentiæ omnes. Reddisne Deo corpus, & sensus tuos? uteris iis ad ejus gloriam, an ad tua commoda? Reddis animam cogitando, amando, ac timendo eum? an affectibus tuis serpis circa creaturas? Vide, quot titulis te Deo debeas: creavit te, redemit te, servavit te, vocavit te, tot beneficiis te cumulavit. Redde & proximo, quod debes, Charitatem. Est imago ejus, cujus tu; ab eodem creatus, eodem sanguine redemptus.

DOM. XXVIII. POST PENTEC.

De magno Charitatis mandato.

1. *Interrogavit eum unus Legis Doctor: Magister, quod est mandatum magnum; quod Deus præ omnibus requirit. Ait illi Jesus: Diliges Dominum Deum tuum ex toto corde tuo, &c. Hoc est maximum & primum mandatum.* Matth. 22. Intelligis? *primum*: ergo hinc incipiendum est: *maximum*: ergo hic terminandum est. Amor rex affectuum est, & primus motor; ergo huc omnes movere debet, & ipse rapi, tanquam in suum finem, extra quem nihil est amabile. Habuistine hoc præceptum tanquam *primum*, & *maximum*? Nihil unquam Deo prætulisti? O utinam! sit saltem posthac *primum* & *maximum* amare Deum. Quod probabis, si omnia ad ipsum dirigas; si nullam cordis partem tribuas amori creaturarum; si audebis cum Apostolo difficultatibus insultare: *Quis nos separabit à charitate?* Rom. 8.

2. Se-

2. *Secundum autem simile est huic : diliges proximum tuum , sicut te ipsum.* Ibid. Regula amandi proximum est quisque sibi. Nemo se fîctè , nemo non sincerè amat : nemo sibi vult malum , ne minimum quidem : nemo non sibi vult bonum , & inter bona optimum. Debes ergo amare non fîctè proximum ; amoliri , quoad potes , ab illo malum , curare bonum : nam & hoc mandatum magnum est. At proximus tuus , non est unus , sed omnes. Non debes ergo affectum ita uni affigere , ut aliis subtrahas.

3. *In his duobus mandatis universa lex pender , & Propheta.* Ibid. Motivum hîc habes diligendi Deum , & proximum. Observatio Legis absolutè tibi est necessaria. Nullam vis transgredi ? Ita quidem sperem à cordato homine. Ergo dilige : *Qui diligit , legem implevit.* Rom. 13. Huc ergo cogitationes , huc verba , & opera dirige , ut tota vita tua sit exercitium dilectionis.

F E R I A II.

Arguuntur Pharisei.

1. *S*uper cathedram Moysi sederunt Scribæ , & Pharisei. Omnia , quæ dixerint vobis , servate , & facite. Matth. 12. Etsi non bonus superior , at bonum imperium ; parendum est. Etsi malus Doctor , at sana doctrina , servanda est. Sed non insistendum exemplo. *Secundùm opera verò illorum nolite facere.* Nulla ergo tui est excusatio : superior ipse , qui fieri jubet , non facit. Ille de se , tu de te rationem reddes. *Dicunt enim , & non faciunt.* Absit hoc à te. Bene dicere non est clav's ad cœlum , sed bene facere. Non , quid dixeris , quæretur ; sed , quid egeris. Quàm turpe est docere virtutem verbô , & factô doctrinam suam improbare.

2. *Omnia*

2. *Omnia verò opera sua faciunt, ut videantur ab hominibus?* Ibid. Alterum, quæ in Pharisæis carpit, vitium est, quod æstimari & laudari quærant ab hominibus: his si placeant, sibi satisfaciunt: *Amant primos recubitus, & primas cathedras, & salutationes in foro*, ac publicam honoris delationem. Hæc si assequantur, in cælo sunt. Non ita tu, qui vis servus Dei esse. Certum est illud Apostoli: *Si hominibus placerem, servus Dei non essem.* Gal. i. Non potest Deo non displicere, qui nimium studet hominibus placere. Fac, te impetrâsse, ut placeas: *mercedem recepisti.* Ergo in hunc fumum laborâsti.

3. *Væ vobis Scribæ, & Pharisæi, quia similes estis sepulchris dealbatis, quæ aforis patent hominibus speciosa, intus verò plena sunt ossibus mortuorum, & omni spurcizia.* Ibid. Tertium hoc est vitium, quod arguitur, simulatio sanctitatis. Ubi ficta est virtus, ibi sunt certò vera vitia. Nihil prodest, imò plurimum obest apparere, si non subsit esse. Deus non aspicit, quis appareas, sed, quis sis. Talis apud Deum es, qualis in animo, & conscientia. Ab illo pro æternitate judicaberis, non ab hominibus.

F E R I A III.

Prædictio desolationis.

1. **C**um videritis abominationem desolationis stantem in loco sancto excisi templi Hierosolymitani: qui legit, intelligat. Matth. 24. Intellige, quod tu sis templum Dei, quod immineat tibi desolatio per mortem. Dissolvetur enim templum hoc. Intellige, quid agendum antea, ne pericliteris. Frustra enim tunc voles, cum non poteris. *Qui in Judæa sunt, fugiant ad montes. Es in populo electo:*
ut tunc

ut tunc securus sis , nunc fuge ad montem , qui Christus est , ut eum imiteris. Qui *in tecto* es excelsæ virtutis , *non descende* ad humilia sæcularium. S. Hilar. Qui *in agro* Christi plantatus es , non *revertere* unquam *tollere tunicam* veteris conversationis. Quam tutus tunc eris , si nunc iste agas ?

2. *Væ autem* *prægnantibus in illis diebus*. Ibidem. Supremus ille dies semper instat : fortè iste est. Væ tibi , si usque in illum prægnans es. Plenus bonis desideriis , & antea ea paris in actum. Quid nunc boni concipis , statim pariendum est : quia tunc non erit tempus. *Orate autem , ut non fiat fuga vestra in hyeme*. Provide , ut non superveniat tibi mors , dum friges in obsequio Dei. *Vel in Sabbatho* , dum ferias agis , & in socordia vivis. Hæc omni tibi hora curanda sunt , quia nulla hora vacat periculô.

3. *Erit enim tunc tribulatio magna , qualis non fuit ab initio mundi*. Ibid. Intellige improvidis , & tepidis , qui distulerunt in illud tempus agere , quô amplius non licet. Torquebitur luctâ suprema corpus , sed multo magis conscientia. Vivacius tunc intelliges bonum , & malum. Sarcinam tuam majorem reperies , quam unquam existimaveris , &c. Ergo ut tribulationem effugas , nunc age , quod tunc actum voles : nunc cave , quod tunc cavisse desiderabis. Mortem de agendis consule , sed & consilium audi.

F E R I A IV.

Vigilandum ad Adventum Domini.

1. *Vigilate , quia nescitis , quâ horâ Dominus vester venturus sit*. Matth 24. Prudenter semper metues , quod certo veniet , nescis quando. Quid si ante

si ante paucos annos venisset Dominus, qualem te reperisset? Quid si h c moment  veniret? quid velles fecisse? Quid si scires, post horam venturum, quid ageres? Quod agendum statueres, illud age, quia forte veniet. Ideo occulta est tibi illa hora, ut omnem habeas suspectam.

2. *Beatus ille servus, quem, c m venerit Dominus ejus, invenerit sic facientem.* Ibidem. Tanti est vigilare, ut   sola vigilantia Dominus pronunciet servum beatum. Vigilanti non irrepit fur, qui parta tollat. Non pr terit boni occasio, quam non arripiat. Dic ipse: Ubi Deo attendisti, admisistine vel levissimam culpam? an uni pravo appetitui cessisti? nonne omni occasione in bonum usus? At nonne hoc ipsum est esse beatum, ita vivere, ut macul  careas? *Beatus vir, qui inventus est sine macula.* Eccl. 31.

3. *Si autem dixerit malus servus ille.* Ibid. Bono ac vigilanti servo malum oppone; qui dicit in corde suo: *Moram facit Dominus meus venire*: qui in tepore suo cogitat, adhuc superesse tempus, qu  ferventer agat. O miser! *Veniet Dominus illius in die, qu  non sperat.* Quis tunc ejus timor: qu  trepidatio? Quid si *manducet, & bibat laxando frenum concupiscibili*? Credo, non velles talis deprehendi. Ergo esto paratus. At nunquam eris satis paratus, nisi sis semper paratus.

F E R I A V.

Parabola decem Virginum.

1. *Simile est regnum c lorum decem Virginibus, qu  accipientes lampades suas, exierunt obviam sponso, & spons .* Matth. 25. Et h c parabola ad vigilantiam monet. Omnes fuerunt virgines, omnes

omnes acceperunt lampades, omnes exierunt obviam, omnes moram faciente sponso dormitaverunt. Et tamen quinque erant fatuæ, quinque prudentes. Sed non omnes sumpserunt oleum secum. Ideo illæ prudentes, quæ sumpserant oleum in vasis suis. Fi-des lampas est, sed non sufficit. Imprudens es, si non etiam oleum charitatis accipis, & ea media, quæ te coram Sponso Deo securum reddant, ne lampas extinguatur: *nam fides sine operibus mortua est.* Jac. 2.

2. *Media autem nocte clamor factus est: Ecce sponsus venit.* Ibid. Venit, cum minimè cogitamus, Dominus. Tunc surrexerunt omnes virgines, & ornaverunt lampades suas. Quæ omnium sollicitudo? quia coram sponso comparandum erat. Tunc fatuæ errorem suum viderunt, quod oleum deficeret bonorum operum. Sed serum nimis est tunc velle incipere, cum desinendum est. *Fatuæ autem sapientibus dixerunt: date nobis de oleo vestro; sed frustra, aliena opera tibi non proderunt, ubi retribuitur unicuique secundum opera sua.* Putas, non doluisse fatuas; solatiò plenas fuisse prudentes? In quarum sorte desideras esse, earum sollicitudinem assume.

3. *Et quæ paratæ erant, intraverunt cum eo ad nuptias.* Ibid. Non quæ primò ibant ad vendentes, seu quæ differunt se parare. Periculum salutis subit, qui differt media. Præstitisse oportet antea, quæ sunt salutis, non tunc velle. *Novissimè veniunt reliquæ dicentes: Domine, Domine aperi nobis.* Sed pulchra verba nihil juvant, ubi pensantur opera. Non prodest tunc verbis profiteri Dominum, quem in vita factis negaveris. Ergo tunc, dum sunt dies salutis, dum tempus acceptabile, insistendum est bono. Adhuc enim

porta patet. *At ille respondens ait: Amen dico vobis, nescio vos.* Hoc fulmen olim time, si nunc Deum non noscas, & secundum quod cognoveris, ei non servias.

F E R I A VI.

Parabola de talentis.

1. **H**omo peregrè proficiscens vocavit servos suos, & tradidit illis bona sua. Matth. 25. Etiam hæc parabola præparationem suadet. Dedit uni quinque, alteri duo, tertio unum talentum: *Unicuique secundum propriam virtutem.* Cogita, quæ accepisti à Deo, talenta corporis, animæ, naturæ, gratiæ. Non tuæ res sunt, sed Dei. Parum tibi videris accepisse? Deus ad tuam virtutem mensuravit. De paucio rationem reddes. Plus accepisse tibi damno fuisset. Quo fine tibi data sunt? ut negotieris: *Negotiamini, dum venio.* Luc. 19. Perit Domino lucrum, quod non facis. Non potes ergo aliter uti, quam Deus velit: & tamen fecisti. Quid faceres servo, qui pecuniâ tuâ ad sua commoda, & voluptates uteretur? vide, an non tu sis talis.

2. *Post multum verò temporis venit Dominus servorum illorum, & posuit cum eis rationem.* Ibid. Eam & tecum inibit; forte non post multum temporis. Et accedens, qui quinque talenta acceperat, obtulit alia quinque: similiter, qui duo, alia duo. Lucrum fecerunt ad proportionem talenti. Uterque vocatur servus bonus & fidelis. Uterque invitatur in gaudium Domini sui. Non prævalet ergo apud Deum, qui plus accepit. Deus enim usum talentorum, & gratiarum spectat, non cumulum. Non fuisset vocatus bonus, & fidelis, qui quinque

que acceperat, si tantum duo lucratus fuisset. Ita Deus nullam gratiam vult esse vacuum. Ergo assidue tibi curandum est, ut nullam gratiam in vacuum recipias. Hic verò esto vigilans.

3. *Qui unum talentum acceperat, ait: Domine scio, quia homo durus es: & timens abii, & abscondi talentum tuum in terra: Ecce habes, quod tuum est. Ib. Non perdidit talentum, sed servavit. Cur ergo reprehenditur? Serve male, & piger. Quia non est negotiatus, non fecit lucrum, quod Dominus requirebat. Unicum ergo talentum neglectum ita castigat Deus? Quid respondebis, qui tot milia defodisti in terram, gratis tibi ad lucrum cœlestium concessis ad terrena, ad sensus commoda abutendo? Ergo nunc tandem ita rebus tuis invigila, ut audire merearis: Euge serve bone, & fidelis, intra in gaudium Domini tui.*

S A B B A T H O.

De extremo Judicio.

1. *C*um venerit Filius hominis in Majestate sua, & omnes Angeli cum eo, tunc sedebit super sedem Majestatis suæ. Matth. 25. En Judicem illum, quem habuisti hætenus advocatam apud Patrem: illum, in quem confixerunt peccatores: illum, quem contempnisti. Et congregabuntur ante eum omnes gentes. En judicandorum multitudinem, in qua & tu eris. Et statuet oves à dextris suis: hædos autem à sinistris. En diversam judicandorum conditionem. Quis in his pavor, & trepidatio? Quod in illis animi solatium, & gaudium? Et quæ erunt a dextris? Oves, quæ ductum, & vocem pastoris sunt secutæ. Et qui a sinistris? Hædi, qui concupiscentiis suis servierunt. O Deus! quan-

D d a

tum.

tumcunque vis , pone me hîc à sinistris , ut ibi collocer ad dextram.

2. *Tunc dicet his , qui à dextris erunt : Venite benedicti Patris mei , possidete paratum vobis regnum.* Ibid. Prius bonos ad præmium vocat , quàm reprobos damnet : quia paratior est semper ad benefaciendum. S. Chrysost. in Imperf. Hoc enim secundum naturam agit : pœnas invitus infligit. Quàm suavis accidet hæc justis sententia ? Desideras , & tu illam audire ? Operibus impetrabis. Hæc allegat Judex : *Esurivi , & dedistis mihi manducare . &c.* Sinè his in vanum speras. Ergo , *Quod potest manus tua , instanter operare.* Nec parva negligè : quia nihil est tam parvum , quod vestitum charitate in Deum , ibi non evadat regnô æternô dignum.

3. *Tunc dicet his , qui à sinistris erunt : Discèdite.* Ibid. O quale tonitru in auribus eorum ! *A me Quale fulmen ! Deo in æternum carere. Maledicti.* Qualis dolor , Deo in æternum exosos esse ! *In ignem æternum !* Qualis desperatio , in æternum pœnâ sensûs torqueri : *Qui paratus est diabolo à me , à te autem tibi.* Qualis cruciatus æternum cum dæmonibus habitare ! Et quæ tam horrendæ sententiæ causâ ? *Esurivi , & non dedistis mihi manducare , &c.* Opera non præstitistis ? quæ exigebam : egistis , quæ vetabam. O Deus ! *hîc ure , hîc seca , modò in æternum parcas.* O æternitas ! æternitas ! *quàm amara est memoria tua !*

F I N I S.

AD MAJOREM DEI GLORIAM.

MAG 2012332

